

擘經室集

一一

Ac
149
J8
Y46
V. 11
擘經室三集卷四

重修表忠觀記

錢塘表忠觀宋熙寧十年趙清獻公請於朝始建於
龍山吳越文穆忠獻兩王墓側使錢氏之孫爲道士
曰自然者居此以修護之理宗時官給田三百畝以
旌舊功元至元初遇兵燹觀墓俱毀明正德閒遂爲
江尙書兆域嘉靖三十九年總督都御史胡宗憲巡
按御史周斯盛布政使胡堯臣按察使胡松提學使
范惟一以靈芝廢寺故址遷建新觀卽吳越時故苑
在湧金門外今所重修之地也當時有武肅十九世



孫德洪自餘姚來守此觀飭俎豆輯譜牒湖山靈爽
神實憑依春秋肸蠁爲最盛焉崇禎中都御史熊飛
復修輯之

國朝康熙四十四年

聖祖仁皇帝南巡

賜保障江山額雍正四年

世宗憲皇帝敕加封爲誠應武肅王今

皇帝六次南巡屢

駐蹕凡五

賜宸章褒功述事且

命有司以時致祭蓋自忠懿宋初納土以來未有食
報增榮如今日者也今武肅裔孫璋棡等以廟宇少
頽呈請有司修葺於是巡撫吉公慶布政使張公朝
縉鹽運使阿公林保各出俸錢命知杭州府李公亨
特董修之增建碑亭左右六間畫廊三十間正殿基
培高三尺易墜垣以甃石重肖五王像設計費白金
三千四百兩有奇又增給銀六百兩置鹽運司庫發
商榷子母爲歲修之費藏事于乾隆六十年元以是
年冬奉

命督學浙江入觀展拜樂觀厥成爰以重修落成命

十一府士子賦詩紀事凡得詩千有餘篇極一時之盛擇其佳者付武肅裔孫泳錄之泳從金匱來寓此庀材樹石實始終其事卽爲元述此大畧屬爲記且自以隸古書丹刻石者也

嘉慶九年重濬杭城水利記

杭州水利自古重之今之省城南北十里東西五里爲長方形西湖居其西湖水入城有三路一湧金水門居正西一湧金旱門環帶溝居西少南一清波門底流福溝居西南流福溝自清波門外學士港導水入流福寺溝入城由街底伏流出府西青龍庵經府

南面自東折而北過府學運司東至杜于橋環帶溝
水西來會之東過紅門局三橋址折而北至定安橋
湧金水門之水西來會之入滿營城八字橋分爲二
一東出滿營過衆安橋入小河至中河一西過龍翔
宮至丁家橋折而北出滿營城過臬司西至回龍橋
折而東由觀橋入小河過金箔橋入中河中河匯各
水南行至新宮橋其金箔橋之下有藩司東

行宮前之太平溝水來會之太平溝水亦自三橋址
分流而南者也中河過新宮橋又至撫院西分爲二
一出鳳山水門東行城外北折至候潮門外之永昌

壩一由通江過軍二橋出候潮水門至永昌壩入城
河又至會安壩達東新關至海寧州是水凡三折貫
通城內外數十里南至閘口北至武林門外汲濯舟
楫皆賴之乃數十年來未加濬治惟湧金水門尙通
湖水其環帶溝微通涓滴流福溝塞久矣且運司河
三橋址數里高淤滿營河亦淺阻每遇大雨水城內
泛濫司府縣署刺舟而入居民多臥水中府縣獄以
桔槔出水獄多瘐囚下河中河之水反致淺濁無來
源水利若此當治乎不當治乎甲子春予首捐廉俸
官士商亦各出資計銀四千八百餘兩計開廣學士

港十五丈六尺自學士港流福溝至三橋址掘土四千七百九十四方自三橋址北至滿城南過藩司東行宮前之太平溝金箔橋通江橋過軍橋慶豐關等處掘土四千六百五十一方由是清波門首受湖水清清泠泠入流福溝過運司前會環帶溝至三橋址會湧金水門水入滿營城暢通無泛濫之苦藩司前諸山水亦入太平溝暢流無阻其西之湧金西南之清波正南之興隆西北之聖塘澗水石函六閘設金木水火土五牖板視西湖水盛衰增減啟閉委其事於杭州水利通判專掌之兩縣主簿運司經歷分司

之院司府縣督察之別具文案以備考自茲以後每歲十一月濬治一次毋減工毋累民是役也杭州人候銓同知邱基知水之理身任其事經營十閱月工乃畢刻碑記之并刻圖于記文之後且載捐銀人名于碑陰置碑于吳山海會寺是寺也爲祈謝晴雨長官共集之地庶幾共覽而知勿久而廢塞焉嘉慶十年上元日記

南宋淳熙貴池尤氏本文選序

元幼爲文選學而壯未能精熟其理然訛文脫字時時校及之昔但得元張伯顏明晉府諸本卽以爲祕

冊嘉慶丁卯始從昭文吳氏易得南宋尤延之本爲
無上古冊矣按是冊宋孝宗淳熙八年辛丑無錫尤
延之在貴池學官所刻世謂之淳熙本每半葉十行
每行大字廿一二小字廿一二三四不一惜原板間
有漫漶其修板至理宗景定間止卷二八葉及卷九
十九葉書口並有景定壬戌重刊木記可見其中佳
處卽以脫文而論如東京賦上下通情注宋本卷三十五下
毛本脫言君情通於下臣情達於上故能國家安而
君臣歡樂也廿二字又重舌之人九譯注宋本卷三廿八下
毛本脫韓詩外傳至獻白雉于周公廿三字秋興賦

天晃朗以彌高兮注

宋本卷十三六上

毛本脫杜篤至高明

廿字

以上毛初刻本脫後得宋本改

思元賦行頗僻而獲志兮注

宋本

卷十五

毛本脫蕭該音至廣雅曰陂邪也卅五字陸

士衡答賈長淵詩我求明德注下

宋本卷廿四十七上

毛本脫

正文魯侯戾止八字注文卅二字七發客見太子有

悅色下

宋本卷卅四九下

毛本脫數百字諸如此類不勝枚

舉其中異文如蜀都賦千廡萬室

宋本卷四二十下

晉府本

毛本室改屋則與上下文出術等字不韻矣羽獵賦

群娛乎其中

宋本卷八廿三上

翻張本晉府本毛本娛改嬉

則與漢書楊子雲傳不合矣宋書謝靈運傳論莫不

寄言上德注引老子德經宋本卷五翻張本晉府本

毛本並作道德經不知德經二字見陸氏經典釋文

及禮記正義也吳都賦趨材悍肚注引胡非子宋本五卷

五上毛本胡改韓不知胡非乃墨子弟子見漢隋史

志也騷下山鬼篇采三秀兮于山間宋本卷卅三○三上注文

三秀上晉府本毛本增逸曰二字此沿六臣本之舊

崇賢本不當有也永明九年策秀才文自萌俗澆弛

宋本卷卅六上及齊故安樂昭王碑文緝熙萌庶宋本卷五十九

八下翻張本晉府本毛本萌改氓然古書多作萌也

亦非他本之所可及元人張正卿翻刻是書行款一

切頗得其模範第書中字句同異未能及此若翻張本及晉府諸刻改其行款更同自鄮矣惜是冊缺第四十一四十二兩卷近人卽以正卿本補入雖非完書實亦希世珍也此冊在明曾藏吳縣王氏長洲文氏常熟毛氏本朝則句容苴氏泰興季氏昭文潘氏以至吳氏獨怪冊中皆有汲古閣印而毛板訛脫甚多豈槧板後始獲此本未及校改耶元家居揚州舊城文樓巷卽隋曹憲故里李崇賢所由傳文選學而爲選注者也元旣構文選樓于家廟旁繼得此冊藏之樓中別爲校勘記以貽學者裝訂旣成因序于卷

首

送楊忠愍公墨蹟歸焦山記

楊忠愍公墨蹟一卷共五幅一爲開煤山記一爲謫
所苦陰雨述懷詩一爲哀商中丞詩一爲元旦有感
詩一爲與王繼津書此卷本藏謝東墅少宰壩師家
師嗣壽紳庶常恭銘以贈梁山舟侍講同書侍講不

欲全畱之但割存與王繼津一書而返其四有跋記
事與翁覃溪閣學方綱跋并存卷中庶常以元撰少

宰墓銘故以此卷贈元元却之不許藏數年欲歸之
焦山故於卷中鈐以官印尙未致送也焦山仰止軒

者明天啟間建奉忠愍木主舊在水晶菴今圯無存

嘉慶丁卯僧秋屏

覺證

請改立忠愍公主于焦隱菴

後屋中元稍葺新之重題木扁且邀翠屏洲詩人王

柳邨

豫

歸之焦山軒中此夙願也明嘉靖壬子忠愍

約唐荆川至焦山詩云楊子懷人渡揚子椒山無意

合焦山姜如須先生

垓

仰止軒詩云六義風流今不

滅十行疏草未全焚原因報國成忠愍翻似完身傍

隱君今卷中詩文并存仰止軒舊與漢隱菴遠今軒

在菴後似姜先生詩豫爲今日兆者二公忠義之氣

與江山共千古茲與漢定陶鼎同置方丈固其宜也

又元藏宋嘉定元至順寫本鎮江府志二部乃張木

青學士

熹

所贈其閒舊聞古蹟甚多極可寶貴乃謀

之鎮江人無冒瑛之者今亦附忠愍卷同付秋屏暨

其師借庵

巨超

兩詩僧世守之如摹刻墨蹟鈔寫志

書祇可在山爲之勿令俗夫持去也嗟夫卷帙之藏

昔人比之雲烟過眼若賢忠之遺蹟史志之文獻固

未可等量之惟是子孫少不肖非飽蟬蠹卽歸鬻失

平泉艸木能終不與人哉世家祕閣之藏不如名山

僧寮之寄較然明矣茲送卷歸山事元作記存之拙

集中且當代賢卿名士亦多題詠載之各集海內其

知爲焦山之物若他日有不肖僧徒以此貢之他人之手陳之几庋之架人皆能說所從來而賤之恐世閒無此僨父也

焦山仰止軒記

明嘉靖壬子楊忠愍公與唐荆川先生約同至焦山忠愍詩有云楊子懷人渡揚子椒山無意合焦山天啟閒郡守于水晶庵後建仰止軒奉忠愍木主今已圯矣漢隱庵者舊祀漢焦孝然先生其後軒甚虛敞余與寺僧覺鑑丹徒王君豫議以後軒名仰止軒加以修葺立忠愍木主祀之又余舊藏忠愍墨蹟五紙

其一卷久爲墨林所重因鈐以官印跋而歸之軒中
王君亦以所藏忠愍文集板同置軒中庶幾忠烈之
氣與江山共千古矣同奉主至焦山者甘泉陳本禮
黃金余之弟亨子常生并題名栞石後金匱錢泳書

連理王樹堂壽詩序

辛未夏元在京師得表叔江王華先生書知由歙來
揚州應其弟吉雲表叔之招也古人偶一相思千里
命駕況此連牀奚間風雨至情至性骨肉之恩在焉
是可感已元童時遊橙里舅祖之庭舅祖文詞名家
素持禮法閨門以內旣和且肅先生以孝謹著于時

吉雲先生爲先生幼弟先生教之友愛備至吉雲先生亦事兄彌悌至于今蓋三十餘年矣歲丙寅先生于歙村老屋建小軒三楹題曰知還實有戀鄉里返素朴之志乃由揚歸居于歙又恐吉雲先生或失故步將去揚而志四方也故題揚州老屋曰畱雲閣以寓意于今蓋亦五年矣中間先生來揚州者再今且壽七十吉雲先生總鹺務不克歸歙省其兄乃復迎兄至揚將慰離思偁壽觴兄弟之間怡怡然如此先生幼讀書工詩善楷法惠定宇厲樊榭沈學子諸先生皆曾館于家先生習染所及聞見深遠履蹈儒術

沈潛書史不衣華服不食兼味遠聲色而淡貨利又其壯年涉歷江湖追隨定省施濟貧困蔭陟甚廣垂橐而歸蕭然寒素迨去江淮紛華之區依祠墓耕讀之地却埽課子若將終身常作招隱詩以示弟然則先生生平行誼可以概見矣昔諸葛武侯有契于淮南子澹泊凝靜之旨擬之先生豈爲過哉連理王樹堂者揚州康山之麓有二王蘭樹交柯連理而生元舅祖鶴亭先生所居也吉雲先生旣爲鶴亭方伯後于先生雖出爲從弟而情誼彌篤無異鶴亭橙里兩先生之相友愛也連理之木古人以爲嘉應故在漢

碑中爲圖刻之最古者論語曰君子務本又謂孝弟
乃爲仁之本本之不立枝葉尙不能榮況連理乎斯
樹之生蓋有所應爰繪爲圖以徵戚友之詩元文詞
鄙拙不足表揚惟是幼年受知于先生最早撫之無
異子姪故知先生亦最深用記顛末以爲序焉

晚鐘山房記

杭之淨慈寺所謂南屏晚鐘也昔江少司馬蘭讀書
寺中寺西南牆外隙地司馬構屋數楹北嚮外環以
廊中奉佛象嘉慶八年秋余過揚州司馬語余曰此
屋未圯耶吾遠祖吳越侍御有德于浙曷設斯主余

曰六一泉三堂余已遷主數百矣是屋也禮亦宜之
九年春司馬治河赴淮北江君鴻江君士相以資來
葺新之于屋西建樓一楹可望西湖余名其屋曰晚
鐘山房樓曰屏山樓于屋之背立一龕設吳越侍御
史充鎮海軍節度判官江公景房栗主以

皇清誥授中議大夫兩浙江南都轉鹽運使江公承

玠 誥授光祿大夫 賜布政使銜江公春 誥贈

光祿大夫兵部左侍郎江公進 誥授中議大夫候

選知府江公昉四主從之侍御名景房字漢臣吳越

常山人宋太平興國初吳越納土時充鎮海軍節度

判官奉版籍歸宋吳越賦重畝增三斗有奇民病之
侍御沈其籍于河以罪自劾幸免于誅後王方贊奏
定賦畝一斗浙東西十三州民受其德賦減于王沈
籍實始于江事見元張樞所譏沈籍記及宋史王珪
傳以六一泉遺愛堂之例準之是主固宜設也轉運
使侍御二十六代孫也雍正元年以戶部郎中出知
嘉興台州二府用朱子舊法修台州太平水利擢鹽
運使輸資修海塘有惠于商士齊次風侍郎公所植
士隸書院稱弟子焉方伯贈少司馬太守皆侍御二
十七代孫贈公以子蘭貴贈如其官今修山房江君

鴻者轉運之孫太守子爲方伯後者也士相者贈公之孫少司馬弟之子也修山房設主旣畢遂書石記之俾浙人知侍御史之主所由來他日江氏子孫往來揚歙者入山房而拜焉不亦宜乎

鄭氏得墓圖跋

吾郡鄭氏世篤忠義明東里先生諱之彥生四子元嗣元勳元化俠如元勳卽職方公明季以守城說高傑事被訛言遇害元化子爲虹守浦城死節明史有傳俠如後人修休園志于雙忠事畧不少及并官職亦畧之殊無識也職方事實見李清王心湛杭世駿

所撰三傳而杭傳爲最詳核余與職方裔孫新甫孝廉星北茂才同里相友茂才寄得墓圖屬題案圖職方公孫諱嵩者記云甲申職方遇害諸子皆幼公執友率其僕舁柩渡江遠葬遂逸其墓爰奉父遺命訪之于江南句容穿長林而東至鄧家邊潘姓邨遇一老者自言尙及見葬事并能指其處但在溪山爲虎穴久矣詰朝募徒歛槨兵仗渡溪踰嶺遂達墓所斷碑猶在時康熙四十九年也載展遺圖敬此忠孝得墓之事可補諸傳所未及又余舊藏職方畫山水一幅各傳亦未言其善畫也并舉此畫歸之茂才以此

爲先忠手澤可寶也

碧紗籠石刻跋

王敬公之才之遇豈閤黎所能預識爲之紗籠亦至矣而猶以詩愧之徧哉敬公相業誠有可譏然其濬揚州大渠利轉運以鹽鐵濟軍國之用亦不爲無功坡公詩以閤黎爲具眼亦過激之論也古木蘭院僧心平屬書碧紗籠扁遂論之如此

二老重逢圖跋

朱竹垞鄭寒邨兩先生爲老友寒邨元孫勲持竹垞贈寒邨詩墨蹟索題余旣和詩且書二老堂扁俾勲

奉二先生矣勲復屬友繪二老重逢圖蓋取竹垞詩
別久重逢轉傾倒之句爲此是時嘉慶三年秋七月
勲以薦舉孝廉方正寓吳山讀書朱氏元孫萊墨林
等亦將來赴省試相與拜此圖下舊家世澤百年未
艾是可慕也

錢塘嚴氏京邸祖墓圖記

錢塘嚴氏厚民^杰之四世五世兩代祖墓在今京城
永定門外當明嘉靖時有宦于京者葬于此也此後
子孫在明有內官京卿外官布按者在我
朝有官侍郎總督倉場者皆得近祭之子孫以試事

選官入京者亦皆祭之嘉慶辛未壬申間厚民從余在京師每朔望必展其墓親以土崇其封復恐後人迷失之乃畫圖多幀肖其地形分藏族人之家且屬元以小記記之其用心追遠良云厚矣墓在永定門外劉家窯之北南向有碑窯在七聖庵之東三里許庵舊名安樂禪院近在永定門外里許墓之東南曰九聖庵東北曰濮家莊西北曰李家村高廟在墓東北二里許墓後負城城中月皇臺可望而見也至于祖墓祖祠之在杭者厚民又積筆耕之資買田以爲完糧祭埽之用厚民敬宗孝祖之義可以風矣

顧亭林先生肇域志跋

明末諸儒多畱心經世之務顧亭林先生所著有天下郡國利病書及肇域志故世之推亭林者以爲經濟勝於經史然天下政治隨時措宜史志縣志可變通而不可拘泥觀日知錄所論已或有矯枉過中之處若其見於設施果百利無一弊歟四庫書提要論亭林之學經史爲長此至論未可爲腐儒道此肇域志稿本未成之書其志願所規畫者甚大而方輿紀要實已括之亭林生長離亂奔走戎馬閱書數萬卷手不輟錄觀此帙密行細書無一筆率畧始歎古人

精力過人志趣遠大世之習科條而無學術守章句而無經世之具者皆未足與於此也

浮屠說

佛之教始於後漢盛於晉魏然自西晉以前則皆稱曰浮屠或稱爲佛圖佛陀雖音同字異而字必相連在華音爲疊韻未嘗但割上一字單稱爲佛也說文佛字訓爲見不審毛詩論語曲禮學記荀子之佛字皆絕無西域神人之說後漢書楚王英傳喜黃老學爲浮屠齋戒詔曰楚王尙浮屠之仁祠又桓帝紀曰桓帝設華蓋以祠浮屠老子使當日苟單稱爲佛則

詔書曷不稱佛而稱浮屠也其稱佛者始于後漢書

西域傳明帝夢見金人羣臣或曰

魏收魏書以爲傳
毅所對傳毅本傳

無此西方神名曰佛此一節未可深據蓋蔚宗爲宋

人宋時始有佛之稱蔚宗以晉宋以後之恒言改漢

之舊語也魏收魏書釋老志曰張騫還始聞天竺有

浮屠之教哀帝時博士弟子口授浮屠經明帝寫浮

屠遺範又得佛經四十二章緘于蘭臺石室桓帝時

襄楷言佛佗黃老以諫魏明帝徙宮西佛圖洛中白

馬寺盛飾佛圖浮屠正號曰佛佗佛佗與浮圖聲相

近皆西方言其來轉爲二音華言譯之則謂淨覺按

魏收此志所言甚明蓋佛圖二字必相連乃成文其
譯爲淨覺也何字爲淨何字爲覺或必相連或可倒
轉未可知也而乃但割其上一字單稱爲佛訓爲覺
是浮屠爲教本兼淨覺二義而今但一義蓋非其本
矣袁宏曰佛者漢言覺竊謂單稱浮屠爲佛當始于晉宋之間
北朝亦當在魏秦之際故石勒時尙稱澄爲佛圖澄
至鳩摩羅什譯經始稱爲佛殆中國文士所改非蘭
臺舊經本單稱佛也又魏書中沙門卽桑門桑門二
字切音爲僧僧字不古亦晉宋人所造也

六合縣冶山祇洹寺攷

嘉慶十二年余在揚州入西山酒城拜外祖林榮祿
公墓冶山者更在西數十里遂登之山多鐵可拾而
鎔也冶山之勢自西北棠山來西北東三面皆迴抱
而虛其中有二泉自山中出匯爲溪南流注於江其
東南之峰下方而上銳有石脈出其下起爲岡脊南
延數里爲原田實爲溪之東岸一在原上曰上陳莊
別有下陳莊更在其南莊西向溪經其前溪之外有近山山皆
卑迤邐相接至西南桂子山而止實爲溪之西岸立
於莊之前西望近山之外復有青色遠山山形正方
如屏與莊相對夕陽落山外時嵐黛更濃矣冶山泉

石潏迴水木清湛非郡城所有之境也山口有祇洹寺寺屋十數楹甚荒陋無舊碑記可讀然可少憩焉十四年冬余重入翰林檢永樂大典見宋紹熙儀真志載唐開元二十三年六合令房翰祇洹寺碑文凡千餘言碑稱此寺吳始爲象塔梁以地若祇洹遂以爲名宋國公鎮吳州建寺隋皇爲晉王時立白樓隋末焚壞唐開元重建且有座飛萬鶴門結千龍影殿香臺雕甍繡柱三百間邃宇十八變雲圖諸語然則此寺最古唐時且甚壯麗矣又碑云八百人遂以名村然則上陳莊卽稱之爲祇洹村也亦可爰攷而記

之以告遊斯山者

重訂天台山方外志要序

余自束髮受書誦孫興公天台山賦慨然如聞金石
聲嘉慶丁巳奉

命督學浙江按部至台旣竣事遊山中荀輿數十里
出入泉石雲霞閒飄然有出塵之思夜宿方廣寺寺
在石梁之上飛瀑自枕邊瀉落如驚風凍雨終夜有
聲次日曉發遇雨飛流百道動與人足相交午下天
姥山憩清涼寺登仙遺俗非徒太白之夢吟也嘉慶
己未復以巡撫來浙中以防海事時往來其閒然碌

碌道途不遑遊覽所謂一行作吏此事遂廢矣今夏
山中各寺僧以松江陳通判韶所錄方外志求序於
余台山之有專志始於元之無名氏其書世已罕觀
方外志則明高明寺僧無盡所撰也錢希言嘗稱其
學識高出道流所撰山志甚有禪藻云初乾隆丁亥
僧化霖請於齊息園先生刪益無盡書爲四冊刻板
行於世然體例旣不協一繁蕪猥雜疑其爲未定之
稿今通判取而訂之其用心勤矣元又命錢塘嚴生
杰修訂之嚴生云錄藝文過繁山水寺觀反如附錄
宜倣宋范氏成大吳郡志例分隸各門以合比事屬

詞之義從之書成釋靈在繪圖二十有一靈在住此
山中所繪或得其真面目亦從之列於卷首

蔗查集序

宋寶祐廢城在今揚州城北唐宋以來之舊城也通
池已夷峻隅又頽興廢之感當與明遠同之今揚城
亦繁富遊人舟楫所到僅在平山一隅若廢城之古
木蘭院諸處非詩人逸客覓句訪古無遊蹟矣木蘭
院卽唐王播題詩處今名惠照寺寺有大鍊鑊二又
有古銀杏七八株綠陰夏滿黃葉秋零極閑淨荒寒
之趣已故詩僧誦茗者舊居寺中所爲詩清微雋永

警悟脫俗予曩輯淮海英靈集竟未得誦茗詩入錄
是余疎漏之咎也誦茗弟子圓燦以其師蔗查集示
余余乃序其詩集并槩之以廣其傳圓燦亦能詩善
畫圓燦務致佳弟子能文字禪者主此古院庶不墮
誦茗之教也

聖經室三集卷四終

擘經室三集卷五

紀文達公集序

我

朝賢俊蔚興人文鬱茂鴻才碩學肩比踵接至於貫
徹儒籍旁通百家修率情性津逮後學則河間紀文
達公足以當之夫山川之靈篤生偉人恒間世一出
河間獻縣在漢爲獻王封國史稱獻王修學好古實
事求是所得書皆古文先秦舊書被服儒術六藝具
舉對三雍獻雅樂答詔策文約指明學者宗之後二
千餘年而公生其地起家甲科厯躋清要

高宗純皇帝命輯四庫全書公總其成凡六經傳注之得失諸史記載之異同子集之支分派別罔不抉奧提綱溯源徹委所撰定總目提要多至萬餘種考古必衷諸是持論務得其平光

稽古之聖治傳於無窮準諸獻王之寫定周官尚書禮禮記孟子老子厥功尤茂焉

國家舉大典禮恭進頌冊恭和

聖製

御製諸作皆從心所發雍容掄揚有穆如之風公受兩朝知遇有所疏奏皆平徹閒雅爲對揚軌儀請試

士子春秋文以左氏傳立論輔以公羊穀梁二傳而廢胡氏傳尤爲有功經學他所著撰體物披文不襲時俗所爲詩直而不伉婉而不佻抒寫性靈醞釀深厚未嘗規撫前人罔不與古相合蓋公鑒於文家得失者深矣公著述甚富不自哀集故多散佚公之孫香林員外勤爲搜輯者數年得詩文集十六卷梓以行世屬序於元元以科名出公門生門下初入都公見元所撰書稱許之自入詞館聞公議論益詳蓋公之學在於辨漢宋儒術之是非析詩文流派之正僞主持風會非公不能至於此集雖非公所自勒然亦

足以覘全量矣

王文端公文集校本跋

王文端師詩文不自以爲重蓋公所重在立朝風節也公薨後公子埵時收羅雜稿寄至江西屬元編刻之元乃手編爲葆淳堂集若干卷又訂成年譜一卷付之梓梓成元匆匆移河南爰以板寄閩是時公子已出守閩郡矣板中誤字頗多同門友李許齋廣芸手校一過改補之此李公手校本也故跋之

凌母王太孺人壽詩序

吾友凌次仲官寧國教授明年太孺人壽八十有一

將稱觴於學齋以書來屬元爲文書諸屏元與次仲
交久且深凡以詩爲壽者元固宜序其事矣次仲長
元七年合志同方誼若兄弟以故知太孺人最悉太
孺人姓王氏海州舊族次仲嘗謂元曰昔先君子以
依親戚自歛客海州娶太孺人某兄弟實生於是焉
某六齡而孤兄年二十有六貧不能自給太孺人鬻
簪珥使就塾師讀書麤記名姓而已少長習賈于市
往往爲人所紿太孺人曰汝爲賈而恥與人爭利恐
難成宜從事于學然學非蘄爲博士弟子之謂也必
通經立行爲古之儒焉且獨學無友則孤陋而寡聞

吾有汝兄侍養汝其游四方就師友以成之於是次仲乃挾書出游博通經史善屬文尤精三禮及推步之學乾隆辛丑與元訂交於揚州問學相長各期束身修行少有所表見於世以無忝所生未幾次仲入都翁覃溪先生奇其才教以制舉業勉之應試遂以己酉庚戌兩榜成進士次仲例選知縣投牒吏部改教授以奉母是時天下識與不識無不重次仲之學行者嗟乎次仲生東海僻陋之鄉非太孺人勗之以游則鬱鬱與駟僧老矣烏能顯名於天下哉癸丑元奉

命視學山東詣熱河

行在元與次仲同爲王韓城朱大興兩公所得士時
次仲寓韓城公直廬元往別焉公於座中謂之曰吾
不能強子改冷官子願之甚善且吾亦嘗爲此然非
耐貧不可也今次仲之貧如故而循陔致養閉戶著
書其志趣爲何如太孺人怡然安之其德教又何如
也至於疇昔砥厲之言尙冀始終無負他日太孺人
登期頤上壽元當躋堂賦詩爲諸交游倡焉

里堂學算記序

數爲六藝之一而廣其用則天地之綱紀羣倫之統

系也天與星辰之高遠非數無以效其靈地域之廣輪非數無以步其極世事之糾紛繁頤非數無以提其要通天地人之道曰儒孰謂儒者而可以不知數乎自漢以來如許商劉歆鄭康成賈逵何休韋昭杜預虞喜劉焯劉炫之徒或步天路而有驗於時或著算術而傳之於後凡在儒林類能爲算後之學者喜空談而不務實學薄藝事而不爲其學始衰降及明代寢以益微閒有一二士大夫畱心此事而言測圓者不知天元習回回法者不知最高謬誤相仍莫能是正步算之道或幾乎息矣我國家稽古右文昌

明數學

聖祖仁皇帝御製數理精蘊

高宗純皇帝欽定儀象考成諸編研極理數綜貫天人鴻文寶典日月昭垂固度越乎軒轅隸首而上之

以故海內爲學之士甄明度數洞曉幾何者後先輩

出專門名家則有若吳江王晁闇

錫闡

淄川薛儀甫

鳳祚

宣城梅徵君

文鼎

儒者兼長則有若吳縣惠學

士

士奇

婺源江慎修

永

休寧戴庶常

震

莫不各有譔

述流布人間蓋我朝算學之盛實往古所未有也

江都焦君里堂與元同居北湖之濱少同遊長同學

里堂湛澹經學長於三禮而於推步數術尤獨有心
得比輯其所著加減乘除釋八卷天元一釋二卷釋
弧三卷釋橢一卷總而錄之名里堂學算記書成而
屬元序之元思天文算學至今日而大備而談西學
者輒詆古法爲舛疏不足道于是中西兩家遂多異
同之論然元嘗稽考算氏之遺文汎覽歐邏之述作
而知夫中之與西枝條雖分而本幹則一也如地爲
圓體則曾子十篇中已言之七政各有本天與邈萌
日月不附天體之說相合月食入於地景與張衡蔽
於地之說不別熊三拔簡平儀說寓渾於平而崔靈

恩已立義以渾蓋爲一矣的谷四方行測朔蒙氣反
光之差而姜岌已云地有游氣蒙蒙四合矣然則中
之與西不同者其名而同者其實乃彊生畛域安所
習而毀所不見何其陋歟里堂會通兩家之長不主
一偏之見於古法穿穴十經研求三數而折中乎劉
氏徽之注九章西法隨事立說闡其隱祕而日月五
星之果有小輪與夫日月五星本天之果爲橢圓與
不則存而不論昔蔡中郎撰十意未竟上言欲思惟
精意扶以文義潤以道術著成篇章今里堂之說算
不屑屑舉夫數而數之精意無不包簡而不遺典而

有則所謂扶以文義潤以道術者非邪然則里堂是
記固將以爲儒流之典要備六藝之篇籍者矣元少
略涉斯學心鈍不能入深且以供職中外斯事遂廢
今見里堂成此書敬且樂焉吾鄉通天文算學者
國朝以來惟泰州陳編修厚耀最精今里堂之學似
有過之無不及也

舊言堂集後序

昔陸士衡觀才士之所作而得其用心良以用心之
地觀之實難靈均以降大同以前昭明觀之可謂審
矣自茲以降李唐趙宋文體變遷士衡昭明非能逆

覩者也學者身處近代遙隔前徽享其所素習屏其所未知執以一端蔽夫衆體何其陋也吾師烏程孫松友先生學博文雄尤深選學摯虞劉勰心志實同夫且上溯初唐下沿南宋百家書集體裁所分古人用心靡不觀覽是以濡墨灑翰兼擅衆長不泥古而弃今不矜今而廢古曩撰四六叢語二十篇各窮源委冠以敘文學者誦習得研指趣今哲嗣復哀刻殘稿爲舊言堂集四卷諸所擬議咸具茲篇又其古今體詩托跡中唐衷以風雅文家能事亦備於斯元籍列門生舊被教澤凡師心力所詣略能仰見一二謹

爲後序以諗文家

綠天書舍存草序

裴山錢中丞幼勤于學工於文孝于節母余丙午歲入京師蚤相友善己酉同榜成進士入翰林登堂拜母益相愛重泊余出使在外裴山直軍機相見爲稀及裴山亦出撫粵楚遂不相見矣中間以詩相酬和者頗多彼此半逸其稿庚午辛未間

天子方重用之而裴山遽以病卒

天子傷悼故於飾終之典有加焉裴山有一女曰德容程太夫人慎于擇壻松相國譽余子祐于太夫人

太夫人旣見祐甚愛之曰吾早識雲臺雲臺與吾子
善且祐致佳遂締姻焉太夫人手一囊付祐之母曰
此亡兒之詩需雲臺訂之余受而讀之始見裴山前
後數十年詩筆之全其詩風格清超性情縝密粹然
想見其爲人裴山將母至勤而不鹽于王事可謂
泰山之竹冉冉孤生朝陽之桐萋萋盡力者矣余旣
爲作傳復刪存其詩編爲六卷刊于廣州畀其嗣子
承志俾世守之嗟乎人生聚散心跡奚可預計哉當
丙午丁未間余與裴山居京師嘗共乘敝車以文藝
相示俄爲翰林曷嘗有一言及于外省官又曷嘗有

一言及于兒女子乃二十七年而裴山卒又四年而太夫人卒嗚呼一星後曙古人所哀微雲抹山賤子何忝書成醉酒悲從中來存歿之情結于涕泗矣嘉慶歲戊寅十月序于羚羊峽舟中

孫蓮水春雨樓詩序

上元孫君蓮水之詩蓋出于隨園而善學隨園者也蓮水從隨園游奉其所論所授者以爲詩而本之以性情擴之以游歷以故爲隨園所深賞有一代清才之目而蓮水亦動必曰隨園吾師也不敢少昧所從來謂蓮水之詩非出于隨園不可然隨園之才力大

矣門徑廣矣有醇而肆者亦有未醇而肆者使學之者不善益其所肆者而肆焉以爲出于隨園而隨園不受也卽不敢肆其詞而遺其醇焉以爲出于隨園而隨園亦不受也吾觀蓮水之爲詩清麗有則唐人正軌也且不苟作不多作意必新警語必遒峭一字未安吟想累日所以性情正而詞氣醇與其肆于詩之外無寧有所蓄於詩之中吾固曰此唐人正軌而善學隨園者也乾隆乙卯春予識蓮水于歷下同爲蓬萊觀海之遊嘉慶己未冬又同爲武林之遊詩中蹤跡略可見壬戌夏五蓮水歸秣陵訂春雨樓詩爲

書數語于卷首秣陵山水清麗而壯予不見之久矣
今春雨樓中詩境相似爲掩卷凝思者久之

福謹案蓮水名韶

華陔草堂書義序

今平湖令尹嘉定李同年許齋早年以經術名於江
南及從錢辛楣前輩遊盡得其學經史文辭披華櫛
實六書九數靡不綜覽乾隆丙午秋朱石君師典試
江南合經策以精博求士於是平湖以第四人中式
元以第八人中式相見于春明性情學術契若兄弟
也庚戌石君師總裁會試會元旣定擬之曰此似江

南李許齋及揭曉拆封自第六人始平湖寔第六人
大嗟訝繼拆第一人乃歛朱蒼楣文翰蓋蒼楣亦以
經史爲根抵兼工漢晉古文酷似平湖者吾師之所
以取士吾友之所以受知皆於書義中具見全量然
則平湖之全量不可以書義盡之實可於書義見之
矣平湖事母孝出爲孝豐德清平湖三縣令以潔白
養政聲聞都下毛詩序曰南陔孝子相戒以養也白
華孝子之潔白也斯文有焉且讀斯文者當知寓經
疏史志于明人法律之中爲近時獨闢之徑未可以
尋常程式比也

王柳邨種竹軒詩序

予昔聞翠屏洲王君名久矣歲丙寅丁卯間相遇于揚州讀所著詩驚異之心爲之下旣乃爲翠屏洲之遊洲在焦山北岸桃柳數萬株襍之以竹人跡罕至江潮到門置詩人於此間安得不異於是相與選訂本朝詩集于曲江亭上此江蘇詩徵所由昉也此後予馳驅南北別數年復以癸酉春相會于楊子江上同訂詩徵已四千餘家王君復出柳邨詩選屬序之予軍艘轉運畢迴舟泊高明寺夜雨瀟瀟春鐙搖熠讀是詩至子夜歎其體裁正情性真才雄氣靜將擬

之古人其靖節耶明遠耶正字摩詰耶嘉州蘇州耶
抑子美太白耶將母同復於晚唐後擬之無相似者
夫乃歎其洵有異于時俗之所爲也王君身處蓬茅
名滿海內布衣而老必爲傳人是集亟當刻板以貽
同志王君子名屋年尙幼已工詩有佳製曷附錄數
詩于集後以誌家學

邗上集序

元曩輯淮海英靈集揚州圖經翻閱各家詩集于邗
上事蹟特詳未嘗不歎風氣人物園池觴詠每藉當
時名家別集疊見側出掩卷凝想如將見之明代

國初不具論近年馬氏玲瓏山館材力非甚饒健也
徒以聚書好客扶助風雅迄今家貧書散而故宅瓏
瓏一石猶得歌于松嵐觀察詩集中餘可知矣觀察
工詩善書甲子乙丑間僑居揚州勒所得詩爲一卷
曰邗上集體格蘊藉如漁陽在揚州時相遇之客則
有若吳穀人胡西庚洪稚存方子雲王惕甫樂蓮裳
諸君子遊讌之地則有若篠園康山休園白沙翠竹
江村各園亭相主之人則有若沈旣堂江子屏楊竹
廬江文叔諸舊家詩之以邗上而得歟抑邗上之得
人詩也余故幸邗上不甚陋尙得屢見于各家之詩

甚且以此專勒集名也

福案觀察劉大觀聊城人

惜陰日記序

漢書云脩學好古實事求是後儒之自遁于虛而爭是非于不可究詰之境也豈河間獻王竟逆料而知之乎我

朝儒者束身脩行好古敏求不立門戶不涉二氏似有合于實事求是之教仁和宋氏咸熙潛修力學丙辰丁巳間助予纂集經詁在精舍中爲前一輩學者嘉慶辛未入都以所著惜陰日記相質其間考訂經史古籍皆據實以求是非沈篤澹雅之才能若是乎

存素堂詩續集序

時帆先生詩前集元爲之刊於杭州收入靈隱書藏
後集未校刻而先生卒先生子中書桂馨以稿寄江
西屬訂而桂馨又卒迴憶二十餘年交誼傷悼不已
念先生具良史才主持詩派衷于雅正足爲後學之
式平生學問交游敦篤靡已元雖勞于積牘感先生
之誼亟爲校閱付刻其年譜一卷乃先生子錄寄雜
稿敘成者亦加刪定附于續集之首

福案時帆翰林
學士法式善

是程堂集序

予於浙西見文筆三人曰陳白雲曰查伯揆曰屠孟

昭白雲文筆清古拔俗伯揆則宏麗矣孟昭學于白雲而友于伯揆故其風骨文采出于其間年雖少而波瀾老成三人皆館閣才也乃白雲以進士授知縣伯揆不願舉進士以舉人就知縣孟昭成進士入翰林矣復改知縣所治之縣各著循聲是天將使其循良之政早及于民不徒以文學掩壯年歲月也儀徵吾邑也地處大江之濱北接淮河繁劇難治孟昭領此邑裕如也邑累于稅孟昭自除之邑有難獄孟昭力斷之邑民貧且惰孟昭以木棉蠶桑耕織爲教而民化之邑有鹽梟日益橫孟昭聚武士擒治之民間

頌聲日騰達聞于遠方其政成矣而其文筆復哀然
成集知不以政廢其學且其所以爲學者卽其所以
爲政也余早識孟昭之才與學于吳山讀書之時余
雖抗顏然今邑民也知其循政親切不誣茲序其集
在于甲戌自今以往政績文學懋勉益上者當與年
俱進烏得以此百里地十四卷書衡量之耶

福案孟昭名倬

徐雪廬白鵠山房集序

昔張楊園先生幼孤貧受業于其母母召之曰孔孟
祇兩家無父兒也是以旣長而得戢山之傳自古孤
根危露得母節激厲而成其學者多矣豈非席豐者

易淪于草木貞苦者可勒于金石哉武康徐雪廬孝廉予昔一覽而異其才旣而屢試之知其幼被賢母苦節之教是以行誼文筆卓然有成其詩矢正音而持雅裁清遠峻潔不移于俗駢體文得齊梁初唐之遺交遊旣廣乃莫不知爲賢母之子克自樹立無忝所生者予昔所以試雪廬者在文筆茲序其集豈在文筆哉東廣微補詩曰白華朱萼被于幽薄予爲雪廬誦之

福案雪廬名熊飛

郭書屏鶴井集序

余在浙與守令言民事無暇言詩文然守令中有學

者未嘗不知之鄞縣令郭君可典

文誌

其人也鄞爲

海疆劇於海寇郭君拊之多循聲郭君閩中進士予
每令其鞫海中閩盜悉知其鄉語以故鞫盜甚多得
其情無酷枉者余考績卓異薦之其先爲海上汎舟
之役近乃奉總督檄采銅於滇夫渤海之大昆池之
遙極其遊矣所爲詩爾雅真摯實事求是亦足以紀
其所遊鵬之所搏鵬之所徙乃可以擬之鸛井云乎
哉

靈芬館二集詩序

靈均之騷類性體物無所不有唐宋人詩各成流派

卽以爲同出于騷亦無不可吾讀靈芬館詩二集而
益有悟于此吳江郭君頻伽矐而清如鶴如玉白一
睂與余相識于定香亭上其爲詩也自抒其情與事
而靈氣滿天奇香撲地不屑屑求肖于流派殆淡于
騷者乎或惜其久試未第惟以文得名予曰不然新
舊唐書列傳夥矣全唐人詩亦夥矣予未見繙讀唐
書之人多于繙讀全唐人詩之人也然則亦各蘄至
于不朽滅而已矣何惜焉郭君廣涉歷喜交游山川
芳草所助者實多所爲古文辭雅潔與麗有古人法
度所填蘅夢詞浮睂樓詞清婉穎異具宋人正音卓

然名家久爲王蘭泉吳穀人諸先生所推重殆亦乞
靈于騷而揚其清芬者歟

福案頻伽名麀

畫舫錄序

揚州畫舫錄十八卷儀徵李君艾塘所著也揚州府
治在江淮間土沃風淳會達殷振

翠華南巡

恩澤稠疊士日以文民日以富艾塘于是綜蜀岡平
山堂諸名勝園亭寺觀風土人物仿水經注之例分
其地而載之以上方寺至長春橋爲草河錄以便益
門爲新城北錄以北門爲舊城北錄以南門爲城南

錄小東門爲小秦淮錄分虹桥外爲虹桥上下東西
四錄分蓮花橋外爲岡東錄岡西錄蜀岡錄共十六
卷別紀工段營造錄舫扁錄二卷凡郡縣志及汪光
祿應庚平山堂志程太史夢星平山堂小志趙轉運
之璧平山堂圖志所未載者咸紀於此或有以楊銜
之孟元老之書擬之者元謂楊孟追述往事此錄則
目覩

昇平也或有疑其采及瑣事俗談者元謂長安志敘
及坊市第宅平江紀事兼及仙鬼詠諧俗諺此史家
與小說家所以相通也且艾塘爲此垂二十年考索

于志乘碑版咨詢于故老通人采訪于舟人市賈其
裁製在雅俗之間洵爲深合古書體例者元受讀而
服其善因序其略俾知吾鄉承

國家重熙累洽之恩始能臻此盛也

福謹案李君名斗

王竹所詞序

詞人之作小令以五代十國爲宗守其派者有晏氏
父子歐陽公張先秦觀賀鑄毛滂諸人慢曲以清真
白石爲宗沿其流者有吳文英張炎盧祖臯高觀國
王沂孫周密蔣捷陳允衡諸人自元明以來傳染草
堂結習而花閒集樂府雅詞絕妙好詞諸書之遺意

莫或窺尋無怪乎詞學之不振也王子竹所淡於詞
三十年前卽以之名大江南北茲復手自刪訂埽去
骯髒從俗之作其所存者小令則寓穠纖於簡厚慢
曲乃如溪流瀟風波紋自行而冷光翠色一望演漾
不可盡蓋於四聲二十八調中獨得唐宋人精髓淡
於此者乃知其爲必傳也

福案竹所名
初桐太倉人

羣雅集序

昔歸愚宗伯訂別裁集謂王新城執嚴滄浪之意選
唐賢三昧集而于少陵鯨魚碧海或未之及此宗伯
獨親風雅之旨其實新城但于三昧集持此論耳其

裁僞體與宗伯固無岐趣也近今詩家輩出選錄亦繁終以宗伯去淫濫以歸雅正爲正宗與其出奇標異于古人之外無寧守此近雅者爲不悖于三百篇之旨也丹徒王君柳邨之論詩也以宗伯爲歸近日數大家聲氣炫赫之時王君獨去之若挽抱殘守拙以爲吾恐其言之或非雅也以故伏處大江金焦兩山之北渚而交遊亦幾徧于海內用是著錄

國朝別裁以後諸家之詩積成卷秩名之曰羣雅集卽以歸愚宗伯居首雖爲先輩友人錄其著作而編詩大指亦卽在是蓋已汎濫于宋元諸家及明嘉隆

前後之蹊徑門戶而折衷而得所歸焉又何慮近時
門逕之少有出入者乎王君以未定之草示元屬元
爲序元將入

觀馬首戒途肉遽未徧讀而其大旨已得覽之乃爲
之序

重刻宋本太平御覽敘

太平御覽一書成于太平興國八年北宋初古藉未
亡其所引秦漢以來之書多至一千六百九十餘種
考其書傳于今者十不存二三焉然則存御覽一書
卽存秦漢以來佚書千餘種矣洵宇宙間不可少之

古籍也惜世所行者自明人刻本外鮮有善冊吳門黃蕘圃主事有刊本三百六十六卷乃前明文淵閣宋刻殘本又五百廿卷亦依宋鑄所抄其餘缺卷並從各家舊抄過錄予乙丑丙寅間在雷塘庵取明黃正色本屬友人密加膽校知黃本顛倒脫落至不可讀與明活字板相似其偏旁之訛更無論矣且彼本妄據彼時流傳經藉憑臆擅改不知古書文義深奧與後世判然不同淺學者見爲誤而改之不知所改者反誤矣或其間實有宋本脫誤者但使改動一字卽不能存宋本之真不能見重于後世故余所膽校

者以全依宋本不改一字爲主今此刻本又皆全依
余所校者付梓且精校再三不滋舛脫足使藝林僂
快後世委心古籍古人皆藉是更垂不朽矣

郝戶部山海經牋疏序

左傳稱禹鑄鼎象物使民知神姦禹鼎不可見今山
海經或其遺象歟漢書藝文志列山海經于形法家
後漢書王景傳明帝賜景山海經河渠書以治河然
則是經爲山川輿地有功世道之古書非語怪也且
與此經相出入者則有如逸周書王會楚辭天問莊
子爾雅神農本草諸書司馬子長于山經怪物不敢

言之史家立法之嚴固宜耳然上古地天尚通人神相雜山澤未烈非此書末由知已郭景純注於訓詁地理未甚精徹然晉人之言已爲近古吳氏廣注徵引雖博而失之蕪穢畢氏校本于山川考校甚精而訂正文字尙多疎略今郝氏究心是經加以賡疏精而不鑿博而不濫粲然畢著斐然成章余覽而嘉之爲之桱板以傳郝氏名懿行字蘭皋山東棲霞人戶部主事余己未總裁會試從經義中識拔實學士也家貧行修爲學益力所著尙有爾雅疏諸書蘭皋妻王安人字瑞王亦治經史與蘭皋共著書于車鹿春

庶之間所著有詩經小記列女傳注諸書于此經疏並多校正之力亦可尙異之也

宋本附圖列女傳跋

此圖當分別觀之余嘗見唐人臨顧愷之列女傳圖長卷其中衣冠人物與此圖皆同若衛靈公所坐之低屏漆室女所倚之木柱顧圖中皆有之絕相似否則誰能畫柱爲枯株之形也觀其宮室樹石如孟母圖中書院之類或有宋人所增然卽此尙可見宋屋之形至于人物鐙扇之類定爲晉人之筆無疑且恐晉人尙本于漢屏風也

杭州紫陽書院觀瀾樓記

康熙四十二年浙江鹽法道高公熊徵創建紫陽書院於杭州省城紫陽山下有詩十二章分詠其地今之聽事北向者爲樂育堂堂後高屋三楹拾級乃登者爲五雲深處折而東有池廣一畝湛然清深曰春草池池上水閣南向今名凌虛者曰南宮舫東向者曰簪花閣池南有山如重巘山之空明處皆南宋人所抉剔曰別有天曰尋詩徑曰巢翠亭曰螺泉曰鸚鵡石曰筆架峰曰垂釣磯鸚鵡石側之校經亭爲元所建山之最上者曰看潮臺臺久圯嘉慶八年都察

院巡鹽使者延公因書院生徒日多附課者皆給以膏火之資席不敷坐乃建高樓五楹以冠此山移樂育堂朱子栗主祀於樓下祀魁星於樓上藉爲生徒藏修息游之地本孟子之義名之曰觀瀾樓斯樓處山之顛俯視城市萬屋鱗次長江如帶環曲於外若其風日流麗波濤不驚越山清遠澄流東下有足觀者又若潮汐自海疊騰駕而來雲馳雷動震疊心神發皇耳目更有足觀者然則學者觀瀾之術可知矣觀于海者難爲水游聖門者難爲言聖言莫大於孔子海濶莫大於浙江善乎趙岐之言曰所覽大者意

大觀小者志小朱子之言聖道大而有本學者漸乃能至生徒之登斯樓者莫不志於大道成章乃達教生徒以學者亦將操此術於盈科之流水以觀之矣使者名延豐滿洲人家世甲科卹商愛士使浙四年多惠政書院院長王君名宗炎蕭山進士深於經術學行醇厚生徒三百二十有八人董斯工者教官楊秉初丁治時五月朔甲午

諸城劉氏族譜序

禹貢曰海岱惟青州諸城在漢爲琅邪郡今屬青州故乾隆二十一年宰相劉文清公以翰林視學安徽

賜詩有曰海岱高門第也嘉慶十九年諸城劉氏共修族譜成以前明宏治由碭山遷諸城之祖爲始祖迨今三百二十餘年傳十四代列表者八百二十一人誌其祠墓記其遷徙井然秩然何其慎也劉氏之望二十有五漢唐以來將相名人不可勝數今諸城譜謂碭山以上不可稽不妄推世系又何慎也唐書宰相世系表以宰相著其姓今諸城文正文清兩公非徒爲宰相且爲賢宰相天下仰之族譜不因宰相而修而賢相更足立族譜之望嗚呼此聖翰所以特許爲海岱高門第也烏有

先帝已推高門第而猶不本老泉族譜序意亢宗睦族奠系分房者乎是譜之修非止世家之乘且裨國史之表誠不可緩于今日矣元爲文正公門生門下之士文清公亦爲館師今大司農又同榜進士也大司農以譜屬元爲序元不敢辭敬書大義僭附卷末云爾

岱頂重獲秦刻石殘字跋

泰山秦李斯石刻屢存二十九字乾隆初年碧霞宮火石失世間拓本最可寶貴故余以舊拓本合漢延熹華山碑同摹刻于揚州北湖也嘉慶二十年前任

泰安縣常熟蔣君

因培

在岱頂王女池水中搜得殘

石二尙存斯臣去疾昧死臣請矣臣十字新揭清朗如故洵爲快事後之攬者當有感焉

葵考

葵爲百菜之主古人恒食之詩幽風周禮醢人儀禮諸篇春秋左氏傳及秦漢書傳皆恒見之尔雅于恒食之菜不釋其名爲其人人皆知也故不釋韭蔥之名而但曰藿山韭蒼山蔥尔雅不釋葵其曰菹葵芹葵戎葵蔞葵皆葵類非正葵亦韭蔥之例也六朝人尙恒食葵故齊民要術載種葵術甚詳鮑昭葵賦亦

有豚耳鴨掌之喻唐宋以後食者漸少今人直不食此菜亦無知此菜者矣然則今爲何菜耶曰古人之葵卽今人所種金錢紫花之葵俗名錢兒淑氣卽蜀葵二

字吳人轉聲

者以花爲玩不以葉充食也今之葵花有四

種一向日葵高丈許夏日開黃花大徑尺一蜀葵高四五尺四五月開各色花大如杯此二葵之葉皆粗澀有毛不滑不可食惟金錢紫花葵及秋葵葉可食而金錢紫花葵尤肥厚而滑乃爲古之正葵此花高不過二尺許花紫色單瓣大如錢葉雖有五歧而多駢誠有如鮑明遠所謂鴨掌者異于秋葵之葉大多

歧不駢如鶴爪也齊民要術稱葵菜花紫今金錢葵
花皆紫無二色不似蜀葵具各色秋葵色淡黃也左
傳云葵猶能衛其足杜預注云葵傾葉向日以蔽其
根曹植表云若葵藿之傾葉太陽雖不爲之迴光然
向之者誠也王篇云葵葉向日不令照其根此皆言
葵之葉能衛其根卽葛藟庇本根之義非言其花向
日自轉也藿爲豆葉豆之花亦豈向日而轉哉予嘗
鋤地半畝種金錢紫花之葵翦其葉以油烹食之滑
而肥味甚美南中地暖春夏秋冬皆可采食大畧須
地肥而葉嫩大如錢乃甘滑儀禮士虞禮稱之曰滑

者以此又余嘗登泰山其懸崖窮谷曲磴幽石之間
無處無金錢紫花之葵皆山中自生非人所種山中
人采其葉烹食之但瘦耳然則世人雖久不食之而
名山古地尚有畱存者矣說文云藿豆之少也余嘗
種豆采其葉苗食之味亦美葵葉之味與藿正相似
益可知古人葵藿並舉之義秋葵葉嫩時亦可食但
此與葵性相近終非正葵葵之花開于夏此則至秋
始開其葉不能四時常可種食耳

化州橘記

按志橘紅出化州者佳化州四鄉多橘以城內者爲

佳城內多橘矣以及聞州衙譙鼓者爲致佳及聞鼓之橘多矣以衙內蘇澤堂前者爲致佳蘇澤堂前祇兩樹矣尤推賴氏園中老樹一株爲致佳老樹久枯其根下生新樹今數十年高丈許故復稱老樹賴氏守此世爲業買者就樹摘之以示其真花多實少之年一枚享千錢雖官不能攫之園中近老樹者數十株亦佳然惟老樹皮紅有白毛戟手香烈而味辛識者入手能辯之夫蘇澤堂橘官物也徵之者多則州牧不暇給長官若買之則官不受價否則攫而已予于庚辰十一月過州知賴園之橘可買也命僕人入

園訪老樹賴叟曰老橘賣已盡惟零丁數枚矣卽以數千錢摘之賴叟其古橘中人歟或云化城多蒙石蘇澤堂當石上而賴園老樹根下蒙石之力或更巨物性所秉或亦然歟

自鳴鐘說

自鳴鐘來自西洋其制出于古之刻漏小學紺珠載薛季宣云晷漏有四曰銅壺曰香篆曰圭表曰輓彈元謂輓彈卽自鳴鐘之制宋以前本有之失其傳耳西洋之制器也其精者曰重學重學者以重輕爲學術凡奇器皆出乎此而其佐重學以爲用者曰輪曰

螺是以自鳴鐘之理則重學也其用則輪也螺也古
扇壺盛水因扇滴水水乃漸減遂以爲輪之轉運是
水由重而漸減爲輕也自鳴鐘以鐵爲卷置銅鼓之
中換之使屈其力力由屈求伸亦由重而漸減爲輕
也鐘凡二鼓一鼓以記時一鼓以擊鐘記時之筭外
纏綆以奪弟二塔輪之力塔輪者形如臥塔所以受
綆也塔輪奪弟三中心輪之力記時之鍼管乎中輪
中心輪奪弟四直輪之力直輪奪弟五齒輪之力若
齒輪無物以節之使齒聲其數以漸退則各輪之力
不勝鼓中鐵卷之力砉然立解其綆頃刻已盡而其

卷亦驟伸矣故有懸鎚往來搖動藉以節之與齒輪之齒相應齒輪漸退則四三二輪亦遞退綆漸解而卷漸伸也擊鐘之筭外纏綆以奪弟二塔輪之力塔輪奪弟三擊輪之力擊輪者外管擊齒內樹杙以動鐘鎚弟三擊輪奪弟四鳥頭輪之力弟四鳥頭輪奪弟五小輪之力弟五小輪奪弟六風輪之力若無風輪使其力少重而滯于轉則其擊鐘也甚速無節矣擊鐘之鼓其機亦管乎時輪時至則擊齒卸而鼓中鐵卷之力伸矣伸少者擊少伸多者擊多擊畢則齒礙而關其力以待後時或以二鉛錘代鐵卷之力則

無兩鼓其爲重學也益明兩鼓各輪皆合于二銅版其合也皆螺釘之力其轉也皆輪之力究其塔輪與鐵卷亦皆螺旋也綜其理皆由重以減輕故曰重學也此制乃古刻扁之遺非西洋所能剏也

清遠峽記

踰庾嶺而南至清遠縣凡南雄韶州連州之水皆匯流過清遠峽始至三水縣南趨于海此峽兩山相對水出其間峽北有飛來寺立寺門與隔岸人可呼而相與語甚狹也然而三郡千里之水舍此無由入海觀其曲折夾束貫行之勢亦奇矣若水舍此而別有

所由則此間計惟數十畝平田耳指寺前叱犢之地
謂爲古揚帆之地誰其躋之凡水分流有二者最易
畱其一塞其一此峽之上古無分流故千古不塞也
又安知古亦有二流已塞其一而畱此一也三江者
禹貢所著也南江在今蕪湖以上漢書地理志水經
注皆有分江水豈誑後人耶今塞耳或人疑池州寧
國之間皆山無古江之故道此未多歷地形也余歷
地所見如清遠峽最狹者有二焉一則浙江桐廬縣
之七里瀧一則廣東高要縣之羚羊峽此二山行水
之地形皆與清遠等而羚羊峽過廣西一省之水爲

九巨豈可足未繭于衆山之中而遽斷其爲無是哉

新建南海縣桑園圍石工碑記

南海縣之西南有西樵山焉勢高而基厚連綴甘竹飛鷺各小阜盤礴數十里西北兩江之水所共抱而洩海者也此山古必居海潮中數千年兩江泥沙附山而渟漸渟漸廣山之距水亦漸遠于是始有田田患大水之浸于是北宋以後始圍以隄始有桑園圍之名田之未圍隄也大水浸之則泥沙加積焉一年積二三分厚之泥沙百年卽高一二尺厚之田地自有隄而田無水患地亦不復加高然而順德香山新

會下游之海變爲田者愈久愈多下游之田旣多則上游兩江浩瀚之水難速洩以難速洩之水抱不復加高之田水高田低且以不堅之隄捍之烏能不險而潰哉 國朝以來屢經修築以衛民生溯宋元明事載前碑誌不具述余于嘉慶二十二年冬初蒞粵是年夏水決三丫基民命田稼所傷實多察知歲修資少乃籌庫資發商生息歲得銀四千六百兩以濟之然終不能無大患南海人伍元蘭伍元芝兄弟並官刑部郎捐銀六萬兩新會人盧文錦前官工部郎捐銀四萬兩請于險處皆建石隄以障之其險者如

三丫基禾义基天后廟大洛口吉贊橫基諸處隄上用條石疊之隄坡隄根用硨石護之共疊石一千六百餘丈護石二千三百餘丈始斯役者南海令仲振履終斯役者南海令吉安躬斯役而勞心力者佐貳顧金臺李德潤舉人潘澄江何毓齡等二十五年工成用銀七萬五千兩餘銀還之三部郎三部郎不願復受請以濟三水縣隄及公事之用夫桑園圍內數十里如一小邑隄若潰則順德龍山諸地兼受其衝伍與盧無田廬在其中乃捐銀至十萬之多志在保障可謂好義而樂善者矣是役也工鉅用多不可不

奏而行二十四年元會同撫部奏奉

旨允行道光元年以工竣奏且請照禮部建坊例獎
伍盧以坊題

欽定樂善好施四字奉

旨又允行余閱水師出虎門歸過順德歷斯圍各險
處勘其工謁海神廟致禱焉且誠圍中各堡紳士
耆老等自茲後歲逢大水土隄之薄者厚之低者崇
之漏者塞之石隄之壞者增之脩之碇石之卸者增
之壘之官士請樹碑以記其事書此付之庶幾此一
方永臻安定焉

恩平茶阮硯石記

嶺南恩平縣南廿餘里溪盡處入山又廿餘里有巖曰茶坑產異石嘉慶初山民始掘之持至端州端州硯工見之曰此非吾端石何佳乃爾于是端州工始采爲研以冒端州石端州老坑石幾盡阮閉不復采今采者新阮耳新阮有魚腦青花火捺鸚鵡眼諸色與老阮同恩平石無魚腦青花而石中有黃龍火捺綠眼又多綠脈或縱橫相交此則端巖所少矣端州新阮潤而滑不發墨恩平石雖不及老阮而發墨勝于新阮端州之石割于洞故石外無皮製硯者必削

其礲确使中規矩恩平石則天成橢扁三角等形積萬小石戴土成大巖由由碎泐不相連屬采之者如拆壁掘地而得甌或重數十觔或重數十兩石外有皮色裹之或黃如霜葉或紅如榴皮如燕支或綠如蕉葉如苔錢如苕帶如蛛絲或皴如松皮或斑如虎皮或青綠如古彝器剖之其中或有黃龍紋如氣水之流或有綠紋如繩線之結或青綠數層相疊種種形色與端巖大異而硯工必盡去其異者以冒端巖故二十年其名未顯余近知此石佳惜其久冒端巖而不自立名也爰命硯工買石畱其形色而琢爲硯

且記之

福謹案泐說文解爲水之理非石裂也而考工記曰石有時以泐則泐字似有裂意今觀各坑石一大塊之中復有文理順其理擊之卽裂研工指之曰此水線也凡石皆有水線石久卽裂裂必從水線之理由此可證攷工說文互明之義

蘇文忠公詩編注集成序

余從韓桂船大司寇獲識仁和王君

文誥

於嶺南王

君學識淹通深於史所撰蘇文忠公詩編注集成尤精博匪特聚百家爲大成更可訂元修宋史之舛陋余於接席間歷扣王君致力於蘇詩之處王君曰蘇詩編年注不始於施德初與顧禧也當元豐間坡公

遷黃彭城陳師仲爲編述密徐二郡所作古律以寄
事載東坡集中今王龜齡集注姓氏錄彭城陳師道
後載有陳希仲以其注內劉共父或稱洪父張敬夫
亦稱欽夫例之是希仲註卽師仲也其後坡公北歸
有前後集編年註則趙次公宋援李德載程續四家
也李敬齋載在古今註謂之四註本繼有林子仁者
復附益之改四註爲五註考子仁於政和中賜號高
隱處士而自政和上溯建中靖國僅一十七載註已
兩刊德洪親見黃魯直而謂坡公海外詩中朝士大
夫編集已盡可爲崇觀時刊行四註五註之證是編

年註出於北宋者也次公同時有趙夔者嘗知榮州
納交於叔黨別創爲分類註垂三十年而刊於紹興
之初自鳴一家復有師民瞻任居實孫倬李堯祖四
家接踵於後其爲體例一本於夔而取編年五註並
納入之是爲八註十註庚溪詩話載乾道初梁叔子
入對阜陵謂近有趙夔等註軾詩甚詳而龜齡集註
序則云舊得八註十註考夔序其詩分五十類自爲
單行與編年五註各不相牟乃刊定後閱三十五年
而阜陵目爲趙夔等註此卽夔註五註並入八註十
註之證夔序仍以分類弁首故云趙夔等也龜齡集

註實由八註十註推廣今編年五註猶有存者檢對
龜齡集註其入選者十有六七亦惟此十家註獨賅
備與龜齡增輯諸家繁簡懸殊此是十家分合具可
考也龜齡在隆興朝力持國是阜陵方倚爲用其不
及集註者龜齡亦僅有此八註十註而已殆至乾道
漸知諸將不足用於是一力請外專以及民爲務而
其排纂亦在此時以阜陵不及集註考之是書成後
六年矣呂伯恭廣夔註爲七十八類龜齡實主呂本
故集註亦七十八類載入姓氏錄伯恭名下而夔之
分類亡今其序猶存而與集註分類不符由於此也

龜齡序又云自八註而十自十註而百均之百人此
又八註十註積累至百之證計其所均之人列門牆
預後進者爲黃魯直陳無已秦少儀潘邠老王直方
劉無言曾公衮晁冲之韓子蒼李商老潘仲達蘇養
直釋祖可出魯直西江派者爲謝無逸洪朋高子勉
楊信祖夏均父何人表洪芻饒德操李希聲謝幼槃
徐師川洪炎汪信民釋巽中流入播遷號耆舊者爲
王性之汪彥章林敏中呂居仁王長源江端本元不
伐林子來通計北宋註可知者四十七家南渡傳聞
學者爲劉子翬黃通老陳體仁汪聖錫龔實之胡邦

衡劉共父張南軒呂伯恭甄雲卿登朝籍及閒放者
爲張孝祥汪養源吳明可馮圓仲芮國器胡元任鹿
伯可陳少章王壽朋葉飛卿丁鎮叔孫彥忠項用中
葉思文喻叔奇王百朋張器先傅薦可通計南宋註
可知者三十一家此編年累改爲分類滙爲集註之
大略也施德初登張孝祥榜龜齡出五載始入爲著
作佐郎其與顧禧爲編年註應在淳紹之時據陸游
原序概論作詩事實而下云德初絕識博學係指題
下施註紀事又謂助以顧禧該洽係指句下顧註徵
典紀事引本集欒城史傳不載出處徵典引經史子

集外藏悉載出處顯屬二手卷端施氏顧氏以次標
列亦可與序參證卷中疵議趙夔程續等註輒曰舊
註而於次公間一標名其編年依仿五註亦見施顧
所因又凡原引經史正義已盡則避去佐以別載此
緣施顧不時緝檢五註十註是以相爲表裏所在符
合其體段概可知矣施宿爲餘姚令乞序於游至嘉
定付刊已較集註後出三十五年凡刊五十五年至
景定而曼漣鄭羽爲淮東倉汰其字大小七萬一千
五百七十七計一百七十九版自此流入元明無復
表見而集註有元刊者則已增入劉須溪註須溪在

宋爲國博終於元季書雖元刊內有補列數家當卽
須溪所爲其去宋刊固不遠也

國朝康熙間宋牧仲得施顧殘本邵子湘取肆本分
類補綴因以編年爲施註而目肆本分類爲王註沿
說至今肆本省七十八類爲三十類在前明已有之
而不詳所自或言此出吳興茅本而新安朱本復省
爲二十九類然迴非龜齡集註之面目此後查夏重
得影鈔施殘本翁君覃溪得牧仲施刊本馮君星實
兼得宋刊編年五註後集及元刊龜齡集註夏重補
施星實王施並補參覈得失皆能赴其力之所至然

於各註遞爲乘除而貫串一氣卒無有言其義者此
編年註出於南宋近又兼井分類之大略也余復讀
王君之書知其涉歷諸家精校博考然後能集諸家
之成而發其所未及王君蓋謂變法改法之不明則
由於史陋朔黨洛黨之不辨則由於史諱紀時紀事
之不當則由於註誣改編補編之不確則由於註淆
此皆於兩公本事未嫻貫於心而徒馳騖於外故其
岐舛脫闕治之愈勞爰創立總案以統各詩復訂正
誌傳以統各案而補所不備於蘇海識餘中於是擊
空踐實而裁爲具體意向畢達其前之以王補施也

先因肆本輟輯莫測誰某論者無徵五註集註出馮君星實猶以南渡後爭尙蘇學牋解人衆爲言蓋相沿王註悉出南宋之舊說耳王君乃嚴趙呂之類別窮施顧之編年上追豐祐下逮貞元發明北註南註先後變易成於風會且其旁搜遠紹氣類源流通感分合本末明晰泰然大同是皆確有所據足補前註之未達矣坡公立朝犯難語言文字志節不磨得王君發之始無所遺誠括衆美而舉其全矣余適觀是書之成復問而知其心得之要著於簡端俾海內讀是書者由是而擴蘇公詩之意洵盛事也

學海堂文筆策問

問六朝至唐皆有長於文長於筆之稱如顏延之云
竣得臣筆測得臣文是也何者爲文何者爲筆何以
宋以後不復分別此體

男福謹擬對曰自明人以唐宋八家爲古文於
是世之人惟知有唐宋古文之稱竊考之唐以
前所稱似不如此也唐人每以文與筆並舉又
每以詩與筆並舉是筆與詩文似有別也由唐
溯晉則南北朝文筆之稱多見於史分別更顯
矣况金樓子文心雕龍諸書極分明哉謹綜六

朝唐人之所謂文所謂筆與宋明之說不同而見於書史者不分年代類列之以明其體矣

漢書樓護傳長安號曰谷子雲筆札

晉書蔡謨傳文筆議論有集行於世

宋書傅亮傳高祖登庸之始文筆皆是記室參軍滕演北征廣固悉委長史王誕自此後至於受命表策文誥皆亮辭也

南史顏延之傳宋文帝問延之諸子才能延之曰竣得臣筆測得臣文

北史魏高祖紀帝好爲文章詩賦銘頌有大文

筆馬上口授及其成也不改一字

魏書溫子昇傳熙平初中尉東平王匡召辭人以充御史同時射策者八百餘人子昇與盧仲宣孫搴等二十四人爲高第於時預選者爭相引決匡使子昇當之皆受屈而去搴謂人曰朝來靡旗亂轍者皆子昇逐北遂補御史時年二十二臺中文筆皆子昇爲之

北史溫子昇傳張臯寫子昇文筆傳于江外北齊書李廣傳廣曾薦畢義雲於崔暹廣卒後義雲集其文筆十卷託魏收爲之叙

陳書陸瑋傳其所製文筆多不存本後主求其遺文撰成二卷

劉師知傳師知好學有當世才博涉書傳工文筆

徐伯陽傳伯陽年十五以文筆稱

按文筆之分稱此最顯然有別

梁元帝金樓子立言篇云古人之學者有二今人之學者有四夫子門徒轉相師受通聖人之經者謂之儒屈原宋玉枚乘長卿之徒止於辭賦則謂之文今之儒博窮子史但能識其事不

能通其理者謂之學至如不便爲詩如閭纂善
爲章奏如伯松若此之流汎謂之筆吟咏風謠
流連哀思者謂之文而學者率多不便屬辭守
其章句遲於通變質於心用學者不能定禮樂
之是非辯經教之宗旨徒能揚權前言抵掌多
識然而挹源知流亦足可貴筆退則非謂成篇
進則不云取義神其巧惠筆端而已至如文者
惟須綺縠紛披宮徵靡曼脣吻適會情靈搖蕩
而古之文筆今之文筆其源又異至如彖繫風
雅名墨農刑虎炳豹鬱彬彬君子卜談四始李

言七畧源流已詳今亦置而弗辨潘安仁清綺
若是而評者止稱情切故知爲文之難也曹子
建陸士衡皆文士也觀其辭致側密事語堅明
意匠有序遣言無失雖不以儒者命家此亦悉
通其義也徧觀文士畧盡知之至于謝元暉始
見貧小然而天才命世過足以補尤任彥升甲
部闕如才長筆翰善緝流畧遂有龍門之名斯
亦一時之盛夫今之俗搢紳稚齒間巷小生學
以浮動爲貴用百家則多尙輕側涉經記則不
通大旨苟取成章貴在悅目龍首豈足隨時之

義牛頭馬髀彊相附會等張君之孤徒觀外澤
亦如南陽之里難就窮檢矣

按福讀此篇與梁昭明文選序相證無異呈
家大人家大人甚喜曰此足以明六朝文
筆之分足以證昭明序經子史與文之分而
余平日著筆不敢名曰文之情益合矣

劉勰文心雕龍總術篇今之常言有文有筆以
爲無韻者筆也有韻者文也

按文筆之義此最分明蓋文取乎沈思翰藻
吟咏哀思故以有情辭聲韻者爲文筆从聿

亦名不聿聿述也故直言無文采者爲筆史
記春秋筆則筆是筆爲據事而書之證

南史孔珪傳高帝取爲記室參軍與江淹對掌
辭筆

陳書岑之敬傳之敬始以經業進而博涉文史
雅有辭筆

按辭亦文類周易繫辭漢儒皆謂繫辭爲卦
爻辭至今從之繫辭上下篇云聖人設卦觀
象繫辭焉以明吉凶又云聖人有以見天下
之動而觀其會通以行其典禮繫辭焉以斷

其吉凶是以謂之爻又云繫辭焉而命之動在其中矣又云繫辭焉以盡其言據此諸文則明指卦爻辭謂之繫辭孔子之上下二篇乃繫辭之傳不得直謂之繫辭也

今本無傳字釋文王

肅本原有傳字其謂之繫辭者繫屬也繫辭卽屬辭

猶世所稱屬文焉爾然則辭與文同乎曰否孟子曰說詩者不以文害辭趙岐注云文詩之文章所引以興事也辭詩人所歌詠之辭是文者音韻鏗鏘藻采振發之稱辭特其句之近于文而異乎直言者耳又按辭本是詞

字說文詞意內而言外也从言从司釋名曰

詞嗣也令撰善言相續嗣也然則詞之从司

卽有繫續之意詞爲本字辭乃假借也

唐以前每

稱善屬文此古義也宋後此稱少矣孔子十翼繫辭傳文言皆

多用偶語而文言幾于句句用韻繫辭雖是

傳體而韻亦非少

繫辭傳上下篇用偶者三百二十六用韻者一百一

十與家大人所舉文言中偶句韻語之義相合此文與辭區別之

證亦文辭與言語區別之證也楚國之辭稱

楚辭皆有韻楚辭乃詩之流詩三百篇乃言

語有文辭之至者也

王充論衡古之帝王建鴻德者須鴻筆之臣褒
頌紀載乃彰萬世

按此筆卽記事之屬

梁書任昉傳昉尤長載筆才思無窮

按南史本傳作尤長爲筆沈約傳云彥昇工
於筆攷禮記史載筆任彥昇長于碑版亦記
事之屬故曰筆

唐書蔣偕傳三世踵修國史世稱良筆

按此筆亦記事之屬

陳書徐陵傳世祖高宗之世國家有大手筆必

命陵草之

陸瓊傳瓊素有令名深爲世祖所賞及討周虓陳寶應等都官符及諸大手筆並敕付瓊

按此筆謂詔制碑版文字故唐張說善碑誌稱燕許大手筆

梁書劉潛傳潛字孝儀秘書監孝綽弟也幼孤兄弟相勵勤學並工屬文孝綽常曰三筆六詩三卽孝儀六孝威也

按詩亦有韻者故與筆對舉明筆爲無韻者也上曰工屬文下曰筆曰詩蓋詩卽有韻之

文與散體稱筆有別

南齊書晉安王子懋傳文章詩筆乃是佳事

按此文章是有辭有韻之文詩又有韻之文
之一體故以文章詩筆並舉

梁書庾肩吾傳簡文與湘東王論文曰陽春高
而不和妙聲絕而不尋竟不精討錙銖覈量文
質有異巧心終愧妍手是以握瑜懷王之士瞻
鄭邦而知退章甫翠履之人望閭鄉而歎息詩
既若此筆又如之

北史蕭圓肅傳圓肅撰時人詩筆爲文海四十

卷

劉禹錫中山集祭韓侍郎文子長在筆子長在
論持矛舉楯卒不能困

趙璘因話錄韓文公與孟東野友善韓公文至

高孟長于五言時號孟詩韓筆

金元好問詩云杜詩韓筆愁來

讀似倩麻姑癢處搔本于此

杜甫寄賈司馬嚴使君詩賈筆論孤憤韓詩賦

幾篇

按此皆以詩與筆並舉

南齊書高逸傳歡口不辨善於著筆


按此筆爲無藻韻之著作之名


晉陸機文賦詩緣情而綺靡賦體物而瀏亮碑
披文以相質誄纏綿而悽愴銘博約而溫潤箴
頓挫而清壯頌優遊以彬蔚論精微而朗暢奏
平徹以閑雅說去聲煒晔而譎誑

按此賦賦及十體之文不及傳志蓋史爲著
作不名爲文凡類于傳志者不得稱文是以
狀文之情分文之派晉承建安已開其先昭
明金樓實守其法

家大人開學海堂于廣州與杭州之詁經精

舍相同以文筆策問課士教福先擬對爰考
之如右 家大人以爲此可與書文選序後
相發明也命附刻于三集之末





擘經室集

一二

五言古詩

AC
149.
58
746
v.12

擘經室四集卷一

御試擬張衡天象賦

御試一目羅賦

擬潘安仁射雉賦

炙輠賦

薔薇賦

赤壁賦

賜御筆熱河考墨刻卷恭謝摺子

乾隆

賜御筆筆誤識過墨刻卷恭謝摺子


乾隆

恩授經筵講官恭謝摺子

以下皆嘉慶

擘經室四集

目錄



賜御製邪教說墨刻摺子

京察議叙恭謝摺子

賜御書福字恭謝摺子

奉

勅進經籍纂詁摺子

賜御製養心殿記墨刻恭謝摺子

賜御製原教三篇墨刻恭謝摺子

卷二

重修高密鄭公祠碑

重修會稽大禹陵廟碑

重修揚州會館碑銘

蘭亭秋禊詩序

謝蘇潭詠史詩序

四六叢話序

葉氏廬墓詩文卷序

厯山銘

注曾子研銘

落日餘霞研銘

白圭詩館研銘

水師正威大銅礮銘

官齋精舍銘

寶龕鐘銘

刻扇鐘銘

警鐘銘

古龕鐘銘

揚州隋文選樓銘

南宋尤本文選卷首畫象銘

西瑯阿侍御摹坡公笠屐圖贊

方維祺太守以我觀我圖贊

桂林隱山銘

宋硯銘

端溪璞石硯銘

粵溪茶坑天然大硯銘

茶坑硯山銘

端溪老岩研山銘

西齋銘

乾隆癸丑仲冬上丁祭曲阜

孔廟文

祭天目山神文

隱天目山師友

丘神文

諱劉梁丘神文丁祭曲阜

西德錄

諱梁丘神文

梁丘神文

梁丘神文

梁丘神文

梁丘神文

擘經室四集卷一

御試擬張衡天象賦

以奉三無以齊七政爲韻
大考翰詹一等第一名

惟圓象之昭回建北極以環拱擬磨旋以西行儼笠
冒而中擁陽乘健以爲剛氣幹機而非重分五宮以
各正圍列宿而高聳旣承天以時行亦後天而時奉
昔虞廷之治象命羲和以互參仰璿璣以分測廓四
儀而內涵惟周髀與宣夜合渾天而爲三溯洛下之
善製亦鮮于之極諳地平準而天樞倚黃道中而赤
道南惟中陸之相距廿四度以相含割渾圓爲象限
分弧角於輿堪歸隸首之實算斥鄒衍之虛談原夫

日周天步月麗天衢日一度而若退月十三度而愈
紆分十二以合朔乃會躔以同符冬起牽牛之次夏
極東井之區秋遇壽星之位春在降婁之隅惟九行
之出入亦四道之殊途攷日至之圭景尺五寸而不
逾分高卑於遠邇測里差之各殊月令遲于小正夏
時合于唐虞驗中星之遞徙又知歲差之不可無至
若別五星于五天錯經緯於日晷金一年而周天丑
未終而寅戌始水周天以同金井絡終而降婁起歲
周年以十二爲衆星之綱紀四仲則三宿已遷孟季
則二宿非邇火二年而一周入太微而分紫土周歲

以廿八將彌月而度乃徙旋七政以同天能左右之
日以列宿廿八正自重黎指以招搖正以攝提惟角
亢之七宿升蒼龍而上躋正天門與衡柱有角首之
杓攜虛女殷乎北位爲子丑之端倪鶉火殷乎南紀
當三台而光齊胃昂畢之七宿合首尾於參奎占伐
旗與溝瀆象白虎於其西分野占星斗耀惟七機青
樞翼分其區魁雍衡荆異其術四輔連乎理樞陰德
近乎太乙內階映文昌之宮衛尉對丞弼之秩帝座
御而華蓋高閣道啟而勾陳出王良却而造父馳柱
史明而開陽吉斜漢絡乎天半夏案戶而光實其隸

垣外而居南極者亦縷數之不能悉事天以敬治象以正三光宣精四時爲柄圓而動者施其德高且明者布其令奉三無私者惟君建五有極者惟聖屏靈曜于緯書撰靈憲以互證是以黃帝制奎以推策有虞撫衡而齊政惟有道者萬年協清寧而衍慶

御試一目羅賦

以題爲韻散館一等一名

羅因鳥而始張鳥以目而罔逸羅惟取其周遮目非貴于專壹椽之初聽夫丁丁舉焉乃觀其乙乙多爲之備得之在少而不在多密爲之防獲之在疎而不在密然而偏于少則綿綿未成惑于疎則恢恢反失

觀離忘作罟之方掌禮昧張弧之術豈織千絲之網
以一統千如祝一面之羅解三畱一原夫爲罟爲罾
曰羅曰罾或成掩畢之箕或作翻車之軸雉何事而
離罟鴻何爲而漸陸理密文連絲交花簇隙漏相承
玲瓏互複本一緯而一經乃或衡而或縮免有蹄兮
不忘繭爲綸而非獨至于綱舉目張網開鳥覆逸翮
莫翔修翎已蹙故結羅者必有四維而得鳥者惟憑
一目此亦如百囊魚罟非九罟皆罟鮮鱗七屬犀角
惟一札或當金鏃也若乃經連極寡繩結無多非連
罟之組織異數罟之搓抄人惟一孔之智制非四寸

之過空成方而彷彿縵爲橢其若何若兩縵虛設于
網侯莫加采鵠若單緯初施于機軸未擲金梭結比
繩樞竟一櫺之徒具張如絙瑟何一弦之可歌蓋集
目成羅惟一羅乃收衆目而分羅得目非一目可抵
全羅是以空爲結網之求繆作臨淵之慕豈虛張而
冀其自投抑徒設而思其偶遇編一絲以爲罽欲求
翡翠之毛鍊寸鐵以成罽願挂珊瑚之樹正恐魚緣
木上未識其難鳥萃蘋中罕知其誤我

皇上道挈乾綱網開賢路

綸綍宣而人仰璣衡條理密而世欽法度廣搜羅于

四海未嘗或有遺材析節目于

萬幾安得紀其成數張烏羅以有待豈同文子之書
加一目以何爲無取正平之賦

擬潘安仁射雉賦

挾良弧以游騁兮從文翰之原禽睇飛翬於高隴兮
聽鷺鳴于平林思逐羽而捷獲兮嫺雄技以愉心伊
茲禽之英麗備采藻于修翎秉離象而耀爛應璣衡
之星精賦鷁鷺之殊質審鷓鴣之異聲性專棲以驕
處雄護界其必爭爾乃秋草乍衰枯桑競落驚沙暮
飛晨霜猶薄凜寒色於垆野燎宿莽于旣穫始奔羣

以迅竄勢將集而更躍稟肅氣以耿介勵毅力而虛
躋畫地開場度阡分壤盤馬獨出奮臂右攘始驚殺
而求穴繼蹶衝而直上關淵蕭以擬脰弦激括而成
響頓驚盼以值鋒墜錦毛于十丈若乃黃泉潛沸微
陽肇回山明積雪地伏鳴雷感震聲而始雒勾采頸
以羣來交斑臆之離襪振繡翼之陪鯁紫間滿操黃
肩巧控機商偏正手權輕重意決一發疊雙必中重
翮同摧兩膺並洞及其熙熙春陽陶陶孟夏麥垂機
以迎秋泉度剛而微瀉恐宴圖之失禽瞻晨星而夙
駕登崇邱以周覽揆懸刀以調翰雖咿喔之驟應猶

猜狷而盤桓曳黼繪于袞背峙頽赫之赤冠步踈趾
而彳亍舒藻翼之爛煊顧影聳角驚聲睽視斂翮善
藏挫首未起禾穎駭動尙露脩尾俯青疇而低瞰殼
銛鏘以下擬乍仰臆而憂鳴已決背而裂觜若夫大
夫旣娶未聞笑言如臯親御輕馳鶴軒巨黍鳴兮飛
鏃雉子獲兮摧斑藉一矢以嘗巧解三年之鋼顏又
若瑯琊舊族近徙茂陵春田設翳曉壟分塉筠箱馴
翼茅障隱矰舉巾誘媒發音清激挾兩紛至或韞或
翟羣調狎而擾嫺復怒妬而跳趯悍屏息以勵觚窺
寶鑕而命的至如南皮輕騎江表貴游輪輿微動紘

蓋平流矯白羽以振竒準翠顙以點眸終撤翳而從
諫又何論夫焚裘懿彼名翬雄桀見戕嶽嶽避株紛
紛采囊縱入秦而化石慮歸楚而誤皇孰若折榦破
樊啄飲壇塲所以嗅季氏之供具嘆時哉于山梁

炙輠賦

以炙輠中膏其流無盡爲韻翰林館課

爰有稷下辨才齊中贅客轉異爲同變黑成白邁談
天之騶過雕龍之爽味非大道膏腴傾出羣言瀝液
周迴無轆妙於轉圓氣燄可凌甚於親炙粵有物焉
命之曰輠擊堅無傷形圓非橢滑膏內盛堅金外裹
史言貫轂汰輠不在丁凝詩詠載脂接軸何傷輶軻

守以緩火乃滲漉而徐流持近洪鑪亦淋漓而競墮
若夫便給極捷滑稽無窮苟有談而必劇亦無辨之
不雄何嘗艾艾期期語燥唇吻之際試聽幡幡截截
慧流齒牙之中笑梯絜楹無辭或滯涕唾流沫有說
皆融譬之炙輠匪欲屯膏快流轉於輶牽實沃澤以
淳熬如蘭釭初焚暗斟鐙炷似香醪既盞小滴銀槽
談折子成駟難及舌論殊莊叟輪反爲尻其始也批
卻導欸其繼也分理析肌挈瓶之智不盡恥罍之聲
何時非瓚裏黃流難吟瑟彼異壺中冰潔莫賦溫其
脂韋之行可通豈如不食之鼎天倪之言日出乃同

無當之厄方其過稷門坐祖邱折賓客抗諸侯垣車
悉納井轄初投火守輶而炎炎旣熾脂得火而涎涎
始流出之愈多如飲二斗而賜餘瀝揮之不竭若操
一盂而得滿篝所以世驚非馬人用虛車以非爲是
強有爲無守口如瓶言何相反炙手可熱事究何如
杖亦足以關輪智嗤武叔黍何須乎量藪拙笑輪輿
然而金遭口鑠不窮者必窮釜共舌焦無盡者終盡
雖爲齊人所傳實爲吾儒所哂宣王之世辨客聯鑣
戰國以還俳優接軫棘軸稀膏爲滑也忌子之遇合
堪羞方枘圓鑿能入乎孟氏之高風不隕

薔薇賦

熒余舟於漢皋兮策余馬于荆山當季春之佳令兮
敷衆芳於林巒有薔薇之嘉卉兮施修條于樹端紛
樸櫟而蔭翳兮亦叢灌而交攢或孤植于石罅或隱
被於柴關或偃日而如蓋或圍圃而作樊謝人力之
培植遠樵斧而不刪茁瓊蘂而葳蕤綴白華之檀欒
香芬烈以盈路散春風而未殘欲折枝以相貽箴刺
手而莫攀雖奇馨之襲人羌服媚而靡艱絕樛木之
求思如漢女之貞閒鄙無臭于棠梨斥淹冶于牡丹
色皓皓其白雪驕陽春而不寒疑碎剖其卞璞琢王

英而爲顰抑神女之弄珠結百琲之珊珊昔筆路之
初啓豈斯木之盡刊何靈均之多頌惟紉佩于芷蘭
斯楚騷之所遺爰摘詞而永歎

赤壁賦

丁丑之春余從鄴下移節武昌復以簡兵之行溯襄
鄖彝陵搯舟師下荊州乘風東歸過所謂赤壁者慨
然歎曰余所經之地古皆篡竊於曹公維彼亂世實
生奸雄攬茲陳迹不知感慨之何從也斯壁也抗洞
庭之北據監利之東衆山凝碧絕壁畱紅春江曉開
殘月落弓戈船偃旗軍堠靜烽天下治平舟楫盡通

東吳西蜀往來憧憧溯建安之挾令出南郡以興戎
攘江陵之軍實秣北馬于渚宮舍彼精騎泛此艤舫
波濤之性不習檣櫓之用未工斯不待吳廷研案已
先決其無功况夫公瑾用智孔明效忠公覆贊助載
荻蒙衝進夏口以西拒當烏林而礪鋒憑沙羨以自
守射連艦而進攻破江天之寒色縱一炬以橫空起
鳴雷於萬鼓扇巽女于殘冬付舳艫于謫出化猿鶴
與沙蟲幾于林鳥焚巢臺雀墜銅折鼎一足當塗路
窮笑江波而迴指乃僅免于華容余固曰非赤壁而
亦敗矧天假以東風余今出荆門回郢中順江水以

安流乘長風之淪淪
撏孟甄而拔武修隄防而劬農
擬蘇子于黃州乃情地之不同
毋徒傷于古人之故
壘惟穆然于江上之青峯

賜御筆熱河考墨刻卷恭謝摺子

乾隆

欽惟我

皇上學海探源地符開遠

德誠法

祖那居駐灤水之陽

功在信

天拓地極崑山以外道元之標
鍾石未如登齊老之

峯茅溝之會湯泉似僅見蒲昌之海昔

著考而濡流已判今

加識而河曲愈明

臣

伏思濡水久訛河源彌遠舜禹

之世畧在西荒漢唐以來陷于絕國惟我

皇上削平四部落休養卅餘年金河百道何異

山莊武列之川禹貢一篇未似

御製河源之考蓋能通二萬里未通之地故得決四
千年未決之疑且以漢使之行久羈西域明修之志
徒首南音持節者未必身親操筆者徒知耳食豈如
今一介之使逕達真源九譯之言胥歸

聰聽此又因

武德之無遠弗屆故拓地而及天池

文學之無所不精故審音而刊元史紀畧既修以後

宇內雖有專書熱河作考在前卷中必須

題識貞珉繼勒初分筆彩于華箋翠帙頻頒更仰

恩光于墨寶所有臣感激微忱謹繕摺恭謝

天恩伏乞

睿鑒謹

奏

賜御筆筆誤識過墨刻卷恭謝摺子

乾隆

欽惟我

皇上典考唐虞道積今古

萬幾咸理事皆

親御丹豪半字偶殊

文乃特鑄翠墨昔知過以

著論

聖人之言已滿堂茲識過以

摘辭周武之銘仍在筆

臣

竊思天行至健有過度之

餘差地闢无疆見殊途之歸轍見爲誤實爲無誤之
驗識爲過豈有或過之時况乎考道德於百王時以

積而成古聚典謨於千古事因積乃可稽稽之訓同
見堯典康成之注積之爲義詳荀卿勸學之篇因異
而轉以見同是二而還知爲一辭文旨遠知
聖論之無不包容氣盛理明讀

奎章而彌深悅服所有臣感激微忱合繕摺恭謝

天恩伏乞

睿鑒謹

奏

恩授經筵講官恭謝摺子

以下皆
嘉慶

本月初四日翰林院以

經筵講官缺請

旨奉御筆圈出

臣

阮元竊

臣

業荒書府學愧經畚慕

漢宋之儒先景行未至求師承於傳注家法鮮通自
問幼年本蓬戶桑樞之子敢榮夢想爲

經帷講幄之臣茲奉

恩綸得叨清秩榮幸之下感悚交并欽惟

皇上本孝爲經闡開宗於東魯體仁出治補衍義於
西山

園雍舉稱制之文

東殿崇說書之禮以

臣

淺陋豈贊

高深臣惟有勉勵儒修益勤經業繙書虎觀敬陳抑
戒之威儀珥筆螭坳願識邇英之義理所有臣感激
微忱謹繕摺恭謝

天恩伏乞

睿鑒謹

奏

賜御製邪教說墨刻摺子

竊臣接奉

恩賞

御製邪教說墨刻一分隨恭設香案叩頭祇領伏讀

之下仰見我

皇上體天地以立心統智愚而在宥欲迪民以正道用

特賁夫

宸章惟此

至誠惻怛之懷見于

剴切申明之際苟不盜兵皆爲赤子若徒佞佛何咎
白蓮督兵者知叛道之必殲牧民者知正教之當植
所消弭者何限所保全者寔多行見

武偃西川烽消南楚官知廉法民習敦龐荷

重熙累洽之休服田疇而食舊德凜

保泰持盈之訓端趨向以迓

新恩舉太平億兆之眾

生成而教育之靡不在

聖明指示中矣臣曷勝欽服欣感之至謹繕摺恭謝

天恩伏乞

皇上睿鑒謹

奏

京察議敘恭謝摺子

竊臣接閱邸抄恭遇

京察大典欽奉

上諭浙江巡撫阮元有守有爲清儉持躬着交部議敘欽此

臣隨恭設香案望

闕叩頭謝

恩訖伏念

臣

學淺才庸備邀

恩遇更蒙

簡畀重寄封疆任事以來心長力絀不克于吏治民生有所補裨以仰報

天恩萬分之一撫衷循省慚極汗流茲以
考績屆期荷蒙

天語褒嘉

予以甄敘實屬

臣

夢想所不到聞

命之下榮感既切悚惕彌增嗣後惟有恪遵

聖訓清儉永持守爲交勉倍殫心力益凜冰淵以期
仰副

皇上鼓勵裁成之至意于萬一爲此恭摺具

奏叩謝

天恩伏乞

皇上睿鑒謹

奏

賜御書福字恭謝摺子

本年正月十六日賁摺差弁回浙奉到

御賜福字并

批諭云親書福字賜卿願兩浙士民同霑厚福欽此
臣當卽出郊跪迎至署望

闕叩頭祇領訖伏念臣一介寒微仰蒙

聖主殊眷

簡任封圻在浙年餘每思造福于士民而材性淺薄
時懷愧勉茲荷

宸章親洒

溫諭下頒臣奉到之辰正值盼雨之候未幾六花獻瑞徧積春田遠近士民莫不懽忻舞用知至誠動念立能感召

天庥

臣

感激之餘倍深敬凜惟有永遵

聖訓堅守初心整飭官方培養元氣務俾士安弦誦民慶盈凝以期仰答

皇上高厚鴻慈于萬一爲此恭摺叩謝

天恩伏乞

皇上睿鑒謹

奏

福謹案是摺乃嘉慶六年是年十二月二十七

日

家大人又奉

御賜福字一幅福以是日生于節署故命名福字

賜卿敬識

天語戴國恩也

奉

勅進經籍纂詁摺子

奏爲恭

進經籍纂詁仰祈

聖鑒事

臣

於七月初十日面奉

諭旨

命臣將所撰經籍纂詁呈

進

臣

謹裝潢成冊恭呈

御覽欽維我

皇上道蘊符珍光垂圖冊

辰居念典論繹羣經

乙夜觀書詠成全史兼

聖作與明述煥乎文章維

稽古曰同天式於詒訓

精一執中之學誠協言詮

經天緯地爲文允符德業固已甄陶神海并括典謨
猶復

詢及芻蕘不遺葑菲式仰

聖衷之冲穆巍蕩難名益徵

帝學之高深涓埃莫贊臣見同窺管識等扣槃曾簪

朶殿之毫夙被

洪鈞之鑄前以督學之日撰茲纂詁之編育才首在
通經奉

聖人之至教博古務求載籍誦前哲之雅言依韻類
文統長言短言而並錄卽字審義合本訓轉訓而俱
收爰集多士以分程乃勒十函爲一部屢經校勘尙
有舛譌亦事補苴不無罅漏是以梨鐫甫就僅畱爲

家塾之藏雖復葵嚮維殷未敢作

帝庭之獻酒蒙

名對猥荷

垂詢

諭令進呈

幾餘賜覽

臣跪聆之下感悚交并謹奉綈函敬呈

黼座五經之文爲道本秉

睿裁而期惠於藝林六籍之義以詁通舉下學而幸

歸於

天鑒

臣謹繕摺并書十套進呈伏祈

皇上睿鑒謹

奏

賜御製養心殿記墨刻恭謝摺子

竊臣標提塘賁捧到

恩賞

御製養心殿記墨刻一分臣當卽出郊跪迎至署恭

設香案望

闕叩頭謝

恩祇領訖欽惟我

皇上道統傳心

釋經室四集

卷一

七

聖功養正

法宮建極會皇極之大中

溫室修和涵太和之元氣固已

九重敬德四表同仁矣乃猶瞻雲棟而念

先謨見羹牆而衍心法本堯舜禹湯諸聖而得所養

闡中正仁和四字而

單厥心

御采殿以正紫微

撰記文而頒翠墨

臣

惟中者所以定不偏不倚之規

正者所以示無反無側之準惟本仁以出治則克己

復禮而天下歸惟致和以化民斯保泰調元而

天命永

奎章在殿久以

列聖之心爲心

天藻摘文卽以一心之養爲養善之至矣無能名焉

抑臣更有進者是惟

皇上心同道同備中正仁和之德因之心正筆正成
中正仁和之文昔韓柳雄辭猶有心於排冢歐蘇健
筆亦肆力於揣摩今讀

記文六百言銘詞十六韻蘊廣大精微之志宣和平

雅正之音不使氣而氣自醇不矜才而才愈大蓋上
本乎羣經正史乃下軼乎諸子百家臣學切觀摩識
開

魏煥共瞻

睿製正文體卽正心源衆拱

辰居養一心以養四海所有臣

欽服欣感下忱謹繕

摺叩謝

天恩伏乞

皇上睿鑒謹

奏

賜御製原教三篇墨刻恭謝摺子

竊_臣齋摺差弁回淮捧到

恩賞

御製原教等篇墨刻二冊又三卷到_臣當卽出郊跪

迎至署恭設香案望

闕叩頭謝

恩祇領恭誦欽惟我

皇上仁符

昊眷誠格

天心當

禁垣竊發之時雷雨顯彰夫助順逮勅旅徂征之日
櫓槍淨掃夫餘氛固已畿輔奠安寰區聞喜矣茲輯
九月以來

訓諭之旨申警之文彙勒貞珉普頒翠帙臣欽承
恩賜敬繹

綸言原正教以黜邪則經正民興之道也行實政以
教忠則知人安民之德也有堯舜咨儆之思而盡心
竭力仰答

天恩之

訓著有禹湯修省之德而遇變罪己酌減慶典之

詔頒至於澄敘官方修明武備戒貪墨以厚民業警
叢脞以亮天工不惜丁凝反覆以求詳固由疾痛顛
連之在抱臣惟漢唐以後類多變端或失馭於強藩
或寄權於重鎮或饑徭之太甚或邊釁之多開揆其
致事之由究因失德之故今借卦教而造逆本非失
業無所賴之民矣

禁地以肆邪出乎人情不及料之外

聖心之慈祥愷惻本共白於臣民

聖德之正大光明亦無慚於史冊

皇上乃以返躬之誠爲昭事之本哀無罪則推原於

教化之未至訓有位則引咎於人政之未宜苟有心
知能無感泣雖至頑鈍亦當奮興臣敢不滌慮澡神
竭謀致力盡當爲之職事戒積習之因循冀荅

高深稍寬尸素所有

臣

凜遵感悚下忱謹繕摺具

奏叩謝

天恩伏乞

皇上睿鑒謹

奏

賜御書福字恭謝摺子

戊寅

竊臣齋摺差弁回粵捧到

恩賞

御書福字鹿肉麋肉山雞一分並奉

硃批書福錫卿以迓春喜欽此當卽恭設香案望

闕叩頭祇領訖伏念

臣渥邀

厚植忝任連圻

鰲陞瞻

顏憶趨承於隔歲羊城移節愧報稱於

高天值茲改歲之初倍切玩時之警迺荷

奎章親御

溫諭特頒旣

普錫以春禧復

寵分夫珍饌斂時敷錫

聖主以福

臣

耆福民宣

化承流

微臣

敢不以迓

恩者迓喜

臣

惟有勤思綏靖推

洪福於兩粵東西敬體

柔懷布

天福於重洋內外冀佐

盛隆之治稍寬尸素之譏所有感激欣幸下忱理合

恭摺具

奏叩謝

天恩伏乞

皇上睿鑒謹

奏

李甲

天恩光

遠土觀望

擘經室四集卷二

重修高密鄭公祠碑

元嘗博綜遺經仰述往哲行藏契乎孔顏微言紹乎
游夏則漢大司農高密鄭公其人矣公當炎祚陵夷
清流沈錮泊然抱道邃情墳典却謝車服隱德彌修
所學易書詩禮春秋論語孝經箋注百餘萬言石渠
會議無以逮其詳貫扶風教授不足擬其旨趨又嘗
比核算數甄極絃緯兩京學術用集大成天下師法
久而彌篤固不以齊魯域焉今
皇帝惇崇儒術表章經學

纂定三禮義疏多采鄭說是以海內學人翕然依嚮
言性天道無敢騁其虛悟禮度書文靡不通其原本
庶幾孔壁簡策得以訓言儒生耳目未傷瞽瞍被公
之教斯爲至矣公墓祠在高密縣西北濰水東岸四
牡結轡于鄭公之鄉高車竝軌于通德之門是北海
太守孔文舉所開建也元以視學泣止斯土展省祠
墓地隄實甚宰木不捍于樵采驚沙坐見其飛積趙
商漢碑未傳於著錄承節摹碣埋蝕于泥土遂乃倡
搢紳之夙願鳩木石之工材始于乾隆五十九年冬
十月至六十年秋八月成掘沙百尺門防易以東向

植樹四垣饗堂翼其南榮聽事啟楹則長吏齋祀所
止息也茅廬栖畎則賢裔耕讀便蠲除也復將擢彼
秀異用請于

朝以奉登俎世世勿絕庶使大儒之祀不致忽諸之
歎治經之士無歉仰止之懷居斯鄉者績學砥行感
憤而起不益偉與爰樹樂石表德刊銘其辭曰

秦燄威經漢學證聖於鑠鄭公禮堂寫定網括衆典
束修懿行學徒知歸異說反正子雍多毀仲翔善諍
日月豈踰藐彼敏政礪阜之旁漣流湯湯草銜有帶
沙走無囊林薄新雉陰彼墜牆廟貌聿崇祀事孔明

長白之嶺別啓覺堂粵惟茲土司農之鄉

重脩會稽 大禹陵廟碑

粵昔五德代興紀號天中二典遞禪立都西北惟
神禹之陟降皆在江水治水之終始皆在會稽何者
履已西夷生蕙苾于石紐江之原也憂民東教封葛
桐于會計江之委也若夫黃帝中經所載宛委覆釜
所藏登臨夢發金簡玉璫出焉灑沈澹災底定者千
八百國其始通水之理實在會稽至于會諸侯詔羣
神誅後至者而大計其功黷踴已甚絞緘猶薄迄于
今參耕之畝宛然非古之上壟歟然則月逾庚子年

加申酉亦終乎此矣或謂九州修貢山川成書會稽
主名不著于冊然三江分派以浙水爲南支萬里岷
流指山陰爲歸宿古今遷異俗儒駭之是知胼胝勞
蹟必登茅山之巔成旅中興實存大越之祀也吳越
春秋謂少康封庶子無余於越春秋祠禹墓於會稽
漢書地理志會稽山有禹井禹祠是故陵之有廟其
來已古我朝

列聖相承繼舊蹟以平水土東南江海間幾勞太僕
之駕焉今嘉慶歲星次庚申

聖天子孝祀配天望辯維謹乃修階壇勤丹雘用承

祀事巡撫阮元來拜廟下以考其成巖壑盤鬱江海
深阻維茲廟貌巍然鎮之蠲精王帛如來百神之朝
馳慕風雲或降二龍之駕郁郁乎蒼水探穴于其初
元圭填德於其既固 夏后氏神聖之所發藏亦吾
聖天子之所以稽古帝報功德也爰作頌詩銘諸樂
石其辭曰

浙爲南江地臨越絕青泥藏書白雲出穴陵者葬陵
跡畱櫟樾農不變徒樹不改列厥有原廟肇祀少康
山川風雨日月陰陽階扶窆石棟抗梅梁聿新世室
載啓元堂昂星孕珠崙山輯王黻冕天容龍蛇古屋

伯益奉經庚辰侍輦封竝蒼梧廟同嶽麓 龍飛五
載障淮塞河錢塘樅石海無驚波新廟奕奕南鎮我
我神功

聖德今古若何馬祠遺法烏田修祀醵享金鼎符探
王笥漸海訖聲登山刻字被碑以文載之曷願

重修揚州會館碑銘

京師宣武門外揚州會館始建於乾隆初年汪君從
晉出白金四千金君門詔益金而成之者也其事詳
於舊碑六十年來頽壞日甚雖屢有修葺而莫能新
之和會堂聯星堂地勢甚卑鄰水來侵夏不能居牆

圯柱傾公車罕至嘉慶元年鄭君宗彝官吏部郎請於其叔鄭君鑑元得白金四千鮑君志道張君緒增黃君楫又各出白金一千乃合貲重修之和會堂聯星堂暨東西箱築基增高三尺許治其井堰水有所歸第三四兩院以次修立復建閣于聯星堂之東以祀神位焉先是屢欲修而未成今嘉慶四年歲次己未乃集事讀舊碑乃知創修者前己未歲也殆亦有數存其閒乎工旣成乃棊石紀名兼載圖事俾後之人知今義舉之盛必將有踵而行者使舊基無廢新構益增也勒以銘曰

江淮合城牛斗垂躔靈秀隩區人文出焉鹹鹹人文
濟濟甲第魏闕聯班春明竝騎斯館肇修己未之春
輪奐竝美桑梓同鄰堂開和會門接宣武公車之來
於時處處歲深垣圯莫芋莫凝瓦塵積草庭潦生萍
又六十年歲周己未惟我鄉人興廢舉墜乃構其堂
乃高其基庖廂具無不宜嘉樹可譽甘棠勿拜
藤垂紫綬藥翻金帶禮神之閣峙於其東文昌下照
其光熊熊孟夏之朔星珠聯瑞鳩工庇材適當其會
維我廣陵運會日昌元甲天下解領江鄉是科文武
解元會元
探花皆出揚州作此銘詞以栞樂石後有繼者永永無極

蘭亭秋禊詩序

在昔典午中移啓江東之雲岫瑯邪南徙持吳會之
風流山林之秘競呈觴詠之情咸盛雖悟老易之悵
猶切彭殤之悲豈非神州不復易興陸沈之歎中年
已往莫釋哀樂之懷鍾情既深發筆斯暢是以林表
孤亭結山陰之幽契定武片石傳永和之逸軌矣元
以嘉慶二年八月上已按部於越嘉賓在坐簿領既
徹游情共馳再揚曲水之波展脩秋禊之禮浴沂湖
典本無間于春風采蘭賦詩實有異于溱水是時清
風未戒白雲午晴幽谷屢轉重山爭峻發崇岩之桂

氣起秀麓之松嵐迴谿接步緬陳迹于古人爽籟入
懷屬高情于天表夫倦心既往者撫韶景而亦悲撰
志詠歸者臨蕭節而彌適況今

朝野殷闡敬修名教吾輩遊歷皆在壯年白駒未繫
動空谷之雕輪旅雁羣飛集江湖之素羽振翰無采
雖愧元長之才侍晏承

恩曾效廣微之對良會已洽清吟紛來內錄賓客戚
黨之詩外納僚屬生徒所詠凡有作者皆著于篇

謝蘇潭詠史詩序

在昔詠史之作肇於仲宣太沖然皆綜覽興衰論列

流品五言成製風已古矣自宣遠矢音於畱國延年
託詠於秋胡篇什所陳乃有專屬三良致哀五君興
感異情同調分合又殊有唐一代詠史七言惟周曇
孫元晏積數十百首然皆斷句罕見律篇未有上下
一千六百四載臚敘五百二十六人揚清風以作誦
激濁流而成諷如蘇潭先生之以律詠史者也先生
擢穎詞垣囊筆史局

講幄內直方岳西分政簡益清才優多暇嘉慶二年
移治兩浙以詩示元元出按婺括南極永嘉山水方
滋芳草未歇每手茲編情賞逾美觀其錯綜紀傳點

竄贊評鎔儷事於鑪錘飾高情以斧藻聞見殫洽故
所用者宏衡量均平故其論可定古今成敗燦然畢
覩君子於此得經世之大端焉若夫負聲振采竝擬
唐賢子美之慷慨沈雄王谿之縝密工麗發鼓吹於
唐音挾瀛奎之律髓七言能事咸備於斯又其取材
富博正史之外雜篇小說凡數百家昭明之選學在
樓溫公之草藁盈屋安得李善胡三省之徒爲此五
百章疏證之哉

四六叢話序

昔考工有三言青與白謂之文赤與白謂之章良以言

必齊偕事歸鏤繪天經錯以地緯陰偶繼以陽奇故
虞廷采色臣鄰施其璫火文王壽考詩人美其追琢
以質雜文尚曰彬彬以文被質乃稱馘馘文之與質
從可分矣懿夫人文大著肇始六經典墳邱索無非
體要之辭禮樂詩書悉著立誠之訓商瞿觀象於文
言邱明振藻於簡策莫不訓辭爾雅音韻相諧至於
命成潤色禮舉多文仰止尼山益知宗旨使其文章
正體質實無華是犬羊虎豹反追棘子之談黼黻青
黃見斥莊生之論矣周末諸子奮興百家竝驚老莊
傳清淨之旨孟荀析善惡之端商韓刑名呂劉雜體

若斯之類派別子家所謂以立意爲宗不以能文爲本者也至於縱橫極於戰國春秋紀於楚漢馬班創體陳范希蹤是爲史家重於序事所謂傳之簡牘而事異篇章者也夫以子若彼以史若此方之篇翰實有不同是惟楚國多才靈均特起賦繼孫卿之後詞開宋玉之先隱耀漢華驚采絕豔故聖經賢傳六藝於此分途文苑詞林萬世咸歸範圍矣賈生枚叔竝轡漢初相如子雲聯鑣西蜀中興以後文雅尤多孟堅季長之倫平子敬通之輩綜兩京文賦諸家莫不洞穴經史鑽研六書耀采騰文駢音麗字故雕蟲繡

悅擬經者雖改修塗月露風雲變本者妄執笑柄也
建安七子才調輩興二祖陳王亦儲盛藻握徑寸之
靈珠享千金於荆王至於三張二陸太冲景純之徒
派雖弱於當塗音尙聞夫正始焉文通希範竝具才
思彥升休文肇開聲韻輕重之和擬諸金石短長之
節雜以咸韶蓋時會使然故元音盡泄也孝穆振采
於江南子山遷聲於河北昭明勒選六代範此規模
彥和著書千古傳茲科律迄於陳隋極傷靡敝天監
大業之間亦斯文升降之會哉唐初四傑竝駕一時
式江薛之靡音追庾徐之健筆若夫燕許之宏裁常

楊之巨製會昌一品之集元白長慶之編莫不竝投
龍文聯登鳳閣至於宣公翰苑之集篤摯曲暢國事
賴之又加一等矣義山飛卿以繁縟相高柯古昭諫
以新博領異駢儷之文斯稱極致趙宋初造鼎臣大
年猶沿唐舊歐蘇王宋始脫恒蹊以氣行則機杼大
變驅成語則光景一新然而衣辭錦繡布帛傷其無
華工謝雕幾簾業呈其樸鑿南渡以還浮溪首倡野
處西山亦稱名集渭南北海竝號高文雖新格別成
而古意寢失元之袁揭冕弁一世則又揚南宋餘波
非復三唐雅調也載稽往古統論斯文日月以對待

曜采草木以錯比成華玉十穀而皆雙錦百兩而名
匹明堂斧藻視畫績以成文階彤笙鏞聽鏗鉉而應
節自周以來體格有殊文章無異若夫昌黎肇作皇
李從風歐陽自興蘇王繼軌體既變而異今文乃尊
而稱古綜其議論之作竝升荀孟之堂核其敘事之
辭獨步馬班之室拙目妄譏其紕繆儉腹徒襲爲空
踈此沿子史之正流循經傳以分軌也考夫魏文典
論士衡賦文摯虞析其流別任昉溯其原起莫不謹
嚴體製評隲才華豈知古調已遙矯枉或過莫守彥
和之論易爲真氏之宗矣我師烏程孫司馬職參書

鳳心擅雕龍綜覽萬篇博稽千古文人之能事已攬其全才士之用心深窺其祕王銍選話惟紀兩宋謝伋談塵略有萬言雖創體裁未臻美備況夫學如滄海必沿委以討原詞比鄧林在揣本而達末百家之雜編別集盡得遺珠

七閣之祕笈奇書更吹藜火凡此評文之語勒成講藝之書四駢六儷觀其會通七曜五雲考其沈博而且體分十八已括蕭劉序首二篇特標騷選比青麗白卿雲增繡黼之輝刻羽流商天籟遏笙簧之響使非胸羅萬卷安能具此襟期卽令下筆千言未許臻

茲醞釀也元才圉陋質心好麗文幸得師承側聞緒
論妄執丹管而西行願附驥尾而千里固知盧王出
於今時流江河而不廢子雲生於後世懸日月而不
刊者矣

福謹案司馬孫公乃太平府同知
名梅烏程進士丙午科房師也

葉氏廬墓詩文卷序

乾隆歲庚戌元與葉雲素先生

繼

相識于京師蓋同

出朱文正王文端二公門下也先生學術深厚貫通
古今至性過人篤于實踐執親之喪疏食廬墓其事
見於汪稼門制府尺牘中嘉慶歲辛未先生子東卿

以尺牘詩文卷屬序之元嘗讀禮記曰墟墓之間未
施哀於民而民哀每歎斯言以爲肫摯況親喪斬然
邱隴未乾者乎墟墓之間情境非一禮記所謂哀者
風聲月色雪地霜天實爲砭骨刺心直發天性也夕
陽欲暝樵牧歸散麻衣不溫孑然獨立松柏翳其寒
色桑榆收其晚景少焉風入林表聲如遠濤悲從中
來未有不潛焉出涕者矣或若生魄之月低至下春
樹影雜亂露氣泣濕徙倚俯仰四無人聲時有伏兔
竄出淺草或冀此時得聞太息及其終不可見夜已
鄉曙噉然以號曷可言已又若夜雪初曉積素滿山

獨來墓門埽數尺地布藁而坐微風振于木末飛糞
落于懷袖寒晨霜重策杖草逕皚皚滿履時撻棘刺
寒節有黯然之色樂人有怵然之心一身若朽百念
盡灰先人邛邱敝廬丙舍若將終焉可也且夫熙攘
之跡馳驅之勞人世所不能無也苟爲流俗所染境
致乎炙熱紛華之地情靡於從風迴憶家山阡墓間
風霜雪月情境若此未有不澹然慘然自發其天性
者也以此言哀哀何如之嗚呼彭殤雖達非齊藁槨
之物閭廬可恬奚叅蒲褐之坐用我儒修敷此禮說
二氏之誘知不溺矣

歷山銘

乾隆六十年龍集單閼七月庚戌朔

起居注日講官 文淵閣直閣事詹事府詹事提督

山東學政儀徵阮元遊登歷山勒銘樂石其詞曰

登彼翠微堂基戴石岱麓分陰媯田啓陌雷雨坐生
峯巒競碧樓駕三重崖懸百尺繞牆虹落穿閣雲飛
碑頭六代松要十圍岑苔籍屐天花滿衣磴隨客意
嵐成佛輝下涌泉源清交水木湖平鏡揩城迴帶曲
野氣沈邨林煙隱屋兩岫同秋千塍共綠平原似海
曉日開天燕齊道直蓬萊影圓山棲壽佛臺降飛仙

後之來者亦百千年

注曾子研銘

中四惠通六藝省言行謹身世測天員窮禮制聖所
傳賢勿替

落日餘霞研銘

己未秋日借邸于京師衍聖公

賜第退直後少得清暇因銘研云

落日就暝餘霞在天蟬吟高樹魚唼涼泉蕉花垂露
竹葉含煙羊鐙統扇几席清妍

白圭詩館研銘

白圭之玷猶可磨斯言之玷不可譌

詩不可爲也爲讀若平秩南譌

之譌譌化也

立行有玷更若何

水師正威大銅礮銘

赤堇之質黃金之色瀆神脩貢自交趾國長贏兩尋
規圓繩直嘉慶五年天風蕩賊斂而祐焉全其本德
歸正服逆允宣厥職駕海奔雷萬鈞聲力值發無虛
當堅必克守我浙東制彼遐域元戎寶之視茲銘刻

官齋精舍銘

構茲精舍三筵之地銘於坐隅所以自治無欲乃澹
先明厥志毋躁乃靜道遠勉致坐而共圖行省之事

以此保民以此計吏虛已集益委懷分寄賢者守堅
能者耐勤曰恕與忠曰仁與義不計其功務正其誼
勿近于名勿放于利放利民傷近名政僞勿安于陋
勿舞其智舞智必窮安陋多蔽勿懦而隨勿激而肆
操勿迫蹙寬勿廢墜廉勿矯俗居勿求備士狹齒繁
情滴用匱惟其太平更難撫字否毋諱疾泰毋侈瑞
令煩愈擾事監不緻闕當速補過戒終遂平情持準
難說使器中不逾情庸不立異心鎮常安神清多識
制行實難矢口則易凡茲恒言學焉未至靜思自箴
靖共爾位

寶龢鐘銘

臣元受

兩朝恩侍從禁近備官司徒惟

帝五年歲在己未

命臣撫浙臣辭

帝手詔曰卿宜力任仔肩爲朕宣猷贊化臣拜受

命撫浙三年海濊未徹風雨未蘇作器能銘臣何有

焉惟

帝八年春二月丁酉初吉越二十六日壬戌臣父

年七十受祿于

帝封光祿大夫敢作寶龢鐘以應中春莢鐘之律以
蘄眉壽綰綽多福以對揚

天子丕顯休命阮氏子子孫孫其永寶用之

刻扇鐘銘

惟

帝八年春二月丁酉初吉越二十有六日壬戌臣

父年七十受祿于

帝封光祿大夫用作刻扇龢鐘以應中春莢鐘之律
將命銅史金徒運其甲子司其商刻而自擊之嚶嚶
雝雝以蘄眉壽于無疆以對揚

天子丕顯休命阮氏子子孫孫其永寶用之

警鐘銘

時至則鳴鏘然而警叫且戒晨雖夢亦醒士稚雞聲
彥國圓枕趨

朝涖政視此乃寢

古甌鐘銘

惟嘉慶八年秋八月浙江巡撫臣阮元觀

帝于樂

帝錫宴三錫玉如意一荷囊四刀一衣一襲暨鹿戴
荔支之屬臣元敢拜頤首用對敷

天子丕顯休命九月戊午臣歸浙紀

帝恩命刊銘古龢鐘永寶用之

揚州隋文選樓銘

揚州隋文選樓巷多見于宋王象之輿地紀勝等書
隋曹憲以文選學開之唐李善等以注選繼之非昭
明太子讀書處也羅願鄂州集所謂文選巷劉氏墨
莊亦其地也予之宅爲選巷舊址嘉慶十年冬遵
先大夫遺志于家廟西建隋文選樓樓下爲廟之西
塾樓上祀隋祕書監曹憲以唐沛王府參軍公孫羅
左拾遺魏模模子度支郎景倩崇賢館直學士李善

善子北海太守邕句容處士許淹配之嘉慶十二年
服除乃爲銘曰

文選樓巷久著於揚曹氏荆隋李氏居唐祥符以後
厥有墨莊阮氏居之廟祀江鄉建隋選樓用別于梁
棟充書秩窗散芸香刻銘片石樹我山廡

南宋尤本文選卷首畫象銘

蕭選曹注學傳揚州貞觀之後是有選樓貴池宋本
桼板始尤海內罕覩數帙僅畱雷塘菴主樓居邗溝
錦緘展校髹櫝曬收繪象卷首一笠橫秋

西瑯阿侍御摹坡公笠屐圖贊

彼何人斯既笠且屐偶然類君誰主誰客冒雨團團
衝泥策策欒隔涼雲山畱遊跡孰柱其冠孰文其舄
惟此笠屐於道大適儻曰東坡未異肥瘠我屐欲蠟
與此同癖細雨斜風蒼苔白石

方維祺太守以我觀我圖贊

大學修身顏子克己觀我之道本爲儒理易觀我生
无咎卽吉豈無進退道不敢失

桂林隱山銘

并序

余生辰在正月廿日近十餘年所駐之地每於是日
效顧寧人謝客獨往山寺嘉慶廿四年余歲五十有

六駐於桂林是日策數騎避客于城西唐李渤所闢
之隱山登降周回串行六洞煮茗讀碑竟日始返竊
以爲此一日之隱也爰作銘辭刻於北洞

士高能隱山靜迺壽濬之主名闢此奇秀一山盡空
六洞互透不鑿自通雖探莫究穴無雨來岩如天覆
虛腹開潭垂乳滴溜寒澈鏡奩響傳壺漏引月入峽
吸雲穿竇磴曲風搏泉清石激仰壁藤垂摩碑苔繡
蓮憶古香桂疑秋瘦招隱巖前朝陽洞右涼堂北開
高亭東構獨出春城清遊晴晝曉嵐入懷夕陽滿袖
一日小隱千年古岫何人能復西湖之舊

隱山唐在
西湖中央

有荷有舟境地
更奇今爲田矣

宋硯銘

古人之硯古之式用以擘經發守墨凡事求是必以
實如石堅重效於國

端溪璞石硯銘

荆山之璞以爲良璧曷若不鑿之守其黑于石

粵溪茶坑天然大硯銘

粵溪之石泐于往古苔斑繡岑松皮漚雨磨爲巨硯
以鎮書府書以銘之雷塘葦主

茶坑硯山銘

端溪片玉松煙所浴石壁畱紅天池瀉綠澁浪低生
纖雲橫束畫意詩情大癡一幅

端溪老岩研山銘

端溪一卷因其自然以爲硯山古蘚爛斑

西齋銘

西齋老圃似野人家無多籬落少著桑麻硯惟墨守

天有綠遮端巖列翠讓木分極齋前有二木相讓井泉本爽

階水勿斜南雄有斜階水榻橫蒲席窗護葛紗鸚母啄稻鹿

女踏花離枝摘荔引蔓縣瓜長匏扁豆素馨紫茄圍

樊觀槿欹廊煮茶滌煩習靜存樸黜華學爲圃者忘

在官衙

乾隆癸丑仲冬上丁祭曲阜

孔廟文

於戲 孔子傳道

帝躬用治斯世斯道乃隆堯舜賢遠文軌大同

帝敬 孔子禮備儀崇

幸魯釋奠講學

臨雍教被瀛漠豈惟域中元奉

帝命視學於東津逮洙泗仰止 聖宮凜承時祭癸

丑仲冬瞻俎習禮循墻慕恭宗廟既入百官景從壇

杏化兩庭檜古風簾鳴金石壁振絲桐兩楹之間三
獻既終轍無歎鳳室拜蹲龍神志雖肅精誠詎充

聖道如天敢希格通惟

聖之裔子孫其逢

逢大也
洪範斷

句與從
同爲韻惟

聖之鄉多士質忠以元謨陋秉鐸何功

聖人佑之啓秀發蒙斯文在茲天下所宗

帝方籲俊

聖惟達聰

祭天目山神文

天目兩山作鎮杭湖出雲降雨匯于具區惟吳淞口
入海尾閭洞天福地

神明所都雷與電掣龍起雲敷開晦霽陰風爲驅除

宜晴而晴野無沮洳宜雨而雨暎者立蘇
神功聖德佑民非虛近年數郡水旱堪虞田未豐穰
潦浸田廬長吏省愆政刑有渝未能感召致鮮嘉符
今致潔蠲民隱上疏香醴入山牲帛載途拜求
靈佑惠此越吳蠶桑倍收麥稻大餘功佑

聖世恩及農夫疆吏祈報謹竭其愚

聖經室四集詩卷一目錄

琅嬛仙館詩略

己酉

雨後過瀛臺

家吾山少司寇

葵生

屬題裴園編修

學浩

勺

湖草堂圖

庶常館聽寒柝

庚戌

崇效寺法源寺看花晚集楊荔裳

揆

舍人齋

中

皇上萬壽恭進宗經徵壽說文冊

聖經室四集

詩目錄

一

恩賜大緞恭紀一首

辛亥

御試賦得眼鏡

二月 大考紀

恩一首

同沈雲椒少宰

初

南書房散直

賜貂裘恭紀

壬子

初秋同孫淵如

星衍

言皋雲

朝標

兩同年遊

萬泉寺涼水河後數日招同沈雲椒少宰那

東甫彥成同年再遊

牛欄山

密雲縣迎

駕

癸丑

泉宗廟扈

駕

御園道中

芭蕉

灤陽道中

澤經堂四集

詩目錄

月夜過趙北口

兗州道中

發落卷

曲阜城東

甲寅

萊州試院曉寒

寒亭

登州雜詩

登州聽海濤聲

過黃縣

題秦二世琅邪臺石刻

泰山碧霞元君廟

瓶中碧蓮

雨後泛舟登滙波樓

山左學署八詠

小滄浪亭

明鐵太保祠

秋日同徐太守

大榕

至龍洞遂遊佛峪還憩

壽聖院揭元豐順應侯碑

泝上海棠秋日作花

靈巖山

同人登岱至對松山日暮而返

登嶧山

鄒縣謁孟廟晚宿孟博士第中

早行

詩卷二目錄

乙卯

喜晤焦里堂

循

姊丈於東昌寄懷里中諸友

自禹登山白雲峯東三里至佛峪

歷城白雲峯西北至錦屏巖憩壽聖院

壽聖院西南石壁上有龍洞出入里許

由龍洞巖下西過三龍潭十里至黑峪而返

復至佛峪

寒食日長山縣道中雨

過臨淄縣齊侯墓

題江寧孫蓮水

韶

漢上舊遊詩後

海棠

木筆

萊州蜉蝣島

題海濱獨立圖

登蓬萊閣

過華不注山

小滄浪亭雅集和馬秋藥前輩

履泰

五日濯纓橋小集遲馬秋藥前輩小疾不至

以詩來卽和原韻

小滄浪亭

東孫淵如同年

四照蓮

題何夢華

元錫

林外得碑圖

獨遊佛峪

爲新城王文簡公書立墓道碑

渡河

展母墓

敬題

御賜惲壽平撫元人萬竿煙雨圖

敬題

御賜惲壽平撫黃鶴山樵松崖翠壁圖

丙辰

嘉慶元年正月人日射鵠子於浙江學署之

西園卽事聯句

題胡雒君虔環山小隱圖

秦小峴觀察

瀛

招遊西湖晚謁表忠觀適錢

裴山同年

楷

過訪未值有詩見投報以一律

渡錢塘江呈同舟諸友

梁湖道中

過謝氏東山

上虞縣

恭進

授受禮成文冊蒙

賜蟒袍一件荷包一對恭紀

會稽山謁 大禹陵

女桑

曉雨後登吳山

五月二十一日曉登吳山雨霽復泛西湖

卽事

七夕

修暴書亭成

題錢可廬明經

大昭

蕉窗注雅圖

桂蕊

題董文敏摹趙文敏鵲華秋色圖

金井梧桐歌

湖州懷吳菌茨太守

丙辰重九登靈隱石筍峯

陳古華太守

廷慶

同爲桐江之遊至嚴州而

返投詩贈別賦此爲報

和陳古華前輩桐廬道中韻

嚴州七里瀧漸江水

印泥

春夜江上聞角聯句

詩卷三目錄

丁巳

桐廬九里洲梅花三萬餘樹侍 親登岍遍

遊奉 命賦詩

金華夜泊

夜至永康縣

枯蒼山雨歌示諸生端木國瑚等

題方湛厓

溥

所藏張南華

鵬神

雲溪圖卽用

南華元韻

遊古永嘉石門觀瀑布

白麗水放舟至永嘉四首

將由溫州至台州過雁蕩前一日宿扶容村
曉過四十九盤嶺至能仁寺

大龍湫歌

常雲峯

寄雁蕩

過馬鞍嶺

卽景

淨名寺蔬飯

試雁蕩山茶

登靈峯望五老靈芝諸峯

度謝公嶺望老僧巖

遊石梁洞

石門潭

出山宿大荆營

小窗

咏鐵拄杖

與興化顧藕怡

仙根

遊山卽題其詩稿一絕

題謝侍御

振定

金焦夜遊圖

予在山左畜一馬甚駿及至浙不施鞍勒者
輒浹旬日柔脆以死詩以惜之

題王蘭泉司寇

和

三泖漁莊第七圖

張子白同年攜穉石翁畫至杭州展讀於定香亭上題詩記之

七月十一日同人過西湖晚泊湖心亭看月

海寧安瀾園雜詠

八月望後至海寧州登海塘觀潮

秋桑四首

題道場山歸雲菴孫太初墨跡卷後

謝蘊山前輩屬題蘇潭圖

題凌次仲教授

廷堪

校禮圖

詩卷四目錄

戊午

上元後一日春讌和謝蘇潭方伯韻二首

五更過蘇堤列炬中見桃柳正妍

半山桃花十餘里春仲偕人兩次來遊元和

蔣蔣山

徵蔚

武進陸祁生

繼輅

陸紹聞

耀適

皆有圖詠紀事因題冊中

上巳桐江修禊

溯嚴瀨至蘭谿

金華試院宋白公堂後雙古柏

冒雨由縉雲趨麗水道出桃花交青黃龍諸
嶺雲氣萬狀勝於晴時

山花

春盡日阻風青田和張子白同年

若采

詩韻

重遊青田石門觀瀑布

蕉林驟雨

溫州江中孤嶼謁文丞相祠

五律

台州試院在城北龍顧山之麓有樓巍然名

曰四照書榜懸之

由臨海至天台

國清寺

華頂茅蓬

薄暮重過石梁

夜宿上方廣寺藏經樓

萬年寺題僧達本壁

天台山紀遊

竹垞詞和陸九

耀適

天台籐杖歌

遊山陰陶石簣讀書處水石洞

戊午五月二十六日靈鷲峯銷夏聯句

嘉慶三年西湖始建蘇公祠誌事

秋日任滿還

朝同人餞於西湖竹閣賦詩誌別

贈吳鑑人

曾貫

贈鮑以文

廷博

贈朱朗齋

文藻

贈何夢華

元錫

贈何春渚

淇

贈朱青湖

彭

贈周樸齋

治平

贈端木子彝

國瑚

題江子屏

藩

書窠圖卷

已未

會試闈中夜雨和

石君師韻

恭和

御製立秋日遣悶元韻

移竹

九月望

裕陵禮成旋

蹕復奉

羣經室四集

詩目錄

七

命敬閔

山陵工程謹成八韻

趙忠毅公鐵如意歌

題宋高宗瑞應圖同彭芸楣館師作

題五代馬楚復溪州銅柱拓本

暖房示書之

武林歲暮

詩卷五目錄

庚申

春日台州

庚申正月督兵海上往返天台未能入山

天台大雪三日守凍剡溪

守凍

送趙介山

文楷

殿撰李墨莊

鼎元

舍人奉

使冊封琉球

題孫淵如觀察萬卷歸裝圖

綠葉

題西湖第一樓

題徐碧堂司馬

聯奎

秋艇狎鷗圖二首

贈李西巖總鎮

附李壯烈答詩

上虞道中

天台行帳題楊補帆

昌緒

畫天台桃源圖

台州夜坐

初秋台州獲安南海寇事畢曉發回杭州

寫榜作

漪園晚眺

仲冬詣天竺復過靈隱蔬飯冒雪登西湖第

一樓

浙東賑災紀事

屬王椒畦同年畫珠湖草堂圖卽題

題王椒畦畫金華載詠樓圖

登八詠樓

卽事

桐廬九里洲看梅花四首

辛酉

賦得雷乃發聲

蘇隄春曉

二月十七日過臯亭山看桃花用六言律體
廿三日自海塘迴舟曉過臯亭復成一律

登鎮海招寶山閱新造水師大艦

臘月朔日入山祈雪出山過詒經精舍訪顧

千里

廣圻

臧在東

鏞堂

用去年得雪詩韻

壬戌

曉至西溪祭

社稷壇

海寧州迎潮

安瀾園小憩

自乍浦彩旗門觀海至秦駐山

題汪蛟門先生少壯三好圖

秋日西湖泛舟

駐杭州時每九月花奴自揚州載菊來奉

親宴爲寫秋江載菊圖題之四首

同人分詠古十印得劉淵之印

置西漢定陶鼎於焦山媵之以詩

浙撫署東偏誠本堂巨石嘉慶七年移立澹

凝精舍方池中以予字字之曰雲臺峯用蘇

黃壺中九華倡和詩韻

詩卷六目錄

癸亥

癸亥正月二十日四十生日避客往海塘用

白香山四十歲白髮詩韻

澹凝精舍卽事

吳蜀師甄

與諸友分賦商周十三酒器爲堂上壽得

商父丁角

爲朱椒堂爲弼題朱氏月潭八景圖冊八首

白題珠湖射鴨圖小像

澹凝精舍卽事

綠陰課詁經精舍擬作

澹凝精舍初夏

那東甫同年由廣東奉

使過浙賦贈

飛霜鏡引

壬戌孟夏由靈隱徒步過韜光菴直上北高
峯頂癸亥孟夏又至雷題觀海畫卷

夏日過雲棲

西院平臺落成

虎邱後山小憩

沂州道中二首

曉過敖陽

羊流站

自新泰至泰安登岱夜宿 孔子廟曉觀日

出作

癸丑七月赴山東夜宿新城縣南今復以癸
亥七月入都過此以一絕紀之

出古北口

上親獲鹿於山莊得

賜割鮮

過普陀宗乘須彌福壽二廟

萬樹園

賜宴恭紀一首

中秋日山莊

恩賜曲宴用唐王建詩韻

過青石梁用陳雲伯顧鄭鄉

廷綸

倡和詩韻

秋柳

題錢裴山同年使車紀勝圖

馬秋藥光祿用曹唐遊仙七律體爲古人贈

答詩倣擬三首

珠湖草堂因洪湖汎濫屢在水中癸亥入

觀過揚州尙無水患小住一夕分題八首

夜宿母墓

癸亥九月十九日與諸故友相聚於平山堂
爲展重陽詩會卽以贈別

九月廿一日爲金焦之遊

重題秋江載菊圖卷二首

題桃花春浪渡江圖

冬至前澹凝精舍閒坐

甬江夜泊

題陳默齋參軍

廣寧

攤書圖三首

種園葵

冬至測晷

臘月十九日拜蘇公祠

立春日

恩賜福字恭紀

詩卷七目錄

甲子

題陳曼生種榆仙館圖

復與諸友分賦商周十三酒器爲堂上壽

得周兕觥

春日漪園卽事

題秋平黃居士

文賜

淨因張道人

因

埽垢山

房聯吟圖

朱右甫

爲弼

摹輯續鐘鼎款識作秋齋摹篆

圖因作論鐘鼎文絕句十六首題之

由永康至縉雲

過桃花嶺

山花四首

觀青田石門洞天瀑布夜宿洞口

由溫州渡江至樂清

遊天台桐柏宮觀瓊臺雙闕

宿國清寺

雨中至高明寺

雨後至石梁觀瀑宿上方廣寺

曉發石梁

萬年寺前古樹

山禽五首

回杭州

題牡丹巨蝶畫屏

桐花落白綿名曰桐綿咏之

晚過西湖

古之蘭乃澤蘭非今之蘭也種之階下并繪之

題畫扇三種花

八月十五闌中作用坡公八月十五催試官

詩韻

附徐司馬

聯奎

和詩

試院煎茶用蘇公詩韻

題朱椒堂西冷話別圖

修西湖

行宮畢奉安

仁皇帝

純皇帝龍牌恭紀

題和內子畫歲朝圖獻 堂上韻

乙丑

安瀾園月中作

命海塘兵剪柳三千餘枝遍插西湖并令海
防道以後每年添插千枝永爲公案
行賑湖州示官士

詩卷八目錄

文選樓詩存

丁卯

辭雷塘墓菴

渡河

月夜拜滕文公廟

曲阜鐵山園贈衍聖公孔治山

慶鎔

內弟

河間

定興曉發

渡滹沱

渡漳水望銅雀臺遺址

廣王右丞夷門歌

陳畱懷古寄示二弟仲嘉亭子常生

大梁除夕

戊辰

答陸九

耀通

大風霾登吹臺

過密縣

中嶽嵩高詩三首

嵩山三石闕歌

嵩陽隱居

大梁

嵩嶽歸步禱得春澤誌喜一首

臨淮關阻雨

戊辰五月辦賊至寧波爲前提督壯烈伯李忠毅公建昭忠祠哭祭之

初秋澹凝精舍小憩

題曲江亭圖

題曹夔音摹趙松雪樂志論圖卷

拜岳鄂王廟

分詠歲寒雜物二首

將渡錢塘江夜宿六和埭院

姚江舟中除夕

庚申六月余乘風破安南寇船于台州獲其
四總兵印銷之爲劍今八年矣戊辰冬復剿
蔡牽于海上夜舟看劍寫詩劍匣

已巳

題何夢華上舍訪書圖

靈隱置書藏紀事

題趙忠毅公癸卯年白書詩卷後

蔣蔣邨學博

州

請書厲樊榭徵君墓碑置祭

田

八月十五日浙江提督邱公

良功

會福建提

督王公

得祿

於寧波普陀洋十七日先追及

蔡牽於台州魚山洋擊之十八日復會擊之
於溫州黑水洋沈其船牽及其妻子皆死於
海詩以誌慰

題家藏漢延熹華嶽廟碑軸子

題北湖摹碑圖

貞觀金塗造象阿彌陀銅碑歌集翁覃溪先
生齋中作

屠棐鴈庶常

倬

將出爲縣令所寓京城米市

胡同有古藤二株白繪圖卷索題

詠絮亭以畫冊寄索題

題朱野雲處士

鶴年

祭研圖

詩卷九目錄

庚午

與諸表兄弟共建

外祖榮祿公林氏祠堂

於揚州陳家集

天后宮側記事一首

已未借寓京師衍聖公邸曾栽竹三叢藤花

兩本庚午再寓添栽槐柳桃海棠欒枝丁香

并舊有古槐榆椿棗穀共三十餘株記以一

律授之館人

門生屠琴鴈以翰林改宰儀徵翁覃溪先生
倡詠餞送遂亦以詩贈行

綠樹

題內子綠靜軒圖

題陳受笙

均

十三鏡齋詩稿後

題陳迦陵先生填詞圖卷

題女蘿亭香影移梅詞意圖卷

昌運宮白皮松歌

覺生寺觀永樂大銅鐘

雨後遊萬柳堂

京師揚州會館第三層院中種竹百餘竿題

其軒曰小竹西

新秋月夜

過瀛臺見秋荷盛開

辛未

唐花歌

秦小峴少司寇

予告歸田餞之於萬柳堂卽題其城西草堂圖疊
司寇和余萬柳堂四律韻

二月十八日雪後獨遊萬柳堂題壁間元人

雪景畫中

寒食日偕朱野雲遊萬柳堂夜宿寺中清明
日復看花柳

上巳日萬柳堂同人小集看野雲處士栽柳
和翁覃溪先生韻

野雲處士種柳萬柳堂自作圖卷屬題

與法梧門前輩

式善

同遊西山先過八里莊

慈壽寺

渡桑乾河入西山登羅睺嶺

游潭柘山宿岫雲寺倚松閣

遊戒臺寺

戒臺寺古松

途中小雨

獨遊萬柳堂

辛未初秋移寓阜成門

卽平澤門

內上岡新居有

小園樹石之趣題壁四首

中秋小園鐙月

同野雲山人小園坐雨

昌運宮爲古道院白松七株虧蔽霜雪松下

青苔平鋪竟地雨後來遊聞無人迹

研背坡公笠屐像

聽福祐孔厚諸兒夜讀

王楷堂比部

廷紹

齋中七尺端溪大石硯歌

種菜

題吳荷屋

榮光

登岱小照

題圖

韜布

曹學閔

二公戒壇祠圖

題書之靜春居圖卷

壬申

小園初春

三月二十日

駕幸南苑大閱恭紀

夜宿萬柳堂贈覺性開士和翁覃溪先生韻

小園雜詩

首夏奉

使山西辦蒙古阿拉善鹽池事內子餞於小園率

賦

過井陘關

太原晉祠

晉水

懸壺山

臺駘廟

聖母祠

古柏

貞觀晉祠銘

涼堂

曉涼

磁州滏泉道中

正定喜雨

小園

寄題焦里堂姊夫半九書塾八詠并示琥甥

中秋小園鐙月

出古北口四百里至木蘭圍口

木蘭山口

初用眼鏡臨清舟中作

題張淶卿

詞

露華榭稿

拜汶上分水廟

仿鑄漢建初銅尺歌和翁覃溪先生

十二月十一日夜宿海州雲臺山東海營次

日閱兵

過海州板浦弔凌次仲教授

詩卷十目錄

癸酉

高郵雨後舟中歌

泊瓜洲督運自題江鄉籌運圖

題郭頻伽

唐

神廬圖卷

題蝶夢園圖卷用董思翁自書詩韻

遊淮陰柳衣園憶京寓蝶夢園

隋宮瓦

題柳徑停雲圖卷子三疊萬柳堂詩韻

緯代賑

重陽泊天津登芥園小樓

甲戌

春草軒詠春草寄仲嘉二弟

與王柳邨處士

豫

丁柏川觀察

淮

方靜也茂

才

士俠

焦山僧借菴同立焦山書藏詩以紀

事

賀翁覃谿先生重赴甲戌科

恩榮宴

過珠湖草堂用白題射鴨圖舊韻二首

夜宿雷塘墓菴

曉發攝山

雨後過青陽五溪登望華亭看雲中九華山
九華憶古二絕

舟過小孤山

冬至日雪窗偶成

登滕王閣

詠十三金石文房

甲戌除夕接雷塘庵僧心平書詩以答之

乙亥

齊侯鬯歌

伊墨卿太守

秉綬

由閩赴都過南昌賦別

用余家瓜洲紅船爲式在南昌造船以爲救生諸事之用瓜洲船乘風歸去三日至瓜洲矣

夏夜雷雨題楚夜雨雷鐘銘宋楊本冊

夏夜

讀吳穀人前輩

錫麒

有正味齋續集卽用見

寄原韻和寄

題雪窗圖卷用去年韻

丙子

正月八日立春游百花洲

春雨

百花洲春晴

百花洲課士作得花字

以沈檀爲勾股形筆筒嵌鏡於其弣處卽以爲硯屏照墨也刻詩代銘

題金帶圍花開宴圖

將由豫章赴中州過廬山作

大梁丙子立冬後一日卽得雪四寸再疊雪

窗圖韻

治大梁撫署後圃偶題

臘前三日將出都與野雲山人同宿萬柳堂
覺性開士方丈曉行賦別

十二月過趙州茶亭僧舍

丁丑

春日安陸道中題王鑑畫楚山清曉卷

彝陵峽口望蜀江

荊州懷古

泊調絃口

荊襄雜詩九首

靄園聽鶯

閱洞庭水師畢登岳陽樓

望君山

丁丑九月十一日謁南嶽廟遂登祝融峯

頂

唐懷素緣天庵

遊浯溪讀唐中興頌用黃文節詩韻

過瀟湘合流處

自湖南零陵入廣西全州避雨宿湘山寺次

日曉發

詩卷十一目錄

丁丑

桂舟三章章四句

登沙角礮臺閱水師畢卽乘水師提督之兵
船過零丁外洋看大嶺山望老萬山回澳門
閱香山兵因題船額曰瀛舟

戊寅

初食荔枝

節樓前木芙蓉

詠玻璃窗

肇慶七星巖下校武望石硯山

伯玉亭節相寄示臨安平夷紀事詩書畝二
首

自梧州泝灘江經龍門劍窖之險

桂林微雪疊雪窗舊韻

桂林除夕憶雷塘庵僧心平

己卯

隱山三章章四句

八念八首

登桂林棲霞星巖隱山諸崑洞

桂林春望

桂館春夜初晴

憶江南春

送春日去桂林

柳州柳侯祠

龍賓道中

上林道中

由賓州至邕州過崑崙關觀狄武襄進兵處

下橫州烏蠻大灘拜馬伏波將軍廟

嶺南荔支詞

賦得喜雨課兒擬作

夜宿清遠峽曉登峽山飛來寺

英德道中

度梅嶺

東林道中詠肩輿瓶中桂花

過淝水

鳳陽漲阻夜泊

宿趙北口

正大光明殿

萬壽宴蒙

恩親賜杯酒恭紀一首

渡淮有懷河北諸公

偕仲嘉宿雷塘庵樓

結蘇亭于木蘭院竹南古銀杏北

選樓蠟梅

偕張芟塘

維楨

步過渡春橋小憩倚虹園

風雪夜行縱陽江

舟中望廬山

由南康入蠡澤

宗舫

梅嶺張文獻公祠看梅花

度梅嶺用前韻

庚辰

望遠鏡中望月歌

鸞羽歌

端州北岩綠硯石歌

桂林陳相國元孫繼昌中庚辰狀元且爲解
會三元廣西蓮盦方伯有詩紀盛和韻一首
粵西平樂峽中

新秋夜行陽朔灘水上

庚辰嶺南除夕

辛巳

西齋待月

壬午

過合肥見陸廣文

繼輅

出示文集談杭州舊

遊

壬午述職歸過珠湖草堂

及門陳雲伯

文述

爲江都令尹邀遊焦山作

詩卽和雲伯韻時同遊者王柳邨僧借庵令
尹之子裴之柳邨之子屋余弟亨

西南風阻畱住采石磯太白樓

大姑山阻風看月

落日放船好

大暑節坐滄江虹紅船由江都直達洪都江
湖夏濶月明如晝或阻風太白樓下晝看青
山夜臥皓月或乘風馬當山外夜濤澎湃俄
頃百里紀以一律寫畱船中

香稻米飯


大榕


述職後謁

昌陵回粵七月度梅嶺再疊梅嶺舊韻一首


余撫浙江江西皆曾修建鄉閭號舍今督粵
粵閭號舍七千六百餘間更湫隘皆改建寬
大之秋兼撫印監臨鄉試書誌一律

[illegible]









擘經室集

一三

卷一百一十五

AC 149 J8 Y36 V.13
摩經室四集詩卷一

琅嬛仙館詩略

已酉

雨後過瀛臺

淡虹殘雨壓飛埃

清籟霏微霽色開青鳥拂雲歸闌苑白魚吹浪過
蓬萊神仙此日應同駐車馬何人不暫回半嚮金
鰲橋上望水南猶自轉輕雷

家吾山少司寇

葵生

屬題裴園編修

學浩

勺


湖草堂圖

雲堞依春浦長淮瀉古渠輞川王氏宅笠澤陸家

摩經室四集

卷一詩

一



廬公本金閨彥文探玉署儲量才原有尺銜

命屢登車彭澤歌歸去天台賦遂初湖波通一勺
書卷富三餘賞雨宜茅屋看花奉板輿小山多桂
樹秋水足鱸魚烟柳才藏塔風蒲不礙漁過橋開
菡萏繞舍種絲苴陸屋東西住陶樓上下居燕泥
春戶敞螢火夜窗虛祕笈人爭借遺經我自疏山
東皆法鄭河北盡師徐詞賦傳司馬春秋學仲舒
名猶傳藝苑地不改經畬詎意洪河決旋教別墅
淤居人憂浥溼之子歎沮洳舊列門生籍來麾使
者旗幟香心暗記荒草手親鋤葑沼疏鬟水蘭堂

曳佩琚文翁新講室尉氏古門閭丙歲初經此申
年昔降子竊唫學使賦及拜侍郎裾地剩三篙水
家餘萬軸書竹林能免俗把臂意何如

庶常館聽寒柝

空街夜冷欲三更閣閣何人相競鳴靜掩蕭齋聞
斷續夢迴虛枕數分明催殘月影低無色敲碎霜
華落有聲明日早朝清漏急車中聽到紫微城

庚戌

崇效寺法源寺看花晚集楊荔裳

揆

舍人齋

中

匆匆春事月已三看花幾度來城南城南韋杜曲
復曲按記兩處尋伽藍入門嘉樹生衆綠柳絲榆
莢桑可蠶粥魚茶板寂無響珠宮琳宇深潭潭雜
花園殿作香界一瓣不著飛龍龕丁香細乳結瑣
碎棠棣弱幹垂馥馥何如三丈海棠樹千枝萬葉
相交參前度看花值紅雨小苞溼透臙脂含今朝
穠極色反淡鉛華爛漫春尤酣祇林奇卉我未識
毋乃此是優鉢曇惜難十日花下卧不及蜂蝶時
時探夕陽門外散金影歸來小巷同停驂元規有
塵拂扇落但以嘯詠生清談我雖不解酒中味一

杯目飲知其甘春鐙垂燼街鼓疊欲去不去情猶
耽相約更待鼠姑放借閒再訪枯禪庵

皇上萬壽恭進宗經徵壽說文冊

恩賜大緞恭紀一首

敬脩符典贊皇唐采段承

恩出尙方豈有高詞繪

天日猥蒙華袞被文章綵綸曉奉金門

詔經緯親歸

玉尺量共拜瀛臺

鑾輅下拂衣已染御爐香

聖經室四集

卷一詩

三

辛亥

御試賦得眼鏡

得他字五言八韻
大考一名

引鏡能明眼玻璃試拭磨佳名傳
綬黷雅製出歐羅窺戶穿雙月
臨池湛一波連環圓可解合璧薄
相磋玉鑑呈豪穎晶盤辨指螺風
中塵可障花下霧非訛眸瞭寧須
此瞳重不恃他

聖人原未御目力

壽徵多

二月大考紀

恩一首

乞假方期省故園

上年冬請假旋里省院阿公以大考將近不允

親掌敢

期親擢冠詞垣

元卷本第二上親擢置一等第一

會將一冊邀

宸賞

上年冬徵壽說文冊蒙

上閱元

所進宗經特賜衣緞

更幸連篇

被

御論

元大考詩疏中字句備上一覽記之舉以獎論

備尹

青宮堂有範

向來最優元蒙大考編檢陞任學士已為值

恩更擢少詹事

班西殿室皆溫

蒙勤殿

南書房行走

懋微臣何以

殫心力始荅

生成曠代恩

同沈雲椒少宰

初

南書房散直

華經堂四集

卷一詩

四

紫垣散直半斜陽殘暑迎秋尙未涼待得上車風
氣透東華門外晚荷香

賜貂裘恭紀

垂問衣貂未頒裘到從官

恩真同顧復

臣

本最清寒著雪趨金殿含香下玉

欄歸來面慈父持共采衣看

壬子

初秋同孫淵如

星衍

言皋雲

朝標

同年遊萬

泉寺涼水河後數日招同沈雲椒少宰那東

甫

彥成

同年再遊

鳳城南去鳳泉頭尋得招提一再遊
潦後苔萍畱野岸雨餘禾黍壯平疇
三叉小逕依村轉九曲清溪抱寺流
兩日不來風色老最宜秋亦不禁秋
蓼花蘆葉白縱橫車馬何曾此處行
重到游蹤皆一轍數人心跡總雙清
濯纓臨水歌相和拄笏看山眼倍明
我本忘情學機事灌園許聽桔槔聲
三月垂楊六月荷半年惜未此經過
門前高樹西風早橋外野塘秋意多
遠色蕭森歸別業詩心淡定對頭陀
誰知九陌黃塵外自有清涼十里河
望裏清光有所思湖山非敢憶葦絲
詩人會處須

乘暇游子歸時未有期野性消磨天趣少吟懷荒
落夕陽知晚來倚馬茶亭外一段高情讀斷碑

牛欄山

小山徑數里靈蹟連牛欄輪蹄歷磊砢頑石圓如
磐雜樹夾崖口木葉聲初乾迤邐入山腹宛轉拓
地寬人煙成小市氣聚無風寒出山攬山勢卑扈
且墮巒一綫白狼河入塞清流湍衝沙走東麓崖
澳相鈎盤順流望潞河北漕趨白檀夕陽自今古
駐馬爲盤桓

密雲縣迎

駕

重邑據形勢庠廡接白檀山分通塞遠水急刷沙
寒輦道依紅樹舟梁護碧欄

天顏初日霽共喜

聖躬安

癸丑

泉宗廟扈

駕

維皇濩德澤甘雨湛郊原曉晴雲尚瀆夏首綠初
繁東勾柳成谷西雉稻名村泉響蛤猶吠露涼蟬

未喧宮槐交翠蓋堤草藉

龍軒青疇契

宸賞黃屋瞻崇尊敷筵坐臨水

賜食共銜

恩清醴度雙闕于此鏡心源

御園道中

雲淡星爭出風微月有波五更殘雨歇四野嫩涼
多溼氣歸林薄清香發黍禾行行天欲曙休問夜
如何

芭蕉

閑心寥落依草木手種芭蕉數葉長
讀書略同抽卷軸煮茶聊與鬥旗槍
簾櫳微隔綠逾淨風雨不來心亦涼
何況昨宵聽浙瀝小窗藤枕復匡牀

灤陽道中

初陽照千峯向背分晦顯雲霞忽建標
嵐碧色已淺山村起炊煙輕風任舒卷
沙泉聲自清露草光猶泣策馬循迴溪
崖谷迷宛轉舉首望日輪東西始可辨

月夜過趙北口

燕南殘暑淡星河爲避秋炎月夜過
露草清香蟲

語細水楊疎影馬蹄多三更蟹舍明簾火十里虹
橋壓鏡波豈有公孫能避世太行西去隔滹沱

兗州道中

平田泉水自成渠村口秋林日影疎著我肩輿安
穩過半看黃葉半看書

發落卷

積案盈箱又幾千此中容易損華年明珠有淚拋
何處黃葉無聲落可憐冷傍青氈猶剩墨照殘紅
燭已銷煙那堪多少飄零意爲爾臨風一惘然

曲阜城東

庫門東去意蒼茫泗水西流向夕陽陵上白雲留
少皞地中黃土認空桑策書字在郊麟死鐘鼓聲
銷海鳥藏過客未談三古事莫教先賦魯靈光

門以大庭氏庫
得名他國無之

甲寅

萊州試院曉寒

渤海陽和尚未回曉聞昕鼓發輕雷山風入院旆
初動潮氣滿城關未開昨夜清樽思北海何人博
議似東萊此時頗讓江南客官閣春深落古梅

寒亭

五千年下讀遺經
濰水橋東馬暫停
海右無如此間古
斟尋亭北有寒亭

登州雜詩十首

甍睡分圖遠
萊牟鑿境通
山高饒怪石
海闊有長風
鹵地魚鹽薄
沙田黍稷豐
我來千里外
小住一城東

鎖院浹旬久
驚寒衣轉加
地東天早曙
春遠樹遲花
夜雨逢三月
雲濤落萬家
成連渺何處
寒水滿平沙

三面瀛洲水
舟行繞岸回
風波休轉漕
斥堠必登

臺漁戶編船住番夷納賚來去年英吉利受吏過蓬萊

城闕通帆船滄濤壓女牆旌旗風裏壯鼓角地中藏秋汎丹崖險春耕竹島長晚潮人散後飛鳥上樓航

桑田言本幻日主祀無名人到之采島雞鳴不夜

城秦碑湮舊迹漢使失回程當日求仙處皆從蜃

市行凡史記載秦漢求仙之處今皆

冠山森傑閣吐氣接洪濛曉戶宜賓日低簷可避

風謂避風亭捲環連碧玉磨鏡出青銅何處攜東海坡

公一袖中

南洋趨楚越北岸接遼關小賈輕航海餘丁出墾
山人家挂綰羽時節望刀鐃畧有唐風儉惟畱歲
晚閑

山川饒毓秀風土亦能寒春女皆稠髮鄉民愛素
冠比居千戶靜近市一街寬見說民稀訟清閒是
長官

俗樸難挑達衣衿相與青何人同獻賦有士始橫
經古歎才難得今求地有靈當年施與宋風雅總
飄零

人歇新耕後閒情在小邨雨煙送歸路花柳發春
園石壁支茅屋蔬田結枳樊轉慚行客過車馬一
時喧

登州聽海濤聲

海雨溼土春初晴海雲自北趨南行風來渤海暮
轉急吹落萬派驚濤聲初疑驅車來遠道輪雷欲
動遲而輕後如閉閣伏虛枕簷前凍雨千條傾或
是汝南馬旋磨否則試院煎茶鎗相視不語共歛
聽出戶仰首巡南榮天空晝靜日將落頗有鹵氣
來山城城頭雉列屋鱗次其中直作波浪鳴丹崖

田戍近三里長流迴洑聞縱橫日行北陸海底暖
潛陽蒸起龍蛟鯨謹聲騰沸島嶼振夕汐淘汰沙
石清洋洋一洗耳底淨心體虛豁無凡情人生不
俗卽仙骨豈有大藥真長生更待夏仲望岱嶽遠
收青色歸雙睛耳目至此歎觀止或令聾瞶開聰
明

過黃縣

風軟平田不動塵柳梯麥甲總宜人行過百里東
萊路來看黃睡雨後春

題秦二世琅邪臺石刻

我求秦石刻若秦之求仙求仙不可得石刻終難
湮岱石經火燬嶧石徒再鐫之梁墮入海海水潘
爲淵負哉琅邪臺椎築何殷填黔首三萬戶金石
三千年石高丈五尺怪鐵鍊精堅剝落盡三面小
篆畱西偏披蘿復剔蘚拓紙鳴槌旣我來讀詔頌
載籍合馬遷臣斯臣去疾穆德名並傳筆力入石
理王柱勁且圓點畫說偏旁益知叔重賢所惜頌
與詩變化隨雲煙僧父磨粗沙俗字鐫長天餘此
十三行斯壘誠可憐特立石鼓後屹峙五鳳先海
風吹不倒流徙悲斤權蘇公頗好事模刻城臺前

亦惟八十字文款本未全每見宋元碣殘暴如廢
輒乃以嬴氏物存者猶歸然豈有鬼神護而免列
缺鞭誠因麻石性余所見秦及西漢碑皆麻粗石故久歲月無磨研
得此足以豪神發忘食眠更思寄同好南北翁孫

錢

謂覃溪閣學淵如
比部辛楣宮詹

泰山碧霞元君廟

元君唐代宅帝女巽宮封向背分齊魯高明冠岱
宗萬山階下小雙曜殿前逢斗柄迴霄極霞標建
日春銅甌棲翡翠藻井倒芙蓉恍惚堂生樹精誠
牖見松臨軒增地厚卷幔發天容帔接星文動裳

垂水繡穠洪河衣帶闊滄海鏡花鎔挽洗盆疑華
開闕闕並嵩王華畱宋璽篆迹失秦峯木德原宜
穀神功盡在農棗梨香稅歇鐙火夜梯重繩鎖登
先早循牆走獨恭翠微寒氣積赤綴午光濃試拜
生雲石應飛降雨龍私懷雪饋志敢接向禽蹤明
日云亭路難聞上界鐘

瓶中碧蓮

帶得明湖水氣清牕前兩日碧雲橫粉衣零落青
房小研水簾風一段情

雨後泛舟登匯波樓

急雨纔過水上樓門前齊解木蘭舟垂楊小屋菰
蒲岸不聽涼蟬已覺秋

湖裏荷花百頃田溼香如霧綠如天會須盡剪青
蘆葉頓放花光到客船

就樹營巢湖上家罾魚小釣水三叉南豐祠下無
人到籬落閒開木槿花

鵲華清翠近城多十里泉田足稻荷樓外斜陽秋
色早更從何處覓鷗波

山左學署八詠

落日城頭晚東風泉上春湖光復山色齊向倚欄

人四照樓

落落橋上人
泠泠橋下水
顧影獨整冠
清歌懷孺

子濯纓橋

烏浴闌花外
魚跳窗影中
滄江卧米叟
畫舫記歐

公小石帆亭

十丈赤珊瑚
紅泉入鏡湖
輞川圖畫裏
惟解種菜

萸海棠

岱雲一片白
風雨雕玲瓏
落地化爲王
朗朗對裴

公王玲瓏

臺迥煙波闊
檐虛夕照閒
寒鐘靜無語
霜氣滿秋

山鐘樓

西軒石如菌松杉得甘露恐有仙人來采與東坡

去石芝

吉金與樂石齊魯甲天下積之一室中證釋手親

寫積古齋

小滄浪亭在鐵公祠旁與學署近隔一湖其
後軒元題爲水木明瑟用水經注語也夏秋
間每泛舟過之茶竈書牀流連竟日較之春
秋行迹頗分勞逸

小港西軒外扁舟北渚涯百弓開柳岸六柱泛蘆

簿獨往常無約高情或有儕李公休皂蓋杜子屢
青鞋橋約圍栽葦亭門窄縛柴軒窗商啓開几席
合安排煮茗然雙鼎攤書占一齋寫碑金石錄題
字水松牌檻曲看盤鶴牆陰認篆螭舊詩猶在竹
午夢間依槐起對山鬟擁閒臨天鏡指嵐光遙接
案波影上平階巖屋小於匣池魚細似釵濠梁多
古意泉石湛秋懷拄笏西風爽塞簾夕照佳新涼
流玉宇暮色動銀淮月露收園鑰輪蹄憶箭靷江
湖浪遊跡襟抱未全乖

明鐵太保祠

易謁金陵廟難撓厯下鋒兵戈驅石佛風雨挫真
龍死願先平保功甘讓盛庸明湖舊祠外秋水薦
芙蓉

秋日同徐太守

大榕

至龍洞遂遊佛峪還至

龍洞穿洞出小憩壽聖院揭元豐順應侯碑
錦屏巖下扣禪關林汲泉頭看水還得路卻隨支
遁馬迎人都是范寬山碑陽帶墨摹官勅洞裏然
燈照佛顏旣欲狂遊須盡興城中難得一朝閒
泝上海棠秋日作花

春深行部失花期不見殘紅下厯陂葉底西風闌

外雨泥人猶放兩三枝

靈巖山

山谷通靈氣伽藍出世情
辟支孤塔影卓錫古泉聲
松問何年種碑題過客名
憮然念塵迹翠壁白雲橫

同人登岱至對松山日暮而返

未及上翠微暫攬松山勝
嵌巖置修除緣壁起盤磴
拂衣千仞上闌危不可凭
峯高多夕陰天半風初勁
坐我萬松間蒼翠互相競
白雲橫不流中有新寒凝
林壑媚幽姿泉石動清聽
已忘世人情羨

彼飛鳥性

登嶧山

絡繹羣山勢茲山定一尊

元謂蒙嶧二山皆以占象得名尚書所謂曰蒙

日繹也爾雅曰屬者繹說文作圍

排天雲作嶂入地石連根魯柝

邾相近秦碑魏不存

秦碑爲北魏主所仆杜少陵云孤障秦碑在者誤也祇

今遊攬處不必到書門

嶧山秦刻石處名書門

鄒縣謁

孟廟晚宿孟博士第中

霸王代謝百年間夫子風塵又轍環若使靈臺開
晉國豈能秦石上鄒山遺書賴有邠卿校古廟惟
餘博士閒今夜斷機堂外住主人燈火照松關

早行

戒道雞聲歇炊煙起孤村寒林無戀葉隨鳥下平
原平原多枯草繁霜被其根鳥來無所食還向空
巢翻村中有老農曉起抱諸孫傳聞達官過策杖
倚蓬門屋西積草廩屋東延朝暾布衣木棉厚顏
色有餘溫懸知爾室中尚有升斗存

擘經室詩四集卷二

琅嬛仙館詩略

乙卯

喜晤焦里堂

循

姊丈於東昌寄懷里中諸友

光嶽樓前見里堂執襟一一問江鄉十年舊雨兼

新雨幾處青楊間白楊

用南史何蕭事

元白州鄰曾共卜

庾周肥瘦各勝常累君同作風塵客敢詠冰心寄
洛陽

自禹登山白雲峯東三里至佛峪

茲山何岵毳神禹之所登東行入虛谷泉石媚清
澍側徑臨深谿馬足猶兢兢午嶂屯春陽陰厓積

素冰石無附土樹壁有緣隙籐雲護巖上佛泉養
厨中僧何當看秋瀑濩落山三層巨流曳紳帶細
溜垂綵繩靈臺出其上衆勢歸馮凌我情亦遐舉
振翮隨花鷹

歷城白雲峯西北至錦屏巖憩壽聖院

靈湫住天龍談禪闢初地但見元豐碑破屋已古
意繞階漱清冷壓簷積蒼翠泉急石尤轉雲過松
花墜前峯不可梯高鳥懾其翅誰爲造孤墻中使
金仙睡後峯如太華巨靈擘爲二誰爲駕飛梁鐫
彼摩崖字古人具精力恥作尋常事否則愁如僧

碌碌老荒寺

壽聖院西南石壁上有龍洞出入里許

神龍抉壁入破壁復飛去龍去壁已穿介然用成
路當門立大佛乍見心疑怖石泐面如削曾向夢

中遇

前夕夢石人無面今所見同

過此入深隧秉燭遂暗度俯

行尻益高相呼不相顧一隙忽生明日開夜嚮曙
不知出何山奇險更難步手中得葛蘿足下生松
樹蜿蜒攫爪痕是我題名處

由龍洞巖下西過三龍潭十里至黑峪而返
三龍潭峽口如防復如堂千丈屹相對古色交青

黃其下狹數尺亂石毆羣羊短衣雙不借眼底無
康莊路窮逕仍達地暢崖復當水消尙存迹日午
已韜光陰森料山鬼蒼莽防奔狼有客獨結廬無
乃非人鄉十里暮始返華岫月微茫城關明爝火
春漏聽三商

復至佛峪

澗草迴新綠巖松發古春泉銷三月雪佛現六朝
身馬足熟知路僧寮閒可鄰誰知城裏客常作入
山人

寒食日長山縣道中雨

風雨近清明蕭蕭過驛程
烟橫林影斷青遠麥田
平行部三春事思鄉十載情
雷塘今日路知復是
陰晴

過臨淄縣齊侯墓

畢竟仍存土一抔
邱明晏子兩春秋
可憐上古無
書籍何處青山葬
爽鳩

題江寧孫蓮水

韶

漢上舊遊詩後

扁舟無那漢臯迴
詩向樊川刻意裁
交甫何期珠
佩解牧之曾見紫雲來
恐因極樂能消福
如此多情祇爲才
欲洗胸中愁萬斛
試翻春海到蓬萊

海棠

星娥海上曉妝時
洗盡鉛華世不知
今日清明花
下坐滿天靈雨
落胭脂

木筆

一樹臨風四照開
白雲晴日麗蓬萊
欲知花頂春
多少更與仙人上玉臺

萊州蜉蝣島

山根走入海
出海更成山
一碧揩銅鏡
孤青擁鈿
鬢潮生春蟄起
月黑夜珠還
誰復能齊物
蜉蝣天地間

題海濱獨立圖

山根入海海連天
著我臨崖思渺然
同是蒼茫千古意
不知生後與生前

登蓬萊閣

下見滄溟上絳霄
城頭一閣獨超超
天能包括鯨波靜
日有光華蜃氣銷
島外帆移千里目
坐中人壯午時潮
曾遊山海東經內
酈注江河總寂寥

過華不注山

兩年山下記行蹤
秀澤單椒磴百重
南渡濟流初起嶽
北離岱麓獨成峯
三周人與車聲遠
九月秋

如畫色濃不是明湖開曉鏡鄂跗誰照碧芙蓉

小滄浪亭雅集和馬秋藥前輩

履泰

北渚離塵鞅明湖浸翠微濠梁宜客性山水願人
歸樂趣莊逢惠吟情孟與韋孤亭復虛榭徙倚意
無違

每有論文暇遊懷相與偕豪華非絳帳蹤跡共青
鞋軟草平侵路圓荷半帖階隨時齊物理生也亦
無涯

五日濯纓橋小集遲馬秋藥前輩小疾不至
以詩來卽和原韻

樂泉涌地出城裏流汗漫吾家散衙處汨汨穿葭
蘼此境雖荒率頗受冷士盼魚依橋影聚鶴應人
聲喚遲客獨不來坐久風荷亂小疾居樂源詩情
隔湖岸今日當薰浴未有綵絲絆求炙及鸚鵡好
音在芹泮我有銅艾虎持同梁鏡看是日出梁太
平元年五月

丙午日鏡並元延祐元年
銅艾虎鎮紙爲玩

諸生各成詩願就君改判

我有石菖蒲連絡根不斷鑿鑿見清水蓬萊白石
彈節物無好句坡公應知歎落日池上飲賴有顏

與段

謂顏運生
段赤亭

展讀所得碑石墨光燦燦

小滄浪亭

獨泛滄浪平底船軒窗面面葉田田風光誰許平

分得人與池心四照蓮

池中碧蓮一枝四心分出因以名之

小艇穿池不礙花種花人住艇爲家教收荷葉三
霄露供我菱甌午後茶

筆牀書篋向池攤池上荷花高過欄捲起烏篷遮
午日一雙銀蒜壓青竿

北渚紅橋結笠亭蕉衫紈扇此消停夕陽若爲人
間立畱照湖山半角青

蟬歇殘聲綠樹間霞痕山影共闌刪微風吹動金
波色月在東南箕斗間

我向滄浪獨立時五更露氣到清池城頭落月輕
黃色多少鴛鴦睡不知

東孫淵如同年時初任兗沂曹道尙未至山

東

濟南亭館傍湖開湖上秋風且漫催萬朶荷花五

名士一時齊望使君來

五人謂馬秋藥桂未谷
武虛谷顏衡齋朱朗齋

池中碧蓮一枝四花共蒂花各三心因名曰

四照蓮諸客觀者皆有詩

一枝折向水晶盤十二蓮心共一攢儘有花光酬
坐客不妨樽酒合圍看

題何夢華

元錫

林外得碑圖

孔林牆外夕陽明永壽碑酬訪古情我後何君來

曲阜手摩殘字得熹平

癸丑冬元至曲阜適黃小松之訪碑人以見漢隸殘

石來告元亟命掘昇至試院手剔其文乃熹平二年石也

獨遊佛峪

山深易覺秋一雨衆秋足西風吹涼雲蕭然出空

谷寒花隱荒蔓疎葉下林木久坐依盤陀泉石交

耳目雖未攜琴樽情賞轉幽獨

爲新城王文簡公書立墓道碑

先生墓道在山阿兩載輜軒伏軾過司

凡

李吾鄉

推大雅臯陶從古善賡歌翰林風月誰能似齊魯
聲華近若何多恐此碑容易泐未如詩卷不消磨

渡河

水色開眉宇縑塵拂箭袍西風新雁起落日大河
高斷岼立千尺歸帆輕一毛安能用舟楫全代馬
蹄勞

展母墓

嚴霜隕寸草饕風撼長樹哀哉我慈親竟向此
間住慈親昔愛我一日欲百顧欲及我之冠欲
畢我之娶教我讀古書教我練世務哀哉皆未及

竟忍舍我去五年守里門幸得依墳墓十年爲
帝臣未踏雷塘路年年寒食節悲酸向誰語今年
奉

命歸

許祭叨異數蹀躞北郊外一蹙欲十步哀哉我
慈親長年竟此處繞隴亂叫號迷惑竟無據直欲
挾土開呼 母應而寤回寤終不能白日黯已暮
簡書矢靡鹽料此難久駐更悲去家後寒暑尙三
度北林多雨雪西風吹霧露夕陽散樵牧夜月竄
狐兔而我居官齋錦稻雜然御斯志期無忝安敢

計溫飫惟有勞

國事聊以酬悲慕

敬題

御賜懌壽平撫元人萬竿烟雨圖

雨山雲欲流奔泉出其麓沙石餘青蒼潤氣滿林竹

御園依玉泉龍籜森如束每因扈

蹕遊得以豁塵目癸丑銜

使命濟灤濺行轂城西習遊處絲筵蓋泉屋乙卯
冬至浙小住西湖曲三里五里中盡是篴管谷置

聖朝集卷二
臣於此中

天意不令俗慨然思有斐何以瞻淇澳雪餘冰署
清石渠畫共讀分題得此君烟雨近尺幅灑然襟
帶清穆若鬚眉綠人間與

天上領取

臣

皆足

敬題

御賜暉壽平樵黃鶴山樵松崖翠壁圖

南田逸趣勝盧敖自寫閑身上小舸壁臥斷溪飛
翠影松含清吹落輕濤綸竿舊狎烟波老翰墨今

懸

祕閣高臣愧不如柯敬仲漫叨

恩賜獎微勞

丙辰

嘉慶元年正月人日射鵠子於浙江學署之

西園卽事聯句

虛庭開春首

西琴胡廷森

修竹挂日脚朋哉盍素心

白子

張若采

耦進踐清約揚觶酒已具

廣泉林道源

射鵠興可

託鵠鼓音微轉

中之程贊和射鵠二字今北音讀如時鼓

時射韻非錯

對棚借梅列

定甫江安

量步破苔薄西十北十符

里堂焦循

左个右个作護匏籍之茅

伯元阮元

當箭懸以幕加幅

委髯奴

西琴

設侯用文鄴尺壁內倍好白子大泉輪滿

郭五花疊陣圓

廣泉

兩儀換九躍星緯各成天中之月

望不畱魄紅點嵌星星

甫定

白堊圍皦皦囹圄圖雜元

黃

里堂

紛披範青蘄堵者竹象交

元伯

絙之秣爲索敦

弓我旣張

西琴

鳴鏑匠復削志傳爾雅名白子臍射道

成惡渾沌破七竅

廣泉

相攘出六鑿講譜法深穩中之

六

時

十三

射法

最精細

編須人

豐鑠

胡西琴先生年七十八鬚長慮

弦拂編

飲決看誰先

甫定

袒衣云盍各燥濕擬重輕

里堂

陰晴變今昨恃力挽取强

元伯

敢遠立反卻心摹

飛衛神

西琴

笑勝投壺樂竽將一一吹白子淵遂深深

拓是謫者叱者

泉庾

亦翩若矯若吻厲驚飢鷹

中翰

飛聽匪驚旁人不及瞬

甫定

喝者或曰著叩鳴善于

問

里

響應真如諾投石散水暈

元伯

擲彈碎花萼儼

絲貫于針

琴西

若鎖投以鑰其衷將直取白子他心竟

能度虛中窺轂輜

泉庾

無極存匡廓或挈貳叠雙

之中

或連參斷繳或四鍬井儀

甫定

或五兩統落或觸植

顛墮

里

或維網綰綽揚或隼出塵

元伯

或蛇赴壑

止或陷區與

琴西

或拂枝格拙每成獨笑

白子

巧翻

致衆愕既徹待獲旌

泉庾

乃飲無算爵功力相箴規

之得失互嘲諢雖藝近乎道

甫定

此禮其猶醪當風

醒薄醒

里

臨池度曲約餘情看洗馬

伯

畫者更盤

礪

西琴

時

封

君作洗馬圖

題胡雒君

虔

環山小隱圖

環山學人愛著書經術密矣生計疎慨然載書出
山去江湖一舸塗五車烏乎有山不能居無山欲
買願更虛君不見山中老農不識字一生溷跡樵
與漁

秦小峴觀察

瀛

招遊西湖晚謁表忠觀適錢

裴山同年

楷

過訪未值有詩見投報以一律

天使浮雲自往還春晴喜借一舟閒共舒中禁鐙

前日來看西湖雨後山

元與小峴裴山在中禁時五鼓卽橐筆相見

吾

輩冠裳烟水上君家祠宇竹松間好將千首新題

句都就詩人仔細刪

新得諸生表忠觀落成詩千餘首

渡錢塘江呈同舟諸友

虎跑泉頭列騎迴六和塔下布帆催纔當春日江
心暖知有風潮海上來隔岼峯巒青已到同舟賓
客興初開古人縱愛山陰道不抵諸公酷愛才

梁湖道中

屈曲梁湖水舟行亂過橋山深皆有路浪靜不通
潮暮色浮松頂清香動麥苗謝公吟賞處蹤迹祇

漁樵

過謝氏東山

雲水東山春放船
謝公裘屐憶當年
蒼生寄托傷
溫浩青史功名冠
石元捫蝨有人知
唳鶴圍棋無
暇笑投鞭始凝
殘墅今何處
惟聽風泉似管弦

上虞縣

曲水平穿岼長林
綠壓垣石橋多似路
山縣小於
園白舫依官渡
紅梯倚戍墩
劇憐溪谷裏
考績尙
稱繁

恭進

授受禮成文冊得

旨云措詞典雅尙爲得體

賜蟒袍一件荷包二對恭紀

樞密傳

優詔

微臣被

寵褒雙荷聯

賜袋九蟒繡宮袍

德似日難繪

恩如天更高趨庭雖戲采戀

闕欲簪豪

聖經堂四集

卷二詩

七

會稽山謁 大禹陵

會稽巨鎮東南雄宛委巒嶂摩青空文命之陵據
呂墨朝衣九拜揚春風典謨有字遷有紀豈假弱
筆陳豐功惟思禹德在於儉無間再歎世折衷山
川主名遍天下此山不載禹貢中揚州域廣漸海
表刊定未紀夷與戎東教躬勞遂道死參耕壟畝
封葛桐陵者塋陵澤塋澤蒼梧之野將毋同豈如
後人詭且侈沙邱還至咸陽宮子元誕妄太白陋
亂引汲竹疑重瞳夏家天下子亦聖曷爲薄塋於
越東試以吾言問二子無稽之說將立窮我拜旣

畢題窈石白雲滿穴春陽紅帝之瑞應氣郁郁神
所出入光熊熊重黎受命地天絕惟有陵鎮猶相
通

女桑

婀娜春風裏柔桑已拂穉曾經纖手種剛與一肩
齊綠影初勝翦青園未上梯閑閑在何處猶隔小
牆西

曉雨後登吳山

足下峯齊列雲中日未生萬家殘夢歇五月曉寒
輕草木宣山氣江湖納雨聲若非登眺遠空自臥

嚴城

五月二十一日曉登吳山有晴意復泛舟入

西湖遂大霽

破曉登吳山來風力尙微扁舟入西湖冷然吹我
衣西北雙峯高雨氣猶霏霏東南倚山郭隱隱明
朝暉颯然長風至與波相因依初日忽瀲灩敗雲
自翻飛柔櫓劃清朗照見山四圍江湖卑溼氣廓
然空所歸歸來日未午園林地漸晞撫我壁上琴
燥氣生金微

卽事

虛亭風氣接清池銷夏情懷懶正宜一泚芙蓉三
逕竹兩箱金石半牀詩修書最樂刊成後望雨翻
驚響到時更待晚晴看洗馬蕉林蝙蝠拂簷遲

七夕

碧霄雲淨露華清靈匹迎涼渡已成河絡漸從西
角轉月弓將近半弦明農桑本是人間事兒女猶
關天上情茆屋夜深珠戶曉一般秋影看縱橫

修暴書亭成題之

久與垞南訂舊盟江湖蹤跡髮星星六旬歸築三
間屋萬卷修成一部經繡鴨灘頭秋芋熟落颿步

外古槐青笛漁早死雙孫老誰暴遺書向此亭

題錢可廬明經

大昭

蕉窗注雅圖

錢君磊磊古丈夫治經亦復箋蟲魚解字九千分
部居字字剖出光明珠更肆精力及其餘稚讓廣
雅釋且疏唐宋以後此學麤有如蹊逕生榛蕪吳
氏棗板猶模餉坐令文字多齟齬錢君一一爲杷
梳旁達衆說通經郭此學吾見王石曜與君同歸
而殊途蕉窗在屋西北隅是卽錢君之可廬臨風
把卷吾愛吾輾然一笑何軒渠畫師吮筆爲寫圖
綠天曾與錢君俱玲石一卷蕉三株中有鬚鬢蒼

而腴蕉之爲物雅所無雅讓所學在漢書列傳嘗
解馬相如埤蒼傳至曹江都選學欲問曹公徒江都
曹憲有廣雅音李試注子虛之巴苴芭蕉始見干
善得曹憲之傳蕉鹿之蕉讀爲樵卽上林賦列子
說文之蕉非芭蕉也

桂藥

叢桂將花又一年淮南同是早涼天小山露白人
初隱羣木秋高月未圓濃意半生含雨後清陰都
在試香前誰來金粟林中坐不到聞時是妙禪

題董文敏摹趙文敏離華秋色圖

離華秋色圖趙吳興爲周草窗所作也草

窗本濟南歷城人所居在雒華兩山之間
其祖時遷居吳興弁山之陽故自號弁陽
老人同時張句曲雨亦爲此圖鷗波圖元
曾見之句曲圖不可見惟見其題句于自
書詩冊鷗波圖舊爲董思翁所藏思翁摹
之不止一本元今所藏乃思翁癸卯年所
摹帶水長林浮煙遠岫草窗松雪風韻雙
清吳興山水本以清遠移人然濟南據岱
嶽之北七十二泉隨地涌出匯爲明湖澄
鮮渟澈萬荷競發流出城北滌洞于華不

注前每當秋林初晴橫雲斷麓正如此圖
畫中矣元兩年厯下復到吳興思翁此幀
常懸行館單椒秀澤尙愛此山看不足也
思翁本是江南客老與吳興鬪風格一卷分從舊
墨林白染青山上生帛厯下青山有誰華山前原
是草窗家吳興清遠家何處碧浪秋蘋自作花道
人同住鷗波裏爲畫齊州好山水秋色山光尺幅
中西風鄉思千餘里我曾兩載按齊州湖裏荷花
水上樓七十二泉流不盡青煙兩點誰華秋誰華
山色真奇絕畫意詩情不能說螺黛濃描京兆眉

劍鋒碧削昆吾鐵白雲如帶截林鋪雲外單椒翠
影孤若愁難到雙峯下試看華亭此幅圖華亭妙
筆朝朝見壁上雙峯壓吳練我今攜畫到吳興惟
有秋山大如弁何事老人居弁陽蒨鱸想亦感香
光鴉叉展看何時足又上城南古道場

金井梧桐歌

老鳳夜啄青琅玕露華飛溼金井闌美人倚瑟愁
不彈碧紗如水生夜寒夜寒缺月下金井玉繩斜
繞銀牀冷井波無聲澀修綆秋風搖動梧桐影館
娃酒醒扶頭歸促管繁箏燭十圍卻下繡簾遮不

住棲鴉驚向隔林飛

湖州懷吳菡茨太守

碧浪湖中書畫船道場清遠著吟鞭愛看山色經

千遍爲采蘋花住七年郡志頗詳名宦事鄉人新

錄舊詩篇口碑畢竟江關在費鳳雙趺共渺然

墨妙

亭費鳳二碑久佚其字見隸韻中

丙辰重九邀同孔幼髯丈

廣林

陳古華前輩

廷慶

徐惕菴農部

大榕

何夢華上舍

元錫

陳

無軒廣文

倬

登靈隱石筍峯和古華九言詩

韻

城中風雨騷屑不我容相約來登湖上之高峯江
山湖海向我共磊落安能苦吟寒菊花蒙茸前輩
豪興較我更十倍先使研中硬語除纖穠近來塵
疴不藥而自愈惟覺高秋爽氣來相逢憶昔策馬
秋過華不注徐君與我健足皆無筇直穿百丈石
壁龍洞出巖下餘客瑟縮不敢從又曾登岱題字
摩崖下籃輿出入動與雲霞衝其時正值九月上
弦後足底羅列萬朶青芙蓉卽今石筍峯前樹奇
絕焉此對松巖外之長松諸君有未遊者有遊者
終當繼此禽向雙高蹤歸舟狂興入詩亦入酒西

山峯影競落深盃濃回看白雲橫斷共登處高樓
百尺合臥陳元龍

陳古華太守同爲桐江之遊至嚴州而返投
詩贈別賦此爲報

錢塘江上秋潮生送我直到桐廬城七里瀧中秋
水落畱我卸颿瀧口泊列戟危檣二十枝夜深燈
火驚溪壑過船賓客銜深盃水雲昏黑詩情頽天
明夢醒入瀧口兩山直夾蓬窗來面山阻水絕無
路多恐前舟誤行去山迴水折路忽通舵樓已失
才行處吁嗟此水何時通松雲石壁開鴻濛客星

歛曜臥不起坐令列宿全其功出瀧盡行七十里
賴有清風半颿耳兩行翡翠做疎巖十頃玻璃湛
平水此時秋氣壓生紙謝沈刻意荆關喜辰州太
守尤清狂出門兩月詩滿囊三泖鱸魚不下箸野
船偏買纖鱗嘗野船雖好不可住別我吳淞江上
去明日乘風我上灘百里颿分睡初寤他年記取
分帆處嚴州城外桐溪渡

和陳古華前輩

廷慶

桐廬道中韻

桐江水色與雲同兩岼青山接碧空山逐江流無
斷續雲分山勢各西東風颿二百里真速日影未

申時更紅况是羣賢共秋色半歸畫裏半詩中

新安江東過嚴州建德城外八七里瀧卽水
經注所言漸江是也別有穀水出衢州西安
至蘭谿縣金華諸水又自南來會之東至建
德與新安江合流入瀧水經注所誤以漸江
穀水爲浙江者也余兩駐嚴州以一律紀之
幾番鼓楫下嚴州秋雨春風滿驛樓江合雙流爭
入峽山盤千疊竟通舟天教清氣歸吳越地走靈
躔出女牛獨有客星來大澤高臺終古一羊裘

印泥

玻璃窗暖書盈榻晶盤玉碗花瓷合刀圭輕撥印
泥開一勺芳脂浸紅蠟秦家玉鈕漢金龜五色泥
封天上詞溼抹紅沙翻繆篆未知佳製剏何時宋
人抹印猶調水誰鍊丹膏落縑紙銀綬三年艾吐
綿箭鋒九轉硃飛紫雲笈眞沙蘇合油銷凝暑日
又經秋珊瑚枝共明珠碎琥珀花同桂屑投象牙
縷字輕銅刻花乳燈光鬪新式譜上朱文揭兩京
烏絲闌壓燕支色讀畫鈴詩露寶光卷中磊落扇
頭香若無研北花南趣肘後綸金空自黃

春夜江上聞角聯句

一江花月換邊愁

此鉛山蔣修隅知廉句也

頓覺

蒼茫滿客舟

林道源

南國春情多在夢古人心事

重防秋

雲臺

詩中我已驚吹鬢泉城上誰能獨倚樓

半夜潮生風獵獵

蔣徵蔚

壯懷銷盡爲清游

泉

生好讀書風雅雖
重刻標榜若中興
若善藏書以傳
一 功其民無憂

擘經室四集詩卷三

琅嬛仙館詩略

丁巳

桐廬九里洲面江背山梅花三萬餘樹侍

親登岼遍遊奉命賦詩

梅花三萬樹春洲長九里上接戴山松下照桐江
水目力所不到花勢殊未已雪光晴不落香海浩
無底詩人誇鄧尉較此百一爾卸帆登中洲漸入
深林裏十圍合抱圓數丈拔地起拂帽更礙路眩
轉聊徙倚四顧無所見惟見萬花蘂萬花爭向人
一笑親顏喜

金華夜泊

百里春風滿羣帆
暮色橫遠山連野
燒淡月下灘
聲塢影自孤
直津頭將二更
千家尙燈火
遲我婆

州城

是日民間
千家張燈

夜至永康縣

四山看野燒
一路入荒榛
石臥頻疑虎
松明遠照人
城關延過客
行李累齊民
爲憶去年好
山陰畫舫春

栢蒼山雨歌示諸生端木國瑚等

栢蒼之山應天符
粵惟羣仙之所都
軒皇旣遠洞

天閉何處尙有仙人問我來焚嶺疊足望但見青
峰萬丈矗立東南隅是時仲春日已炙陰巖起蟄
蛟龍蘇盤厓百里直到郡觸石已見雲合膚一日
二日雷車驅三日四日雨始濡春城夜聽溜滂沛
北天晝看煙模餽遙知風門天井響飛瀑濺起萬
斛光明珠穿林度樾散成霧溼氣沍結松千株棠
溪管溪流並急箭發不受山縈紆陽開陰閉復幾
日此時真有羣靈趨仙臺福地不能到誰來示我
經與圖却喜甌江水新漲石門山色迎川途我行
寫此示國瑚有山不吟毋乃爲腐儒

題方湛厓

溥

所藏張南華

鵬翀

雲溪圖卽用

南華元韻

我聞練水城東南就中小結南華菴南華散仙據
梧坐濠梁之樂情所詣玉峰徵君極好事直欵靜
寄軒相探雲溪之妙不可說請君拂紙以筆談溪
上白雲四時好今當初夏猶濃酣雨晴風軟懶欲
臥橫空大雪堆青嵐忽然低飛壓茅屋綠榆翠竹
相交參此時賓主靜無語惟見毛穎揮毳毼山中
白雲贈陶隱南方草木歸嵇含雲溪頗擬范攄宅
若作友議應成三南華仙才不久駐徒令和者悲

而慙姚江學士又化去

卷中有邵二雲學士雙簾書屋題句雙簾想

亦傷鬢髮方君此卷失復得水隨帆楫山隨驂屬

我長歌韻成疊渭城欲唱無何戡今日扁舟展卷

讀石門波影相吞涵溪中雲氣不能畫況有垂瀑

飛風潭

是日同遊石門看瀑布

遊古永嘉石門觀瀑布

石門新營在江西非青田但李太白卽以

此屬之謝公

永嘉謝守弄奇譎手擘石門山壁裂侵晨直上青

雲梯一派寒泉迸龍穴嵯頭百丈直如削逼令泉

飛出其缺當其欲落未落時衝擊紛披忽三折坐

教破碎飄輕清不使渾淪成注泄偶經宿雨更爭
來少得迴風便旁掣橫入雲氣派將斷影漏初陽
眼尤瞥沾衣溼意詫沉陰撲面清光仰霏屑何人
拍手喝曰奇若使彼驚少吞咽到地灑石無喧聲
此石千年洗真潔澄潭半頃綠光淨如著一塵卽
污褻老僧新焙春中茶燒松煮水快一啜櫻桃蔗
漿漫相勝誰復此時猶內熱暑天風日諒不到寒
想冰絲半空結安得誅茅四時住坐對天紳自怡
悅出山一步一回顧隔斷青林始忍別行看雁蕩
大龍湫與此相衡孰奇絕

白麗水縣放舟至永嘉縣

桃花楊柳背通津十里溪山捩舵頻
面壁每驚無去路望烟始識有居人
怒流不怕千回折窮谷應遲半月春
若使客星逃更遠此間幽瀨好垂綸
雲徑歸樵忽有歌數家小屋倚坡陀
砍松爲圈思擒虎鑿領成田便種禾
畝下停舟妨亂石磴前躡屐挽修蘿
不知如此荒寒趣比似銷金湖若何
夜眠只合在深溪月黑巖高望已迷
但見峰頭爭上下偶因斗柄認東西
舟人寄碇先尋夢山鬼驚燈或暗啼
且掛風帘護紅燭小瓶春色看棠梨

東甌國在海山邊十里江城萬井煙已見颶風傾
蔀屋誰平鯨浪駕樓船三盤島嶼參差出百粵帆
檣雜還連豈似登州高閣上碧環千里接遼天

將由溫州至台州過雁蕩山前一日宿扶容

村

一行分兩戒其南極雁蕩重壓沙海頭險扼東甌
吭永嘉山水滋康樂尤清放度嶺惟斤竹緣溪阻
修嶂天地惜靈秀不易使人矧及其終難祕疏鑿
任靈匠已勒大通碑更示詎那相坡公遊山分去聲
平生頗自仗惟以詩酬圖未足供跌宕龍湫百二

峰吾耳久知狀竊疑形容者奇幻言或妄今春渡
甌江百里山海上瑤嶺據海溼風潮午初漲復輿
厲石梁足底走鹹浪晚程猶未歇茲山已入望情
隨嵐氣清心與飛雲壯且投村屋宿行李聊摒擋
吾徒侈清遊一飯若轉餉損之又損之勞費已莫
償惟願明朝晴風谷動清曠同行若春雁斜向峰
頭掠懸知今夜夢先受山靈貺

曉同江補僧

鏐

錢可廬

大昭

蔣竹塘

調

張農

聞

彥曾

方湛厓

溥

何文伯

孫錦

諸友暨家叔

載陽

春

樂清竺令尹

雯彬

過四十九盤嶺至

能仁寺

曉程將何之四十九盤嶺嶺高盤愈仄曲折若修
綆肩輿未及上相顧色已警陵緬惑回棧心怯息
九屏不登丹嶂高安見海天永白雲翳人目初陽
生樹影度嶺入深谷倏忽闢靈境譬若讀古書艱
輜驟難省至於入之深道指乃可領行行至招提
幽籟泛虛靜中慄旣已平泉石生春冷

大龍湫歌

山迴路斷溪谷窮靈湫陰閟龍所宮眼前無石不
卓立天上有水皆飛空飛空直落一千尺鬼神不

任疏鑿功絕壁古色割爾破山腹元氣冲然通有
時靜注絕不動春陽下照神和融有時飛舞漸作
態已知圓嶂生微風一甌春茗啜已盡水花未散
猶復搖玲瓏颯然乘飈更揮霍隨意所向無西東
不向尋常落處落或五十步百步皆濛濛豈料仙
境在人世誰作妙戲惟天公雲煙雨雪銀河虹至
塵冰縠珠簾櫳萬象變幻那足比若涉擬議皆非
工石門飛瀑已奇絕到此始歎無能同惟有天柱
矗立龍湫中屹然百丈與此爭雌雄

常雲峰

怪石立孱顏濃雲常在山翻疑碧峰走出沒白雲
間雲氣無時盡此峰終古閒遙知滄海上認取掛
帆還

寄雁蕩

我聞雁蕩波連頃却在最高峰上頭雲裏龍鱗接
煙水泥中鴻爪識春秋欲攀危磴千層去難向深
山一日畱果有經行古尊者擲詩還使逆波流

過馬鞍嶺

林薄無疎影川谷莽回互嵯轉得新蹊已惜忘舊
路延緣入東谷狹嶺詎可度盤磴引高情飛泉入

危步停策如據鞍雙谷兼盼顧沉雲散靈風萬石
盡豁露伽藍遠撲地蒙茸翳春樹宿心旣申寫景
物相昭遇徘徊下層巒嶺脊難久駐

卽景

毛竹青陰日影遲亂飛鸚鵡拂晴絲杜鵑花發松
花落正是山田秀麥時

淨名寺蔬飯

石色峰峰變溪聲步步斜樓間圍野屋杉竹隱春
花入寺聽詩板穿林劖筍芽鐵盂香稻飯匙上有
雲霞

試雁蕩山茶

嫩晴時候焙茶天細展青旗浸沸泉十里午風添
暖渴一甌春色鬪清圓最宜蔬筍香廚後況是松
簞翠石前寄語當年湯玉茗我來也願種茶田

湯顯

祖云雁蕩山種
茶人多姓阮

登靈峰望五老靈芝諸峰

春陽已西頽遊者殊未倦復谷窅以深羣峰闐然
見參差各離立戍削盡成片巒峰忽中空直罅裂
如綫淩厲出林表蟠逕將升甌三休始及上九折
石猶旋當門飛冷泉入腹抗高殿虛牝喧聲聚陰

森和候變奇觀意已驚靈跡情彌眷頗知吾去後
定復來期羨

度謝公嶺望老僧巖

謝公慧業早生天屐齒曾經到嶺前峰上丈人猶
化石不知成佛更何年

遊石梁洞洞深可容千人石梁亘其外

古洞空山腹飛梁駕洞門橫空規日影分罅夾雲
根仰險危將墜探深響易奔操蛇神若至應有夜
光屯

石門潭

石門集卷三
蕩陰雙閣水齊向石門東淺瀨平春浪澄潭受遠
風晚潮歸海綠落日滿山紅回首三重嶺都藏雲
氣中

出山宿大荆營

埃旗遙見大荆營麥隴茶田取次平
斤竹澗通新驛路石門潭抱小方城
沙邊落日籃輿穩渡口春風畫角清
今日郵籤促塵鞅他年重與細經行

小窗

小窗紗影細如煙窗外蕉林綠滿天
鸚鵡乍鳴茶半熟醒來方悟挾書眠

咏鐵拄杖

瘦蛟飛舞螫龍愁六尺錚錚敵佩鈞曾伴古仙登
葛嶺合依衰將住并州氣寒斷不因人熱骨重何
能繞指柔若是樂全生日鑄已隨銅狄較春秋

與興化顧藕怡

仙根

遊山卽題其詩稿一絕

湖光山色上吟衣幾日間遊便欲歸歸去詩情更
何許清晨登隴看雲飛

題謝侍御

振定

金焦夜遊圖

北固風雲靜此宵詩情酒興落金焦江聲夜滿松
寥閣月色寒深玉帶橋縹緲一帆孤掠雁蒼茫雙

寺共乘潮舊遊我亦披圖見十載鄉心向海搖
予在山左畜一馬甚駿馳驅齊魯動致千里
及至浙出必以舟不施鞍勒者輒淡旬日柔
脆以死詩以惜之

腐儒豈是九方歎負爾昂藏六尺身空使湖山埋
白骨未從秦楚踏黃塵懸金難得無雙士裹革從
來有幾人我本將家羞墮武敝帷零落下檀輪

題王蘭泉司寇

和

三泖漁莊第七圖

捕魚老屋三泖邊一圖題詠五十年英辭妙繪滿
湖海流傳半在吾生前先生作圖髮初冠七十手

辭白雲案剡溪特賜賀知章不是經秋憶張翰當年七子重三吳已詠漁莊第一圖輞水才人猶未第草堂十志早傳盧星盧特奏相如賦從此漁莊不能住鳳皇池上早朝來五柞宮前秋獵去忽與嫖姚西出師上通井絡下昆池盾鼻飛磨露布墨弓衣細織簫簫鏡詩每當鐵馬金戈日却念綠簑青箬時還

朝顏色動

天子岳牧親民南奉使雲生蠶澤雨成霖門對滇江心似水皐陶颺拜復賡歌從古詩人西部多久

居臺省劉祥道舊狎煙波張志和釣艇歸來殊未
老手結香茅向圓泖東都經訓鄭司農堂下羅生
書帶草泖中人是畫中人千首新詞七尺綸淞水
風前蓴葉冷江南雨裏杏花春先生來踐西湖約
第七圖詩屬我作鐵篴吹雲過塔山楊鐵篴居泖上小蒸
曬網成邨落曹雲西隱居泖上作小蒸圖但寫閒盟鷗鷺身誰
知曾畫麒麟閣我亦家居簞社湖往來蹤跡惟樵
漁弱冠登

朝謁蒲褐

公京邸蒲褐山房乃歸愚宗伯舊第

似公早歲逢歸愚暮

年若

許歸湖曲學畫漁莊到七圖

張子白同年攜蘄石翁畫至杭州展讀於定
香亭上是時地荷怒發盆蘭襲人把酒論詩
極一時清興題詩記之

蓮花過雨清宜畫蘭箭臨風韻似詩記取丁年秋
七夕定香亭上晚涼時

七月十一日同人過西湖晚泊湖心亭看月
湖心有客夜停船白露如煙月滿弦風裏雲霞無
定色水中星斗落高天直愁銀漢浮身去惟見金
波著地圓亭是月中仙樹影四圍虛湛王輪全

座中仙侶認瀛洲一片清光共舉頭極浦荷花騰
夜氣出懷詞筆破涼秋人因地勝方能聚景是天
開恐易收來有浮雲歸遇雨三更霽色爲君畱

海寧安瀾園雜詠

修竹影風淪清意每相媚秋逕有人來颯然破空

翠

御題
水竹延清

老竹露花垂新竹風梢亂莫聽琳琅聲微妙在鼻

觀

御題
筠香館

葢桂抱幽亭秋香聚圓谷懸知昨夜晴明月三更

足

天香
鳴

小閣據木末千花向閣開不知出花上花底看人

來

羣芳閣

窗前十畝池月出定滉漾今宵難待月金波入清

想

漾月軒

陂陀易畱人頗可釣寒碧雨餘秋水深又沒一層

石

碕石磯

風來月復到吟弄當如何我不識禪理惟知張志

和

烟波風月

雲生竹趣深兩歇荷香定有客放舟來風蟬動涼

聽

竹深荷淨

虛庭雜花樹料此宜春宵笙歌初散後滿地花影

搖

和風皎月

癯叟說青籐籐古叟尙幼榻來八十年入秋更堅

瘦

古籐水榭

乘興每登樓坐見芳林杪寶思發春華高情屬雲

表

挾藻樓

石徑滑蒼苔危欄四面開何人要脚健直上此亭

來

翠微亭

八月望後至海寧州登海塘觀潮

錢塘江湖秋最巨未抵鹽官十之五我來鹽官塘

上立月初生霸日蹉午江水忽凝不敢東海口咳
張反西吐潮不推行直上飛水不平流白僵監海
若憑陵日再怒地中回振千雷鼓馬銜高坐蛟鼉
舞拔箭倒發錢王弩須臾直撼塘根去搖動千人
萬人股如捲黑雲旋風雨如騁陣馬鬥貔虎如陰
陽炭海底煮如決瓠子不能禦二千水擊徙滄溟
十二城隳倒天柱氣欲平吞於越天勢將一洗餘
杭土吁嗟乎地缺難得媧皇補大功未畢悲神禹
此是東南不足處豈爲區區文與伍滄海桑田隔
一堤魚龍鱗首相鄰處我

皇功德及環瀛親築長防俾安堵全用金錢疊作
塘不使蒼生沐鹹鹵邇來龕赭漲橫沙卻指尖山
作門戶雁齒長椿十萬行魚鱗巨石三層礎王充
論前有古蹟枚乘發後無奇語吁嗟乎此塘此潮
共千古詞人心樂

帝心苦

秋桑

吳興桑田之多與稻相半丁巳八月下旬
按部至此西風落葉騷騷然有深秋意矣
因成四律以邀和者且以此課郡中詩士

扁舟衣袖乍驚寒下若桑林綠意殘初響天風知
半落未逢夜雪已先乾樓前有日蒼涼出陌上無
箏錯雜彈若使秋胡今駐馬黃金原向絹機看
西河古社重徘徊木葉應知庾子才淇水秋期貧
婦怨晉廷九月餓人來采菱纖手空成妒舞柘輕
要不共迴偏是吳儂感憔悴十年牆下記親栽
底須三宿問他鄉誰向花前笑索郎釀秫時光宜
薄醉調弦情緒動清商但教天下輕綿暖何惜林
間墜葉涼試種東坡三百尺芟來終比暮春長
漁陽八月已空枝還是吳興霜露遲飛鳥雨晴猶

護羽野蠶風定向懸絲遠揚試伐深秋後光景能
收落照時料有苕溪老桑苎垂虹秋色滿新詩

題道場山歸雲菴孫太初墨蹟卷後

卷中有文董諸

名公數十人書畫

山人化作秋雲飛吳山松冷雲初歸草菴白塔不
能到惟見白雲翻夕暉去年道場山上去杖策直
叩枯禪扉聽詩頗有古錦版侑茶不用黃金徽今
秋移文入山去直取朶雲來棘園滿堂賓客共翦
燭把卷羣歎所見稀

以文入山向僧取卷畱文爲券題畢乃交付以防胥吏匿

竊

山人詩翰清似鶴華陽真逸猶嫌肥後來過客

五百載縑楮半爲山人揮蒼煙過眼月露溼疑有
雲氣沾人衣此卷不可染塵俗送爾以詩歸翠微

謝蘊山前輩

啟昆

自南康遷居南昌別業有

池翁覃溪先生名之曰蘇潭先是覃溪先生
視學江西曾名南康蘇步坊之井曰蘇潭故
蘊山前輩卽以自號且繪蘇潭圖屬題

先生清望似蘇公小住南昌別業中自有謝墩任
人奪却將蘇步與師同

翁爲謝之師

百弓小圃堪盤鶴

半畝方塘好印鴻爲乞新詩壓圖畫瓣香先寄北
平翁

蘇齋久已入詩談更與西江水共參

坡公江西詩會用馬祖語

學士坊邊新改井先生溪上舊師覃論交白髮清
同照若雨蒼生味定甘五百餘年書卷尾恐將終
號謝公潭

題凌次仲教授

廷堪

技禮圖次

石君師詩

韻

周儀治天下厥功逾誓誥揖讓升降中精義靡不
到吾友凌經師無雙齊許号縣蕞容臺上不受介
紹導既有戴聖學且持高密操志氣堅不撼精力
滿無耗弱冠我同游許我入堂奧嚶嚶兩鳥鳴頗

異凡味噪實事必求是虛聲共恥盜君之入京師
以禮爲履蹈始知士相見盡化頑與暴北海一席
間驚譽馳四境惟知抱一經不願駕雙鷺宣城冷
官舍技禮志雅好昌黎所苦讀而君力排稟經文
溯江河疏義析潢潦得間發一難皇慶賈公彥不
敢報餘情述周髀知天若裨竈重輪引虛綫測視
目無眊淺儒襲漢學心力每浮躁豈知后與慶家
法傳衰髦凌君發禮例楊復李如圭不屑冒金輔
之程易田及劉端臨盧名弓相視互不傲邇來文
更雄魏晉力能造始歎才之奇實惟天所壽吾師

極重才愈奇愈憐悼新詩榮于褒華袞被單綯
制科儻三舉會見交章告翹然賁弓車豈徒離席
帽平生學何事許

國敢怙慤辟雍仰

天藻詎止泮芹芼吾才陋且小地褊若滕郃與君
素投分又若邸與瑄同在文公門籍湜各樹纛親
老修天爵斯言昔所禱君今潔白養恩勤慰孚菹
已勝饑驅時負米比轉漕手此十七篇怡然志無
懊天將厚其後茲特先韋犒所以吾師詩披圖深
勸勞

止

挈經室四集詩卷四

琅嬛仙館詩略

戊午

上元後一日春讌和謝蘇潭方伯韻

月輪還見十分圓金綺餘情不夜天
鐙色照開花苑外歌聲飛過彩雲邊
民騰善氣春如海官有清聲酒亦賢
同是南江持節者共將歡慶祝

堯年

天爲人和每放晴望舒偏向小園盈
春生北海賓朋坐詩帶東山絲竹聲
半月閒心疎簿領一時仙吏話蓬瀛

同宴九人皆以京朝官外任者

東風入律鯨波靜玉

燭先調十二城

五更過蘇隄列炬中見桃柳正妍

清鐘動疎樾缺月猶在天山光餘夜碧湖水生春
烟春煙約微風飛落蘇隄邊我騎青驄來暗柳拂
絲鞭行燈一路明照見桃花鮮譬如蓬島夜綽約
棲羣仙燭龍啓潛蟄驚起仙人眠尋常春夢濃日
影移花輒今宵破春曉醒在羣花先東方雲漸白
六橋虹影圓不惜沾衣露濕紅殊可憐

半山桃花十餘里春仲偕人兩次來游元和

蔣蔣山

徵蔚

武進陸祁生

繼輅

陸紹聞

耀通

皆有圖詠紀事因題冊中

阜亭山下多春風千樹萬樹桃花紅江城愁雨二十日破晴小舸來花中三篙新漲紅到底一片絳雲飛不起仙子霞裳住赤城麗人靚服臨春水蘭槳搖搖行復回橫塘香霧轉輕雷薄寒小雨燕支濕畱住濃酣緩緩開兩年我爲行春去每到花時不相遇崔護重來似去年劉郎又到成前度詩裏情懷畫裏身坐中慘綠盡詞人若非才子樽前筆孤負臨平二月春

上巳桐江修禊

去年修禊到蘭亭今日春江倚畫舫上巳風光晴
更遠富陽山色晚逾青要將觴詠臨流水還向綸
竿拜客星濯遍塵纓何處好釣魚臺下碧泠泠

溯嚴瀨至蘭谿

春江三百里一瀉衆山破流雲如秋潮始識風力
大連颿撲天去其勢頗無懦亂峯不知名絡繹復
坎坷終日蓬窗中把卷向山坐轉如立灘頭盡遣
羣山過晚來有明月莫擁黃紬臥

金華試院宋自公堂後雙古柏

自公堂後雙古柏六百餘年老宋客蟠根鬱律透

重泉生氣勃然出堂脊一株轆轤紋節轉一株皮
厚腹中壩等閒鶯燕不敢來絕頂花雕刷寒翮瓦
溝殘日落青子蒼鼠奮髯噉其液此堂支柱多古
礎乾道七年魏王宅湯陰惡檜刻不盡輩洛松楸
種何益此柏幸栽節度家頗有清香凝畫戟徒恨
苔身長百尺未與冬青樹爭碧堂陰誰可話疇昔
六碑首問熙寧石

堂後有石碑六
皆兩宋物也

冒雨由縉雲趨麗水道出桃花交青黃龍諸
嶺雲氣萬狀勝於晴時

春城晚逾暖四山雲氣蒸曉發縉雲南雨勢方奔

騰延緣起修磴巖壑來填膺眼前快磊落足底愁
凌兢傳壁凜傾澗接石度高陵路窮嶺直立遂乃
衝雲登雲深不見路叱馭將母能

陟險有悚志探奇多曠情松篁易成響况以風雨
聲雜花滿四山紅白垂繁英上有千仞峯蒼翠流
餘清下有百道泉亂石交喧鳴其中亘白雲與我
相縱橫

嶺上多桃花花落初生葉芳草何芊眠染濕綠蚬
蝶不知凌絕險轉覺閒易躡迷漫十步外白雲飛
帖帖浮嵐青數痕中有峯千疊若令廓清霽飛鳥

去猶懼

青巖亦已轉陵緬山之陽林澗正懷烟花岫猶屯
香降隨猛泉落升共高雲翔翔雲扶我行冷逼單
衣裳欲招青田鶴謂端木國瑚矯翼來低昂仙都在何
許雲海春茫茫

山花

野花滿山紅白黃山丹躑躅高莧薑青桐蕊小不
來鳳薔薇拂露跳麝香墓門短碣沒春草叢祠破
壁開斜陽野火亂燒半枝死樵斧却赦柔條長鳩
啼綠陰不知處引我眼到青巖旁君不見竹林堂

前飛達末台州紅栽潤州鉢沃土清泉護曲欄三日不澆根欲渴請看青巖石上花白雲如水養之活

春盡日阻風青田和張子白同年

若采

見投

詩韻

又放甌江黃篾船棧生風力透輕絲山來一一重
相見春去堂堂不受憐枯嶺清流千百轉秣陵秋
雨十三年今宵良話應無夢泊近西堂對榻眠
恐是芙蓉海上城靈都望見月初生宵來定有胎
仙過春盡曾無杜宇聲屐齒溪山間後想燈花詩

句客中情請聽一夜船頭浪已覺東風暗裏更

重遊青田石門觀瀑布

石闕開雙扉未登心已羨沿溪溯潺湲越谷望葱
蒨飛流百仞上先向林表見敢拜天紳垂疇與白
龍戰曳影澄潭涼觸石生衣濺雨餘情彌壯風定
勢猶旋踈響靜凡喧搖光引清眩茲來春夏交山
花落如霰重游意更洽坐久心逾眷安能構巖棲
聊息水程倦

蕉林驟雨

黑雲閣日來蓬蓬芭蕉窗下生微風忽翻白雨破

幽獨萬點秋聲戰寒綠此聲入耳心亦涼動搖眼底迴清光何處驕陽火繖熱何處大道風塵黃跳珠濺玉驟復緩簾波不動清陰滿半晌疎齋已坐忘案頭茶冷青菱椀

温州江中孤嶼謁文丞相祠

獨向江心挽倒流忠臣投死入東甌側身天地成孤注滿目河山寄一舟朱鳥西臺人盡哭紅羊南海劫初收可憐此嶼無多土曾抵杭州與汴州

台州試院在城北龍顧山之麓有樓歸然出于林表虛窗四敞雲山相圍余置榻其上畱

連浹旬昔山左濟南試院有樓曰四照爲施
愚山所題余極愛登眺遂復以名此樓書榜
懸之

靈江通海汐雲霞圍一城孟夏方陶陶林薄含餘
清林中有高樓神撫羣山平風光泛疎牖嵐氣通
環甍興言懷謝公爲此登樓情

衆峯不同青一雨淨萬綠啼鳥悅初曙晴雲翳深
木朝陽未上城人煙猶隱隱屋曉起神自清復此豁
遙目隱囊風氣涼臨窗一晞沐

山多雲氣聚少暖卽成雨翔風海上來颯然破微

暑輕涼潤笙簟清氣入王廕高林接繁柯森森繞
窗戶情賞在無言列岫靜可數

西嶺鬱崔巍夕日早銜光谿壑起輕陰穆然何清
蒼歸鳥入林小樵徑盤雲長暝色漸近人樓外浮
昏黃豈能無世慮及茲澹欲忘

茲樓四無礙下視未十仞勢憑山已高天垂月尤
近清霸生明弦流雲散華暈燈火遙樓青笙歌夜
風順誰知卷幔坐吾方攬幽蘊

傑構臨湖山兩載居齊州茲來章安郡夢與愚公
遊連楹旣窈窕遠嶺亦清適龍顧頗宜夏誰華空

復秋願得施宣城臥吟百尺樓

由臨海至天台

驟暖蒸涼雨新晴得快風
竭來清澗上細繞碧山中
淺浪連村麥高陰滿路
桐赤城知不遠遲客晚
霞紅

國清寺

朱閣瓊臺未及攀長松
纖草叩雲關六朝山色
禪光定雙澗泉聲客性
閒止觀何人參智者題
詩此處是寒山老僧若
問天台賦惟有三幡句
不刪

華頂茅蓬

華頂茅蓬底枯僧忘世情披雲採春茗剷雪得黃
精虎跡穿林見龍腥帶雨生此中百五輩疑有應

真名

茅蓬最小皆苦行僧棲止處
幽巖窮谷計一百五十餘所

薄暮重過石梁

獨倚長松自詠詩曇花亭下白虹垂飛流縱向人
間去莫忘石梁清激時

夜宿上方廣寺藏經樓

雲構飛流上高眠近太清星辰低北戶鐘鼓發初
明塵土十年夢風泉一夜聲却嫌採藥者翻重世
間情

萬年寺題僧達本壁

寺門高引八峯低老樹新篁綠影齊試與豐干入

林去緩扶藤杖聽黃鸝

林間黃鸝最多

天台山紀遊

天台一萬八千丈我來迴出羣峯上碧山如海不能平天風足底催高浪山下白雲凝不流浪花卷出青黿頭惟有經臺立天表不與元氣同沉浮飄飄直過八重嶺百尺飛流石梁頂龍門鑿破走崑源銀漢扶回瀉天影金庭雙闕不可攀王沙瑤草非人間曾記桃花古仙客夜騎元鶴吹笙還七籤

空說子微悔

雲笈七籤司馬悔山爲李明仙人十六福地

李明柏碩今

安在多爲遊人乏仙骨割盡胡麻蹈東海昔登海
閣望蓬萊赤城又見霞標開羽人雖去洞天在白
日照耀金銀臺可憐害馬不肯住今夜月明宿何
處揮手一抹羣峯平彩雲填滿千盤路若非清夢
落天姥定繞仙壇轉飛去

竹堦詞和陸九

耀通

越嶺登山雙竹君平安日日我須聞何人支起西
窗坐只隔斜陽不隔雲

著我天台雁蕩間青琅玕繫碧連環昨從惆悵溪

頭過軟似詩情穩似山

天台籐杖歌

福庭本是羣仙囿漢代桃源尙如舊仙人手種祁
婆藤擲與人間賽靈壽敲破錢簧捫榔栗擎起蛟
身看清瘦我來天台親見之萬年嶺上垂金枝猿
狖引臂弄光澤筋纏石骨堅無皮鹿樵偶向夢中
得七尺珊瑚淡紅色豈須芝草始長生著手已能
助仙力石梁雨滑生蒼苔聽笙看月登瓊臺恐隨
飛瀑化龍去直撥白雲尋鶴來持歸拂拭奉 堂
上要腳輕便不汝仗躍馬才從靈隱回橫膝聊爲

壽者相庭前倚杖聽兒詩如策長藤到台蕩

遊山陰陶石簣讀書處水石洞

飛夢下天姥餘情入吳越鏡湖波逼山石簣水搜
窟飛梁駕重門立柱抗高闕冷壁悟禪面瘦峯露
仙骨定役靈匠心莫謝天機伐削成夏圭斧奇拜
米顛笏清風漱玲瓏澄潭倒崑崙紅樓四月寒烏
舫一篙滑藤枝曷更長蘋花香未歇勝境豈在多
覽古興超越緬想山阿人沿流弄明月

戊午五月二十六日靈鷲峯銷夏聯句

出郭緬微波

奉賢陳廷慶古華

沿隄快新霽綠罨千樹濃

安邑宋葆淳芝山

紅擎萬花麗荀輿先後來

婁縣楊之松

磴兩三憩疊足山龍從

錢塘何元錫夢華

撲眼石陵厲泉

喧橋影圓

儀徵阮元雲臺

亭微茶烟細呼猿已無聲

古華飛

鷺頗有勢張翼障日高山

芝

垂珠啄雲銳迦陵遠流

音

山黃

圓澤近同諦結夏慧理巖

夢華

論古咸和歲

開山

自晉咸和始

蠟屐穿玲瓏

雲臺

藤杖閱迢遞一派瀉龍涎

古華

千盤擁螺髻具相嵌莊嚴

芝山

題名雜分隸洞窺

一綫天

山黃

臺譯千佛偈登頓竟忘疲

夢華

脫略了無

繫高軒補尋梅

雲臺余屬僧

靈隱東軒有老梅已枯補栽之為題補梅軒額

層

椒遲訪桂往迹追白蘇

古華

忘形到支惠佳薜浸清

寒山芝伊蒲出新脆解衣到劇譚簣臨池更游藝畫

法尚夏圭夢華硯懷抱劉蛻余藏晉咸和

研蛻竹陰午夢清臺槐院晚蟬嘒歸思趁吟鞭古涼

風襲行袂出山尚聞鐘芝臨湖重鼓柁回指翠微

間簣卻眺烟波際此遊殊耐吟夢後會良可繼暑

歆翻避人臺我東日西逝古

嘉慶三年西湖始建蘇公祠誌事

蘇公一生凡九遷笠屐兩到西湖前十六年中夢
遊徧况今寥落七百年西湖之景甲天下惟公能
識西湖全公才若用及四海德壽不駐湖山邊區

區明聖一掌耳易補缺陷開淤填長堤十里老葑
卷北峯頓與南峯連雨雲雪月入吟袖裝抹濃淡
皆鮮妍水枕競與山俯仰百吏散後登風船可憐
紗縠去不得欲歸陽羨愁無田江頭斑白說學士
碑在口上無勞鐫三百六十寺興廢竟無一屋祠
公焉前年我來拜公像聊以山水娛四賢柏堂竹
閣今尙在一祠畢竟公當專淮海秦公世交後謂小
峴觀辨此醪出清俸錢歲寒巖下百弓地宅有花
樹池多蓮讀書堂字公手蹟一匾橫占屋十椽余摹
公所書讀書堂碑吁嗟乎公神之來如水仙靈風
字爲祠中堂匾

拂拂雲娟娟樓臺明滅衣蹁躑萬珠跳雨生白烟
琉璃十頃清光圓水樂驚起魚龍眠我歌公句冰
絲弦薦秋菊與孤山泉神歸來兮心超然望湖樓
下湖連天

秋日任滿還

朝同人餞于西湖竹閣賦詩誌別

誰家有此好湖山況是西風竹閣間秋水正寬情
共遠賓鴻初到客將還汪倫潭上舟迎岸辛漸樓
頭酒照顏爲問淨慈古開士再來我可不緣慳

贈吳鑑人

曾貫

秦家五字劇縱橫曾出偏師陷長卿寄語蘇州漫
相許語兒還有小長城

贈鮑以文

廷博

清名卽是長年訣當世應無未見書何處見君常
覓句小闌干外夕陽疎

贈朱朗齋

文藻

雨後清溪遶屋流藤床著膝看魚游先生竟似陶
貞白萬卷圖書不下樓

贈何夢華

元錫

却因風木常多病不爲清狂始詠詩一種閑情誰

解得夕陽林外讀殘碑

贈何春渚

淇

清聲無柰左雄知老戀林泉未肯離若論不求聞
達好此人曾賦却徵詩

贈朱青湖

彭

白髮吟詩獨閉關著書常被八人刪龍泓未見山
人癖別起書堂又抱山

贈周樸齋

治平

中法原居西法先何人能測九重天誰知處士巾
山下獨閉空齋畫大圓

贈端木子彝

國瑚

誰是齊梁作賦才
定香亭上碧蓮開
枯州酒監秦
淮海招得青田白鶴來

題江子屏

藩

書巢圖卷

江君未弱冠讀書已萬卷
百家無不收豈徒集墳
典歟識列尊彝石墨堆
碑版我年幼於君獲與君
友善談經析鄭注問字及
許篆書巢小東門出城
路不轉時從書裏坐左右
任披展何期丙午荒負
米致偃蹇秘笈遂散失
今乃存者鮮繪此一幅圖
感慨良不淺余爲進一言
聊以當解辨世有聚書

人充棟富編簡腹中究何有九流盡乖舛江君書
雖佚等身多述撰精華在一心糟粕笑輪扁樹石
滿書窠雲烟任過眼

已未

會試闈中夜雨和石君師韻

人材

昭代盛淵藪盡充羸鑒別推先輩師資得老成風
流歸古籍雷雨蒞清盟況有文昌氣銀河洗甲兵

恭和

御製立秋日遣悶元韻

微涼迴

殿閣秋向

鼎湖來曉露深

天慕西風感

睿才禮修軍帥賞

詩動侍

臣哀

籌筆思輦鼓銷鋒靜草萊仰惟

純孝志決奠下方災諸將

恩皆重新兵氣更催共當迎爽候合力挽河回一

洗羣氛盡

龍輶不起埃

移竹

南西門外竹檀欒破曉移栽一百竿到處軒窗皆
洒落我家門逕本清寒夢回涼雨踈踈聽坐對秋
風細細看獨抱愁心向誰說此君遮莫報平安

九月望

裕陵禮成旋

蹕復奉

命敬聞

山陵工程畱住四日每當夜月瞻望松山潛焉出

涕謹成八韻

慟哭龍輅外

橋陵已閉

宮千官歸扈

蹕一介代司空鑿石題名馬攀髯泣寶弓松楸孤

月下樓殿萬山中星斗環人近神靈護勢雄定知

雷雨後直使地天通

大葬前二日夜雷雨滿山旋即開霽肅穆常

侵夜悲思直溯風何當

春祭畢

周文王葬于畢還從

屬車東

趙忠毅公鐵如意歌 成親王教作

趙忠毅公錢如意傳世甚多銘詞形製大略相同而年款各異其最古者施念曾宛雅所載一柄爲神宗戊申春製銘曰其鉤無鏐廉而不剝巨歌巨舞巨弗若是利維君子之器也此後厲樊榭韓其武沈歸愚所歌皆未識年月若壬申製者今在初頤園中丞處天啓壬戌張鼇春製者在吾簣一處天啓癸亥製者舊在陸丹叔侍郎處今詒晉齋此柄又爲天啓甲子是當時所

製非止一也戊申之銘作以弗是利利與
劇器爲韻餘者作折或篆文相近摹仿之
訛與或讀是字爲絕句則折字又與下不
屬矣

趙公老死不如意公如如意國不墜逆璫鑄錯滿
六州三尺寒鏐天所棄公引正士盈朝廷在地爲
岳天爲星小人倒竊君子柄二十六字空鏐銘我
讀此銘重大息銀篆銷磨鏤花蝕指揮曾見三君
來抨擊能教四凶踣嗚呼此器鉤無錢廉而不劇
古所稀天鑒搜羅出呈秀摺紳黠竄歸廣微嗚呼

此器以歌舞中外忻忻望政府清流終勒東林碑
成骨幾埋代州土嗚呼此器以弗折百鍊精剛正
臣節一握難收婦監權六人甘死銀瑄錢公銘天
啓甲子年是年十月公南遷五更一星對殘月石
硯與此同清堅忠毅公東方未明之硯銘曰殘月
暉暉太白睽睽雞三號更五點此
時拜疏擊大奄事成天不佑明使公貶公貶乃將
策汝功否則同汝貶縱大奄摩挲金氣動星文太白歸天夜睽睽

題宋高宗瑞應圖同彭芸楣館師作

康王天命爲元帥先使臣民應符瑞南渡須收奉
璽心北盟早識投鞭志緋帶蕭郎待詔才江山半

壁手中開却將希古滄浪法勅寫中興瑞應來上
河曾記清明日鄭俠監門傳諫筆漫說東京天水
流竟看艮岳宮車出此日惟知崔府君小奴先見
護行人兩河將相占丁甲百萬蒼生繫鬼神鬼神
拯馬河堅凍白兔仙亭偶然中冰天何處走青衣
御營已協黃袍夢夢中江海半模糊泥馬金牛事
有無却聞風藥花飭使歸寫吳山立馬圖此圖絕
勝延祥觀半臂雙環莫同玩回憶黃羅擲將時祇
今道服披圖看臨平燈火似樊樓賸水殘山屬馬
劉圖中尙是中原地半是磁州半暉州李宗韓岳

皆思戰願飲黃龍恢赤縣此事當年最吉祥凌烟
惜未開生面赤符龍鬪渡滹沱自古中興瑞應多
白水真人真謹厚惟聞苦戰不聞和

題五代馬楚復溪州銅柱拓本

此柱朱竹垞檢討舊有二跋吳任臣十國
春秋載此文訛數十字且沿五代史士然
之訛今觀拓本實士愁也柱今在保靖縣
十里舊茅灘上館師彭芸楣大司空以拓
本屬題

伏波鑄銅柱歸車得讒構馬殷無功德天以湘潭

授酬勲在千年毋乃是華胄士愁一角蠻豈如徵
側富不爲錦溪長甘作辰澧寇盜用盤瓠兵敢與
九龍鬪僭僞當盛時材力每雄厚梯棧破溪塞焚
林縛猿狖五姓跪飲血求誓僅自救王曰與爾盟
鬼神質詛咒伏波文學博四羊印曾奏當年若勒
銘定能正蒼籀天策十八人無出宏臯右雄文與
功稱所學亦不陋赤堇丈二尺鑿字硬且瘦惜哉
猥掉尾蠻烟蝕銀鏤前年有苗格露布出雲岫拓
本來軍中南昌辨其讀史校薛歐闕跋訂吳朱謬
吾祖昔征苗午夜揮兵走十戰九洞中碧血染


袍袖此柱當戰壘刀鏐或親扣挾冊三摩挲仰視
日中晝

暖房示書之


落日黃塵暗錦韉退朝且就曲房眠別開茶熟香
溫地好待風饗雪虐天索爾新詩憑素壁記人往
事有青瑣爐燈夜讀慈機下此事傷心二十年

武林歲暮

武林逢歲暮風雨正淒然短燭論文夜寒雲聽雁
天客懷清似水官舍冷於禪莫道長安遠崢嶸共
此年止



THE UNIVERSITY OF CHICAGO PRESS



擘經室集

一四

12
199
58
846
614

擘經室四集詩卷五

琅嬛仙館詩略

庚申

春日台州

滄波圍古郡弭節一登臨
緯耒農人意樓船將士
心麥愁春雪厚帆慮海雲深
世事積如此天台安
可尋

庚申正月督兵海上往返天台未能入山


前年遊屐入天台今日雲山不肯開
縱使石梁難再到飛流可向夢中來

天台山大雪三日守凍剡溪

擘經室四集卷五詩

詩

一



雪竇集卷五
天台三日漫天雪頓長千峯一丈高華頂定當排
玉樹石梁想見凍銀濤礧迷險磴常翻馬溪擁寒
澌不受篙安得春風吹暖日四山春水下輕舸

守凍

剡溪百步寬積雪寒流壅我舟陷其中尺寸不可
動豈無槳與楫力士失其勇非冰疇敢履少涉卽
沒踵此時計春糧如珠但盈捧四顧絕人迹惟見
玉山聳南中春水煖岸草媚丰茸爲想下天台輕
帆坐中擁豈料三日雪寒壓山川重事勢變莫測
及此乃深悚所以海上寇吾憂在甌甬

送趙介山

文楷

殿撰李墨莊

鼎元

舍人奉

使冊封琉球

同是中朝第一流
雲螺彩蟒拂麟洲
狀元風度今莊叔
才子神仙舊鄴侯
四月西湖畱駐節
萬人南海看登舟
翰林盛事知多少
如此乘風乃壯遊

題孫淵如觀察萬卷歸裝圖

魯民爭道送歸程
萬卷圖書短櫂輕
使君去後一

帆遠惟有微山湖
水清

右丞渭城一曲取調最高
籥爲之裂北宋猶有能唱

之者東坡濟南春好雪初晴一首
用之此絕亦用其調未知合否

綠葉

我家讀書處團雲蓋老屋茲復來吳山繞屋列嘉
木已當衆芳歇萬葉成一綠北窗人意閒瑣碎搖
晴旭疎雨過南樓蕉桐滴鳴玉半年勞簿領春筍
積成束賴此清蔭濃稍可障塵俗隔簾影逾淨下
階涼更足不知此何時但見青梅熟

題西湖第一樓

高樓何處臥元龍獨倚孤山百尺松人與峯巒爭
氣象窗收湖海入心胸經神誰擅無雙譽闌影當
憑第一重却笑扶風空好士登梯始見鄭司農

題徐碧堂司馬

聯奎

秋艇狎鷗圖

鑑湖秋水放輕舟
賀監歸來未白頭
誰與先生最相狎
舟前三十六沙鷗
濠梁秋水坐忘機
一抹青山淡夕暉
愧我今年機事重
海鷗終日背人飛

贈李西巖總鎮

儒將威名定不虛
風濤千里鎮儲胥
海天飛礮親撾鼓
夜月揚帆坐讀書
造得戈船浮木枿
築成京觀掣鯨魚
封侯自有黃金印
射石將軍恐未如

次韻酬阮雲臺撫軍

李長庚

西巖

開府推心若谷虛
要將民物納華胥
風清海外

除奸蠹令肅軍中畏簡書報

國自應親矢石酬知未盡掃鯨魚庸疏何幸叨
青眼媲美前賢愧不如

文章高映斗牛虛絳節重臨護象胥帷幄申嚴
三尺法指揮妙合六韜書不嫌樛櫟加丹漆着
意箴規滅釜魚漫許胸中有兵甲運籌未稱待
何如

上虞道中

曹娥江外驛籊長百曲清溪繞石梁夏氣出山雲
莽莽晴烟歸壑水浪浪風前高樹吟蟬早橋外平

田吠蛤涼却羨老農耘稻畢一般閒意立斜陽

天台行帳題楊補帆

昌緒

畫天台桃源圖

天台仙境去仍還百道清溪萬疊山洞口桃花隨
水出巖前瑤草帶烟刪誰教一路生靈藥却有雙
仙並綠鬟笙吹月明元鶴背樓臺霞護碧松關歸
雲隱隱聞雞犬飛瀑泠泠雜佩環千載偶逢開王
戶春風常爲駐紅顏每依錦瑟終年坐除種胡麻
鎮日閑如此好山猶別去仙源那怪斷人間

台州夜坐

雨後得秋意草蟲聲漸多樓陰流素月山影接明

河坐覺風初定遙知海不波此時問韓說何處夜
橫戈

初秋台州獲安南海寇事畢曉發回杭州

海上羣山碧四圍新涼時候送將歸秋來天使浮
雲薄不待南風也自飛

寫榜作

列炬搖紅唱夜闌屏風老吏侍闈官忽聞佳士心
先喜得上名經寫亦難撐拄五千古文字銷磨八
百舊孤寒榜花已說孫山好還向孫山以外看

漪園晚眺

碧樹西風裏闌干閒更長萍開魚影亂松靜鶴巢
涼遠水交平岼秋山耐夕陽不知惆悵久歸棹入
昏黃

仲冬詣天竺復同孫蓮水

韶

吳山尊

鼎

汪芝

亭

恩

李四香

銳

陳曼生

鴻壽

陳雲伯

文述

林

庾泉

道源

焦里堂

循

過靈隱蔬飯冒雪登西

湖第一樓

空山寂無人同雲闇然合微雪何荒寒僧境頗宜
臘翩翩裘屐來開堂見老衲鑪火熱松明茶烟出
禪榻煮筍出山去湖光更蕭颯櫓聲動烟水如與

雁相答山樓對南屏萬樹擁一塔窗虛衆影歸懷
冲雅情洽古人重清遊良貴朋簪盍寄言儒家子
禪悟不可雜

浙東賑災紀事

冰凌塞谿壑積雪明羣山飽飯被復陶猶覺此地
寒矧茲災餘民食少衣復單庚申夏六月風雨夜
漫漫山海本交錯蛟龍出其間夷寇蕩頗盡嫠枯
民亦殘狂流破山出百道開巘岼平地水一丈牆
屋崩驚湍漂人及雞犬決冢浮窆棺清畎爲石田
沃土成沙灘萬頃稻始花擢拔同草菅客如疑此

言試看高樹端樹端枝杈極藁稭猶交攢爾時不
死民垂淚呼長官長官發倉穀倉破穀不乾升斗
縱不多尙可數日餐飛章入告

帝民隱動

天顏

帝曰毋諱災赤子皆恫瘝近者急軍儲度支殊艱

難臣體

帝之心不敢少吝慳金穀四十萬胥吏伺爲姦察
之苟不密何異官貪頑民受官所授著手親分頒
我來如視傷一一索其瘕治寇在於猛卹災務於

寬致災已不德有力敢不殫所賴高田稔米價平
市闌種蕎亦成熟雖貧心已安終思卅萬人家室
何時完朔風生礪道伏軾興長歎

屬王椒畦同年畫珠湖草堂圖卽題

月落湖水平珠光弄殘夜夕霏已媚人况是斜陽

下吾家甓社西臨水有茅舍當年

達人歸

謝靈運述

祖德詩云達
人貴自我

行吟得清暇投壺登小樓射鴨來虛

榭柳細早分涼荷香始知夏我豈不懷鄉塵鞅安
可謝武林好山水未宜稅烟駕終念甘泉山青光
向湖瀉

題王叔畦同年畫金華載詠樓圖

夫容峯下碧城頭
百里清江繞樹流
如此好山原入畫
祇須名輩一登樓
荊州詞賦思王粲
元暢詩篇說隱侯
我亦欲來同覓句
恐聞鴻雁不勝愁

登八詠樓

蛟龍城外迹鴻雁
澤中聲山破雪猶積
野荒風易生
三冬氣寥落
六代意縱橫
怪底休文瘦
誰能遣此情

卽事

鴉盤老樹晚來寒
密霰蕭蕭打竹竿
風色滿天雲

更緊絕無情緒倚闌干

桐廬九里洲看梅花

九里江洲好畫圖梅花曾見此間無
花農不記花開數約畧一洲三萬株

潑眼花光江岼前半成明月半成烟
若非天女散花地便是神仙種玉田

香和雲氣染人衣花與山光共四圍
一片暮雲花上落可憐香重不能飛

十萬瓊花路百盤入花容易出花難
老僧菴外三千樹已耐詩人半日看

辛酉

賦得雷乃發聲

嘉慶六年正月久晴未雨望澤甚殷十六
日頒到

御賜

御書福字並

批諭云親書福字賜卿願兩浙士民同霑厚福欽

此是夜春雷應節雨澤優霑士民交慶十

七日試三書院生童擬作試帖一首敬書

玉旨宣示諸生使知共被

華經堂四集

卷五

詩

八

聖朝集 卷五
恩膏勉膺福澤也

風雨正漫漫鳴雷起夜闌一聲宣地氣百里破春
寒震在剛柔始屯如發洩難天門開鬱律車轂轉
盤桓紫電初回掣青雲已直干伸舒聞雉雊動盪
啓龍蟠暖透山田麥狂消浙海瀾况逢

宸翰灑澤被士民寬

蘇堤春曉

北高峯上月輪斜十里湖光共一涯破曉春天青
白色東風吹冷碧桃花

二月十七日過臯亭山看桃花用六言律體

臯亭山下春色甘
遯邨前夕陽柳葉纔勻鴨綠菜
花盡染鶯黃雙橋遠水弄影畫舫晚風載香況是
碧桃萬樹我來權作漁郎

廿三日白海塘迴舟曉過臯亭復成一律

篷背東風太緊曉來桃柳橫斜溪頭飛溼紅雨山
半飄殘絳霞流水一年春色武陵何處人家莫尋
洞口漁父且看紛紛落花

登鎮海縣招寶山閣新造水師大艦

怒濤如雪擁蛟門百道樓船過虎蹲山名旗鼓一新
人氣壯風雲四合礮光屯句章郡縣來相望橫海

將軍許細論果使水犀騰浪去不教海外有孫恩

辛酉臘月朔入山祈雪卽日得雪出山過詒

經精舍訪顧千里

廣圻

臧在東

鏞堂

用去年

得雪詩韻

殘歲山崢嶸陳迹兩年合峯巒洩春氣一雪復成
臘空谷無行人白光凍千衲出山入精舍拂衣花
滿榻延賓有陳蕃下車愧衛颯煮茶說羣經鄭志
互問荅登樓對南屏還見去年塔頽雲潑墨濃圖
中認王洽撫景觸愁懷鄉園戶空闔慈竹壓墓門
風雪定紛雜

壬戌

曉至西溪祭社稷壇

路轉西湖曲松陰散曉涼五更山雨歇八月稻花香
流水開天影頽雲壓電光儘多祈報意無德感
勾芒

海寧州迎潮

青峯岑寂碧雲開忽見江流亂卷迴虹影化爲秋
水立日光曬倒雪山來難分龕赭東南路怕聽鹽
官日夜雷塘裏桑田外滄海教人爭不重徘徊

安瀾園小憩

秋園風雨歇坐覺蕉衫冷竹樹含清陰如雲淡無
影苔岑蟋蟀吟空庭悶幽靜我本懷秋人情賞相
與永

自乍浦彩旗門觀海至秦駐山

八月試新寒蒼茫海岬聞天風吹大水落日滿羣
山潮汐防衝突艤艫計往還勞勞千里事行路反
成閒

題汪蛟門先生少壯三好圖

梁蕭琛自言少壯三好音律書

酒也

汪君磊落古丈夫朗朗玉立清而腴百尺梧桐閣

上居持喪卻薦爲醇儒

君舉鴻博科以未闕服固辭徵舉

撐腸拄

腹萬卷書其才鬱塞不可舒一使金尊玉罍瀉醺

醪一使哀絲豪竹催謳歆人生豈能無嗜好要問

好者爲何如既不能讀五車又不能注蟲魚縱令

好色皆登徒餽糟歆醺爲屠沽吁嗟乎汪君磊落

古丈夫儒臣法吏心事俱

君詩云半生心事無多字只在儒臣法吏間

白雲青史相縈紆文如介甫詩韓蘇

漁洋山人評君語胸

中經緯大有用一視餘子齷齪而麤疎君不見汪

君之友禹鴻臚寫此少壯三好圖龍舉篆隸陳坐

隅彈箏撫管皆名姝如有歌聲遏圖內一展卷後

飛空虛青天白眼互照耀酒氣拂拂搖其鬚此圖

流傳在江都秦君林下供清娛五笥僊館貯萬軸

嗜好未與汪君殊秦敦夫編修博覽多藏書壯年引病新構藏書之屋曰五笥僊

館屬元馳書寄圖索我句我句能寫汪君乎不能

顧曲不能飲自慚俗吏陋且迂惟有簿領來儲胥

又有經籍堆籤廚此間開圖呼女奴酬君以酒騰

花觚更裁素絹重臨摹百家題句寫無餘吁嗟乎

汪君磊落古丈夫風流文采今所無眼前之人誰

如蕭彥瑜

秋日西湖泛舟

三面青山倚夕陽桂花天氣半溫涼不須泊岸尋
花去湖上秋風鎮日香

駐杭州時每九月花奴自揚州載菊一舟來
一時瓶盎軒階俱滿奉嚴親宴花下饒有
家鄉風景爲寫秋江載菊圖題之

重陽花事滿江關千里花奴獨往還瓜步西風潤
州雨一船秋色過金山

爲寫秋江載菊圖黃花同我住西湖我來日飲西
湖水更爲澆花調一符

花稱鄉心酒半酣老人安穩住江南階前半畝

方池水便是延年古菊潭

松間石畔竹籬根栽滿黃花卽是園記得童遊問

兒輩此間可似傷花邨

揚州城北傷花邨種菊至數百畝田家籬落風景絕

佳

同人分詠古十印得劉淵之印

漢寶缺角威斗亡永嘉六璽歸晉陽中間竊歛數十載天生漢甥劉元海二角真英雄蛟龍那得居池中可憐王侯降編戶劉淵名但鐫頑銅此銅鐫印尙青組隨陸文兼絳灌武朱范同門傳五經曾以書緘封印土無端王璽來河汾改元刻瑞

增三文

淵于汾中得王璽增淵海光三字改元河瑞

平陽光昌漢天子

豈監司馬家兒軍當塗典午皆成篡昭烈廟中出
降禪公主之孫能復仇人心到底思東漢惜哉和
曜性不仁不及李淵生世民若使石符奉漢璽諱
淵久已如唐人我今得印繫之時剛卯金刀辟邪
鈕回水爲淵屬象形想見單于文在手元海生有文在手曰淵故名

置西漢定陶鼎於焦山勝之以詩

西漢陶陵鼎以漢慮僂尺度之高七寸三
分身高四寸二分蓋高一寸六分蓋上有

三環各高一寸二分兩耳高二寸二分三
足高二寸銅質五色斑駁腹有稜純素蓋
鑿隸書銘大字十五曰隃麋陶陵共廚銅
斗鼎蓋并重十一斤小字四曰汧第卅五
器鑿隸書銘大字十七曰隃麋陶陵共廚
銅鼎一合容一斗并重十斤小字十六曰
汧共廚銅鼎容一斗重八斤一兩第廿一
案漢書地理志隃麋汧二縣屬右扶風後
漢書耿弇傳建武四年封耿況爲隃麋侯
續漢書郡國志作渝麋誤也又續漢志定

陶在濟陰郡本曹國後漢屬兗州刺史部
郭璞曰城中有陶邱史記云穰侯出之陶
卽其地定陶共王康元帝子哀帝父永光
八年自山陽徙封漢書丁太后傳建平二
年上曰太后宜起陵恭皇之園遣大司馬
驃騎將軍明東送塋於定陶貴震山東共
王傳哀帝二年追尊共王爲共皇帝水經
注濟水自定陶縣南又東逕秦相魏冉冢
南又東北逕定陶共王陵此器云陶陵是
定陶共王陵也隃麋汧二邑共此器故曰

共廚銅鼎鐘鼎欵識漢好時鼎銘云今好
時共廚金一斗鼎汾陰宮鼎銘云汾陰共
官銅鼎上林鼎銘云上林共官銅鼎漢器
體制如是漢陵廟皆有廚三輔黃圖昭帝
平陵爲小廚裁足祠祝欵識漢孝成鼎銘
云長安廚孝成廟銅三斗鼎是也此鼎蓋
與器銘辭不相應者因有二鼎蓋與器互
錯也器銘云并重十斤又云重八斤一兩
云器重八斤一兩則蓋當重一斤十五兩
矣今除蓋以庫平法馬稱之重五十三兩

七錢二分銘云容一斗以今官倉斗較之
得一升八合定陶故城在今山東曹州府
定陶縣西南予得此鼎因思焦山祇有周
鼎若以漢鼎配之經史引徵可增詩事爰
以官牘達之鎮江府丹徒縣付焦山寺僧
永守之竝加冊於櫝繪圖揭款鈐印備錄
諸詩時嘉慶七年季秋月

碧山一角浮春潮中有周鼎開雲歆古文十行照
江水百家詠釋窮秋毫千年古篆變爲隸西漢款
識多鑿雕我有漢鼎五十字隃麋汧鑄供定陶斗

斤兼記古權量汾陰好時同禋祧濟水東流帝陵
起臣莽掘廚金不銷齋中拭刷出古澤鼎雖轉徙
猶堅牢煙雲過眼莫浪擲送爾安穩棲松寥

焦山閣名

占鉏解爵共相餞雁銍翦燭吟清宵壬戌之秋木

葉脫海門風起江飛濤蛟鼉踏浪避金景蒼然古

意生單椒此時此鼎入山去江天寶氣騰輕艘海

雲堂中多古木兩鼎肩耳初相遭周儀可補覲禮

闕

周鼎呼史冊命之儀可補禮文之不足諸家詩考未言及此

漢事志傳徵班

曹倉籀字破鬼夜哭八分不似周王朝一波一磔

湛水石同隱有似由與巢胎禽仙去亦偶耳華陽

銘尚鐫嶠嶢可知古人皆好事以詩媵鼎各訂交
他時得暇或相訪雲飄一片橫金焦

考杜佑通典京口有譙山庾太平寰宇記
亦以譙山爲戍海口之山余家藏嘉定鎮
江志云江淹焦山詩舊本作譙山是北宋
以前尚名譙山北宋以後始以焦孝然事
傳會之孝然避兵娶婦於揚州見三國志
注爾時孝然年尚幼似無隱譙山三詔之
事且孝然爲魏以後人蔡伯喈卒於漢末
在孝然之前焦君之贊當別有一焦君似

無爲孝然作贊之事又焦山古鼎王西樵
始據韓吏部如石言爲京口某公家物嚴
分宜奪之康熙間人競以爲詩歌故實然
自嘉靖以後明人書集鮮及此說天水冰
山錄于分宜家物無所不載古銅器款中
祇有古銅鼎二箇共重一百一十四斤且
有蓋竝未言及款字此鼎一鼎之重已不
止百餘斤矣朱竹垞翁覃溪二君深於考
古者其焦山鼎詩中皆不言此事爲其無
據也故余謂焦孝然嚴分宜二事等諸無

稽勿聽可也

浙撫署東徧誠本堂有巨石以漢慮僦尺度
之高一丈二尺有奇勢如夏雲初起卓立成
峯足圍甚小而要頂幾兩倍之峯之可望可
穿上下通透者三十一穴余於嘉慶七年移
立澹寧精舍方池中以余字字之曰雲臺峯
余鄉本有雲臺山也因用蘇黃壺中九華倡
和詩韻題之

雲臺海上有高峯何日爲雲上碧空隨我南來三
竺外引人遊入九華中臨池當戶堂堂見透月穿

風面面通欲與石交商一語那如鍊壁不玲瓏

擘經室四集詩卷六

琅嬛仙館詩略

癸亥

癸亥正月二十日四十生日避客往海塘用

白香山四十歲白髮詩韻

春風四十度與我年相期駐心一迴想意緒紛如

絲慈母久違養長懷雛燕悲

元十歲時母嘗點白香山燕詩示

劉叟等篇口授成誦

嚴君七旬健以年喜可知人生四十

歲前後關壯衰我髮雖未白寢食非往時生日同

白公恐比白公羸

白香山正月二十日生見文公集

百事役我心

所勞非四肢學荒政亦拙時時懼支離宦較白公

早樂天較公遲我復不能禪塵俗日追隨何以卻
老病與公商所治

澹凝精舍卽事

雪消青草出晴沙淡綠梅枝滿著花石上寒泉冒
深淺風前春色試清華一峯已染苔痕溼半鏡還
分樹影斜難得小齋閒坐久夕陽時候啓窗紗

吳蜀師輓

八輓吟館同人
分詠八輓之一

吾鄉平山堂下濬河得古輓文二曰蜀師
其體在篆隸間久載于張燕昌金石契中
未知爲何代物近年在吳中屢見蜀師古

甄兼有吳永安三年及晉太康三年七月
廿日蜀師作者然則蜀師爲吳中作甄之
氏可知按揚州當三國時多爲魏據惟吳
五鳳二年孫峻城廣陵而功未就見于吳
志本傳此年紀與永安永康相近然則此
甄爲孫峻所作廣陵城甃無疑矣

吾鄉江淮間崑岡爲地軸井韓列雉堞如泥塞函
谷漢末之故城當是潁所築孫峻圖壽春將作曾
親督遺此一尺甄薶在平山麓有文曰蜀師匠者
或師蜀永安及太康蜀師吳所屬廣陵魏久據不

領孫氏牧惟五鳳二年欽

文

爲峻所蹙城城雖未

成一簣已多覆殘甃今尙存吳志朗可讀孫峻豎

子耳殺恪

諸葛恪

何其酷恪所不能城峻也安能續

揚城無降將嬰守每多戮哀此古甌甌屢受石與

鏃

汪容甫廣陵對云廣陵一城歷十有八姓二千餘年而亡城降子不出于其間

摩挲蜀

師文千年歎何速晉城久已蕪廢池更喬木

宋姜夔詞

云自邊馬窺江去後廢池喬木猶厭言兵漸黃昏清角吹寒都在空城按劉宋及趙宋南渡時揚州

荒蕪爲九甚

吾鄉少古碑得此漢輒足五鳳當延熙稱

漢遵綱目

朱子綱目吳五鳳二年爲漢後主延熙十八年

仙館列入輒照

以雁鐙燭刻燭或聯吟詩成受迫促清暇想李程

日光照如王

與諸友分賦商周十三酒器爲堂上壽得

商父丁角

商父丁角有饗饗飮山雷文甚緻內銘三十二字曰庚申王在東門

夕王格宰桴從錫貝五朋用作父丁尊彝十六月惟王乙祀角又五外銘三字曰庚丙冊案十六月者董道謂商君自始卽位月通數之例也且商器之銘月每在前而祀在後也

吾鄉有酒器十三銀鑿落今吾積吉金其數亦相若就中文多者厥有父丁角饗饗突猗猗山雷運盤礪銀花漫青白金衣發斑駁三足白鼎鼎雙角何嶽嶽無柱亦無流求形異于爵其容當四升今

量三爵弱鄭說角卽觥蒼兕露椅桷內銘卅一字
東門王夕格庚申宰梲從尊彝錫貝作其末紀五
數特角肖手握東門居青陽重屋榑松桷宰梲名
無徵商書本闕略賴此鑄篆文勝于左邱削大賚
富五朋金錫付鑪錯父丁爲王臣銘詞殊敬恪伊
巫暨甘傳世系誰可度外銘庚丙冊亦難推月朔
紀月至十六斯乃子氏學歐陽疑未明董道識頗
卓先月後乙祀殷禮考鑿鑿萬物孰最壽吉金至
堅確况此四千年傳之自殷亳舉以奉親娛春
酒周尊酌諸友飲且詠絕麗復沈博寶用蘄永年

眉壽長綰綽仲春日丙辰

錫玉適連珏擬待述職旋紀

恩銘諸縛

二十日蒙白玉壽字

如意一枝恩賞

爲朱椒堂

爲弼

題朱氏月潭八景圖冊

黃鳥何睍睍楊柳何依依未若紫陽山鵲鴿鳴且

飛

柳堤鳴鶯

松石交清蒼晴嵐浮暖翠虛亭寂無人此中有古

意

松石晴嵐

苔磯新綠溼隔溪烟雨暗垂釣本忘機清川向人

淡

釣臺烟雨

一夜風雨聲聒耳何縱橫曉來看飛瀑石上春雷

鳴

石門瀑漲

月出東南隅澄潭影先得疎林風定後浮作淡黃

色

澄潭印月

莫買鵝溪絹畫作堂前屏請看南山色疊如螺髻

青

南山疊翠

晚山綠沈沈平林烟漠漠間殺寺門秋一杵殘鐘

落

西山晚烟

空山多雨雪尚有千年樹詩人慕月潭敝廬在何

處

王峯積雪

白題珠湖射鴨圖小象

射鴨復射鴨鴨向菰蘆飛菰蘆何蒼蒼秋樹何依
依扁舟泛珠湖西風吹我衣湖波清且遠日暮澹
忘歸昔日俗情少今時塵迹違但讀孟郊詩竹弓
無是非

澹凝精舍卽事

難得從容愛景光今朝初覺暮春長石邊蕉葉簾
前綠窗外花枝鏡裏香鳥壓藤稍低著水魚跳池
影上搖牆新茶一碗人清暇不管西山下夕陽

綠陰課詁經精舍擬作

幾番春雨亂紅披重到園林一月遲涼意轉生
亭午後清光多在嫩晴時輕寒輕暖人初靜如
水如雲鳥不知待過黃梅好時節新蟬嘶破影
參差

澹凝精舍初夏

圖書簿領共籤厨樹木蒙茸六七株梔子花
開風氣暖芭蕉葉大雨聲麤石中溜似天台瀑
階下池如雁宕湖多少洞天遊不得此間便是
小方壺

那東甫同年由廣東奉

使過浙賦贈

使君旌節駐杭州民說公孫尙黑頭鈴閣竟如
同

館住弓弦間爲入吳收山中辦賊蠻烟淨湖上聯
吟春水柔四十年華五離合予與東甫同四十歲幾多歡喜
幾多愁

飛霜鏡引

真子飛霜鏡逕今尺五寸七分體圓外作
八瓣菱花形背白如水銀左方四竹三笋
一人披衣坐狻置琴于膝前有几几置短
劍二爐一又一物不可辨右方一鳳立于
石二樹正圓如帚形下方爲池池中一蓮
葉葉上一龜龜值鏡之中虛其足下卽爲

鏡之背鈕也上方有山雲銜半月形月中
有顧兔形雲下作田格格中四正字曰真
子飛霜真子者鼓琴之人飛霜其操名也
予審此爲晉鏡何以知之以書畫之體知
之也書非篆隸晉以後體也畫樹直立圓
形如帚畫月內加兔此晉人法也予曾見
唐人摹顧愷之洛神賦圖樹形與此同且
畫太陽升朝霞句日中有陽鳥實同此形
矣真子飛霜于書無所考見予以意推之
或卽晉戴逵耶晉書逵本傳云逵能鼓琴

工書畫其餘巧藝靡不畢綜師事術士范
宣于豫章宋書戴仲若傳云漢始有佛像
形制未工戴逵特善其事据此二史則善
鼓琴善畫善鑄銅師術士逵一人實兼綜
之則真子將毋卽逵也錢博士坵云古人
製器原欲以流傳後世使其人不作此鏡
則湮沒無聞矣故好事好名之徒今亦不
如古据博士此言真子若非戴逵微此鏡
則真子無傳矣爲逵鏡可寶非逵鏡尤可
寶也

五更曉月霜天高匣中寶鏡悲六朝鏡如霜月月
如鏡人間天上常相遭鏡中何所有真子坐彈琴
琴中何所有必是變徵清商音竹筍出林蓮出池
真子坐當春夏時一彈天地有秋氣蓮葉慘淡遊
神龜再彈長空轉寒月鳳皇夜叫雙梧枝三彈四
彈清霜飛素娥青女顰蛾眉菱花內有古人面凜
然冷逼誰敢窺剡溪高人戴安道作畫范銅盡工
巧或是王門破琴後幽凍三商真大好又疑真子
原無名以鏡寫神琴寫情霜華落指看不見惟見
鏡臺秋月明秋月復秋月千年磨不缺負局聽琴

聲琴聲久消絕琴聲絕兮真子歸劍沈秋水兮鏡
滿春暉掛高堂兮曜日懸池館兮照衣春蠶珥絲
七絃溼新篁解籜桐葉肥繁星徹夜早霞暖何處
寒霜背月飛

壬戌孟夏由靈隱徒步過韜光庵直上北高
峯頂癸亥夏日又至韜光畱題韜光觀海畫

卷中

潮聲不到北高峯惟見樓頭海日紅健足直凌山
色外詩情渾付竹光中胸前泉石千層起眼底江
湖一望通欲學樂天遊兩寺那堪吟眺總恩恩

夏日過雲棲

入山三五里修逕夾松篁滿地綠雲滑隔林紅日
涼客來惟飲水僧老但焚香莫向城中去炎歊日
正長

西院平臺落成

平臺石磴路三盤到此方知眼界寬百尺梧桐扶
碧柱四圍雲岫倚紅欄隔江風雨連潮聽入夜星
河帶月看本欲乘風便歸去瓊樓高處況無寒

虎邱後山小憩

虎邱開北戶平野意蒼然遠水千邨稻斜陽萬樹

蟬風迴殘暑外人在暮山前三度來遊憩流光已
八年

沂州道中

殘暑戀河北浮歛殊未收農心愁晚旱客夢怯長
郵密雨漫天落涼泉滿地流風雲真快意一氣接
新秋

百里蘭陵路秋風生袷衣曉涼蟲語響新雨豆花
肥脈脈墮黃月頻頻繞翠微遙知秦蜀外到處靜
朝暉

曉過敖陽

殘月淡無色自向西嶺斜東山鬱蒼翠絢以朱明
霞佳哉罄山峯松柏紛如麻單椒冒秀澤百丈青
蓮花魯諱廢不得千載停征車孰可比秋色岱陰
雙鵲華

羊流站

去嶽尙百里羣山已壯哉白雲出梁甫青氣隱徂
徠日暮吟何在南州碑亦摧古人塵轍外幾輩叱
車來

自新泰至泰安僕馬已憊而日始午更乘山
輿登岱夜宿孔子廟曉觀日出作

蒙山居魯東其高已無量孰知泰山麓遠在蒙頂
上蒙陰二百里嶽起地勢仰行行過徂徠巖巖入
高望仲秋日當午將登氣先壯險嶺戒迴馬懸崖
記御帳盤道多旋折羣峯無定向飛泉渙其聲天
風與之盪絕壁松倒垂雕鶚不及掠何由溼蒼翠
白雲日相養石磴十八重直立無可傍前踵接後
頂志歛疇敢放及其登天門萬里詆蕩蕩半點梁
父烟一綫汶河漲平野若滄海衆山起青浪落日
雲霞昏翻騰變千狀拂拭舊題名暮拜 孔子象
小夢日輪轉午夜天雞唱日觀開扶桑元氣浴滉

澆色鑄黃金天嶽影搖清曠陽烏突躍出暈采忽
飛颺雙眸倏爾明一嘯劃然鬯氣從平旦復心與
天機長嗟此封禪基土壤古不讓七十二代君何
年路始剗持此問古人夷吾亦惆悵

癸丑七月赴山東夜宿新城縣南萬柳月明
蟬聲徹夜今復以癸亥七月入都過此以一
絕紀之

曾是新城借榻眠深林涼月夜鳴蟬十年四度匆
匆過又是秋風退暑天

出古北口

盧龍古塞曉霜飛千里陰山鐵作圍城窟水寒宜
飲馬關門風緊乍添衣到來幾樹初黃葉此去無
山不翠微爲語白檀沙上雁江南依舊稻梁肥
上親獲鹿於山莊得
賜割鮮

神武調鎗準山莊鹿柴前近臣新

賜食置吏亦

頒鮮識味思茸客延齡借角仙擬供
堂上膳

恩意壓華筵

過普陀宗乘須彌福壽二廟

聖經室四集

卷六 詩

七

武列多秋水東流石挺峯都網如小邑大藏盡高
墉丹壑方千尺香臺疊七重石門雙白象金屋九
黃龍樓曲層層起欄迴面面逢鐵旗輕似羽銅鐸
響於鐘藩部膜爲拜諸天王作客晚來邊月滿孤
塔出青松

萬樹園

賜宴時蒙古王公及回部越南貢使皆列坐參贊
侯德楞泰亦凱旋紀

恩一首

灤山秋霽

御筵開上將初銜飲至杯東走名駒大宛到北飛
馴雉越裳來魚龍戲畢諸藩拜薇芑詩成二雅材
何幸使臣歸述職得叨
恩命共趨陪

中秋日山莊

恩賜曲宴用唐王建詩韻

宮槐月上動昏鴉

賜宴歸來燭已花今夜真如天上住瓊樓西畔一
仙家

過青石梁用陳雲伯顧鄭鄉

廷綸

倡和詩韻

盤龍身蜿蜒飛鳳翼
膈膊山勢雖雄奇
非人終寂寞庚庚
青石梁跡阻心驚
愕疇能驅輪轂上
與石相搏漢晉久
恢張金元亦礪砢
疑是烏桓開或爲
慕容鑿山脈向東
走象緯測外博盤
旋登領脊攀援上
肩膊礙馬刪枯槎
滑足塞清洑客嗟
行路難人減遊山
樂及其升高梁潑
眼頓揮霍南山與
北山萬壑低於腳
白雲參錯之一起
垠堦山光翠太濃
天色青轉薄仙靈
定來往虎豹敢騰
攫是時秋八月西
風寒始作塞雁向
陽飛蕃馬思北躍
去來挈吟侶驤首
倚寥廓吳山吾管
領四載住城郭

春遊嫌騶從夜景阻筦鑰縱有得句時但向梅花
索顧陳詩並好山林復臺閣披圖想塞垣心旌共
懸度快哉度此梁心胸屢開拓語險山失奇筆銳
石將削我

朝合中外威德連北幕四十九藩臣奔走懼少卻
逾茲興桓嶺振以尼山鐸三秋駐

翠罽萬象呈谿壑

輦道仰鬱盤馬埒遠連絡金根

天子車陰羽王會鶴高山作康之周雅歌桓酌
御氣通虹梁豈復有虎落所以輪蹄鐵日與石火

爍今年秋氣早霜月已弦
魄迴思癸丑秋十年事
猶昨天外多劍峯依然礪青鐸
詩人復歸來得句
定各各行吟涉灤水如嵩繞伊洛
梁上雲漫漫梁
下波漠漠

入古北口

策馬初迴紫塞間斜陽閑煞萬重山
晚來小雨西風急人與秋雲共入關

古北口月夜

邊月照長城蒼涼萬古情
西風入遙夜秋色更分明
客路無多日鄉心何易生
江南如有夢香露桂

花清

秋柳

盧龍塞內古漁陽
秋柳蕭蕭一萬行
邊馬歸來猶戀影
曉烏曉後漸飛霜
還思歷下西風裏
又過琅瑯大路旁
況是淮南悲落葉
隋隄千樹接雷塘

題錢裴山同年使車紀勝圖

西南山川天下奇
山靈望客來圖之
儒臣足底無遠道
不行萬里空吟詩
吾友錢君富經術
吳山越水開須眉
文章一出冠天下
奉

詔偏走西南陲
西陲何所有蜀道
一千里人盤空

外行棧從天上起，劒閣天彭橫。白雲巫峽瞿塘瀉，
秋水此時使者珥筆來。短衣匹馬秦關開，題詩一
夜過井絡。蠶叢祠外銀河迴，蜀才樂得獻其秀。巴
猿不敢鳴其哀，南陲夫如何。衡雲連粵桂，瀟湘弔
二妃。蒼梧拜虞帝，荔浦藤江到處佳。王筍瑤蓼列
無際，使者到此詩更新。放筆直欲無古人，三江五
嶺入卷軸。蠻花猺草扶車輪，以詩教士在溫厚。孤
寒八百皆迴春，或云官似漁洋叟。入蜀年同三十
九，天將靈境付詩筆。一百餘年入君手，我云杜陸
詩則同。桂海虞衡彼未有，長安八月藤花館。錢君

示我雙圖卷固知君不以詩重邊事關心應不淺
西川殘寇正加兵交趾庸臣系將殄聚米爲山過
隴西鑄銅成柱來崇善癸亥入都喜見君太平氣
象皆欣欣越裳入貢冊藩服兩川奏凱侯將軍君
久執筆在樞密詞頭爛漫騰高文

帝曰汝楷文且勤

敕之宰相書其勲我來展圖題句出都去但見西
南萬里無煙雲

馬秋藥光祿用曹唐游仙七律體擬爲古人
贈荅詩一卷屬於歸途玩之倣擬三首

武林漁人誤入桃花源贈隱者

桃花流水趁谿魚誤入秦源見隱居
與我談如新讀史諒君藏有未焚書
津邊沮溺非依楚海外神仙不遇徐
若問相逢是何客太元年代武陵漁

桃花源隱者贈別漁人

桃源深處爲逃秦問荅何緣得主賓
嬴氏帝應三十世桃花紅近一千春
滄桑我尙悲黔首雞黍君休告外人
洞口春風最惆悵再來爭得不迷津

漁人重尋桃花源不得

萬壑千巖路已差更於何處覓田家
白雲采采藏

流水紅雨紛紛漲落花一宿山邨疑夢幻扁舟天
地感年華永初以後誰相似處士門前五柳斜
珠湖草堂因洪湖汎濫屢在水中癸亥入

覲過揚州尙無水患小住一夕分題八首

將軍舊游地草堂成小築簑社走明珠三面繞林

屋開窗弄夕霏光暉生草木

珠湖草堂

陂塘三十六曾說古揚州一角黃子湖最向東北

流虛亭人不到五月涼如秋

三十六陂亭

高樓臨柴門六尺南窗小廿里甘泉山隔湖出林

表遠峯更江南雨餘青了了

湖光山色樓

曲渠如碧環循行六百步晚來撤板橋不接邨前路中多徑尺魚魯望有漁具

漁渠

一壑復一邱自謂或過之偶聞黃鳥聲瞿然生遠思升高何所賦三復綿蠻詩

黃鳥隅

芳沼射堂西綠樹繁陰接疊石作坡陀采蓮不用楫昨夜夢靈龜游上青蓮葉

龜蓮沼

采菱復采菱乃在湖之湄春水生菱葉秋風摘菱絲芙蓉渺何所隔水露筋祠

菱廩

扁舟竹枝弓小篷打雙槳南湖與北湖隨風任來

往落日歸草堂悠然洽清賞

射鴨船

夜宿 母墓

夜月滿雷塘邱隴積縞素衰草咽殘蛩泣然溼寒
露時有微風來搖動長松樹哀哉遠遊子歸來泣
母墓四年持使節皆在杭州駐廣廈席厚旃明鐙
雜香炷豈知檐外月照此荒阡路乃知仕宦久不
及童與孺草廬四更冷幸得兩宿住或有歎息聲
愴然一來顧夜氣將爲霜烏嘯天已曙傷心黯無
言又拜墓門去

癸亥九月十九日與諸故友相聚於平山堂
爲展重陽詩會卽以贈別

不到虹橋漫四年歸來松菊尙依然家山乍見翻
疑夢故友相逢盡似仙舊雨一番文字飲重陽兩
度暮秋天芙蓉樓句何珍重吳楚連江又放船

九月廿一日舟至瓜步康山主人江表叔文

叔

鴻

送余至江上乃同爲金焦之遊是日秋

霧曉歛澄江無浪遂登金山步王帶橋憩水

月菴觀坡公王帶時風從東南來三折颿至

焦山丹徒縣尹萬君

承紀

亦拏舟登山偏游

林徑過危棧觀陸務觀題名厯松寥閣海雲

堂諸精舍觀周南仲鼎座鶴銘殘字及余所

置漢定陶鼎山有僧巨超號借菴工詩以新
詩一卷相示過午登舟北固諸山蒼然屏立
高颿縱橫上下無際兩岼秋蘆作花數十里
明若積雪風力催舟颿然已至京口矣爲賦

二律簡康山主人兼寄借菴萬令尹

揚州簫管臥聽迴瓜步紅船霧裏催渡口有人共
颿楫江心何地起樓臺橋痕挂水夜潮落塔影橫
空秋日開解識坡公畱帶意百年能得幾回來
布颿收向午潮中松閣雲堂曲棧通終古碧螺浮
海氣滿山黃葉受江風已看寶意生雙鼎更喜詩

情屬巨公手把一編歸北固蘆花如雪夕陽紅

重題秋江載菊圖卷

霜滿蒲颿風滿窗金焦山色碧雙雙今年添得詩
中畫我與黃花同渡江
莫嫌秋淡魏公家載入江南瘦影斜花白無言人
自淡肯教心事不如花

題桃花春浪渡江圖

兩岼桃花百里紅一江春浪受東風武林溪窄漁
舟小未必能如此畫中

冬至前澹凝精舍閒坐

灤水初歸百事并今朝稍覺案塵輕日光當戶玻
璃暖霜氣入池沙石清晚桂數枝依瘦菊春蘭一
朶伴香橙時盆中晚桂復開數枝春蘭亦開一朶菊根穉葉尚有作花者同在冬至之時
友人多閒來一誦長楊賦金碧離宮憶鎬京

甬江夜泊

風雨暮蕭蕭荒江正起潮遠颿連海氣短燭接寒
宵人靜怯聞角衣輕欲試貂遙憐荷戈者孤島夜
蕭寥

題陳默齋參軍

廣凝

攤書圖

安瀾園外暮潮平數編藏書又論兵我與將軍同

意氣半爲將種半書生

萬丈長塘海勢危四年與我共支持如今投筆閩

中去鍊弩三千卻付誰

交南戰艦雖摧破尙有孫恩號水仙

謂閩盜蔡牽

我欲

勸君更橫海攤書萬卷上樓船

種園葵烹食之

自種園葵烹鴨腳幾番翦摘更蔥龍智能衛足開

三徑心本傾陽耐一冬古鼎仁調春雨滑瑯戈閒

刈綠煙濃不因考古寧嘗此欲問黟山辨穀農

謂程

易田徵君

冬至日澹凝精舍分詠得測晷

時以簡平三辰渾蓋等儀

測冬至日影

日行極南陸短景縮昏曉黃道廿四度最遠離赤道往者必將返經緯爭分秒我有銅象儀泰西之所造渾圓與平圓規運窮蒼昊微陽射影筒一點明且皎簡平記三拔渾蓋演之藻化渾以爲平歟大寄之小一尺銅簫中極目望天表何須鍼指南所向無不了日輪距天頂今日最渺渺斜升復旁降半酉亦半卯甲子交下元日向北來繞初昏測恆星亦頗見參昴儀背具方矩望影兼直倒高遠

此可求不必學海島窺器驚其奇掩卷歎茲巧疊
鼓夜沈沈垂鐙春杳杳窗外寒月出梅影落冰沼
明朝試來看一綫旭光早

臘月十九日拜蘇公祠

西湖臘後待春還寂寂祠堂竹石間澹蕩閑情如
遠水崢嶸殘歲似寒山幾枝柔櫓搖清響百樹梅
花破冷慳記取坡公此生日一年好景最相關

立春日

恩賜福字來浙恭紀

內殿近簪豪東南秉節旄

兩朝

天藻麗五福畫堂高力薄因

恩重心慚爲

寵褒儒生乏經濟

臣

豈有微勞

近有顯親揚名不改儒生本色經濟

自典謨出何事不可爲勉爲一代偉人諸

論

一

挈經室四集詩卷七

琅嬛仙館詩略

甲子

題陳曼生種榆仙館圖

白雲飛斷天空青
抽筒疊鏡窺窈冥
上有神仙之福庭
壽星躔次開畦町
白榆落莢如堯蓂
呼龍耕烟種不停
仙人山館敞未扃
十行高樹圍虛亭
銀河珊珊聲可聽
河邊大石排蒼屏
石破漏雨驚秋霆
瑤枝玉葉敲瓏玲
仙人館中睡不醒
一夢下墮一百齡
精光在心耿耿靈
有時如珠復如熒
粉陰古社春風馨
館中書卷甘石經
夜半起看天南星

門前厯厯疎如櫺

復與諸友分賦商周十三酒器爲堂上壽

得周兕觥

觥高七寸下器皆如爵上有蓋蓋作犧首蓋裏及器皆有銘九字曰

子甕在甬作文父乙彝造作精緻舊所罕見

歲華周綺甲介壽重舉觴古觴十三器羅列別成
行友朋多歡心一一登子堂分器祝眉壽予亦奉
兕觥兕觥高似爵有蓋制特強蓋流作犧首斛然
額角長蓋葉亦如葉相合誠相當左右各有缺雙
柱居其旁器蓋皆有銘九字成陰陽四火加辛足
子某字莫詳在邦作爲甬文父彝何臧安知公與

卿莫辨周與商獸面縮困蠢雲紋浮青蒼爲吟幽
風詩稱此爲無疆惠子咏其斛旨酒思不忘鄭曹
諸大夫燕饗觥皆揚古人致孝養且以合嘉祥載
稽卷耳傳義勿求毛萇工歌間鐘磬酌酒春風香
諸友共飲御歌詩各成章願言千百年壽如金石
長

春日漪園卽事

漪園水閣偶來登九曲欄干一一凭好景行當春
二月遠山看到第三層我雖久作西湖長那得閒
如小院僧莫遣鳴珂過隄去六橋花柳太飛騰

題秋平黃居士

文暘

淨因張道人

因埽垢山

房聯吟圖

高義漢伯鸞裘褐得賢孟同居霸陵山彈琴事吟
詠其詩惜無傳但傳舉案敬吾友黃居士德與少
君并兩篇柳絮吟遂輓鹿車迎山居得埽垢一塵
不來凝蘆簾紙閣間嵐翠相揜映乃知因與緣天
意使之淨幾卷冰雪文相和不相競一洗凡艷空
恥比玉臺鏡秋樹繞高庭蒼苔積幽磴遙想聯吟
人山閣共閒凭城中萬人家俗氛風不定惟此小
山居但見白雲橫

朱右甫

爲弼

摹輯續鐘鼎款識作秋齋摹篆

圖屬題予按昔人論詩論詞論畫皆有絕句
因作論鐘鼎文絕句十六首題之

山齋竹樹起秋陰多少銘文寫吉金說與時人渾
不解四千年上古人心

商盤周誥古文詞宋槧經書已足奇誰識齋中鐘
鼎字鑄當周孔未生時

鑄器能銘古大夫一篇款識十行餘尚書二十九
篇外絕勝訛殘汲冢書

左史真能讀典墳靈均曾以善書聞若非篆體漿

彝在舉世無人見古文

德功冊賞與勲聲國邑王年氏族名半訂傳說半

補逸聚來能敵左邱明

象形指事最精微假借諧聲見尙稀一字寫成百

凝注那如隸草任人揮

秋齋揭字響登登油素摹成一片冰屋漏折釵皆

不似濃如挑漆結如繩

一字經人十日思却從許慎上推之韓蘇若解摹

周篆石鼓詩歌當更奇

有篆方增彝器重無斑始見鍊金純若將青綠爲

題品不是真能識古人

或交纔帶或雲雷半是鎔成半鑿開鳧氏煎金真
不朽幾多竹帛盡成灰

晉唐俗字不知古直至宣和書始傳七百年來零
落盡一函圖篆印方圓

鼎鬲盤彝甌敦鐘刻成石帖與金同百千古字今
猶在第一勲推薛尚功

却怪復齋與嘯堂百千鐘鼎豈皆亡如今積古齋
中物又是當年誰氏藏

子孫承保萬年用過眼雲烟亦達觀一自秋齋摹

篆後幾家寶守幾凋殘

先生嗜好與吾同日日齋中篆古銅庚鼎肉羹朋
爵酒大林鐘響動金風

篆形字與畫同之後世稱奇古不奇今日秋齋圖
句裏古人若見也應疑

由永康至縉雲

山疊漸無路雲開時有風鳩啼新雨後馬踏亂泉
中香草暖愈烈巖花濕更紅行春一何遠千里浙

江東

過桃花嶺

白雲橫絕萬峯齊更踏東峯向嶺西掉臂已過白
雲上回頭盡見萬峯低何年道士栽桃樹終古征
人散馬蹄我向東甌催戰艦封關那用一丸泥

山花

枯蒼山外看春來嫩蕊殘英次第催記取年年三
月裏青桐花落柚花開
等閑樵斧向山中割得嬌花與草同幾日春風又
春雨杜鵑依舊映山紅

蒙茸草樹蝶交飛但覺薰衣香氣微忽見山風披
綠葉一枝白破野薔薇

小樹黃花似馬纓紫葳蕤間碧瓏玲野花多少不
曾識一笑四山相對青

觀青田石門洞天瀑布夜宿洞口

午發枯州外夕歇石門陰春流出雙闕暮色隱高
岑孤峯新綠聚危約襍花沉路轉境屢變巖回情
愈深飛流冒天半噴瀑壓平林時有迴風來激此
奔泉音涼聲乍灑淅素影何蕭森冰絲暗撲面珠
塵濕沾襟仙都白清閼過客屢幽尋詎可滌塵鞅
聊將清道心秉燭出洞口艤舟眠水潯夢殘山月
曉松頂鳴胎禽

由溫州渡江至樂清

春風海上來披拂東甌山山海舊相識三度茲往
還白潮汎孤嶼青嶂抱嚴關浪恬笳鼓靜麥熟漁
樵閒掛蓆指江北疊嶺重躋攀奇峰互虧蔽衆瀑
爭潺湲香草生澗底衆花開雲間惜未進帆海觀
畊到玉環

遊天台桐柏宮觀瓊臺雙闕

逆流踐飛瀑峻嶺九折通仙都豁然闢峩峩桐柏
宮神皋正平敞圓抱千百弓一渡分三橋四面環
九峯巖巒謝險僻雲氣何冲融金庭古洞碧福地

天光紅司馬暨杜呂一一畱仙蹤王笙棲子晉丹
竈居葛翁道書雖微茫史傳殊可宗所以俯仰間
神契孫興公前臺汲醴泉西地逾臥龍境變五里
外瓊臺居懸空乃如巨壑底孤塔高竦嵒上有一
道士茅笠無春冬磨席不敢到魑魅無能逢毋乃
青谿上景純昔所從其南夾雙闕閭闔來天風霞
標出其間倒影移西東何時明月夜鸞鳳鳴離離
遠人肯到此氣已超凡庸緬懷老聃言順物守以
沖詎必驂琅輿真入雲天中

宿國清寺

一庭聚花氣雙澗合泉聲暝色漸相近山雲殊欲
生松杉迷屋角蝙蝠拂鐙檠筍蕨有餘味虛堂藤
榻橫

雨中至高明寺

路轉深山駭見聞靈風吹雨白紛紛萬鵝鼓翅溪
翻浪一飢開炊谷滂雲塞耳雷輪人不語當門咫尺
樹難分仙都爲客開奇境豈似尋常放夕曛

雨後至石梁觀瀑宿上方廣寺

披雲躡修磴冒雨厲鳴澗九曲沿花谿千步落松
棧乘興馳高情遊心得奇觀飛瀑出雲中石梁亘

雪竇集卷之十
天半隨指落斷虹翹掌挾雲漢動地春雷鳴開峽
白龍竄奔爭勢益狂激落派皆散言念西池謠聊
興呂梁歎攀援登迴梯憑臨上層岸懸流日光搖
飛渡足力憚歸雲宿樓際鳴河喧枕畔坐嘯擬遊
仙入夢謝俗宦神清眠易足猿鳥已呼旦

曉發石梁

曉起一樓開羣山壓戶來晴雲分石塔初日上經
臺藥氣滿山發泉聲徹夜催定知桑下宿端不及
天台

萬年寺前古樹八九株高十餘丈俗名羅漢

松

非樅非柏古何樹
唐寺門前八九株
萬葉倒垂青瑤索
一身高矗綠浮圖
往來鸞鶴應常任
供養雲烟定不枯
畱語後人三百載
八峯中有此松無

山禽五首

行人蒼山路百盤
絕無人處白雲寒
泉如琴筑風如籟
忽聽一聲山樂官

鳥名

石門洞浦夕陽低
右傍青巖左碧溪
爲問行人歸去否
杜鵑花裏杜鵑啼

處處山村布穀聲
梯田百丈有人耕
西峯高與東

峯並鸚鵡畫眉相對鳴

幾多惆悵過靈溪亂竹叢中飛竹雞千樹碧桃花
落盡綠陰深處一鳩啼

斤竹嶺邊新竹樹天台山上好花枝綠陰直接剡
溪路都是黃鸝百轉時

回杭州

水陸一千九百里舟車二十八晨昏桑麻菽麥家
家業耕讀漁樵處處村墾嶺開山愁水旱分田析
屋養兒孫長官那有安民策惟望豐年是本原

題牡丹巨蝶畫屏

牡丹一叢花百片絕艷名香與春戀蝴蝶雙雙大
如扇飛上花枝踏花瓣一蝶嬌黃糝碎金掀鬚豎
眉嗅花心一蝶翠毛暈藍碧橫遮花陰長一尺花
陰五銖輕剪衣鞋紅濕透燕支肥天香露氣逗春
曉重壓彩蛾酣不飛蝶不驚花花妥貼麻姑袞罩
玻璃葉那比菜花村裏來染盡滕王金粉篋花是
洛陽第一花蝶是羅浮仙繭蝶

桐花至芒種前後乳外飛落白繇滿院飄揚
絕如柳絮名之曰桐繇且咏之

青桐花發乳垂枝飄落輕繇四月時淡白多沾么

鳳翅清微雅稱古琴絲石欄梅雨香無定金井蘭
風影乍移雖讓女桑能作繭也如柳絮耐吟詩

晚過西湖

獨拏小艇過西湖狎鷺盟鷗好畫圖雲影遠浮雙
塔動水光閒浸一山孤白蘇磊落情非昔韓賈荒
唐事也無酒酸笙歌多歇絕士民岑寂長官迂
古之蘭乃澤蘭非今之蘭也種之階下并繪
之

蘭草古都梁香爲王者香秉蘭諷溱洧紉佩賦瀟
湘旣比同心德還徵入夢祥綠抽高節直紫擢細

莖方小穗青抽穎繁華白滿穰枝枝旁對出葉葉
正相當春雨千枝秀薰風二尺長煎來宜沐浴槁
後更芬芳君子芷同室古人椒共房漫將今俗卉
襲號泛叢光

題畫扇三種花

棉花

浙產沿海最多民賴爲利花葉皆似秋葵而小結苞如荔子大枯裂則棉出

短亞秋葵耐暑風綠苞秋綻白玲瓏吳儂漫說春
絲好難到茅檐霜雪中

茗花

浙茶最多杭州諸山所產皆名龍井茶高三四尺枝葉甚繁秋末冬初葉老開

花如梅五瓣淡綠色

旗槍摘盡又生芽三尺梅枝淡綠花莫怪君謨辨
香茗看花須到埜人家

蘭花

詩騷諸古籍所稱之蘭皆澤蘭一名都梁香方莖對葉紫花碎小枝葉皆香俗

稱為妳孩兒

兩兩青枝對節生紫花香葉古風清詩人溫厚騷
人怨一種芳華各自情

八月十五闌中作用坡公八月十五催試官

詩韻

八月十五夜月愛杭州好西子湖邊似蟾窟試官
堂外如仙島少年科第不覺難爲歎白袍人易老

八月十八潮其險天下無海米驟來高一丈長堤

力護役萬夫濤聲入院夜春枕驚夢常繞雙浮屠

鎮海六塔世間萬事難預必三更無雲月始得我且

向東看月背官燭遠寄羽書招海鵠時合三鎮兵船破蔡牽朱

瀆于舟山之北二寇復遁入閩

次韻

山陰徐聯奎壁堂

皓魄月月圓莫若中秋好主人前身王局仙揮

斥十洲兼三島此來監試六燾開坐對湖天秋

色老輒舍昔所有石道昔所無浙闡士子號舍一萬一千餘間

計號衙一百九十條向爲泥道今自今一任蟻

封魚入戶不用霑體塗足如耕夫明經千佛於
斯出何啻慈氏營浮屠朱衣點頭那能必使君
之恩忘不得不見使君與爾坐燼三條燭期爾
同爲摩天鵠

試院煎茶用蘇公詩韻

我聞王川七椀雨腋清風生又聞昌黎石鼎蚓竅
蒼蠅鳴未若風簷索句萬人渴湖水煮茶千石輕
時載西湖水千石入院專供士子之茶水封院銅魚一十二閒學古人
品茶意古人之茶碾餅煎今茶點葉但煮泉坡公
蒙頂一團自誇蜀不聞龍井一旗綠如玉得茶解

渴勝解飢我與詩士同揚眉開簾放試大快意況
有筆牀茶竈常相隨今年門生主試半天下豈似
坡公懊惱熙寧新法時甲子鄉試余門生爲主試者江南涂以輯河南鮑桂星湖北王引之四川程國仁貴州張師泌廣東陳壽祺廣西吳棗凡七省坡公煎茶詩意惱熙寧五年王安石新變試法專試千言策也

題朱椒堂西冷話別圖

一卷新圖好護持送君應到鳳皇池邀將金石論
交契付與湖山記別離談徧五年書裏事藏來七
子集中詩在予署內下榻今去者吳澹川端木子彝陳雲伯陳曼生童萼君邵東滙并朱某堂爲七子矣飛騰頗願諸君去但惱雲山寂寞時

修西湖

行宮畢奉安

仁皇帝

純皇帝龍牌恭紀

兩朝德澤滿南中越水吳山

御舫通縣圃馬歸猶勒石鼎湖龍去尙遺弓百官

載

主來

行殿

雙輦扶輪過梵宮豈似連昌舊詞客風前但詠落

花紅

題和內子畫歲朝圖獻 堂上韻

吳山春滿大觀臺森戟凝香燕寢開柳絮白銷三

日雪椒花紅並一枝梅吟成彩勝庚庚正月初五日

健畫得金幡乙乙乙丑年回共祝陽春真有脚煖從

堂上履邊來

乙丑

安瀾園月中作

亭林浮暝色春月交黃昏梅花開一山香影動清
渾緩步石橋外晚風柔且溫澹沲池中波寫此王

烟痕參橫不知久獨立愁無言

命海塘兵剪柳三千餘枝遍插西湖并令海防道以後每年添插千枝永爲公案

十里西湖波渺渺柳不藏鶯半枯蘂舊樹婆娑新樹稀折柳人多種柳少海塘一百七十里萬樹綠楊夾馳道誰是年年種樹人騎兵已共垂楊老長條齊翦三千枝遍插湖邊任顛倒幾時春雨浸深根多少新芽出青杪一年兩年影依依千絲萬絲風嫋嫋待與遊人遮夕陽應有飛絲襯芳草補種須教有司管愛惜還期後人保昔日何人種柳枝

曾拂

翠華縈羽葆今日

離宮有落花踈地春風共誰埽白隄插滿又蘇隄
六尺柔荑惜纖小且把千行淡綠痕試與桃花鬪
春曉

行賑湖州示官士

天下有好官絕無好胥吏政入胥吏手必作害民
事士與民同心多有愛民意分以賑民事庶不謀
其利吳興水災後餽粥良不易日聚數萬人煮糜
以爲食士之任事者致力不忍避與官共手足民

乃受所賜澹臺不由徑公事本當至閉戶獨善者
亦勿强相致

常生等案以下丁憂無詩丙寅蒙
恩授福建巡撫大人以病乞
恩恩復許在家養病故丁卯辭墓詩曰一一皆
君恩

六以美漢晉魏小長即子行所贈詩與趙詩同
非官詩詩與趙詩同共三紙自趙詩前又趙詩
翠華集詩集今日

趙詩

擘經室四集詩卷八

文選樓詩存

丁卯

辭雷塘墓庵

孤雲戀林薄新霜被草根西風吹落日闇淡沈平
原此時庵中人逝將去墓門百念傷中腸哀哉復
何言枯僧畱丙舍寂寞依晨昏待爾清磬聲通我
夢寐魂我昨憂且病息影居邱園豈不眷松楸當
懷王事敦感此出處間一一皆
君恩雪涕竟長往浩然乾與坤

渡河

聖賢集卷之八
朝泊黃河南夜宿河北浦河流決射陽所患難盡
語驅車尋修途遙遙指鄒魯四野幕沈陰愁雲趁
行旅回首望江南蒼茫隔寒雨

月夜拜滕文公廟

停車滕國廟寒月四更天老屋燈昏壁寒林霜化
烟平原五十里殘碣一千年願與迂儒說閒來試
井田

曲阜鐫山園贈衍聖公孔治山

慶鎔

內弟

世家喬木三千載海內斯爲第一園九曲修藤雲
偃蓋十圍老檜石蟠根蒼苔紋蝕方壇鼎黃葉聲

喧曲逕門并鋏大峯無數立平泉綠野揔休論
莫道園林欠埽除略加修飾便堪居春花五色栽
宜滿秋樹千株種莫疎勝日娛親常奉酒他年教
子定攤書儒家不說神仙事多恐神仙未此如
上公弱冠久簪纓介弟相攜更有情小象半屏如
王立新詩一卷似冰清貌將溫厚歸名教句埽繁
華近老成愧我風塵無定所半宵聚首便長征

河間

車斑斑來河間河間塵塼堆如山燕南垂趙北際
十里烟波隔塵世塵世那有常閒身水催帆楫車

催輪豈知山深水遠處別有漁樵解笑人但曾少
識漁樵趣須緩行時能且住

定興曉發

晨星初落落平野鬱蒼蒼日色冷東海霜威森太
行農閒村戶靜馬緩驛程長載詠皇華句休教懷
故鄉

渡滹沱

破曉到滹沱連橋策馬過沙明猶帶月冰合尙翻
波呼渡驚王霸離鄉老趙佗滔滔千古事流水暗
消磨

渡漳水望銅雀臺遺址

邯鄲南去渡雙漳
銅雀荒臺半夕陽
一樣暮雲流水外
此間偏覺太蒼涼

廣王右丞夷門歌

老翁七十監夷門
臥內幸姬思父恩
虎符擎出送公子
白首紅顏同日死
公子急走邯鄲城
一椎擊退咸陽兵
平原夫人破顏笑
阿弟乃爾知侯嬴
侯嬴究竟爲何死
刎頸原非報公子
蹈海仲連天下士
不肯帝秦同恥耳

陳畱懷古寄示二弟仲嘉

亨子常生

渡河蒞大梁近識陳畱國陳畱尉氏邑阮氏著舊
德汝穎纏其西衛鄴據其北靈秀毓文學沃衍饒
稼穡元瑜樂詞翰嗣宗醉元默德猷秉威正仲容
具神識遙集及思曠疎放故逃職典午昔播遷銅
駝尙荆棘何況一世家能不轉溝洫遙遙古苗裔
世系求未得惟有讀晉書往行足矜式方今
聖治隆有道皆正直我來秉

使節過都敬憑軾書刻常侍碑千年石不泐

特書
關內

侯散騎常侍嗣宗
阮君碑立於墓

名氏與先疇慨焉長太息

大梁除夕

河干逢歲暮雪意滿梁園古木羣鴉集寒雲大纛
翻黃埃餘艮岳青堞繞夷門却有孤吟客焚香坐
不喧

戊辰

荅陸九

耀通

太華一朵雲飛過嵩山來從風落我手尺素飄然
開故人苦久別新詩爲我裁纏綿積幽思慷慨生
餘哀江東有二陸可敵機雲才憶昔相與遊仙氣
凌天台關中壯川嶽健筆增奇恢我今復南行往
事誠悲哉寄言遠遊客何日驅車回

大風霾登吹臺

清角騰喧上吹臺愴然憂旱復憂霾風沙捲地來

河朔春氣隨雲去汴淮豈有鄒枚閒賦雪更無李

杜共登階

李太白杜子美高達夫曾共登吹臺臺有三賢祠

步兵不念蓬

池近西望蘇門自詠懷

過密縣

鄆鄭風詩在今來溱洧閒雲生風后嶺日落大駝

山儉俗皆陶穴

居民多就土崖穴處

愚民不秉藺最憐春麥

短地褊食尤艱

中嶽嵩高詩三首

粵若稽山經太室維高嵩爾雅釋禮祀肇爲五岳
中陽城測土圭外方連大熊太歲在戊辰春仲山
氣融瑋琤麗朝陽蓄草披東風我來祭廟廷敢謂
精誠通峻極仰方正深蔚含和沖

明神若降鑒昭然垂太空

右太室

少室峙天西勢竝太室高定思渺難陟但覺神理
超峯巖削雷雨靈爽通雲霄敷以帝休華流以白
王膏輶輶闢左關險隘同成臯漢武華西來于此
獲駁庶登禮罔不荅二室各一半豈期少姨碑摛

藻惟其佻

右少室

啓母候禹餉聞鼓母乃來跳石鼓誤鳴塗山慙見
能奴來切母往二室間化石不肯回禹曰歸我子啓
生石遽開鴻烈集古訓斯言何怪哉班書載漢詔
石已居山隈我乃向石拜攬古登崔嵬曷觀詩頌
篇鳥跡生郊禰

右啓母石

嵩山三石闕歌

嵩嶽三闕同高低左右離立八尺齊啓母一闕距

其北太室峙東少室西誰其建者漢朱寵呂營誰

其書者皆堂谿

漢潁川堂谿典

篆隸詰屈銘句奧請降雲

雨生蒸黎畫圖月兔木連理駕車乘馬鈎象犀閔

魏太武周久視夏暴烈日冬流澌二千年來屹相

向厥質麤剝厥色黧二室神祠始秦漢產啓已說

龔山妻要之陽城本禹地三塗四載應無迷此闕

靈祇久呵護歐趙訪古何未稽褚峻縮本我早見

茲來策馬尋荒蹊闕間頗足容二軌壁壘未可窮

攀躋周魯雉闕制可見雉度

入聲

以綵非以雞

古

城闕之

雉乃度以雉也雉乃綵同音假借字綵繩也申生雉經以綵自經也自古未見有雉鳥自經者舊說

非壇槌拓取墨華黝寶之無異摹元圭更洗奉堂
卽秦室之訛額東石一行刻字名畱題神君興雲闕中

起廟牆漢柏春鳩啼

嵩陽隱居

嵩陽多隱居巢由盧鴻一張彪种放之倫
皆稱接踵司馬溫公居洛亦曾買地于疊
石溪爲別館同邵堯夫常來游居蓋陽城
北背轅轅南限潁汝伊古以來山深林密
處也

嵩陽多隱士千古見清輝潁水洗塵去箕山放犢

歸夜來蘿月滿曉起松雲飛言念盧鴻宅深深在
翠微

大梁

咸陽下洛陽春風滿大梁古人通汴泗千里接淮
揚廢苑皆黃土荒隄尚綠楊裴回重弔古回首憶
雷塘

嵩嶽歸步禱春澤復大風霾繼之以雪以雨
以霹靂各郡霑足誌喜一首

白晝移鐙曉且霾神靈力挽好春回雲連泰嶽恒
山去雪自洪河渤海來頓起蟄龍三日雨交馳驚

電百聲雷中原民慰吾歸矣千里東風驛路開

臨淮關阻雨

清明旅館原宜雨楊柳桃花最見春短榻橫風看
步馬長淮繞戶固畱人

戊辰五月辦賊至寧波爲前提督壯烈伯李

忠毅公建昭忠祠哭祭之

粵海聞天接燧烽大星如斗墜殘冬一生精氣乘
箕尾百戰功名稱鼎鐘死後人知真盡命生前
帝許得崇封

至尊震悼廷臣哭早有孤忠動

九重

誰遣孫恩剩一船非公追不到南天

公擊蔡牽於
粵海喉間被

砲薨後蔡牽惟剩單舸逃入安南海中

遠探蛟穴五千里苦歷鯨波

二十年隔歲過門皆不入

公連年在海不歸即歸亦但在鎮海修船備糧

未嘗一返家署

乘潮徹夜每無眠雅之若與牢之合早見

澎臺縛水仙

六載相依作弟兄節樓風雨共籌兵

元乙丑以憂去浙後總督

每掣公肘致有粵洋之變

手中曾擊千舟盜

公與元所共擊滅攻散如水澳鳳尾

補網賣油七都等幫前後不下千艘

海上如連萬里城絕吭原知關

氣數寄牙早已斷歸情

公在洋封所落齒寄夫人以身許國恐無歸櫬也

誰憐伯道終無子好與恩勤待館甥

公無親子襲爵者族子也

其女壻同知陳大琮從公久知盜情余奏畱浙江補寧波同知

甬上重來特建祠舊時部曲竟依誰鈴轅月冷將

軍樹

余來甬上寓提督虛署中

泮水苔深叔子碑

公捐修府學曾自撰碑文

記如此致身真不恨爲何賫志也休疑麥城久合

關家識仿佛英風滿廟旗

公出師時禱於寧波關帝廟占得籤詩有云

到頭不利吾家事畱得聲名萬古傳

初秋澹凝精舍小憩

政繁嫌晝短少暇便心清偶爾埽精舍悠然生遠情屏隨人意曲榻爲夢魂平自笑勞勞甚秋來句

始成

揚州城東南三十里深港之南焦山之北有康熙間新漲之佛感洲或名翠屏洲詩人王

柳邨

豫

居之丁卯秋余與貴仲符吏部

徵

梅

叔弟

亭

屢過其地梅叔買其溪上數畝地竹

木陰翳乃構屋三楹亭一笠於其中柳邨又

從江上郭景純墓載一佳石來置屋中予名

之曰爾雅山房又名其亭曰曲江亭以此地

乃漢廣陵曲江枚乘觀濤處也戊辰秋柳邨

來遊西湖出曲江亭圖索題一首以誌舊遊

長江千里來巴蜀流到廣陵曲復曲古時滄海今
桑田翠屏洲漲焦山北江北橫生十里沙廣陵濤
變千人家九折清溪夾修竹萬株高柳藏桃花輞
川本合詩人住況是惠連讀書處送暑曾過深港
橋尋秋每喚瓜洲渡送暑尋秋向柳邨藤床竹枕
宿南軒千章夏木全遮屋八月秋潮直到門門前
月色連清夜稻花香重荷花謝記得曾探北固秋
何緣又結西湖夏今日披圖似夢醒濤聲還向夢
中聽錢塘八月西樓卧錯認揚州江上亭

題曹夔音摹趙松雪樂志論圖卷

曩讀仲長統傳心竊論之程蘅衫荃屬題
樂志論圖卷因發之於詩

衡門之下地必小泌水洋洋不求飽賦詩尋樂樂
無窮古人之志頗易了良田廣宅車且舟談何容
易焉可求必如此圖始言樂樂未能得先多愁聖
賢栖栖各有志饑溺簞瓢皆易地人人盡是仲長
氏天下生民誰與治公理却笑當時人本無責任
加其身有田有山不歸去披圖孤負江南春可樂
不樂徒自苦仲長之風亦千古

拜岳鄂王廟

不戰卽當死君亡臣敢存猶憐驢背者未逐馬蹄
魂獨洗兩宮辱莫言三字冤投戈相殉耳餘事總
休論

分詠歲寒雜物二首

溫研

俗塵滿案拂還多賴此溫溫一研磨墨煖易乾寒
易凍筆尖最好是中和

寒鐙

夜來風雨弄青熒畱照書氈味最清但有紙窗鐙
一點淒然便得歲寒情

將渡錢塘江夜宿六和塢院

月黑山空已半宵
燈昏古寺對殘膏
風催夜氣將成雪
水落江沙不起濤
詩思覓來禪榻靜
夢魂騰上塔輪高
出門翻得荒寒趣
絕勝城中俗事勞

姚江舟中除夕

丈亭古堠接餘姚
除夕停舟待暮潮
迴憶家庭非往日
轉宜兒女避今宵
鏡中霜薄鬚初白
篷背春寒燭易銷
屈指四年同此夜
雷塘菴冷大梁遙

丙寅除夕在雷塘
丁卯在河南

庚申六月余乘風破安南寇船于台州獲其

四總兵印銷之爲劍今八年矣戊辰冬復剿

蔡牽于海上夜舟看劍寫詩劍匣

銷鎔夷寇印

庚申安南阮光平子光纘之柄臣陳寶王私使總兵四人駕船砲屢寇浙

海掠殺商民余乘風擊之于松門溺死者無算俘八百人夷寇片帆無返者四總兵銅印僞勅皆就獲生擒領善艚進祿侯倫貴利磔于杭州總兵耀斬于台州其餘二人死于海仿鑄古吳

鈎入手才三尺隨身已八秋拭磨舊銅篆慚恨此

瀛舟誓斬聞中賊如誅亡國侯

阮光纘既喪此舟師國益弱聖

上惡棄之纘旋爲農耐舊阮阮福映所併滅卽今恩封之越南國也

已巳

題何夢華上舍訪書圖

徧訪列仙傳終不見一仙惟有一卷書可以千百
年前賢具精魄亦復待後賢訪之苟不力變沒隨
雲煙吾讀古藝略中心每拳拳何君涉九流咨詢
在古編足跡陳謁者腹笥邊孝先擬之於道家亦
是葛稚川我昔校天祿直閣兼文淵稽古中
秘書猶恐有佚焉四庫所未收民間尙流傳問
俟曹倉開索待海舶旋或以一篲借或以青藜然
或在晉隋後或在元宋前何君爲我行時汎貫月
船寫進六十部恩賚下木天

丁卯冬元進四庫未收書六十種

皆蒙

乙覽被

賜

再訪再寫進屢得翰墨緣

紙墨筆硯蟒衣等物

後又進四十種共百種副墨亦可誦我或儲琅嬛何君繪此

圖志學何精擘昔日求金石雅意同清堅靈隱置

書藏更扣西湖舷

近余置書藏於靈隱寺凡書皆可收藏

萬卷能常

存卽是古偓佺

四月十日同顧星橋吏部

宗泰

陳古華太守

廷慶石狀元

韞王

三院長暨朱椒堂兵部

爲

弼蔣秋吟太史

詩

華秋槎

瑞潢

何夢華

元錫

王柳邨

豫

項秋子

壩

張秋水

鑑

諸君子集靈

隱置書藏紀事

尙書未百篇春秋疑斷爛列史志藝文分卷本億

萬傳之千百年存世不及半近代多書樓難聚易
分散或者古名山與俗隔厓岸峒巽靈隱峯琳宮
敞樓觀共爲藏書來藏去聲室特修建學人苦著書
難殺竹青汗若非見著錄何必弄柔翰舟車易遺
亡水火爲患難子孫重田園棄此等塗炭朋友諾
黃金文字任失竄或以經覆瓿或以詩投溷當年
無副本佚後每長歎豈如香山寺全集不散亂名
家勒巨帙精神本注貫逸民老田閒不見亦無悶
雖不待藏傳得藏亦所願我今立藏法似定禪家
案諸友以書來收藏持一券他年七十厨卷軸積

無算或有訪書人伏閣細披看古人好事心試共
後人論既汎西湖舟旋飽蔬筍飯出寺夕陽殘鷺
嶺風泉渙

題趙忠毅公癸卯年自書詩卷後

高邑千秋節中年一卷詩艱難憂國事慷慨息居
時未雨鴟鴞苦當關虎豹疑待銘殘月研值得髩
如絲

詩中有
髩須歌

蔣蔣邨學博

炯

請書厲樊榭徵君墓碑且與

里中諸君子共置祭田報官立案歸西溪交
蘆菴管理詩以紀事

劉樊窗榭說明州遺蛻西溪土一邱多分神仙無
子在但憑天地有詩畱他年碑碣碧苔古此日墓
田香稻秋記取法華山下路詞人長與護松楸

八月十五日浙江提督邱公

良功

會福建提

督王公

得祿

於寧波普陀洋十七日先追及

蔡牽於台州魚山洋擊之十八日復會擊之
於溫州黑水洋沈其船牽及其妻子皆死於

海詩以誌慰

八月溫台急水師孫恩海上族全夷定知故帥神

靈在

謂溫州總兵胡公振聲
提督壯烈伯李忠毅公

看爾長鯨就戮時

蔡逆

滅于温州敬見御製春勝聯句詩註

題家藏漢延熹華嶽廟碑軸子

太華三峯削不成夜來碧色無深淺仙人染作延

熹碑飄落人間止三卷長垣

王鵬冲

一冊歸商邱

宋

今歸成藩

但損偏旁最完善華陰東

雲駒郭昌

又一函椒

花館中見者鮮

謂朱竹君學士家以上二本皆翦裱無唐人題名

我今快

得四明本王軸綈囊示尊顯豐

萬卷樓

全

鮎埼亭

范乙

閣錢

潛研堂

三百年入我樓中伴文選

子藏宋尤

驚

心動魄竹垞語七尺巖巖闢空展渾金璞王天所

成幡然不受人裁翦

全碑未翦整本

唐宋題字皆分明衛

公兩欸夾額篆全身平列廿二行波磔豪釐盡能
辨一字一朵青蓮花玉女翻盆墨雲輒已已摹鐫
向北湖市石察書書佐遣湖邊更刻泰山碑時余月廿二却印入觀過揚州以重摹秦泰山碑殘字與摹華山碑同置城北四十里湖橋墓祠中
嶽色雙雙照人眼

題北湖摹碑圖

秦泰山殘字漢西嶽華山碑三國天發神
讖碑近代並毀拓本皆可寶貴予藏三碑
紙本摹石置之北湖墓祠塾中偶檢家藏
王麓臺山水小幀遂屬畫友添畫碑石及

刻碑者於其坡陀之上名之爲摹碑圖以
詩紀之

吾愚未學繇與羲唐陵宋閣多然疑但曾手摹十
石鼓刻畫史籀誇汧岐下此秦碑立秦岱石刻明
白丞相斯延熹蔡郭華嶽廟江都皇象神讖碑近
代數碑次第毀一紙在世驚神奇定武各石歐褚
耳數十本尙談姜夔三碑真跡下一等况是秦漢
三國時古人筆法入石理何嘗楮墨差豪釐吾齋
積古見三絕訪古者至皆嗟咨客曰是宜并摹勒
一日不刻人嫌遲江南市石北湖去九龍岡上吾

家祠雪鋒吳氏善篆隸奏刀書騷親磨治淺深完
缺盡相肖登登林下鳴璫槌十夫扶起鼎足立桓
楹並視平不欹巖巖疑疑雙嶽色蒼崖翠壁交陸
離建業古氣盡銷鑠秣陵一抹無嫌卑甘泉山色
隔湖見朝嵐浮動青松枝西漢殿石我手獲墳壇
可配魯祝其余於甘泉山手獲漢厲三胥冢上石麓臺畫已百年久
林屋豈爲我圖之我來補寫刻石者三碑添在珠
湖湄坐使此圖成故實摩挲合作摹碑詩瑕邱之
樂古所歎他年老倦應相思

貞觀金塗造象阿彌陀銅碑歌集翁覃溪先

生齋中作

蘇齋市坐將哦詩袖中我出金塗碑碑高四寸寸
之六黃金塗滿光陸離阿彌陀碑四字額左右盤
以雙翠螭其文六行行十許駢麗猶是初唐辭一
軀佛象共願造丹青金玉矜瑰奇慈風慧日振法
界却從勝範觀良規造者趙婆長孫輩其人泯滅
知是誰貞觀紀年廿有一正是四海安平時此乃
唐初正書體出於北魏周齊隋北朝造像百千計
今多石刻畱山陂刁遵高湛各銘碣分明隋末歐
褚師江左韓陵石頗少中原楷法茲其遺奏刀刻

銅力恢展字小如黍微如絲蠅頭蟬翅劇難揭金
枝細書厘見斯蘇齋老人驚歎賞碑者卑也此最
卑予曰鉅細各不朽大碑屢見唐人爲君不見貞
觀是年銘晉祠晉祠銘亦貞觀廿一年文皇御筆書淋漓又
不見三龕造象闕在伊登善大書摩勒之

屠棐陽庶常

倬

將出爲縣令所寓京城米市

胡同有古藤二株白繪圖卷索題

吳山樓前多竹樹舊是詩人讀書處

昔棐陽與查梅史諸子讀

書吳山

瀛洲亭上看花來偏我來時君又去君去正

見江南春韋杜東風不相遇記戀城南三宿住兩

樹藤花小梨鵑

集韻去聲

詠絮亭以畫冊寄索題

海棠

春雨初飛二月時
灑成萬點好燕脂
偶然落爾生花筆
寫出垂絲棠一枝

紅白桃花

白桃淺淡絳桃肥
半著冰綃半著緋
莫道漢人無

綺語曹全碑裏有桃斐

漢曹全碑桃斐與妃同

牡丹

誰將深色囑東風
著力催成花一叢
曾見宋人圍

扇好一枝春滿十分紅

曾見宋人牡丹春滿團扇花大滿一扇

菜花蠶豆

蠶豆菜花黃間青吳中生計滿春塍農家隴上半

盃飯寒士窗前一盞燈

吳中豆爲飯菜爲油

梔子石榴

妙香須自澹中回妙色休從濃處猜拈得一枝合
微笑紅裙何事妬花來

蘭箭

兩箭幽蘭香意足妙似詩情淨如玉湘波如見二
妃來薜荔青青女蘿綠

白荷蜻蜓

菡萏白開涼雨後蜻蜓紅點夕陽時畫工知是有

新意愛誦放翁團扇詩

此幅用放翁詩白菡萏香初過雨紅蜻蜓弱不禁風

意也

桂花

一枝仙桂發天香染上生綃書共藏技與一經無
落葉兒曹漫與下雌黃

木芙蓉

落盡芙蓉霜氣濃還從木末看芙蓉拒霜莫道無
風力接引寒花直到冬

松枝山茶

枝松低亞山茶花歲寒清景詩人家敲詩讀書不知冷雪滿庭松聽煮茶

題朱野雲處士

鶴年

祭研圖


久與端溪訂石交歲寒爲爾拜深宵須知一片閒雲意除却蒼巖不折腰

不食官倉不種田一家耕石祝豐年來年再寫新詩卷更是焚香賈浪仙

私語更更禁香閣
不食官食不辭田
雲意漸晴燕燕不飛
人與微雲共西交
眼邊微雲共西交
眼邊微雲共西交
眼邊微雲共西交

眼邊微雲共西交
眼邊微雲共西交
眼邊微雲共西交
眼邊微雲共西交
眼邊微雲共西交
眼邊微雲共西交
眼邊微雲共西交
眼邊微雲共西交

眼邊微雲共西交
眼邊微雲共西交
眼邊微雲共西交
眼邊微雲共西交
眼邊微雲共西交
眼邊微雲共西交
眼邊微雲共西交
眼邊微雲共西交





擘經室集

一五

卷之九

擘經室四集詩卷九

文選樓詩存

庚午

與諸表兄弟共建

外祖榮祿公林氏祠堂

於揚州陳家集

天后宮側記事一首

西山大田外榮祿啟專祠舊德傳爲政清芬合誦
詩祭分唐世系象表古威儀老屋梅花樹新牆楊
柳枝書函畱宅相元幼時玉珂諸舅氏與經術記
門楣見說何無忌來題壘白碑

已未借寓京師衍聖公邸曾栽竹三叢藤花
兩本庚午再寓添栽槐柳桃海棠欒枝丁香

并舊有古槐榆椿棗穀共三十餘株記以一律授之館人

三公庭下例栽槐更取時花處處栽淇竹低隨青柳密海棠高共紫藤開還添闕里壇中杏但少楊州江上梅待得十年深雨露綠陰紅樹滿春臺

門生屠琴鵬以翰林改宰儀徵翁覃溪先生

倡詠餞送遂亦以詩贈行

展我泰華碑磨我八輒研蘇齋倡吟篇舊友共相

餞

蘇齋詩云仍磨八輒研餞爾羸詩囊

屠君正壯年出宰我鄉縣鄉

縣尙不陋長江繞芳甸近者集鹽艘民風少爲變

臬徒頽泗來小門竟如戰我昔謀增兵請者議未
善爲此多隱憂保障匪易見我早識屠君洸洸吳
越彥清名滿湖海高文冠翰院百里非龐才

帝欲使之練孰意赤紫州巧得顏謝選學者所設
施豈與俗最殿循吏宋汝陰亦入儒林傳蘇齋敦
勉之古誼深眷眷我豈無贈言力行在無倦履之
而後艱折獄言難片我于浙士民拊循詎能徧惟
不負乃心或不報於面今日春明門花前競吟讌
海棠思召伯鳴琴慕子賤行矣春江潮勿爲瀛洲
戀

聖賢集 卷九
二
川州文
綠樹

長安原是慣風塵
無奈風塵送盡春
一夜碧雲催
密雨滿城綠樹接芳鄰
開窗活翠能驚目
埽徑新陰欲罩人
如此槐廳最清暇
門前遮莫響車輪

題內子綠靜軒圖

卉木無躁意
穆然含清陰
况有幽閑人
情賞相與深
小軒遠塵垢
竹樹密成林
皋禽傍蕉石
香草被苔岑
雨餘見曦影
眾綠何沈沈
碧雲澹無迹
半染詩人襟
窗楹閑窈窕
坐此生道心
乃知山水間
太古誠希音
晝長萬籟靜
一聲惟素琴

題陳受笙均十三鏡齋詩稿後

嶽色河聲太倉莽吳山越水劇清柔合將畫筆兼
詩筆直寫杭州入華州百二秦關收爽氣十三古
鏡照高秋奇才舊見吳南野却讓陳生隴塞游嘉興

吳澹川詩
入關更勝

題陳迦陵先生填詞圖卷

卷中自康熙以來諸名家佳作如林各體
皆備惟無七言長律賦此避之

聞道元龍氣最豪平原繡像喜相遭烏絲細壓欄
邊字火色頻添頰上毫陽羨書生鈞黨在維摩天

女借禪逃江山一曲周郎顧絲竹中年謝傅陶名
士競題黃絹婦清班不藉鬱輪袍歌喉井水新爭
柳扇面烟花舊恨桃醺酒墓田依壯悔吹簫園館
記如皋詞人那識東林意湖海樓原百尺高

題女蘿亭香影移梅詞意圖卷

五年香影太匆匆不是忙中卽病中待得閒來披
畫卷才從靜裡見春風舊時月色還如此今日詩
心更許同聞道家園梅樹好女蘿亭外玉璫瓏

昌運宮白皮松歌

昌運宮在香山鄉古松七株百尺長入門瞥眼驚

相望白龍亂竄千條光鱗鬣欲動冷忽僵森然結
夏堆雪霜陰羽鶴鶴飛來涼仙人墜以瓊瑤漿十
步之外聞古香手捫其膚膩若肪俯視檜柏翻老
蒼相憐皆是滄海桑有明正德多權璫永也差比
彬瑾強所知尚有幾希良依松造墓深埋藏松濤
暮起思茫茫陽明古洞應斜陽

覺生寺觀永樂大銅鐘

永樂洪鐘閱古今虹梁鼇柱屋沈沈銷兵秦政成
餘習懺佛蕭梁本疚心一棒難超無量劫萬鈞豈
躍不祥金華嚴輪轉

熙朝後始聽蒲牢自在音

雨後遊萬柳堂

京師崇文門外東南隅萬柳堂相傳爲元
廉希憲野雲右丞別業卽國初馮益都
亦園也一時鴻博名流皆有題詠後歸倉
場侍郎石公文桂改爲拈花寺今池館雖
廢寺尙在

雨後涼雲重驅車趁曉行尋沙無轍跡訪寺得鐘
聲屋外青林合樓前綠野平不來荒僻地那見古
人情

妙繪見鷗波疎齋共聽歌草堂園萬柳驟雨打新

荷

廉野雲宴趙松雪盧疎齋於萬柳堂命家姬歌驟雨打新荷曲松雪設色畫堂中賓主三人淡

紅衣女子手持荷花置酒杯于花中堂外門閉僕馬待焉繞堂前皆荷堂後皆高柳有雨後迷濛之

趣松雪自題七律于上方之左剩水長蘆占孤亭老樹多若非詩

卷在此事半消磨

最好佳山集遙收松雪圖荷連清露

堂名

折柳得野

雲扶池館畱名跡門廡列衆儒滄洲思早卧此地

已江湖

火城闌不住

見佳山堂詩

付與佛拈花今日伽藍地當

年宰相家風流雖歇絕水木總清華陳跡且休論

華經室四集

卷九 詩

七

但催僧煮茶

京師揚州會館第三層院中種竹百餘竿題

其軒曰小竹西

繁華庸何傷惟趣不可俗歌吹沸天時但須一路

竹維揚置行館近在韋杜曲已圍桃李園

余於第四層院

中襍蒔海棠桃杏諸花用唐人春風得意詩意題其扁曰看花館

更築簣簞谷爲

竹作主人何止戀三宿人苟無世情誰住春明屋

所賴有此君蕭灑慰幽獨九陌多風塵適館方有

轂入門拂緇衣一笑對青目宛然禪智西亭外千

竿綠

新秋月夜

煩襟已厭暑迎秋殊願涼徘徊起中夜復此明月
光閒情悶重闌朗抱開虛堂風槐動疎影露卉含
清香蛩新乍吟砌螢暗時度墻散髮理象櫛淪茗
移藤牀所欣在真境豈辨何有鄉但覺羣動息亦
復筌言忘

過瀛臺見秋荷盛開

妙蓮花界淨浮漚翠葢仙莖露未收八部香嚴會
龍海萬真飛舞下麟洲光明湧現雲霞色清淺折
成珠玉流百丈虹梁平跨去人間天上共新秋

雪集卷之四
辛未

唐花歌

燕京窖花出豐臺
臈月已見羣花開
海棠牡丹鬥紅豔
更好淡綠江南梅
我飾書室小且暖
地爐窗日微相煨
瓠盆瓦缶滿几案
拂拭何異尊與罍
衆芳列坐若佳客
千卷書作賢主陪
轉移春風入戶牖
外釀瑞雪中收雷
渾然元氣在何許
扶持枝葉滋根芽
前花未落後花放
次第不覺三春催
開門遨頭出城去
水邊林下花初胎
那知屋裏奪氣候
已經百日看花來
今年冬半再封窖
一歲春花香

兩回

秦小峴少司寇

予告歸田餞之於萬柳堂卽題其城西草堂圖疊
司寇和余萬柳堂四律韻

草堂欲歸去把酒送君行雅望推文學

恩綸獎政聲病憐長孺卧法念釋之平

君德優臣禮遲遲無限情

宮諭論文處佳山昔詠歌

萬柳堂爲馮益都相國別業小峴本生高祖蒼

峴宮諭爲益都鴻博科門生堂中舊多游蹟見文集中

重來折殘柳歸去製

新荷舊侶江湖少遺編淮海多元豐詩帖在貞石

罪臣集

卷七詩

七

待鐫磨

司寇時奉其先世淮海先生竹詩墨蹟卷共覽

城西連惠麓畫出草堂圖

圖爲屠槩鳴畫

山看微雲抹園

添一杖扶林泉容老輩書史便衰儒蹤跡更何許

扁舟凌太湖

春雨江南足軒前有杏花

秦氏有杏花軒

遂菴新几榻吟

社舊人家

小峴家有遂菴又沈周碧山吟社圖亦小峴先人詩事也

把卷清魂

夢臨風攬髻華緘詩如寄阮好待侑僧茶

蒼峴先生緘詩

寄漁洋山人
題日寄阮集

二月十八日雪後獨遊萬柳堂題壁間元人

雪景畫中

佛龕拾得元人畫裝成重向東
廡掛遺畱想是佳
山堂一百餘年僧不賣畫中
白雪粉痕多水泉值
擘青山界兩客策騎同折梅
絹色雖渝猶不壞欲
題未題待雪來直到中春雪
始快正馬披裘獨出
城要看圖中鬥光怪詩成晴
雪滿松篁雲破陽春
撲廡曬

寒食日偕朱野雲遊萬柳堂夜宿寺中清明

日復看花柳

東風吹夜雨洗出長安春城闌已清淑况此遠水
濱邱壑共明瑟桃柳相鮮新夕陽絢紅影閒照亭

中人煙霞亦何物乃爾怡吾神
薄暝月漸明碧雲復微合暗影抱青城遙情識孤
塔徘徊松樹閒花陰更叢襍歸來話西窗高眠接
禪榻清夢夫如何繞林定三匝
心清夢易醒聞鳥已知曙出門復看花滃然迷白
霧霧氣泣花垂似雨亦似露幽石淨可憑春沙軟
勝步試問六街塵豈得此時趣

上巳日萬柳堂同人小集看野雲處士栽柳
和翁覃溪先生

藉田上巳待

躬耕是日侍耕藉田

上回向林塘曙影橫夜雨潑開

春水色暖風吹散曉禽聲客來南郭心皆遠屋對

西山眼更明記取道人栽柳意送行懷古不勝情

坐中秦小峴少司寇將歸田

野雲處士種柳萬柳堂自作圖卷屬題

豐臺何處有廉家偶指城南憶竹垞廉右丞號野雲其萬柳堂

別墅或以爲在南西門外豐臺相近然令杏不得其遺址而朱竹垞日下舊聞則以南城內東南隅

地當之故不列於郊垞而列於南城卽馮益都亦園也亦園歸石氏後改爲拈花禪寺朱野雲處士

自喜其號巧與廉合邀詩友來處士夙緣還種柳遊且爲種柳栽花若有夙緣者

詩人微笑共拈花商量水外千行密點染圖中一

道斜知是野雲深意在城東欲學李西涯

與法梧門前輩

式善

同遊西山先過八里莊

慈壽寺

城裏看西山遙青未可攀峯巒邀客夢車馬趁春

閒學士還清健書生本劣孱一筇偕一笠

法學士携筇元

戴笠好與叩松關

浮屠出荒寺試讀舊碑銘蓮月開雙相

觀明李太后及神宗

象松風語百鈴早收花外劫豈有夢中經啜茗渡

河去春深萬柳青

渡桑乾河入西山登羅喉嶺

待渡桑乾河沙飛風力勁所遊設若斯毋乃盡清
興呼舟達西厓林密野風定車馬猶逶迤嵐翠已
相迎邨遙柳色新山靜花光靚紅杏千萬株梨雲
與之競遠樹蔽迴峯近枝礙幽逕名山匪易探先
受一嶺橫籃輿扶峭岩竹枝撥危磴興逸忘此勞
山深悅吾性煩襟滌使閒濁慮澄已淨何必訪孫
登始聞人嘯詠

游潭柘山宿岫雲寺倚松閣

中峯何隆然九峯外環繞展轉入寺門三幡風嫋
嫋香殿據層巖孤亭出林表柘溪飛冷泉引派分

渠沼穿屋灑清流曲折鬪工巧虛室何精嚴階下
亂風篠牕明文杏花砌襯碧莎草高松與塏齊倚
閣爭夭矯納客入此間直若猿與鳥再宿戀已深
流連玩昏曉緬昔魏翩翩始志釋老文人侈浮
辭遂爾悅禪藻深山泉石間原使精神澡若欲治
身心終當守吾道

遊戒臺寺

戒壇高處護天龍盤磴回欄四五重石殿烟霞東
面暖香臺金碧上方濃

殿臺皆東向

碑聞松漠依雙塏

碑塔皆遼金時物

河走桑乾擁一峯何事遊人畱不住出

山相警是清鐘

戒臺寺古松

戒壇古松枝葉繁問年上溯遼金元或如舞鳳來
軒軒或如雲上蒼龍蹲奇節老幹何足論勿論其
末論其根走根久已入九原穿山破石深無垠養
以蒙泉包厚坤千脈萬絡紛攀援雲欲出山爲所
捫先與松根相吐吞夏含涼清冬含溫房山元氣
來渾渾渾詩人譽樹徒煩言試與至道探真源

途中小雨

春來何處不風沙小雨才能醒麥芽出見野田樵

悴色愧教庭院日澆花

獨遊萬柳堂

蘆芽戢戢柳蓂蓂一水滌洄染蔚藍但是鷺絲飛
到處管教風景似江南

辛未初秋移寓阜成門

即平澤門

內上岡新居有

小園樹石之趣題壁四首

莫遣鄉心憶選樓城西僦屋似邗溝老槐引入三
橋路雜樹圍成一院秋小有峯巒同石屋無多窗
檻擬瀛舟此間風月真清暇竟日能來幾度遊
春來未及海棠顛接引繁花可半年松菊雅逢秋

士健棗梨低待小兒懸遮牆薜荔披風密壓架藤
蘿漏月圓更與梧桐添綠影芭蕉瀟洒竹便娟
小園賦漫比壺公乳鵲藏狸處處同桑翳雙亭清
夏氣椒香一閣散秋風澆花井水朝分研埽葉棐
牀暮拓弓雖是賃居非廡下未因椎髻愧梁鴻

二百卷排新著書高齋插架見經郭讀碑結習成

迂論

時著南北
書派論

修史深情向舊儒

時修儒
林傳

老圃客

來秋逕外西山青到石臺隅墨莊子弟如相問寫
與詩篇抵畫圖

中秋小園鐙月

華經室四集

卷九詩

七

秋宵涼氣滿花臺幾度閒園剪燭來雜樹陰中鐙
影亂流雲缺處月華開衣深應有三更露研淨原
無一點埃共把清吟酬此夕不催絃管不銜杯

同野雲山人小園坐雨

風雨秋園竹樹搖黃昏時候更瀟瀟却如江岸荒
庵裏早揜柴門避晚潮

昌運宮爲古道院白松七株虧蔽霜雪松下
青苔平鋪竟地雨後來遊園無人迹

滿地濕苔衣松身白十圍松凝秋雪艷苔養綠雲
肥古殿絕行迹積牆空夕暉祇應明月夜元鶴獨

來飛

研背坡公笠屐像

蘇公片石攜袖中有東海研背勒眉山英靈動真
宰我昔到蓬萊天東望渤海一笠翻海光知有坡
公在縱橫一萬里上下七百載此意遠茫茫碧環
若爲解

袖中有東海東海如碧環皆坡公句

聽福祐孔厚諸兒夜讀

秋齋展卷一鎗青兒輩須教得此情且向今宵探
消息東窗西戶讀書聲

王楷堂比部

廷紹

齋中七尺端溪大石硯歌

王郎抑塞磊落才埽葉延我來秋齋籬脚黃菊立
碧苔秋陰堂下多強楷齋中一硯真奇材端溪七
尺橫安排以几爲匣髹髮胎紫雲綠雨摩幽崖平
方正直誰量裁羲之宅裡一片階任人十手執筆
來儘可一研容其儕鋏墨無聲墨頓摧如蠟塗釜
臍莫指曰非端州何石哉器大反與恒情乖楷堂
寶此休輕開神寒骨重勿受猜急須刻字銘研隈
淄塵百斛無能埋

種菜

秋果墜西風秋花濕疎雨小山苔草深時有涼蛩

語呼童荷鋤來，剗破半畦土。種菜能幾朝，已見青莖吐。夕陽閒灌園，香味在老圃。桑陰石几間，妻孥共鷄黍。自起剪秋蔬，付與行煑煮。

題吳荷屋

榮光

登岱小照

巖巖東嶽上，俯視萬峯橫。試問來遊者，何人敢自輕。當前爭樹立，此意足生平。風度真相似，松泉如有聲。

題圖

韜布

曹

學閔

二公戒壇祠圖

西山有古壇，岌嶸出塵界。誰是登壇人，先當受孔戒。二老共遺榮，山僻性逾愛。松石寄精神，栗主一

韜布

曹

學閔

占

祠對我曾入山游高風想先輩讀記念我師更下

祠中拜

祠中碑記乃朱文正師撰

山南二老莊我師墓亦在歸

途謁墓門梁木悲茲壤

文正師墓在盧溝橋西十里二老莊北之呂邨

題書之靜春居圖卷子

選樓宋墨莊清江劉氏出朱子撰六詩靜春居其

一賢母教兒孫曾見安定

胡氏

筆我家居選樓先

祠式安吉他年成一房望祐以經術攬此靜春圖

藏書思石室

一卷藏書圖吾

母著慈教卅載繫哀思五鼎豈

云孝茲圖何足論其貌亦頗肖愛此膝下兒光景

似吾少文學固所期心術尤至要一片折蓼心待
爾春暉報

春花雖灼灼惟靜乃吾廬何因致凝靜賴此萬卷
書慕昔宋劉氏累代守經畬報

國敦孝悌兄弟怡怡如浮華吾所惡勤儉保令譽
勉哉爾母子勿負君子居

壬申

小園初春

殘雪棲園林半在小山北初陽麗南軒溫然漏春
色榆枝拆嫩苞東風已有力一夜結輕冰又覺餘

寒勒向午感微和此焉見消息

三月二十日

駕幸南苑大閱恭紀

羽林齊駐晾鷹臺

聖主戎衣策馬來萬乘

躬勞千纛肅九天春霽八門開

座臨山嶽人如海陣走風雲地有雷端爲太平

親詰武簫鐃歸唱

帝之回

三月廿一日夜宿萬柳堂贈覺性開士和翁

覃溪先生韻

但有鴻儒無白丁亦園原不在郊坰綠波深漲橋
頭板清吹閒鳴殿角鈴舊賸樓臺猶楚楚補栽楊
柳故青青春風禪榻茶煙歇共看三更月滿庭

小園雜詩

清明才過見新萸穀雨催花已放齊一樣風光判
桃柳十分春色占棠梨登臺衆綠浮身起繞徑繁
紅炫眼迷半嚮不知花影換月輪東上日沈西
好花宜趁曉來看起向花前擁盃盤霞色忽驚隨
水動露華猶覺著衣寒折枝邀蝶真成畫嚼蕊聽

蜂每忘餐記否空林春未到迴風飛雪撲闌干
才是春明三月中紛紛已颺落花風恰當半謝新
生綠翻似初開少放紅一例分箋酬令節幾番秉
燭入芳叢與人究竟曾何補慚愧家庭樂自同
古藤幾架紫垂簷小刺茶蘼蓋曲廊上番笋抽新
竹密午時陰幕老槐涼黃扉退直鳴珂靜青簡修
書刻箭長忽有微風生夏氣疎簾初試棗花香
終日鱗鱗九陌車久晴容易起風沙洗春一夜廉
纖雨破夏千枝芍藥花研北銅瓶開繭栗墻東玉
軸展鴉叉此間門巷清如水綠樹陰中是我家

小園休賦庾蘭成但向幽軒較雨晴入戶風圓飛
絮轉鋪池水定落花平偶思晝寢安橫榻更爲齋
居結小棚多少案頭書史在商量可似古人情

首夏奉

使山西辦蒙古阿拉善鹽池事內子餞於小園率

賦

好將蔬笋餞餘春舉案居然我是賓肉食到前遲
下箸自思可是遠謀人

過井陘關

漢將論兵處輶車竟往還背分綿蔓水心壯井陘

關柏柴斜陽淡榆門古意閒何邊曾赤幟四顧歎

青山

太原晉祠

晉虞叔也始見於魏收書

晉水初生處虞祠閱魏隋桐圭青剪葉參宿白開
旗羣木森瑤壅雙泉競玉池晚來涼月下肅穆有

靈祇

晉水

山海經懸甕之山晉水出焉

水經晉水篇酈注嘗愛誦何幸茲來遊緣山入懸
甕沈沈女郎祠靈堂抗高棟下有百斛泉瀆湧出
空洞沙淨水逾明石觸波始動夏暑翻若冰冬溫

不知凍蔽日蔭繁林終年漾青葑石埴雙派分水
磨一亭礪東流繞晉陽歲作霖雨用連陂杭稻香
滿澤芙蕖種灌城反滅瑤平晉當譏宋娛集尋飛
梁宦子昔迎送清川澹不收山月暮將弄風泉一
夜聲洗我空林夢

懸壺山

海內讀山經晉水一源發懸壺連蒙龍間麋王爲
窟重甌朝已陞夜游更超越竟登柏翳山還見禹
時月上有避暑宮高齊下有蒼龍闕北漢見山川太
古心萬載未銷歇

臺駘廟

汾睢驅自循蜚初元冥世業大夏墟臺駘手障晉
陽澤沈姒實出汾沮洳金天大鹵襲白壤宣通下
濕生蒲魚昌凝廟象按劍坐唐封神爲昌凝公弟兄原未
相離居閼伯實沈日尋戰允格臺駘本相善太平
興國火晉陽干戈誤讀邱明傳果憐灼艾託官家
何愧參商不相見

聖母祠

晉源之神舊名女郎祠宋熙寧中加聖母號居正殿別立女郎小祠於泉

上閭百詩曾據斷碑知爲邑姜也

漫說叢祠住女郎亂臣原是古周姜雲冠松蓋山

樓靜翠葉銀花水鏡涼開母有姨居少室夫人辭
帝降清湘后妃治法分明在底事河東見武楊

古柏

古柏生何代應生楊李間南臨雙派水西夾一梯
山卧榦青銅柱高枝碧玉鬘寄言後來者省識好
相攀

貞觀晉祠銘

舊揭唐銘一丈碑碑陰今是刻名時六朝隸楷翻

貞觀

隋以前碑與帖分以義之帖法書碑自唐初始

十道山河起晉祠雅

愛義之親作傳感恩虞叔獨題辭

高君雅等禱雨之謀不成瀛

洲學士誰能此使我摩挲歎色絲

涼堂

曾聞水上結飛梁目送清流下晉陽欲借酈君經

注筆綠陰深處補涼堂

水經晉水注云水側有涼堂結飛梁於水上左右襍

樹交蔭希見曦景元壬申夏日來游池館頗多獨無涼堂之名因屬門生太原尹魏來田補書此扁以存古蹟

曉涼

晉陽暑雨夜初收曉起涼深似暮秋不是雁門風色緊未知身在古并州

磁州滏泉道中

百里邯鄲道塵歛生暑風今朝新雨裏一路亂泉
中鷺向稻田白荷依柳陌紅江南好光景此日憶
相同

正定喜雨

呼渡滹沱日卓午禾黍與人同畏暑常山雷起卧
龍飛勒轉風雲射涼雨雨停濕氣蒸夜林曉程起
望猶濃陰大凡一片墨雲下總有萬家歡喜心

小園

長亭三百轉輶車暑退涼生始到家得少閒時才
覺倦坐看園叟種秋花

寄題焦里堂姊夫半九書塾八詠并示琥甥

雕菰樓

君子樂瑕邱貞白不下樓我亦有丙舍近在龍岡頭
他年好魂夢相約來往游

柘籬

樓北樹已嘉樹外籬更好春芳蔓青條秋花隔香艸
若喜柘枝顛毋能采菊老

紅薇翠竹之亭

紅薇駐夏日翠竹延清風虛亭凝一笠襍樹翳成叢
中有著書者樂過仲長公

蜜梅花館

衆卉已驚寒黃梅獨相耐況是先人遺書館勿翦
拜一片冰雪心畱在湖波外

倚洞淵九容數注易室

密室括圖書先生獨注易妙悟契天元數如正負
積孟費勿分家秦李合共席

木蘭冢

昔年王浮圖今畱一坏土花身雖不存其名足今
古標以璫石峯將爲刻銘語

仲軒

公理論樂志有志未能樂何如黃珏湖深遠似巖壑況是樂孔顏於焉寫著作

花深少態簃

君子守歲寒所貴非有態李固豈弄姿魏徵豈嫵媚毋爲擷春華還思翫晚翠

中秋小園鐙月

小園鐙影花影徹夜草香露香遙憶二分明月平開一半秋光

出古北口四百里至木蘭圍口

策馬塞山下泉石生清音延緣入寒麓霜色絢丹

林席狨在幽草晚風吹我襟夕陽下西山朔氣何
蕭森牽駝飲迴澗牧羊散高岑時有獵騎來連韉
帶皋禽茲行洵孤立徘徊獨諷吟有懷古卓歇澹
然多遠心

木蘭山口

羽林初散木蘭圍北幕諸藩拜宴歸剛近重陽試
風雨四山黃葉帶雲飛

初用眼鏡臨清舟中作

高宗壽八旬日無靛黠照

臣賦眼鏡詩

褒許得

優詔爾時頗自恃焉知惜壯少無何中年來淚泣
屢哀弔

鼎湖與雷波心肝傷兩竅況在經籍中千卷自讐
校今年鄴下歸麻茶非意料秋來加鏡看忽使鏡
呈效

帝恩命司空出轉七省漕六百萬石粟案牘待披
報竟欲仗此君心折不能傲古人知非年來歲五
十到豈今一歲前尙爭後先覺亟須盪吾胷無爲
不正眊

題張淥卿

詔

露華榭稿

淶卿昔在余幕旣乃客遊山左作壻東萊
詞采驚人年華感舊今廿年矣露華詞句
雅近王田吳穀人祭酒以詞題其集有云
付香苙一聲一咽尋常歌吹全洗淶卿故
不名詡余昔有漢銅印文曰張詡之印以
贈淶卿淶卿卽自名爲詡此皆本事也

廿載才人說淶卿江湖小集刻初成七條苙咽眞
情味一寸銅香古姓名齊客例應爲贅壻吳蒙還
是作書生富春山色揚州月并作秋懷寄歷城

拜汶上分水廟

尙書

宋禮

畫策本虛懷白叟

白奇

謀抵決排泰嶽餘

根歸魯衛汶流分派入漳淮五千帆楫能逾嶺二

百泉源盡到階心折古人甘下拜神鴉飛舞過松

牌

仿鑄漢建初銅尺歌和翁覃溪先生

蘇齋寄我漢尺篇三尺分弄詩應聯

葉東卿志詵仿鑄漢建初

銅尺三枚以二尺分贈蘇齋暨予而自畱其一

摩挲護屈屢歎息此尺與

我尤多緣江都閔氏舊寶此鑑藏尙在吾生前

此尺

本在江都爲吾鄉之物此一緣也

家鄉漢石竟手獲吉金豈不增

惜憐

予手獲西漢厲王胥冢石字于甘泉山

一從法物歸闕里較量

禮器相後先憶昔再試四氏學量才借尺曾兩年

予兩至曲阜試士皆借此尺于衍聖公府徹赫後還之此二緣也自茲一別十七

載壬申復由魯至燕壬申年予從闕里借漢尺至京師鑄畢還之闕里此三緣也

也蘇齋重見喜作考葉氏仿古鑄且鑄翁葉阮各

得其一日本銅質鎔精堅葉氏用日本銅仿鑄三尺予得其一此四緣也

我曾獲燬越南印模鑄漢尺分豪懸葉氏鑄用原

尺較一絲不爽符貨泉予於庚申年剿獲安南四總兵銅印於台州銷爲一

劍一尺其尺僅以漢尺拓本仿鑄今以原尺較之弱一分有奇不及葉氏此鑄分豪不爽世間

尚有晉前尺周漢尺賴搨本傳晉尺亦爲我所得

復齋宋冊相駢連世間除此漢尺外惟宋王復齋鐘鼎款識冊內有晉前尺搨本

世經室四集卷九詩

其尺銘載與周尺劉歆尺相同卽沈冠雲據以積著周官祿田考者此冊今藏予齋中此五緣也

古齋中列觀八商角周壘及漢甄

予以商銅角周齊侯壘漢晉八

甄唐貞觀塗金銅碑宋王復齋鐘鼎款識宋九延之板文選舊揚未翦本華山廟漢碑及仿鑄漢鼎

尺銅貯積古齋中列爲八觀

末列一觀漢鼎尺定陶仿鑄量與

權惟度量衡共二器周漢制度今兼全

予得漢定陶恭王銅

鼎置之焦山仿鑄一鼎存之齋中漢人鑿所重斤兩所容升斗於鼎蓋器上再合此尺可得古度量

衡之全此六緣也

古今度數無二理適於世用斯爲便測

量粟米剏捷法一尺算遍船五千

漕運總督盤糧之法舊用尺量

船三乘四因始得米數予以今米一石積爲六面立方形卽命此一面爲一尺剏爲新尺祇用再乘

卽得米數寒冬鑪火小閣暖淮陰官舍如琅嬛詩成握

尺天欲雪茶甌香雜沈檀烟

十二月十一日夜宿海州雲臺山東海營次

日閱兵

雲臺山下結軍轅弓矢鉏犁共一屯田已爲桑原是海營惟種柳半成村潮頭沙影猶清淺月底巒光更渾淪認作家山安穩住

山名與余字合

今宵有夢到

三元

峯頂爲三元宮

石臺高處起朝暎殘雪平分嶺脊痕陣合呼槍連谷響射回卷旆帶烟翻休因鯨戮成京觀遂遣鷹遊弛海門爲語胸東諸部曲水仙容易有孫恩

昔年

蔡逆窺上海此地
鷹遊門曾戒嚴

決河曾向郁州奔
碧海渾波共吐吞
東去淮沂頻奪路
西來蒙羽尙連根
誰分賈讓三條策
得溯張騫萬里源
若與黃流較源委
此山遠欲抵崑崙

過海州板浦弔凌次仲教授

山海應如舊
斯人世已無
因文明禮樂
本孝礪廉隅
耐久真成友
成名定作儒
那堪三十載
到此式君廬

擘經室四集詩卷十

文選樓詩存

癸酉

高郵雨後舟中歌

舊年一雨洗春去花落春明襍飛絮今年一雨浮
春來楚州烟水迎船開楚州珠湖好烟水但恐狂
瀾來未已遠邨新綠上林梢野寺江梅破新蘂如
此淮南好畫圖一漲便教成釜底河水原從天上
來湖隄究竟由人毀春風起兮吹春波今年秋風
復如何中流擊楫愁心多且掛江帆催渡河

泊瓜洲督運白題江鄉籌運圖

高臺日映海門紅楊子春江二月中獵獵千帆開
北固幢幢一燾引東風臺建大旗風順則鳴礮升之糧艘始由北固渡江來
舊遊已歎華年改故里還疑夢境同今日伊婁河
上住幸無詩稱碧紗籠

題郭頻伽磨神廬圖卷

名園多樓臺乃遜圖畫久金谷能幾時遽廬同其
偶不死惟谷神神構卽不朽郭子本清貧計出季
倫右尻馬御飛輪造化盜而取精神見山川真氣
爲戶牖彈指樓閣成縮地箱篋受示我神廬圖導
我入廬走捫腹卽生松運肘亦化柳癡語破平泉

澁文斥絳守若不言本無安知非真有始歎甲第
雄不敵詩畫手造物非忌才終待才人厚

題蝶夢園圖卷用董思翁自書詩韻

辛未壬申間余在京師賃屋於西城阜成
門內之上岡有通溝自北而南至岡折而
東岡臨溝上門多古槐屋後小園不足十
畝然亭館花木之盛在城中爲佳境矣松
柏桑榆槐柳棠梨桃杏棗柰丁香茶蘼藤
蘿之屬交柯接蔭而獨無牡丹園有一軒
二亭一臺玲峯石井欹崎其間花晨月夕

不知門外有車塵也余舊藏董思翁自書
詩扇有名園蝶夢之句辛未秋有異蝶來
園中識者知爲太常仙蝶呼之落扇繼而
復見之於瓜爾佳氏園中客有呼之入匣
奉歸余園者及至園啟之則空匣也壬申
春蝶復見於余園臺上畫者祝曰苟近我
我當圖之蝶落其袖審視良久得其形色
乃從容鼓翅而去園故無名也於是始以
思翁詩及蝶意名之秋半余奉
使出都是園又屬他人回憶芳叢真如夢

矣癸酉春吳門楊氏補帆爲畫園圖卽以
思翁詩翰裝冠卷首以記春明遊跡焉

春城花事小園多幾度看花幾度歌
花爲我開畱我住人隨春去奈春何
思翁夢好遺書扇仙蝶圖成染袖羅
他日誰家還種竹坐輿可許子猷過

遊淮陰柳衣園憶京寓蝶夢園

誰家池館傍淮濱薄暮風光潑眼新
初月殘陽交弄影綠楊紅杏共扶春
去年花事詩猶在今日京華迹已陳
但是園林遊便好莫教苦憶舊芳塵

隋宮瓦

隋宮黃土迷蕪城大雷小雷春草生王勾金釵掘
已盡荒原還有耕夫耕我過蕪城見耕者拾得隋
時故宮瓦但有雙環四出紋惜無文字周迴寫回
鴈宮芳林門知是何方簷溜痕流珠堂成象殿建
瓴形勢分明見一規翠甍閱千年祇宜琢就圓池
硯麝煤響榻寫隋書護兒先錄來家傳

題柳徑停雲圖卷子三疊萬柳堂詩韻

癸酉春都中陳鍾溪少司空邀同其叔石
士編修兄王方員外暨朱野雲山人潘芝
軒大司空葉琴柯給事葉芸潭劉芙初董

琴南饒晴薌謝向亭編修同遊萬柳堂山
人畫萬柳堂卷子寄余翁覃溪先生題卷
首曰柳徑停雲并題五言古詩一首諸公
所作多題卷中朱蒼楣比部諸公亦有題
句寄到濟寧舟中因三疊舊韻題荅

僻寺看花處諸公載酒行題詩邀鷺羽補柳得鶯
聲蓮社清風聚蘭亭曲水平那堪廉孟子傷逝不

勝情

柳堂舊遊法時帆
先生頓作古人

兩載禊春波朝遊復夜歌

兩年與山人屢
夜宿拈花寺中

深杯依

鍛柳短燭接銅荷人遠夢猶戀圖新詩更多小齋

三硯外

山人三硯齋覃溪先生書扁

爲我墨重磨

窠壁停雲字池裝柳徑圖書牕曾共覓吟杖記相

扶

壬申春隨覃溪先生遊萬柳堂并訪先生舊居先生童時讀書處距堂一里許耳

詞侶

隨前輩經生奉大儒墨雲題一片飛到蜀山湖

湖水掘已盡苦餘紅蓼花

時各湖積水疏掘殆盡以濟漕運

萬帆

爭轉粟一舸學浮家望雨占雲氣催程趁月華相

思多舊侶把卷伴琴茶

緯代賑

此癸酉六月作及九月歸舟至德州時直

隸豫東邪教作亂乃每船各選壯丁給兵

械合首尾五帮連環相助至十一月始肅

全漕歸江南境

鴻雁年年飛所謀在江湖閒民無聊賴慣作牽船
夫粟米四百萬轉運達

帝都南漕五千船船與廿夫俱牽夫十萬輩歲歲
相挽輸南牽來瓜洲北牽過長蘆負絳面撲地蹴
踏聲齊呼前船呼邪許後船唱喁喁當暑無笠蓋
逢寒無袴襦陰雨沐毛髮烈日炙肌膚岸宿犯霜
露川涉陷泥塗或爲頽白首或爲鬖鬖鬚兵吏促
行程執朴相逐驅戀船如戀家孰肯爲逃逋問伊

何所樂問伊何所圖一飯何所樂一身何所圖所
累惟此口藉船相爲餬有時力衰盡溝壑在路隅
年豐尙謀食歲荒食更無今年春夏旱山東二麥
枯農民無收穫握粟如珍珠俯首掘草根煮及薺
與荼仰首剝樹皮屑及柳與榆魯宋數萬民貿貿
來川途川途亦無麥守死能須臾饑民爾勿死爲
我牽舳艫一船加廿人數萬抵飛芻加夫不得力
不慣相曳婁不慣鳴欸乃不慣合步趨雖不合步
趨聊使相挽扶才牽牯河船便得飯數盂腹飽心
且安人分勢自孤何嘗說相賑與賑實無殊方今

太平世爾曹壯而愚得食卽

帝恩養此七尺軀今年湖水淺處處阻且迂剝運
耗旣多加夫費更需一船有一軍軍困復誰蘇豈
不欲軍蘇賦勿加越吳東南農力困安可再多逾
軍農尙困乏何況牽船徒自古食爲天無食良可
虞所賴豈有他一飯真區區

重陽泊天津登芥園小樓

樹老寒蟬斷斜陽獨倚樓浮雲連渤海新漲下漳
流挽粟能歸庾來船任觸舟迴帆天氣好祇是已
深秋

甲戌

春草軒詠春草寄仲嘉二弟

淮陰二月艸萋萋
帆影車痕上碧隄
節鼓春回行馬外
尋詩晚出射堂西
池塘雨過人猶夢
河朔風和綠漸齊
愁說微山湖水盡
香蘅芳杜滿新泥

與王柳邨處士

豫

丁柏川觀察

淮

方靜也茂

才

士倓

焦山僧借菴同立
焦山書藏詩以紀

事

書賴名山藏
山向古書觀
禹貢逮爾雅
桑欽亦傳授
嶽鎮若非書
其名久舛謬
我昔立書藏
錢塘置

靈鷲茲復來江南焦山藏新構焦山本譙山人罕
識其舊於詩見江淹於典稽杜佑樓倚椒山祠正
氣充宇宙周漢二鼎間常有海雲覆鶴銘殘字多
編列籤厨富萬卷壓江濤千函寄烟岫付與詩僧
收何異長恩守况是仁者靜山壽書亦壽千載傳
其人更有史遷副

賀翁覃谿先生重赴甲戌科

恩榮宴

弱冠科名花甲周

新恩重得會瀛洲三春補赴瓊林宴

先生壬申會
榜在九月

聖經堂明集

卷十

詩

七

萬卷真傳石墨樓

先生之學淵源於黃氏萬卷樓先生自有石墨書樓

錫爵自甘遲二載

辛未科元等在京師卽議先生應與是科之宴先生以壬申尙

少一年願以甲戌科遲二年與宴計六十二年矣

著書人好共千秋

謂前

甲戌科多著書之人元謂今新甲戌科如劉逢祿等亦能著書者也

先生學與精神

合試看江河萬古流

過珠湖草堂用白題射鴨圖舊韻二首

扁舟入珠湖帆共湖雲飛浦溆自回繞蒲柳相因
依破暑得微涼輕風生葛衣憶與草堂別七年今
始歸羣從昆弟來欣然意無違羨君遠城郭蕭然
無是非

鷗鷺狎湖水不向江外飛泛泛蘋藻間烟波常相依
羣從棹湖月夜披白苧衣念我宦遊人故里偶
一歸在外十九年情僞尙多違相念且相勉行年
應知非

夜宿雷塘墓菴

離鄉遠遊子常悲歲月深一朝暫歸養汲汲惜寸
陰茲來得展墓仿佛同此心敝廬僅一宿徘徊戀
舊林暮愁夕陽墜曉迫明月沈夢魂詎能定毛色
忽已侵逮存慟疇昔靡監念斯今行行重回顧涕
泗空沾襟

曉發攝山

秋光縹渺最高峯石徑雲霞疊幾重二十九年人
再到松嵐更比舊時濃

雨後過青陽五溪登望華亭看雲中九華山
九華著奇秀遊眺昔未曾峯巒入夢想烟霞填我
膺今來五溪上駐馬試一登是時秋雨後雲氣猶
鬱蒸九峯在何許訪及溪上僧僧指深雲中恍惚
見未能欲待難久待應憎誰敢憎天風霍然動雲
勢初翻騰乍開若擘絮驟破疑裂繒忽於白雲隙
迸露青峻嶒有如九老者山顛降且升隱隱松嵐

際時見笠與簷有如九遊女簾捲窗暫憑烟鬟曉
未整墮馬堆鬢髻又如水蒼玉琢出青圭稜又如
碧茵薈薈波上凌九峯不齊見三五互減增將
藏意欲秘復見態轉矜屈指知第幾注目窮多層
徘徊涉江去回首秋光凝

九華憶古二絕

九峯縹渺一雲連朶朶蓮華碧上天試把山光比

詩思飄然真似李青蓮

顧野王時此山名九子山唐李太白始改九華之名

雲中一一出青尖風力誰能似此銛欲與荆公鬥

詩筆故應好處是修纖

王介甫九華山詩云盤根雖巨壯其末乃修纖

舟過小孤山

淼淼潯陽九派流
波心清湛一峯秋
獨撐江漢成孤注
遠壓金焦在下游
活翠巖邊霜葉樹
淡紅山頂夕陽樓
乘風破浪尋常事
但惜仙磯未泊舟

冬至日雪窗偶成

南土候多暖今年特地寒
朔風過彭蠡快雪似長安
爲此陰晴計端因稼穡難
稍閒聊自慰戾氣淨餘干

登滕王閣

千年詩序至今存
誰見當時櫓戟尊
爲有大文射

牛斗才教高閣老乾坤棟雲簾雨復飛卷彭澤臨
川相吐吞倚檻獨思百城寄寒江極目靜無言

詠十三金石文房

以唐文泉子紫石硯硯匣上嵌漢貨布以
漢五銖泉范爲墨床以漢宛仁小弩機爲
水池以漢印鈎爲水匙以漢尚方辟邪銅
甯爲筆筒以宋王晉卿鏤金鍊匣爲墨匣
內貯長壽半鈎唐魚兵符以梁大同隋開
皇仁壽唐會昌四造象爲筆架共成一盤
以供清賞

雪集卷十
齋中積古最精挈一尺檀盤事事全金石文房十
三器漢唐北宋二千年案頭舊搨銅花細筆下新
生墨彩鮮翡翠珊瑚皆避席好同歐趙共清緣

甲戌除夕接雷塘庵僧心平書詩以荅之

勞勞已終歲今日少務閑靜坐玩窗影積雪何增
寒言念

君恩重肩力懼未殫忽來詩僧簡古院憶木蘭我
家雷塘墓去院數里間登樓原可望中惟隔一山
墓廬有梅樹神道開松關當茲歲云暮夜雪飛漫
漫復念千里外豈不心爲酸簡中何所語蘇亭多

喜懽上言墓木好下言民食艱民食聊相助墓木

常相看

揚州旱民甚饑余已捐助粥賑更加助於近墓之貧戶

寫詩代荅簡

轉問竹平安

乙亥

齊侯罍歌

此罍銘在腹內十九行一百六十八字乃

齊侯鑄賜田洹子及其妻孟姜之器洹與

桓通借字汪容甫所藏陳逆簠又作桓子

音同則假借無定銘辭有奉齊侯受命于

天子曰爾期璧王樂舞壺鼎鼓鐘用綴爾

大舞鑄爾善斡用御天子之吏洎子孟姜
用祈眉壽等字語工字古銅堅而黝色澤
絕似焦山之鼎余昔購之安邑宋氏葆醇
於戲此罍乃齊景公之所爲賜與田桓孟姜寶用
之雲雷總帶交陸離獸面兩耳雙環垂篆在腹內
難搨槌一十九行列銘辭璧玉樂舞鐘鼓司聽命
天子曰爾期洎桓假借古無疑萬年眉壽爲爾祈
太嶽姜氏尙有媯再世遂至穉孟夷五世洎昌應
卜龜受此器者田乞釐鳳皇于飛陳厚施晏子諫
禮知齊衰此罍之鑄當此時玩辭可見公室卑孔

子請伐扶衰姬此罍屹然竟不移尙父祚短弱尾
旗不抵虞韶傳至斯精金堅黝真釁彝百六十八
字畫奇厯三千年文在茲我姑酌彼還哦詩兕觥近時
罍見余藏文父乙兕觥如爵有蓋上
有兕頭雙角之形器蓋皆有九字銘

齊侯罍歌

常生

罍乃酒器形如壺郭注爾雅曾辨諸其別有五
小曰坎餘者爲罍名無殊古人祭祀及朝享用
備尊彝致精爽天子飾王諸侯金義別尊卑著
天壤吾家積古古物多爵觚觶角紛搜羅酒器
前後共廿六哦詩久已同摩抄後得一罍更權

奇形符古制雙耳垂兩環繫耳吐饕餮古氣磅礴盤雲雷雷疊聲近義取此孔疏訓解得古旨疊口銘辭十九行環列直下疊腹止口小腹大摹搨難銅花青照江水寒篆文百有六十八猝難釋辨非彫殘吾師椒堂朱駕部摹篆秋堂博三古孔惺讀銘末云多張敞識鼎豈足數嘉慶甲戌季冬時吾父拓寄請釋之雄文奇字句估屈一朝識破無廋詞首列齊侯疊數字用錫洹子作龙器洹桓偕聲古通借乃知此爲景公制自古人臣著勲績始制彝器答宣力桓子無

宇齊奚功曷禱萬年加寵錫我憶景公當是年
公室已卑陳氏專五世其昌協筮卜齊國之政
將歸田若使景公早此鑑或知守禮思憂患何
至失刑陳厚施晏子自晉歸納諫此器已兆齊
祚移嬀裔于姜其代斯吾撫此罍再嘆息永懷
還誦金罍詩

伊墨卿太守

秉綬

由閩赴都過南昌賦別

夜雨尊前酒新晴柳外鶯洪都三宿住淮海十年
情孑孑皆孤子嚶嚶是友生此行廣陵郡一路埭

棠清

嘉慶乙丑余丁憂回揚州時墨卿同年爲揚州太守旋亦以憂去官

經堂四集

卷十 詩

三

用余家瓜洲紅船爲式在南昌造船以爲救生諸事之用瓜洲船乘風歸去三日至瓜洲矣

南人使船如使馬大浪長風任揮灑紅船送我過金山如馬之言殊不假我嫌豫章無快船造船令似金山者鄱湖波浪萬船停惟有紅船舵能把洪都三日到江都如此飛帆馬不如

夏夜雷雨題楚夜雨雷鐘銘宋榻本冊

楚夜雨雷鐘鐘鈕鑄雷神之形銘在鐘裏篆跡雄古宋政和中出于武昌後歸秦檜

家今冊中舊榻乃王復齋所收北宋本也
豫章暑雨應時農田大稔清宵聽雨偶題

長句

豫章農田正愁暑圉圉升雲常夜雨西山夜半轉
雷車天遣雷公伐雷鼓雷公偶象在楚鐘政和榻
本墨尚濃篆跡累累肖雷勢每疑夜雨騰蛟龍我
摹鐘文三歎息濕染千年墨雲黑何時墮地見雷
神雷神象見論
衡搜神記鑄象書銘傳芊國今年雷雨動滿
盈有雷不震民不驚涼宵淪茗看古篆雨聲喧隔
譙鐘聲

夏夜

新月淨如洗夜花涼若秋風前雙燭地露下一螢
流暑氣清將減詩情淡不收竹床與蕉扇歇得半
時愁

讀吳穀人前輩

錫麒

有正味齋續集卽用見

寄原韻和寄

七年浙海障橫流常向先生借筆籌

浙海多盜元前後七年辦

畢先生常以籌策見示于詩

相邸詞垣思早歲

已西庚戌間先生爲那繹堂尙

書之師館阿文成公第中元選樓講院憶今秋先

與繹堂同年往來得見先生今住揚州安定書院距

元家隋文選樓最近壽高雅喜詩逾健政拙還

驚句未酬此夜雨
牕秋燭底新編如與話綢繆

題雪窗圖卷用去年韻

去冬今春雪太多甚寒慮有沴及五月麥
大熟且多雙岐者秋稻亦大熟斗米較上
冬賤百餘錢始知宜寒也乙亥冬甫至小
雪節又甚寒得二寸之雪喜題卷中

雙岐多秀麥方識雪宜寒斗米百錢賤萬民千里
安驚心歲荏苒著手事艱難又喜一年雪何妨非
意干

丙子

正月八日立春游百花洲

較雨量晴又一年課農餘事課花田

時補栽花樹

偶來

水木雙清地疑到蓬壺小有天香破早梅知嶺近
綠爭高柳見春先塵勞自愧詩懷少半日能遊便
似仙

小園蝶夢憶芳辰如此林泉也暢神四面樓臺皆
近水一家筆硯共吟春香初茶半畱連處山色湖
光澹蕩人莫使宦遊忘物候度江一十二番新

余在

江南見
十二春

春雨

半月暢春晴翻生望雨情東風變雲氣密雨下江城
遙想匡廬上應多瀑布聲湖山一千里處處起
新耕

百花洲春晴

曉來濃霧滿江城緩緩春光湛湛晴過午日酣風
氣暖水烟山翠不勝情

百花洲課士作得花字

城裏瀛仙館湖東隱士家山林騰嘯詠水木湛清
華孤嶼亭亭立圓波面面斜樓臺雙有影風月四
無遮地領千年勝人栽百種花衆香深雨露萬色

動雲霞過客多題壁春行偶散衙莫教芳樹下忘
却課桑麻

以沈檀爲勾股形筆筒嵌鏡於其弣處卽以
爲硯屏照墨也刻詩代銘

豈獨管爲城兼因硯作屏開奩迴玉照脫穎破春
暝石洗池分鏡花生筆有瓶墨光浮瀲灩燭影射
瓏玲雅製宜宵課新詩抵篆銘兒時書味在還憶
一鐙青

題金帶圍花開宴圖

老圃秋容儘自誇春風何事弄繁華誰知誤煞蒼

生處卽是四花中一花

將由豫章赴中州過廬山作

廬山高連天上雲雲天與山殊不分香鑪峯裏雲

氤氲朝霞暮靄何紛紛

香鑪峯在嶺半嶺高于峯且嶺勢阿曲向西北而峯

居其中其形殊不似香鑪但其中雲氣常滃生如香烟之出鼎乃悟古人所以命名者以雲肖也

我行百里廬山麓遠嶺青青近峯綠東林秋落白

蓮花却向溪南望山北

余家舊藏文徵仲摹李伯時白蓮社圖此圖畫法出

于晉唐舊本尙非伯時所擬社倚崇山溪遶其外今東林寺在溪北而寺後無崇山殊不似此圖余

在寺門望山久之乃悟晉蓮社乃北向背山者山向南而望與圖酷似今東林寺與之相反矣

北香山舊草堂惟畱古木森豫章

香山草堂已無一椽惟畱唐木

一大株數十里
外森然可見

西風嫋嫋下木葉隨雲飛過天池

芴天池岩堯不能到勞人空使山靈笑昨因霖雨
拜疏來長願山靈答

明詔但是西江憂旱時定發雲雷灑龍瀑

廬山舊不列于

祀典今年夏旱余撰文祭禱之後遂出雲降雨七月將卸印時拜疏為山神請封列祀典且祈永致作霖之應奉旨封溥福廣濟神號

大梁丙子立冬後一日即得雪四寸再疊雪

窗圖韵

瑞雪迎冬早梁園氣已寒吏民共清靜川嶽各平安願得來牟熟何愁撫字難夜窗重展卷素食詠

河干

泊大梁撫署後園偶題

昔年鐙火笙歌地今日荆榛瓦礫場
特剪荒蕪開舊圃旋修破碎得虛堂
臺基高處宜登眺案牘閒時竟坐忘
土瘠難栽好花樹春來擬插百垂楊

臘前三日將出都與野雲山人同宿萬柳堂
覺性開士方丈曉行賦別

承

恩辭

九陛奉節戀

平經室四集

卷一

詩

六

天間幾日肅馳驟今夕聊徜徉稅車過蕭寺晚飯
來柳堂山人興還逸開士意亦長是時近佛臘永
夜同僧房空庭澹落月古木含清霜地鑪石炭煖
紙窗律燭光齋厨出寒蔬禪榻薰篆香境僻息羣
動意深難坐忘爲言五載別屢泛千里航頻年憂
漕水兩度歸雷塘彼旣慮寇近此亦恐盜藏滑臺
快擊滅時那東甫同年治莖近在東南郊礪山謹
禦防癸酉冬予亦調發漕標將士防禦于蕭碭之間語長緒往復事過猶
慨慷前春補柳處近在冰池旁春深野桃紅秋高
籬菊黃停雲寄畫卷賦雪畱詩囊蹤跡昔清遠須

睂今老蒼短夢暫欹枕曉鐘已趣裝征途送遙目
離念縈中腸

十二月過趙州茶亭僧舍

五度浚南走驛車衝寒冒暑過僧家買絲客去休
澆酒餉餅人來且喫茶午喝未忘曾爇炭雪途還
記得浮瓜請看老衲惟閑坐尙把星霜改髣華

丁丑

春日安陸道中題王鑑畫楚山清曉卷

我藏舊卷圖楚山畫清曉身未到楚山安知此境
好今春來武昌苦雨意殊惱寒食渡江去漸覺春

雨小行入竟陵西陰雲豁然埽近嶺已飛飛遠峯
猶裊裊是時東方明旭日將加卯蕩漾平湖烟低
向山根遶新霽氣逾清若浮海中島一片綠沉沉
强半是春草烟淨湖水明山影向湖倒碧鏡舒黛
睂繪事遜茲巧連村柳色多入麥菜花少宛轉登
山樵翩翩出巢鳥始知望山色城中苦不早鼓楫
下滄浪青青猶未了橫看數百里巨幅展江表

橫幅

手卷宋人名
之曰橫看子

彝陵峽口望蜀江

岷江本是願朝宗底事巴西繞萬重峽口山光青

似劍荆門水勢白如龍吳船快放三千里蜀客愁
歸十二峯莫問猿聲在何處綵雲可待種芙蓉

荊州懷古

紀南山外古荊州一片江城渺渺愁春夜梅花沙
市月西風荷葉渚宮秋蕭梁書盡名猶在巫峽雲
來夢可畱豈有才人不惆悵未應王粲獨登樓

泊調絃口

布帆安穩楚江天橘樹花香野堠前南望洞庭好
春色華容山碧水調絃

荆襄雜詩九首

羊杜祠

羊杜督軍事被服皆雅儒襄漢據上游用此終吞

吳漢石有婁壽晉碑何遽無

襄陽漢婁壽碑今尚
有搨本晉碑謂羊公

杜公
三碑

鹿門山

隔水鹿門山沙漲漁梁渡渺渺滄浪間隱君從此

去遠岫多松雲鬱積幽人趣

襄陽城

漢水以爲池蕩蕩本天塹何以三千年屢見攻與

陷守取在人謀慎哉以古鑑

大隄

春風吹漢水日落峴山西我自城東來青旗繞大

隄蕭然何所有芳草空萋萋唐以前都關中襄樊為水陸最聚之處故

繁華也

武當宮觀

嶮碑五百載樓觀猶堂堂老桂綴青子春松生古

香羽士無反側任爾耕武當

所過遇真王虛宮及各茶庵皆有古樹周

庵老桂高出三層樓上永樂嘉靖王虛宮四碑皆高三四丈道士依各山者以千計皆佃民種山以

為生計時襄鄖觀察請減汰道流予否之

鄖中山

鄖竹萬疊山民在山深處賊平民徹砦更造新屋

住墾山復種田春深麥遮路

白蓮賊往來鄖竹之時民多逃亡或結砦

山頂本不似前明流民與賊相埒今賊淨民安連遇豐年民焚老林墾山種麥及包穀多造新屋情

頗安樂

古郢都

橫江猶未極歎息此郢中章華在何許禾黍空故

宮惟有屈宋辭萬古流春風

荆門蒙泉

紛紛春日白沉沉夜山青鳴泉出石竇清渠抱幽

亭何必登高臺始講蒙卦經

山半有陸象山講經臺余謂蒙爲出泉之

象有冒勉長進之義故象謂果行育德非專謂童穉愚蒙也一卦之象不專一義也

赤壁

千古大江流想見周郎火草草下江陵匆匆讓江

左縱使不東風二橋亦豈鎖

靜春居三國志疑年錄謂曹操最感橋太

尉之恩引爲生平知己赤壁之戰二喬年皆三十以外操豈有鎖二喬之心杜牧之詩是爲失言

靄園聽鶯

繁林千樹合夏氣一山清連巢亂絲羽倚戶得嚶
鳴百轉猶未已雙柑殊有情羨彼谷居者交交朝
暮聲

閱洞庭水師畢登岳陽樓

木葉西風外秋光滿洞庭波平萬頃白露肅千山
青遠浦一何澹此心相與凝戈船人散後楚客自
揚靈

望君山

終古君山色蒼然壓洞庭橘烟寒鬱鬱竹雨夜冥
冥蘭芷因騷佩魚龍何樂聽莫教徒鼓瑟多恐泣
湘靈

丁丑九月十一日謁南嶽廟遂登祝融峯

頂

瀟江夜雨連湘潭午晴雲氣餘秋炎南行不似重

九後風和川靜如春酣山村竹隴路百轉再宿始
到南岳南入廟拜神謝且禱今年有雨無不甘
更願神功福三楚豐年屢協魚旗占餘閒躋勝
上石廩羣峯按圖相問探磴高嶺仄下馬走逐隊
扶過肩輿籃天門疊石作壁壘上封鑄錢爲瓦簷
飛流直下絕礧底千年不卷珍珠簾風高氣緊殺
凡木但能擁腫生松杉攝衣步上祝融頂雲開石
出何巉巉七十二峯四千丈眼底一一森青尖昔
聞湘中望衡岳舟行能識九面巖我今遠從巖上
立那見葉葉湘中帆惟見帶水自轉折一條白氣

相吞涵蒼梧地荒禹跡遠山中近事差可談少陵
側身歎朱鳳昌黎擲坡多憂讒鄴侯結廬在何處
烟霞畱與張文潛南軒新安雪中住直同文定通
洛濂此外仙釋殊不少我心鈍拙安能參岫嶠有
碑索不得奇文曷出楊升菴名山自念久遊歷歲
月動與行蹤添嵩高二室昔禱雨秦岱日觀早具
瞻謁來雙髻雖未白霜色強半生我髯登峯幸門
腰腳健不扶銀鹿身猶堪鴻雁若迴試寄語吾於
五嶽今登三

唐懷素綠天庵

蕉芽在何處曲折入繁林秋暖無黃葉徑幽多綠
陰壁間狂草在石上古苔深安得住三宿清宵聽
鼓琴

遊浯溪讀唐中興頌用黃文節詩韻

帆隨湘轉尋浯溪登岸欲摩唐宋碑密林接葉山
徑寂青蟲當路垂秋絲橋邊清波眼到底亂石鑿
鑿藏魚兒蒼崖百尺懸于西削成絕壁鳥不棲碑
乃魯國之所寫頌乃次山之所爲三千里外有水
部十四年後無太師人賢地勝文筆古過客墨榻
爭灑揮壁立積錢屹不動安者見安危見危江湖

豈獨漫郎宅又遣山谷來題詩
各人忠愛各朝事大都楚澤騷
人辭事有至難最可歎靖康
俄與靈武隨惟有溪邊古漁父
歛乃湘烟無所悲

過瀟湘合流處

零陵城邊黃葉渡柳侯祠前多
竹樹布帆無恙掛西風正是瀟
湘合流處瀟湘秋水徹底清碧
山如黛照波明隨波轉望忘世
情翠鳥趁魚時一鳴

自湖南零陵入廣西全州避雨宿湘山寺次

日曉發

湘源山下借僧廬翠嶂清流古
畫圖夜雨瀟瀟聽

斑竹曉雲夢夢望蒼梧初冬黃葉猶依樹百里青

松盡引途

夾道古松青蒼蓋天百里不斷舊名怪

底古人遊興好驂鸞飛過洞庭湖

兼謂韓文公呂仙曹唐范石湖

石渠寶笈四集

卷十

三

三十三

拏經室四集詩卷十一

文選樓詩存

丁丑

桂舟三章章四句

毛詩風雅多三疊換韻之體古人唱歎必
三疊而歌之而後人罕效之何也丁丑季
秋由楚入粵疊桂舟三章聊學風詩換韻
之體

桂舟千里上巴陵細雨斜風過洞庭岳陽一望碧
波遠愁絕君山相對青

桂舟千里溯瀟湘細雨斜風橘柚香合江一望淥

波遠人意詩情誰短長

桂舟千里達湘灘
細雨斜風下九疑
峽山一望白雲遠
南海西江相見時

登沙角礮臺閱水師畢即乘水師提督之兵
船過零丁外洋看大嶠山望老萬山回澳門
閱香山兵因題船額曰瀛舟

茫茫沙角外巡海一登臺
潮向虎門落舟從龍穴
開瀛帆乘夜月火礮動晴雷
回楫澳門外西夷迎

節來

夷人奏夷
樂迎瀛舟

戊寅

初食荔枝

廣州五月天清霽荔枝園中摘新荔碧葉猶連翳
翠枝紺苞急綴珊瑚蒂尤物由來不易得久遣詩
人譽佳麗我今飽噉復何難翻覺古人心太契味
中嫌帶醴酪香新荔中微覺有酒氣故白樂天云甘酸如醴酪竟襍微醒
入柔脆我性與酒不相中欲使甘蕉共彈例譽之
固過彈亦非嗜好酸鹹各生蔽瓊漿迸齒清沁脾
且擲檳榔與藤蠋粵人以檳榔扶畱藤葉雜以蠋殼灰共食之

節樓前木芙蓉

樓前幾樹木芙蓉看到初冬更覺紅海暖竟無霜

可拒堂高本有日常烘千枝次第開相亞三色叅
差變不同最是晚晴廊下坐一家人在此花中

詠玻璃窗

紙護窗櫺已策功玻璃更比古時工虛堂密室皆
生白曲榭高樓盡避風尺五天從窺去近一方垣
許見來同儘教對鏡層層照不用開軒面面通疑
畫幅裁花爛漫勝晶簾卻月玲瓏常畱淨几香烟
碧分射深廊蠟炬紅隔斷寒塵明湛湛看穿秋水
影空空雖然遮眼全無界可是身居色界中

肇慶七星巖下枝武望石硯山

星巖何嵯峨石室有仙殿山南閱武塲陣馬得平
甸歲寅節小雪溫暖猶持扇出城風滿旗入埒草
鳴箭東南斧柯山峽對羚羊轉明霞冠翠微流露
鼉光睨石氣韞生輝文彩相與絢儼若几案列硯
山當吾面直使古今筆共此一巨硯踏天工如神
篝火巧剗剗星暈結三巖水肪截萬片官求戒騷
勞民取任利便新阡多塿燥割賣竟殊賤吾家舊
紫雲知自茲巖鑱今日置船窗似人返鄉縣忠義
老磨研古人可想見

伯玉亭節相寄示臨安平夷紀事詩書畬二

首

元老奮天戈平夷埽穴過將軍依大樹百姓種新
禾斬闖勞諸葛收徵倚伏波若非公速捷吾亦警

牂牁

時粵西
亦防江

同備宮寮後懷人三十年使車久離別詩硯各磨
研吾髩已非昔公顏豈似前何時同剪燭重話菊

花天

昔與相國同官詹事時秋冬間齋宿
種菊滿庭余故有一枝軒菊趣圖

自梧州泝灘江經龍門劔窖之險

桂林山南衆水聚聚水成川必流去穿谿破峽抉
石開百折千回自成路此路惟許清灘通誰使連

舟向灘泝天寒水落石更出直下龍門如瀑布水
底森然劍戟多石與水爭激生怒來船不戒偶一
觸立見欹沈亦何遽逆行雖難尙少虞順水飛流
每多誤去年鼓棹險不知今日重來人始懼我家
珠湖烟水平小艇忘機落鷗鷺過灘人倦夢初來
夢到陂亭狎鷗處

余家北湖有三十六陂亭

桂林微雪疊雪窗舊韻

桂館逢殘臘居然刻意寒山情太奇峭民事本平
安集霰一何急迴春應尙難嶺雲殊惱意繁壓碧
闌干

桂林除夕憶雷塘庵僧心平

每當歲暮多風雪是憶雷塘老衲時雲色昏寒低
石馬濤聲嗚咽起松枝墓門梅樹開猶未精舍蒲
團坐可知本不能如僧伴住桂林何況隔天涯

巳卯

隱山三章章四句

余生辰在正月廿日近十餘年所駐之地
每於是日謝客獨往山寺嘉慶廿四年余
歲五十有六駐於桂林是日策數騎避客
於城西唐李渤所闢之隱山登降周回串

行六洞煮泉讀碑竟日始返竊以爲此一

日之隱也

隱山之峰邁軸可容一日之隱客不能從
隱山之北覆巖幽澤一日之隱栖此泉石
隱山之中雲岫四通一日之隱我辰所同

八念

我念雷塘北庵樓對漢陂

雷塘卽漢書雷波雷陂卽雷波

松楸阡

外路霜露墓前碑每遇歡華境常思閭淡時昔年
翹足臥幽獨避人知

右雷塘庵

我念選樓下廊虛窗復深詩書秋客意金石古人
心自我閉門去是誰憑檻吟却畱經詁在聊復擬
珠林

右隋文選樓

我念珠湖岬先人舊草堂到門布帆落曳屐板
橋長偶捕鮮魚煮旋春新稻嘗農鄉好風景那得
久相忘

右珠湖草堂

我念祠樓上西窗對墓田

僧度橋祠樓西望陳家
祖墓及江夫人墓

皆三
里內

小橋橫白水老樹帶蒼烟歸夢曾三宿鄉心

在百年杜公有圓石敢與郭香鑄

墓刻華山碑在樓下

右北湖祠樓

我念平山路清溪十里源如將萬花谷并作一官園
烟月家家舫樓臺處處門卅年閱川嶽邱壑不忘鯤

右平山

我念康山上高堂出女陣舊題思白筆雅集曝書詩
竹馬曾遊處蒲帆屢過時故家惟此在悽絕失

蘭池

亡室江夫人家園有蘭池今兄弟無人園池廢失惟此山爲其從弟家耳

右康山

我念曲江曲亭中王子猷詩鈔千卷富竹看萬竿

修紅雨桃花漲黃雲稻葉秋所思殊邈邈曾此泛

虛舟

詩人王柳村居江洲予結曲江亭柳村選詩千卷

右曲江亭

我念木蘭院廢城隋故宮一林黃葉樹千載碧紗

籠禮塔思坡老聞鐘談敬公墓庵殊不遠香火老

僧同

唐木蘭院卽王播題詩處離雷塘墓庵不遠院僧心平兼管墓庵常住之

右木蘭院

登桂林棲霞星巖隱山諸崑洞

奇峰陽朔盡如簪一路簪峰到桂林

韓文公有帶水簪山之詠

足力尙能躋此勝山容真可駭人心隔林已見星
門迴渡水方知石寺深銷盡寒雲飄盡雨春光猶
覺碧森森

出岫雲霞入岫風巖皆有洞洞皆通敢來月窟天
根裏竟到山腰地肺中九曲穿行人似蟻兩頭垂
飲石如虹偶因尋得桃花路

東洞外多桃花

不料潛過絕

壁東

春風幾日滿天涯平野村林盡有花流水晴光更
搖漾夕陽暖翠不成霞人齊飛鳥高千尺城象盤
龍抱萬家爲喜盛時蠻崗靜佛泉宜煮獐溪茶

雪經室四集 卷十一
六洞唐賢共隱名何能吏隱卧山城但教識得林
泉趣自可消除市獄情道路會須還坦蕩峰巒毋
乃太縱橫驂鸞頗憶衡湘北萬頃重湖一掌平

桂林春望

榕門二月雨餘天曉霧新晴嫩可憐山色淨時烘
暖翠李花穠處鬱春烟閉門豈是陳無已懶讀將
同邊孝先不爲秀峰畱我住崑崙關已著吟鞭

桂館春夜初晴

才見春宵晴後天流連光景未能眠月如停處當
頭近風到和時撲面圓廢圃竟無花一朵荒堦惟

有石千拳閉門守黑猶非妙白不須知是妙兮

憶江南春

五嶺數千里氣候判南北廣州三冬時雜花已春
色花色既不穠香氣亦頗嗇入春每驟暖否則冷
雨逼今春在桂林寒氣更鬱塞不見韶光來常愁
嶺雲黑中惟三五朝放晴雨暫息桃李強自開豈
敵風雨力江鄉春最暢花事苦相憶風日暄和時
香重豔何極斜陽踏芳草光景舊省識始悟江南
春明媚不可得

送春日去桂林

人在天涯送遠春
遠春還送欲歸人
風光漸埽纏
絲雨雲水原隨淡
岩身王筍峰多通
桂驛木蘭舟
小望榕津祗憐花
事成狼籍那有殘
紅上繡茵

柳州柳侯祠

柳江猶抱柳侯祠
定是風光異昔時
青箬綠荷非
舊崗黃蕉丹荔有
殘碑徙移故蹟頻
消瘴想望高樓合
詠詩多少文章畱
恨在鶯啼花落又
羅池

龍賓道中

柳南山水接龍賓
更度牂牁問遠津
青草氣香疑
有瘴綠榕陰重惜
無春當年木客曾
詩客今日搖

人是稻人四月畚田耕種畢此間久已不文身

上林道中

木棉林外鷓鴣聲人與青山相抱行三面翠屏方
罨畫一行白鷺更分明烟清斥埃郊軍射水滿畬
田獐婦耕自古百蠻驕遠徼莫將容易說昇平

由賓州至邕州過崑崙關觀狄武襄進兵處
宋史狄青余靖廣源州蠻等傳載青破儂
智高事甚詳李燾長編曾鞏襍錄所載亦
爲得實惟沈括夢溪筆談一段爲世人所
口炙者余昔嘗疑之今親至邕州知其侈

也筆談言智高守崑崙關按上年十二月
鈴轄陳曙戰敗于金城金城在關之南曙
兵弱而少若智高固守關曙必不能至金
城惟智高狃于金城之勝所以更不分賊
在此爲守備故曾鞏雜錄載青之言曰賊
不知守此無能爲也筆談又言青值上元
大張燈燭欲燕飲三夜次夜二鼓青稱疾
潛出至曉座客未敢退忽報是夜三鼓已
奪崑崙矣此亦謬也余今由賓州九十里
至關頂由關頂四十里漸落平地爲金城

寨由金城至南寧府卽邕城尙有六十里
而歸仁鋪距城北僅二十里若武襄十六
夜二鼓出賓州豈三鼓卽能到關賓州又
何以曉卽得報今以道里及時日推之必
是十六日暮謀已報關無守備武襄遂夜
冒風雨而出卽使騎速亦須五鼓到關方
夜出時必畱密令令步兵十七日曉發非
奪關後返報也步兵約十七日午後可到
關夜可至今城十八日曉行午前后可到
歸仁所以一戰卽暮也狄青傳亦惟言整

軍騎一晝夜絕崑崙關出歸仁鋪耳所言
飭者自是指在後之大軍而言固未言張
鑑爲三徹夜之燕飲也武襄到賓卽斬失
律者三十二人而陳曙之敗余靖實迫之
武襄不能罪同列而斬其次所以桂人哀
之而立廟王明清揮塵後錄有蘇東坡謂
陳崇儀死非其罪之語夫斬將士至三十
二人之多雖曰明罰然旋爲三徹夜鎧燭
之燕飲恐無是情藉曰僞示賊以暇恐賊
謀未聞而軍心先惰故示具五日糧元宵

犒兵或有之三夜鐙宴座客待曉武襄未
必如此沈括所談非盡實矣余觀崑崙關
不甚險惟山谿迴複數十里宜防伏兵謀
者非祇謀備關與否尤以謀有伏與否爲
急若有備伏遂不進乎余思武襄必有佯
攻正道潛兵越行間道之計今按賓州西
南行由武緣本有路可達南寧城特多百
里耳又按余靖平蠻京觀碑及平蠻三將
題名碑皆言正月己未青至歸仁鋪賊舉
衆出城拒戰大敗之宋史仁宗紀則以爲

戊午日當以碑爲得實宋史皇祐五年正月壬寅朔己未正是元宵後三日乃正月十八日也余靖碑誌又言追奔十五里是也宋史狄青傳言追奔五十里亦誤也由歸仁至城僅二十里此碑之所以勝於史也

皇祐三年冬武襄入西粵蕃禁合土兵師集厯三月文臣不相牽宦官不相軋三十二罪人毅然縛而殺曙敗靖迫之有廟祀鈴轄一戰大功成軍制明賞罰我今來賓州武襄所頓歇豈爲宴上元必

待謀而發我來崑崙關武襄所夜奪謀知賊無備

靖汙未及察若其備伏嚴此險難直達間道在關

西佯攻且潛越我來歸仁驛武襄所撻伐山平蕃

騎便左右易馳突賊氣失標牌軍聲動刀鉞此戰以馬

上刀斧破步賊之標牌我來邕州城武襄之所拔詰朝整旅

入智高已夜脫武襄料賊明騎蹴使步蹶武襄在

蕃落數百騎早定以騎蹴賊之策武襄偵賊真夜出決倉猝武襄

得地早過險勢莫遏武襄防患深不遽窮其窟戰

績載史書雖曾識顛末若非見地形游談誤沈括

下橫州烏蠻大灘拜馬伏波將軍廟

鬱水貫烏蠻樓船舊此間伏波橫海去合浦獲徵
還人拜磯頭廟灘喧水底山篙師能撥險潑刺出
江灣

嶺南荔支詞

男福注

嶺外書傳唐伯游

蘇文忠公荔支嘆詩自注漢永元中交州進荔支龍眼十里一

置五里一埃奔騰死亡羅猛獸毒蠱之害者無數唐羌字伯游爲臨武長上書言狀和帝罷之至十明蘇詩註引李註云謝承後漢書唐羌上書云伏見交趾七郡獻生荔支龍眼等鳥驚風發南州土地炎熱惡蟲猛獸不絕於路至於觸犯死亡之害死者不可生來者猶可救也此二物升殿未必延年益壽云云後漢和帝紀元興元年唐羌上書陳狀帝下詔曰遠國珍羞本以薦奉宗廟苟有傷害豈愛民之本其敕太官勿復受獻

風枝露葉漢宮秋

荔支嘆風枝露葉如新採

三輔黃圖漢武帝破南越建扶荔宮扶如何天寶

荔者以荔得名自交趾移植百株于庭

年間事通鑑天寶五載妃欲得生欲把涪州換廣

州

荔支嘆永元荔支來交州天寶歲貢取之涪自

三省通鑑注用蘇說

人道驪山驛騎長漫疑不是嶺南香漕河自古通

扶荔

考唐時轉運由揚州入斗門渡淮入汴由汴

轉漕之制連株成實輕舟快楫抵渭南後摘實飛

事此路難瞞張九章

唐書張九齡傳其弟九章通鑑天寶五載天下風靡以嶺

南節度使張九章貢最按貢荔之事應在此時舊唐書地理志嶺南道廣州南海郡土貢荔支考東西川土貢皆無荔支又樂志載南方進荔支事若是蜀貢當云西方不當云南方也又杜子美詩憶

昔南海使奔騰進荔支又云南方每續朱櫻獻據此數證已爲確實況子美生於唐代目擊其事其爲嶺南之荔更無疑矣

尤物誰曾比荔支

蘇詩初食荔支詩不知天公有意無遣此尤物生海隅又荔支

嘆我願天公憐赤子莫生尤物爲瘡痍

曲江風度那相宜

唐書張九齡傳宰執

薦公卿必問風料應自悔初年賦錯與掖垣人說

知曲江集荔支賦序云南海郡出荔支焉每至季夏其實乃熟狀甚壞瑰味特甘滋百果之中無

一可比余往在西掖嘗甚稱之

新歌初譜荔支香

新唐書樂志元宗幸驪山楊貴妃生日命小部張樂長生殿因

奏新曲未有名會南方豈獨楊妃帶笑嘗杜牧之

進荔支因名曰荔支香宮詩一騎紅塵妃子應是殿前高力士唐書宦官

笑無人知是荔支來

潘州人潘最將風味念家鄉

紅雲宴罷有降王

十國春秋南漢後主本紀大寶三年帝命荔支熟時設紅雲宴

以樂後宮歲以為常宋史劉鋹傳太宗將討晉陽召近臣宴鋹預之言朝廷威靈四方僭竊之主今日盡在座中旦夕劉繼元又至臣率先來朝願執挺為諸降王長太宗大笑馬上珠鞍

八大梁

燔燕之餘尚存美珠四十六甕嘗以珠結

鞍勒為戲龍之狀極其精妙以獻宋主謂左此果

竟難降得去白應也號小南強

十國春秋南漢中宗本紀乾和十四

年周遣使來聘帝欲盛誇嶺南之強館接者遣使者以茉莉文其名曰小南強蓋譏之也宋時後主入汴諸臣不識牡丹有朝臣謂之曰此名大北勝蓋報之也

不妨長作嶺南人

蘇詩日吹荔支三百儋耳椰冠

竟欲真

太平寰宇記儋州居南海之中漢置儋耳郡以其人饑離其耳為名蘇詩在儋州有

椰子冠詩云更

南食昌黎歸去早

韓昌黎集有初將空殼付冠師南食貽元十八

協律一首案韓此詩但言椒橙魚蛤之屬未及荔支唐書韓愈傳元和十四年貶潮州即于是年移

袁州刺史

未曾買夏復探春

蘇詩惠州新年五首探春先揀樹買夏欲論園

端倪養出本天然

明史陳獻章傳陳獻章字公甫新會人獻章之學以靜養為主

其教學者但令端坐澄心于靜中養出端倪

顆顆明珠露下圓靜裏工

夫誰領得江門真有荔支仙

廣州府志江門海在新會縣城東北十五

里案白沙講學于江門世人稱為江門之學白沙嘗就荔支樹吸其露作詩云我是荔支仙

不須誇署尙書銜懷核歸來味共參

廣東通志今

書懷者乃明湛若水從楓亭懷核歸種于西樵

此是白沙真種子

明史方孝孺傳

帝發北平僧道衍以孝孺爲囑曰城下之日彼甘
必不降幸勿殺之殺孝孺天下讀書種子絕矣甘

泉浸得水枝甘

廣東通志湛若水字元明增城人
一時學者稱爲甘泉先生甘泉乃

白沙弟子粵中凡近水之
荔支名水枝近山名山枝

賦得喜雨課兒擬作

得雨如何喜民心造物知疾雷消亢氣雌霓展愁
眉慰切誠求後情酬仰望時欣欣方被澤勃勃已
忘飢治粵憂歸我名亭力在誰還因

天子德優渥遍蠻夷

夜宿清遠峽曉登峽山飛來寺

嶺水願南歸曲江故相曲將與海通波又受峽山

東新秋浪瀾瀾清遠碧如玉古寺何飛來高出二
禺麓歸猿夜半啼老樹終年綠欲登阮隄逕截取
伶簫竹更陟雲臺峰披雲望晴旭頗覺此處山必
宜著我足

北禺有阮隄逕多竹舊志有羅隱書此
雲臺二篆字今不存余補書立石

此

山閱世人今古若飛速人自去來耳山寺無往復

英德道中

殘暑難消白露中蒲帆猶白趁南風孤城古塔三
叉水遠雨斜陽半截虹生翠石看羣玉染泥金霞
愛暮天烘篷窗盡日間如此翻可行程著靜功

度梅嶺

郵程猶畏暑乘夜度梅關雲氣更成嶺星光能照
山事停心少靜途遠力愁孱試向梅花語開時待
我還

東林道中詠肩輿瓶中桂花

洪都穠桂綻新黃折向肩輿石路長何異桂林三
百里行人步步得秋香

籃輿未肯畱蓮社五柳先生自有家若是桂香應
小住料因不愛白蓮花

過淝水

禹貢東陵卽爾雅之東陵阡此大陵在大

江之北不應迷失蓋東陵卽廣陵自合肥
水由巢湖入江合肥地勢平衍至滁州清
流關江浦近江爲陵之中江都東及泰州
爲委長數百里此陵不與安慶桐潛相連
爲有淝水界之甚分明也禹貢曰至于東
陵東迤又曰東爲北江入于海然則大江
向東北流將入海之處最長大之陵非此
山而何此山非東陵而何古稱南北曰輪
東西曰廣廣陵稱廣正因東西甚長至于
東陵東字則對四方之陵而言也

禹貢東陵爾雅收清流關直到揚州請看淝北淮南
南路此是東陵西起頭

鳳陽漲阻夜泊

洪流下商亳浩瀚失平楚野岬不知名危檣泊何
所瑟瑟淮南秋瀟瀟夜深雨我亦感江湖鐙前意
千縷那堪鴻雁聲嗷嗷又遭渚

宿趙北口

紫極星垣近望中七千里路暢西風得看兩次團
圓月才自南雄到北雄

正大光明殿

萬壽宴蒙

恩親賜杯酒恭紀一首

萬壽稱觥金殿開

至尊手賜赤松醅
膝行

前席依龍衮首戴

深恩仰玉杯
旣醉福年真樂只
載歌颺拜亦康哉
敬將

慈惠疆臣意渥灑

仁膏到越臺

渡淮有懷河北諸公

九月黃流楚岫低迴波又見下青齊馬蹄去處皆
秋水鴻爪回時已雪泥歸夢快醒湖墅上停雲愁
在沁園西春深聽奏覃懷績好使桃花漲舊隄

偕仲嘉宿雷塘庵樓

空山雨雪獨立時何人至此方能悟情迴意迴得
返真世俗那得知其故松楸多風草多霜暫來灑
涕棲雷塘墓門夜霧月少光庵樓翦鐙寒對床宦
遊光陰最飄忽支枕阡岡能幾月村屋荒雞叫明
發弟入江城兄往粵此間雪逕寂無人豈換初心
對華髮

結蘇亭于木蘭院竹南古銀杏北

修竹圍若屏古樹高如塔木蘭北院中綠陰翕然
合孤亭一笠新茶竈復繩榻風欄終日間吾不如
老衲舉以屬坡公相呼可相答

選樓蠟梅

六載游踪未到家春時每憶選樓花今年得在樓
前過黃蠟梅開鬢也華

偕張菱塘

維楨

步過渡春橋小憩倚虹園

幾年不到平山下今日重來太寂寥回憶

翠華清淚落永懷詩社舊人彫樓臺荒廢難畱客

花木飄零不禁樵剝有倚虹園一角與君同過渡
春橋

風雪夜行縱陽江

荒江走頽波昏月弄寒色飛雲帶雪來長風起東

北我舟逆流去超越殊有力遙夜速水程

行十二時
四百

餘里六晝夜自帆索敢斜勒喧聲警澎湃蓬窗月

揚州至滕王閣復黑危坐待晨光長燭幾回刻

舟中望廬山

殘夜滄江雪匡廬頂上明曉來青嶂外疑是白雲
生全弃虎溪迹多涵鹿洞情此中吾道在難與淺

人評

由南康入蠡澤

兩年詩卷住南州未向彭湖鼓楫遊
今看匡廬得真面竟推左蠡作遨頭
沙光明淨居陽鳥雪力清強促夜舟
欲向涪翁問詩派橫流可要挽江牛

宗舫

予舊造紅船取宗慤長風之義名曰宗舫
爲金山上下濟渡救生諸用三面使風最
爲穩速十數年來勑使遠行竟往來湖北
江西諸地而江西蕪湖等處亦仿造之爲

救生之用所救皆多近年宗舫之外又增
三舟予名其一曰滄江虹一曰木蘭身梅
叔名其一曰曲江舫已卯冬予由揚州乘
此七日卽至滕王閣下曾奏言此行之速
而上下江長官趨公亦間有乘此始能速
達者換舟赴嶺畱題二詩

金山飛棹本名紅我遣來回楚越中帆脚遠行須
把定莫教孟浪願長風

滿江晴雪幾舟紅頗似唐人舊畫中

予曾見唐人雪霽江行圖

卷絹長不過二三尺而舟長幾盈一尺所著色界畫帆櫓積雪豪髮皆備惟于長江霽雪遠景則畧

之此唐人古拙舊法與宋元人畫意不同楊子橋頭萬里浪滕王閣下一帆風

梅嶺張文獻公祠看梅花

嶺南古梅祠下到此已如到家欲問曲江風度料應卽似梅花

度梅嶺用前韻

古梅開驛嶺芳訊動江關寒減虔州水香先庾浦山落帆猶戀卧登嶠竟忘孱細雨濃花裏人從天際還

庚辰

望遠鏡中望月歌

天球地球同一圓風剛氣緊成盤旋陰冰陽火割
向背惟仗日輪相近天別有一球名曰月影借日
光作盈闕廣寒王免盡空談搔首問天此何物吾
思此亦地球耳暗者爲山明者水舟楫應行大海
中人民也在千山裏晝夜當分十五日我見月食
彼日食若從月裏望地球也成明月金波色鄒衍
善談且勿空吾有五尺窺天筒能見月光深淺白
能見日光不射紅見月不似尋常小平處如波高
處島許多泡影生魄邊大珠小珠光皎皎月中人

性當清靈也看恒星同五星也有疇人好子弟抽
鏡窺吾明月形相窺彼此不相見同是團圓光一
片彼中鏡子若更精吳剛竟可窺吾面吾與吳剛
隔兩洲海波盡處誰能舟羲和敲日照雙月分出
大小玻璃球吾從四十萬里外多加明月三分秋

地球大千月球四倍地
月相距四十八萬餘里

鸞羽歌

神鸞之品亞鳳皇和鈴振響何鎗鎗前年曾說到

衡嶽鑾音一串疑歸昌

前年衡州有大鳥飛鳴羣
鳥隨之音如馬頸串鈴當

是鸞也

奇文異彩那得見片羽不得畱清湘今來嶺

表控桂海仙翎頗出暹羅航焦明振振搏如帚不
入翡翠千金裝翅修三尺尾五尺更比孔雀金花
長連錢珠眼二十四驂青舞繡開吉光其圓眼雖不及孔雀
之金翠但一羽有二十四五眼次第相連古人秉翟尙渥赭況此肅肅
威儀翔一揮筆凡俗塵遠宛然長麗飛女牀

端州北巖綠硯石歌

綠石巖在高要七星巖北在羚羊峽西北
數十里粵人以綠石爲不鏤墨然余所鑿
之研殊膩而發墨王安石詩云鳳池新樣
世爭傳況以蠻溪綠石鐫是北宋已有綠

端石矣宋人皆稱端溪爲蠻溪故梅堯臣
端溪圓硯詩云案頭蠻溪硯其狀若圓璧
端溪北巖藏硯璞苔滿烟生暖如玉何人剖玉出
山來更比端州江水綠春波綠淨唾不可山石綠
肥有雲裏清風吹落筆牀邊還是沈沈雲一朵窓
前蕉葉接梧桐可憐顏色絕相同李賀休歌踏天
紫南唐漫品細絲紅結鄰稍遠靈羊峽墨池裝入
香檀匣怕傳新樣出蠻溪豈有荆公可爲法

桂林陳相國元孫繼昌中庚辰狀元且爲解
會三元廣西蓮盦方伯有詩紀盛和韻一首

文運原因天運開一枝真自桂林來

盛朝得士三元瑞賢相傳家五世才史奏慶雲台

名字

時方伯與狀元同名狀元鄉榜本名守壑因夢改今名

人占佳氣說樓

臺

廣西貢院前大樓久傾以建為祥已若從師友

論魁鼎門下門生已六回

近科狀元吳中洪瑩蔣立鏞吳其濬陳沆及陳

繼

昌皆余門生

門下之門生也

粵西平樂峽中

雨餘秋乍新灘江瀨鳴急殘雲卧半山松際一何

濕清猥弄飛泉兩巖夾水立襲人山氣涼空翠入

呼吸

新秋夜行陽朔灘水上

千峰如九華直立皆千尺向暮森青尖入夜湛深
碧一水相與滌淺漱峰根石餘波拭玻璃淨照天
影白此時秋已新涼蟾半生魄王宇淡雲流榆花
何厯厯斜看露脚飛夜氣濕將滴幽草生暗香蟲
喧破山寂何期來此間清景得今夕停却扇與鐙
野風透絺綌

庚辰嶺南除夕

龍鼎忽已升舉世慟一棄臣官幾何年兩遇此
大事峩峩

觀德殿道路昔猶記深林閱寒雲仿佛入夢寐

先皇廿五載

功德滿天地我

朝五元年皆有兵事議

順治十八年有鄭成功等海寇事康熙六十一年有

烏魯木齊西藏等事雍正十三年有貴州苗疆事乾隆六十年有湖南苗疆事惟今歲庚

辰四海靜車騎若非

德力全安得臻郅治

文武紹

前徽明白付神器繼

聖又有

聖

大仁復

大智在昔姬周時世德隆于四不聞成康後重光
永昌熾臣昔在翰林叨以詞筆侍豈期斗筭才久
受節鉞寄今夕是何時閉門散羣吏急景摧人心
縱橫抹涕泗黯然寒燭前殘夜最初志

辛巳

西齋待月

南海月尤近虛齋先得明花香才淡池樹影忽從
橫小徑三回折閒階一丈平此時聊自憩涼意在

桃笙

壬午

過合肥見陸廣文

繼輅

出示文集談杭州舊

遊

廿載才名博此官省君清興甚相安著書絕勝芙

蓉鏡却病無過苜蓿盤舊日池亭如古蹟故人詩

卷得新刊

嘉慶初定香亭舊友如張子白張農聞江補僧林庚泉蔣蔣山詩皆刻入詩徵

并系小序

勞勞似我君休問試將霜髭付與看

壬午述職歸過珠湖草堂

晝車畏炎暍夜騎雷雨滑脫然舟入湖如魚縱活

潑落帆到草堂烟波接雲濶結亭黃鳥隅

新結草亭一笠

于隅上可坐而望遠

避暑坐清樾平日懷鄉人今朝此暫歇

惜未待夕霏行沙弄明月

及門陳雲伯

文述

爲江都令尹邀遊焦山作

詩卽和雲伯韻時同遊者王柳邨僧借庵令

尹之子裴之柳邨之子屋余弟亨

得暇訪雙鼎雲帆一片橫

余壬戌秋送漢鼎至焦山詩云他時得暇或相

訪雲帆一片橫金焦

好山成舊約勝侶會高情僧老詩仍健

江深暑亦清何當邀外史選石共題名

西南風阻畱佳采石磯太白樓

南風連日阻江船
太白樓邊水接天
且借詩仙樓檻下
橫鋪一榻納涼眠

謝宅青山近可攀
朝朝嵐翠入樓間
飄然詩思生花筆
一朵蓮花青敵山

樓前夜夜月輪新
不見扁舟捉月人
若把古人較今月
謫仙應是月前身

東風偶轉晚涼生
急掛長帆趁月明
月下看山青更好
可能不憶謝宣城

大姑山阻風看月

南風吹山北船橫
紅船逆流也不行
紅船非上水正頂風皆可

行是日乃上水正南風

偶然驟雨洗湖熱月出蠡東還夜晴

大姑山南水萬頃放船一望何其平月與水平我
平月金波玉浪搖光精須臾轉出碧山頂冰輪碾
塔如有聲星漢西流過篷背斜飛露脚涼晶晶秋
風秋色渺何所夏氣不退誰能爭漁船鐙火客船
笛夜來且識江湖情陰懷俗拙望不飲余不能酒半杯卽以
爲苦但著水枕睡便清廬山夢高月將墮仿佛芙蓉
開王京

落日放船好

阻風大孤塘兩日每至日落便放船出湖

乘涼待月

落日放船好彭湖百里寬山如螺子黛浸入水晶
盤綰羽不須問蓬窓撤盡看還當就明月涼洗浪
漫漫

大暑節坐滄江虹紅船由江都直達洪都江
湖夏濶月明如晝或阻風太白樓下晝看青
山夜卧皓月或乘風馬當山外夜濤湧澎湃俄
頃百里紀以一律寫畱船中

可是江天夜夜虹綠帆

紅船皆油
綠布帆

一路月明中開

窓遠接滄浪水捩柁初迴舶舫風銀漢微明低入

海匡廬深碧上連空米家書畫尋常事莫與雷家
劍氣同

香稻米飯

家鄉香飯一盂多半耐咀嘗半耐哦似到水田聞
露氣稻花開處有殘荷

大榕

秋暑午猶烈帆影何彤彤牽船泝蘋水篷低暍難
容安能有美樾使我船可艤前川忽東轉臨水多
大榕盤根岼洒洒翳蒼波溶溶藏舟入榕底愛此
涼陰濃交柯復接葉老綠疊幾重漁人與舟子榕

下間相逢何時解纜去且待上下春前江有新月
相約采芙蓉

贛南南康縣有芙蓉江

述職後謁

昌陵回粵七月度梅嶺再疊梅嶺舊韻一首

春渡滇江水秋旋庾嶺關

新恩容桂海沉慟哭

橋山

君聖初行健

臣


衰不敢孱

朝廷有聲教仍秉

德威還

余撫浙江江西皆會修建鄉闈號舍今督粵
粵闈號舍七千六百餘間更湫隘皆改建寬
大之秋兼撫印監臨鄉試書誌一律


廣廈何曾有萬間聊開矮屋庇孤寒節交白露天
猶暑氣吐青雲地忽寬爽塏竟饒遷舍樂風簷頗
似在家安他年多士兒孫住可識從前坐臥難



THE UNIVERSITY OF CHICAGO PRESS

1911

100



學經室集

一六

一、**政治**
 二、**經濟**
 三、**文化**
 四、**教育**
 五、**社會**
 六、**法律**
 七、**宗教**
 八、**藝術**
 九、**科學**
 十、**體育**
 十一、**衛生**
 十二、**交通**
 十三、**農業**
 十四、**工業**
 十五、**商業**
 十六、**金融**
 十七、**稅收**
 十八、**財政**
 十九、**外交**
 二十、**國防**
 二十一、**內政**
 二十二、**司法**
 二十三、**行政**
 二十四、**立法**
 二十五、**司法**
 二十六、**行政**
 二十七、**立法**
 二十八、**司法**
 二十九、**行政**
 三十、**立法**
 三十一、**司法**
 三十二、**行政**
 三十三、**立法**
 三十四、**司法**
 三十五、**行政**
 三十六、**立法**
 三十七、**司法**
 三十八、**行政**
 三十九、**立法**
 四十、**司法**
 四十一、**行政**
 四十二、**立法**
 四十三、**司法**
 四十四、**行政**
 四十五、**立法**
 四十六、**司法**
 四十七、**行政**
 四十八、**立法**
 四十九、**司法**
 五十、**行政**
 五十一、**立法**
 五十二、**司法**
 五十三、**行政**
 五十四、**立法**
 五十五、**司法**
 五十六、**行政**
 五十七、**立法**
 五十八、**司法**
 五十九、**行政**
 六十、**立法**
 六十一、**司法**
 六十二、**行政**
 六十三、**立法**
 六十四、**司法**
 六十五、**行政**
 六十六、**立法**
 六十七、**司法**
 六十八、**行政**
 六十九、**立法**
 七十、**司法**
 七十一、**行政**
 七十二、**立法**
 七十三、**司法**
 七十四、**行政**
 七十五、**立法**
 七十六、**司法**
 七十七、**行政**
 七十八、**立法**
 七十九、**司法**
 八十、**行政**
 八十一、**立法**
 八十二、**司法**
 八十三、**行政**
 八十四、**立法**
 八十五、**司法**
 八十六、**行政**
 八十七、**立法**
 八十八、**司法**
 八十九、**行政**
 九十、**立法**
 九十一、**司法**
 九十二、**行政**
 九十三、**立法**
 九十四、**司法**
 九十五、**行政**
 九十六、**立法**
 九十七、**司法**
 九十八、**行政**
 九十九、**立法**
 一百、**司法**

42
149
J8
Y46
v.16

學經室續集目錄

卷一

堯典四時東作南僞西成朔易解

釋閏

明堂圖說


孝經郊祀宗祀說

宗禮餘說

大雅文王詩解

咸秩無文解

釋佞



釋來

左傳引康誥解

釋訓下篇

釋敬

雲南黑水圖解

中庸說

卷二

二集

黃河海口日遠運口日高圖說

陝州以東河流合勾股弭說

擬儒林傳稿凡例

集傳錄存

重建肇慶總督行臺并續題名碑記

英清峽鑿路造橋記

例贈儒林郎候選州同知蘭汀林公墓表

平樂府重建

至聖廟碑記

南昌府同知璧堂徐君傳

高郵孝臣李君傳

碧雞臺記

卷三

三集

荀子引道經解

塔性說

復性辨

書東莞陳氏學部通辯後

學部通辯序

文韻說

學海堂策問

四書文話序

摹刻詒晉齋華山碑全字跋

兩浙金石志序

宋揭醴泉銘殘字跋

與學海堂吳學博

蘭修

書

虞山張氏詒經堂記

金子青

學蓮

詩集序

卷四

四集

謝

賜御筆福字壽字鹿肉摺子

祭

南海神廟文

節性齋銘

蘇文忠公象贊

陸宣公從祀廟廡頌

學海堂集序

謝

御賜福字壽字并奶餅乾果摺

謝

賜紫禁城騎馬摺

以上癸未至庚寅八年文筆仍以經史子集分爲四卷以後再各續于每卷之後篇頁積多再分爲中下卷詩則接四卷之後列爲五六七八

九卷庚寅冬刻于滇南分給家塾子弟男常生

祐謹記

三石渠寶笈續編目錄

擘經室續一集

堯典四時東作南僞西成朔易解

堯典宅嵎夷曰暘谷寅賓出日平秩東作宅南交平

秩南訛

鄭康成本作僞

敬致宅西曰昧谷寅饗納日平秩西

成宅朔方曰幽都平在朔易按此經文春十四字夏

九字秋十三字冬十字有互文見義者有變文見義

者有省文者不必定相齊比經文於夏秋著宅南宅

西之字春冬不言宅東宅北秋則西字兩見春則東

字一見夏則南字兩見冬無北字而兩著朔字夏言

交言致冬言朔言易三時皆言平秩而冬獨言平在

元謂在朔易三字主合朔而卽包日食言也東作南
爲西成皆言測日纏發歛主中氣而言也作爲也僞
同爲作爲皆造也言造厯法也成者言作爲旣成也
今尚書作南訛乃東晉人所改漢尚書作南爲或作
南僞僞與爲同故漢書王莽傳作南僞史記索隱本
作南爲今本史記作南譌者後人因晉本作訛而遷
就改之也南僞者創爲此厯法於南方也錢辛楣宮
詹云荀子曰人之性惡其善者僞也又曰不可學不
可事而在天者謂之性可學而能可事而成之在人
者謂之僞是僞卽爲字也元謂此姑勿論荀子言性
之是非但以僞字而論是僞卽爾雅作造爲也之爲
而非詐僞之僞譌誤之譌明矣周禮馮相氏鄭注平
秩南譌宋本作南僞此尤漢時作僞之據也蓋說文
爲訓母猴象形初義也後人卽假借爲作造之僞而
或加个旁成僞字此第二義也又訓爲詐僞之僞此
第三義也後人祇知僞爲詐僞之僞而不知其本是
作爲之爲故不得不妄改僞字爲譌爲訛矣說文有

諺字訛乃平秩者謂日纏分節氣而次第出于東次

俗造也弟交于南次第入于西羲和設儀器測量逐日刻記

辨艸之也辨艸之義見于史記爾雅說文矣平辨也見史記

又見爾雅秩本作艸次第也說文豐部艸爵之次第

也虞書曰平艸東作據此知尚書古文艸與秩同有

次第之義大戴記孔子言麻有順逆順逆即南北朝

言盈縮之法亦即今西洋言高卑之法二分二至漸

為次第第一月有一月之盈縮次第一節有一節之高

卑次第第一日有一日之交易次第所以曰辨秩也辨

秩之法最古矣又案平秩史記作便程蓋秩之失聲

與程之呈聲近也詩柏舟日居月諸胡迭而微迭韓

詩作載載字不見于說文王篇說文祇有載字韓詩

當是載字也說文大部之載與秩迭程聲相近故詩

巧言秩秩大猷說文作戴戴大猷也詩胡迭而微亦

言次第更相食也微者日月食之名故詩十月之交

日彼月而微此日而微微謂光隱匿國語越語日月

微者注謂微者虧損薄食是其義也據此秩迭程載

平經室讀集卷一

二

一集

相通之音義知東作西成南爲亦復兼測日月之食不但朔易之專主測合朔日月食矣非謂春

耕秋穫也如東作西成南僞但言農事則覘星務農

愚夫婦人皆能之何用羲和遠出乎農事別有稷官

豈羲和之職乎亦豈羲仲但教春耕而不觀秋穫和

仲但司秋穫而不課春耕乎且朔之極北不生五穀

所謂朔易者又何農穫可蓋藏乎

漢書王莽傳以東作南僞西成等事

爲農事趙岐注孟子齊東野人引書東作爲農事是

農事之文始于王莽非始晉孔傳又案尚書大傳雖

列堯典之東西南北然但言其方位而已未嘗言作

成二字是農事也朔易二字伏傳史記皆作伏物物

乃朔字物物象相近之訛伏當如五星何以明平在

伏逆參則伏之伏伏朔者月伏于朔也

朔易之爲主合朔言日食也朔者月死盡而未初生

與日但同經度相並而不同緯度則為合朔若同經

度而又同緯度日月人目三者相直則必日食日為

月食以臣迂君之象並莫甚焉並本逆字後世逆字

逆迂也此朔字造字从並之初意若解字當云朔从

遇也逆食日之日也許氏說月一日始蘇此後義也月至

三日始生明若朔日同在緯度即使子時合朔亥時

亦祇相離十二度斷不能蘇生明也又案古人既造

从並从月之朔字即造从亡月王之王之望字專言日與

月相對望也望者月亡即言月食也日為地隔月不

得光有亡象焉月食未有不望者且望从王凡王

廷皆有對直之義故爾雅曰頤庭直也此與朔義相

並至於人之望人乃因日月相望之初義而生為第

二義望望二字皆可假借為用不必定分望字為人

之望人曲取出亡在外望其還之義說文所解非初

義也蓋唐虞以前造麻時本有定期朔定氣原非平朔

平氣因日月食定在初一月半而特造朔望二字即

以爲初一月半之定名夏商後義和失職食不定在朔望故周漢之間解字者不敢以食義專屬于朔望而別生始蘇出亡之義矣且後世厯法不密以致前後失朔尚造朏朒兩字古人于日有食之不宜有有字尚从月得義又何疑于朔望之不專造兩字爲日月食之初義哉但言察朔于北而不言察望于南者朔定而望亦定也蓋合朔時刻雖不定何方而堯命和叔專

司合朔者則在北方故書曰宅朔方爾雅曰朔北方也北固以朔名其方者也經不曰北易而曰朔易明

是特著此字從日月起義而以四方爲後起之義也

朔之曰易亦以日月相易起義也

說文引秘書說日月爲易似卽古尚

書說專指朔易之易非周易之易人日在下日在月上見其交易也故日月相並爲明月在日下爲易

日月食非朔望不定朔望亦非日月食不定東西南

北里差時差交會高下亦非日月食不能同定於一
日之間故唐一行曰日月合度謂之朔無所取之取
之蝕也此三言直接堯舜以上厯法蓋非蝕卽非朔
不朔卽不蝕因蝕造字因蝕定名倉頡之學與羲和
同也春秋日食不在朔無論矣自漢至隋二百九十
三食而非朔者八十三唐五代一百一十食而
非朔者三自一行以後始有定準蓋倉頡之時日食
必朔定朔定氣其法本密故用日月食之義特造朔
望二字設堯舜時日食不能定于朔堯舜豈不對此
朔望二字而有愧哉蓋夏以後羲和失職至漢皆踈
隋唐至宋元又漸密以至不曰平秩曰平在者爾雅
于今最密如堯舜之時

曰在察也此在卽在璿璣玉衡之在義比平秩尤專
重也是此四段共四十六字皆言天象實測造厯之

法亦即用日月食四方一齊辯驗之法

交食之驗有食分深淺有

加時早晚有起復方位此非四方極遠設官同時並測不能相較而準驗

萬世天算皆始

於此也

唐開元元至元我

朝康熙皆分地實測之

不及於此

東南西由日纏發斂辯秩之而得中氣之盈由

中氣以按朔數而作之爲之成之也朔則由合朔之

數辯在之而得朔數之虛以按中氣且得日月食相

交易之數也故下文即并四方測算既定者而命之

曰汝羲暨和朞三百有六旬有六日以閏月定四時

成歲也

釋此句則知堯時本是定朔定氣以無中氣之月置閏非如春秋時歸餘于終及秦漢皆

用平朔平氣否則朔字望字何敢必以日月食之義造之閏月所置何以不曰定歲終而曰定四時也是

故堯時有定朔定氣原難臆知而由造朔望二字周
及以閏月定四時句繹之則古密周疎斷斷然也周
禮馮相氏掌十二月十二辰二十八星辯其序事以
會天位鄭康成引尚書東作南僞西成朔易以爲序
事會位之注此鄭氏書注未以東作南僞西成朔易
屬農事也何也馮相氏所序之事斷非農事是元說
似與鄭氏意合也保章氏掌日月之變動卽日月食
也所與尚書不同者厯法在周爲因故不過辯其序
事志其變動而已若羲和則是創造厯法之祖故曰
作爲成朔也嵎夷暘谷昧谷函都自是地名南交則
其初本非地名所謂南交者亦以夏之日行交出於

赤道之極北二十三度半確爲中國極南致止之處

因此起名義也

交趾北極出地十八度夏至日午表無北影趾同止同趾其始雖

非以地名起義然後人因此卽定爲地名交趾日南

交州皆沿其義而名之也蓋曰夏至之日交極北止

於此南地也猶朔字但因上古專司日月合朔在北

而虞夏時卽名北爲朔方也

禹貢曰朔南暨

黃赤二道隨節

氣以成交距月與日會皆有交道

日月食由于有二交

而今特

著南交者蓋專言夏至日永之黃赤道交以定極南

致止之位也平秩南爲者言辨次南方之日纏及日

月之交而造麻法也敬致者卽周禮冬夏致日孟子

可坐而致之致此言測夏至之日表景至短北來止
此也冬則與此相反而相比可省文矣虞夏書備言
置閏渾天

即璿璣

七政中星諸法不應于定朔日食之

法竟不一言及之不知古聖人以日月食爲災異恐
懼修省然其食也本有一定之纏度雖有一定之纏
度而天象示變之時亦適與人事相應聖人知之而
不詳言之惟包其事于秩在之中而以朔易二字寓
其法故唐虞羲和之道于後世之法無所不包若天
算不密食不在朔而以爲異或知食有一定而不懼
天象之變皆非也詩曰十月之交

此交亦言日月交距

朔日辛

卯曰有食之

日有食之四字自是唐虞以前恒語有字从月說文曰日有食之不宜有也此

自是唐虞以來相傳之故訓不然堯典內有字何以造从月哉造字之後直至周詩始見日有食之之句而孔子春秋內凡日有食之皆用古法書之也不第此也凡造字皆有初義其字見于何代則其義即起于此代之前朔望有二字固顯然義起于唐虞之前矣又如暨字亦見于虞夏書矣說文曰暨日頗見也既小食也然則此暨字从既亦專爲日食而造言日爲月食偏見不全也从旦者即今卯時帶食半見也有字暨字皆日月食造字之初義也有鰥在下汝義暨和乃假借字用之也然則許叔重解朔望二字曷以曲爲始蘇廷臣之說耶曰周漢以日食爲變異漢時尤因此多所省諫故叔重反收朏朧二字與尚書五行傳合而不能言朔有定也又霸爲月霸霸與魄同月全魄乃晦漢書律厯志曰死魄朔也凡由晦而朔即爲改革之象霸从革得音且得義故易曰天地革而四時成周易六十卦獨以治厯明時屬之革者豈非以堯舜治厯定四時日月食皆以朔易月霸爲本歟易曰革已日乃孚竊謂已者改也改从已得

音得義革者改也此已日乃孚之已猶通借爲戊已之已故六二日已日乃革之而九四則直著之日有孚改命矣改命卽湯武革命也改从已更从丙革是改更皆一聲之轉故孟子曰日月之食及其更也是詩也可以明虞書交朔之義矣此解乃元多年蓄念未著于書甲申歲貼此經試學海堂多士無見及此者乙酉歲白露節雨足秋涼始筆之爲篇

釋閏

周禮太史閏月詔王居門終月禮記玉藻閏月則闔門左扉立於其中案此門皆明堂之門也虞夏以來之古禮也然此惟月朔行朔禮時暫居之暫立之以終一月之政事耳若竟謂常居之常立之以終一月

無論郊外明堂非王者常居之地卽城內路寢亦斷

無居門終月之事未可以辭害義也

卽居青陽左个總章右个等皆

謂暫居行朔禮也明堂分東西南北十二堂个當於何月後置閏王卽當以其方之門居之立之明堂之法與厯法相關也周禮惟言閏月王居門中而鄭氏不言十二月所居者已括于頒告朔一句之中鄭氏

注此曰於文

句

王在門謂之閏許氏說文收閏字於

王部曰餘分之月五歲再閏也告朔之禮天子居宗

廟

卽明堂

閏月居門中从王在門中周禮閏月王居門

中終月也案此許鄭之說皆是堯舜以前之古說元

著明堂論由周明堂月令溯至黃帝神農或疑明堂月令乃秦呂氏之說卽使周有此制而堯舜以前未

必卽有十二堂个之制非也禮逸篇王居明堂禮鄭氏康成以爲殷禮引之以注月令可見王居堂个門皆上古之制且管子尸子呂覽淮南子等書或不可据尚書虞書亦不可据乎虞書曰以閏月定四時閏字始見於此此明明是王居門中之字會意確無可疑若唐虞以前不以無中氣之月置閏又無明堂王居門中之制曷爲倉頡已造此王居門中之字乎故唐虞以前明堂堂个之制不可考而可据閏之一字以定之況虞書所謂賓于四門闢四門者舍明堂更以何門當之是故虞夏書內字字皆可考据卽一閏

字而古厯法明堂之制皆明矣

余著堯典東作南僞西成朔易考已言及

堯舜時本有定期朔定氣以無中氣之月置閏矣以此證之更合矣余著明堂論已言郊外明堂與城內路寢有別矣以此證之更合矣黃帝之時豈不知或主節氣或主月朔二者皆可以授民時乎黃帝堯舜則主十二月朔為歲以無中氣之月置閏成歲者彼時義仲義叔和仲三家必有建議欲以節氣為歲不主朔閏者堯則考古法而合氣與朔以定之又合義和四家之法而斷之曉諭之以為但主辨秩節氣為歲不置閏不便于授民時也必須主平在朔易以閏月定四時成歲朔定于月閏定于朔始明白使民共見也今時大小西洋法皆主節氣為歲而不置閏月唐時九執厯已如此今廣東澳門夷人皆以冬至第七日為元旦行賀禮昔宣城梅氏謂和仲宅西之法疇人子弟流入西夷直其然矣

明堂圖說

明堂異名同實及上古中古之分元于已未歲以前

已著論明之矣歲庚寅學海堂經解刻成復取近代諸家之說而驗其圖皆未能確也依月令當有八個而考工記惟有五室斷不相合戴氏乃除太室而以四室置之外四隅卽名之爲个而其互之謂明堂之左个卽青陽之右个總章之右个卽季室之左个其說過巧竊有未安且卽如其說而四隅丈尺猶于經文有不能相合之處元乃別爲圖移四室于堂背四隅重屋之下而以四堂之後八角接之如此則與經文丈尺合室爲室个爲个不相假借且于上圓下方重屋之制亦合卽匠人据此築基構木而造之亦必

能成之非紙上空談也爰更分析爲十說并圖以明之

考工記曰周人明堂度九尺之筵東西九筵南北

七筵堂崇一筵五室凡室二筵此經文明白可据

當從此以起度數東西九筵者八丈一尺也

周尺約當

今尺六寸強八丈一尺六寸南北七筵者六丈三尺

折算當今四丈八尺六寸

也

當今尺三丈七尺八寸

此明堂南一堂之丈尺經不言東

西北三堂者丈尺相同舉南可概三方也城內廟

寢亦襲此名曰明堂然惟向南一面耳而郊外明

堂則四面四堂若云五室全在此南面一堂九七

筵之中而無三堂則行諸大禮斷不能容斷無是事也南堂定而三堂亦定矣舉一反三也

今定爲收四室于堂背四隅重屋之下而以四堂之後八角相接之何所据乎此於經文無顯据惟使堂成爲堂廟成爲廟个成爲个室成爲室在四方則可成王居之禮在中央則可成裸禋之禮亦可成重屋之制耳

五室主五行似當置室于堂之正中然正中則爲太廟四太廟之後共以中央太室爲室而四隅四室鄭氏注謂木室東北火室東南金室西南水室西北者古說如此故西堂名總章赤與白謂之章白金與赤火合不與水合故金室在西南餘室類此

鐘鼎文每有作此形者古鐘鼎銘每曰王格太室此形卽四堂背五室之形也

每室四戶兩夾窗乃考工記世室四旁兩夾窗白
盛之文成伯璵禮記外傳衍之爲每室四達一室
八窗之說大戴衍爲九室三十六戶七十二牖之
說卽東京賦之八達九房之說此蓋因漢明堂而
誤五室爲九室與考工不合也孔氏

廣森

禮學卮

言讀考工世室四旁兩夾爲句窗白盛爲句此爲
特識四旁者四堂之旁也兩夾者左右个也此个
與五室不相涉也元更謂窗者凡四面不明之處
皆加窗至于當用幾十窗不能臆斷白盛者盛義
如城如防此言四面皆用牆如城如防而白之且

多用窗也釋名曰城者盛也爾雅曰山如防者盛是其義也

五室之制奈何按四方之堂寬皆九筵此四堂之背四角相接是明堂之北距乎堂之南青陽之西距總章之東皆九筵也以此方九筵之地爲太室及四室每室止用二筵丈尺恰可相容凡言室者皆廟屋內劃出之名非建五小屋于露處之地可名爲室也然則奈何曰此五室皆當在重屋圓蓋之下若于太室四角立四大柱或再倚四堂之背木室之西之南火室之西之北金室之東之北水

室之東之南立八大柱如圖中○者卽柱礎處楚辭天問淮南子皆有八柱之說則可上載圓屋并遮五室矣

重屋上圓下方之制奈何按重屋見于考工記上圓下方見于大戴記皆是古制此中央九筵之地假使立大柱出乎四堂背之上而加以圓蓋之屋則是上圓之重屋矣圓蓋須比九筵爲大乃不霑雨水于五室也九筵方徑當今尺四丈八尺六寸約須徑今尺六丈有餘之圓蓋方能蓋之至于圓屋之下方屋

卽四堂之背

之上必可虛之以吸日景而

納光也其每一方屋皆有四阿前阿水外霤後阿

水內霤

內流在堂背與室之間必有溝水出四角此最古最大之中霤

而圓蓋之

霤又流于四方堂屋之上也此乃大概爲說耳假

使匠人爲之即可合丈尺而成之

堂崇一筵加以堂之棟宇重屋

圓蓋之高約須通高今尺六丈有餘四堂縱橫方今尺二十丈四尺六寸

至于立柱立

牆梁棟楹庑戶窗諸制古匠不傳難臆撰然逸周

書之四阿復格重亢重卽內階旅楹隄唐山牆等

制甚詳知古時匠氏必有構造之法今雖不可考

但使今匠爲之必有暗合古法者何也大段不錯

小處不妨以意匠定之也

卽如逸周書有旅楹之制考五室重屋四堂八

个非多楹不能成之旅者衆也陳也衆楹陳列于四方內外也詩殷武旅楹有閑襲其名也又逸周書有隄唐山牆之制今定白盛爲牆者釋名城盛也爾雅山如防者盛注曰隄防檀弓鄭注曰防形旁殺平上而長是也明堂之牆如何築造經雖無明文然由此可知四堂之背周圍有牆四堂左右亦皆有牆如防如城特有窗戶四達通明通路耳明堂位達鄉鄉卽窗也唐與隋同廣雅釋宮曰隄隄防也逸周書有內階之制今考九階皆在四外若由堂入室平行則無階矣曷爲有內階也意明堂亦如覲禮壇制有三成也或者堂一成由太廟入至四室之地爲二成由四室之地入至太室爲三成是以公玉帶明堂圖內有昆侖之名爾雅曰三成爲昆侖邱是也逸周書有復格之制說文格木長貌復格者其五室重屋入柱四柱之長者兩層相復乎逸周書有重亢之制亢與抗同高舉抗拒也意爲重屋中有兩重橫木在各柱之間者高舉抗拒乎逸周書有重郎之制郎與廊同或堂與室有兩重廊乎又大戴禮盛德篇明堂又有蒿宮之名云周德蒿茂大以爲宮柱學者哂其誕是也

但蒿柱誠誕而蒿宮之名則有自來周禮載師以宅田土田賈田任近郊之地故書郊或爲蒿杜子春云蒿讀爲郊是蒿地卽郊地也曰蒿地者猶萊田也明堂曰蒿宮者猶之曰郊宮也宮宜在城內今在郊故曰郊宮郊宮卽蒿宮也乃求其解而不得造爲蒿可爲柱之說此皆秦時迂腐博士之所爲無怪拾遺記更衍爲十丈神蓬之說矣然若因此哂蒿宮二字之名亦誕則又非矣

程氏

瑤田

釋宮小記述中霤云古初有宮室時不

過爲腐然之物以覆于上當如車蓋或如今之蒙古包如無柄傘卽古棟宇之遺象古者明堂圓其上以法天上棟下宇之初殆亦圓其上者歟此說明堂上圓下方之象最合然則太室重屋者最古最大之中霤之制也

清廟者太室也若爲圓屋出于四堂之上則蓋茅輕穩禮

亦宜之四堂
用瓦爲宜矣

个之義奈何案个與介同古經子中每通用初學
記引月令个卽作介个介相同卽是一堂兩旁夾
室之義也考工記梓人爲侯侯有上兩個下兩個
亦皆具旁夾之形卽廟寢之東西廂東西夾也左
傳昭公四年使置饋于个而退是非明堂尚可襲
名稱个何況明堂乎

戴氏

震

曰四正之堂皆曰太廟四正之室共一太

室故曰太廟太室此說則甚合其圖之所以丈尺
不合者何也按其圖直以明堂之東西九筵分爲

三以其中爲明堂太廟以東爲明堂左个卽青陽
右个以西爲明堂右个卽總章左个四面皆如此
如此則與經文室二筵三字不合矣何也以明堂
三分之一當一室則明堂左室應寬三筵深七筵
無論與室二筵寬深之數顯然不合且是長方之
形若以明堂爲主則此室向南者寬三筵向西者
寬七筵若以青陽爲主則此室向東者寬三筵向
南者寬七筵何所適從乎且中央容太室之地丈
尺亦同不能定矣

汪氏

中

述學之圖謂明堂祇一面向南之堂無東

西北三面之堂以月令爲誕妄不經非也

閏月王居門中

見於周禮豈十二月反不著王所居禮逸篇有王居明堂禮之名此篇必在漢書志明堂陰陽三十

三篇之內今皆亡矣呂氏大戴所采古禮必本于此餘詳余釋閏篇中

若然者則無

論九筵七筵尚不抵今大府之大堂豈成鉅制試思九階當如何安置且其圖分九筵爲五而平列五堂以五室居五堂之後乃經文室二筵五室當有十筵室比堂多一筵斷不能合也

王平日所居聽政之路寢曰明堂者此地之制準郊外明堂四方之一襲其名也郊外明堂卽月令之明堂有四堂八个重屋五室非城內廟寢也洛

誥周公之明堂卽此制也近代汪氏中述學金氏

榜禮箋皆以覲禮後半段覲諸侯之地祇有門壇

無屋遂謂明堂屋爲妄非也洛邑周公之明堂非

壇乃屋也孝經宗祀明堂之宗从宀無論矣禮古文亦

加周書曰王入太室裸使無屋室王安所入覲禮

後段爲門爲壇祀方明者此乃王巡狩不定何地

盟會諸侯之覲禮也卽東巡岱宗之明堂亦必有屋若無屋而惟有壇齊王何

由欲毀之自古惟況考工記匠人所記之明堂確

聞明堂未聞明壇爲王都郊外之明堂未可以城內廟寢當之無論

逸周書明言明堂四阿左氏傳言清廟茅屋顯有

屋室皆在郊外不能指爲城內廟寢卽考工明言
明堂度九尺之筵室二筵矣復曰室中度以几堂
上度以筵宮中度以尋矣明此度几之室與度筵
之室不同几爲城中路寢之室筵爲郊外明堂之
室也儀禮覲禮自篇首至于饗禮乃歸此前段乃
諸侯覲天子于王都之正禮常禮也且歸則歸矣
曷又祀方明乎其後段自諸侯覲于天子爲宮壇
朝日祀方明以下別爲一事乃天子出巡方岳及
不定何地盟會諸侯之覲禮也是以祇立門壇全
無堂室成王盟岐陽置茅莝晉侯覲踐土作王宮

皆其事也

國語晉語曰成王盟諸侯於岐陽置茅

僖公二十八年盟于踐土朝于王所晉侯作王宮于踐土出入三觀此等觀禮當用觀禮後段門壇之禮後段之禮爲此等事而設也

方明之事惟有此等觀禮行之


朝日之後反祀方明義主盟誓有如此日月山川也否則堂堂王都巍巍明堂及至大祀之時祇憑四尺之方明木乎然則此門壇者茅蒹之意也又鄭氏觀禮注後段謂四時朝觀受之於廟此後段門壇謂時會殷同也此亦有誤城內之廟或一二國諸侯來觀則于此行前段之禮若時會殷同應在近郊者則于明堂行之卽周公明堂位之禮也

此禮無方明若會盟於遠地及巡方岳不定何地始用後段門壇方明之禮必非王在京城近郊之禮也

後段言拜日于東門外者此門乃壇之東門非京師之東門也

後段言拜日于東門外者此門乃壇之東門非京師之東門也

今定四面堂个廟室圖




今定上圓下方重屋圖




戴氏明堂舊圖

二十戶四十窗九階與世室同



汪氏明堂五室圖

凡室三筵



南北七筵

東西九筵

孝經郊祀宗祀說

孝經聖治章之大義有二端一則孔子以孝祀屬周公其人專謂洛邑不屬成王也一則宗祀之宗見于召誥洛誥多士也乃讀者忽之不察并清廟維清小毖亦不得其解矣蓋周初滅紂之後武王歸鎬夷齊既死殷士未服者多戰要囚之未能和睦無怨不獨武庚之叛也此時鎬京尚未以后稷配天以文王配上帝也各國諸侯亦未全往鎬京侯服于周故曰武王末受命也末無也況成王又幼有家難哉于是周公監東國之五年與召公相謀就洛營建新邑洪大

誥治用陟配天之殷禮祀天與上帝以后稷文王配
之后稷文王爲人心所服庶幾各諸侯及商子孫殷
士皆來和會爲臣助祭多遜始可定爲紹上帝受天
定命也若使武王成王在鎬郊祀宗祀而諸侯殷士
不全來臣服助祭卽不能定爲易姓受天命也但成
王此時不敢來洛基命定命于是三月召公先來洛
卜宅十餘日攻位卽成惟位而已各功工未成也三
月望後周公來達觀所營之位知殷民肯來攻位遂
及此時洪大誥治勤于見士卽用二牛于郊以后稷
配天且祭社矣召誥之用牲于郊卽孝經之郊祀配

天也于是始爲周基受天命矣計自二月至夏皆功
于新洛邑明堂各工然明堂功雖將成尚未及配天
基命之後行宗祀之禮于是周公倅告成王成王命
周公行宗禮洛誥之宗禮卽孝經宗祀文王于明堂
之禮也周公宗祀當在季秋幸而四海諸侯殷士皆
來助祭矣十二月各工各禮迄用有成上下無怨人
心大定爲周禎福而無後患成王始來洛邑相宅記
功宗之禮卽命以功宗作元祀矣成王於是時復冬
祭文王武王但二駢不祀上帝又入明堂太室裸王
賓亦咸格使人共見無疑仍卽歸鎬命周公後于洛

守其地保其民是成王但烝祭文武而未祀天于郊
祀上帝于明堂也此孔子所以舉配天專屬之周公
其人孔子若謂雖以武王滅商之大武未能受命臣
我多遜惟周公以孝祀文王配天始能定命臣我宗
多遜也此孝經至德要道上下無怨四海來祭之大
義也此義久蓄于心未筆於書因福補疏孝經于此
事引證繁複囿于舊說不徹經義是以說此教之至
于各經可推明此說者命福引證之

尚書洛誥曰四方迪亂未定于宗禮亦未克救公功
迪將其後

多方曰爾乃迪屢不靜我惟時其教告之我惟時其戰要囚之至于再至于三

洛誥曰亦識其有不享

福案此諸侯尚未盡服殷士民亦屢叛民未和睦上下有怨未行配天之禮之事也家大人曰王氏引之讀四方迪亂未定句于宗禮亦未克救句公功迪將其後句孫氏星衍尚書疏及之而經義述聞不存此條者自因說文引書亦未克救公功爲句未敢破之也但宗禮卽宗祀漢人未發此義故許讀師傳如此其實王讀是也此處第一未字指

四方亂定弟二未字指克救宗禮明是兩事故以亦字夾于其間公功迪將其後卽克救宗禮也漢讀未可墨守也若以公功屬上則於宗禮外又有公功似非經意矣

召誥曰惟太保先周公相宅越若來三月惟丙午朏越三日戊申太保朝至于洛卜宅厥既得卜則經營越三日庚戌太保乃以庶殷攻位于洛汭越五日甲寅位成

福案此召公先來成位庶殷肯來攻位伏生尚書大傳周公營洛以觀天下之心於是四方諸侯率

其羣黨各攻位於其庭周公曰示之以力役且猶至況導之以禮樂乎然後敢作禮樂卽其事也

召詔曰若翼日乙卯周公朝至于洛則達觀于新邑營越三日丁巳用牲于郊牛二越翼日戊午乃社于新邑牛一羊一豕一

詩思文曰思文后稷克配彼天

福案此乃周公來祭天以后稷配天之事也牛二天與后稷二牲也

洛誥曰王如弗敢及天基命定命予乃膺保大相東土其基作民明辟

福案此成王因諸侯殷士民反側未定初不敢來
洛之事也及天基命者乘此配天禮成之時基受
天命也定命者行宗禮定受天命也

洛誥曰今王卽命日記功宗以功作元祀惟命曰汝
受命篤弼丕視工載乃汝其悉自教工王若曰惇宗
將禮稱秩元祀

福案此成王命周公行宗祀之禮之事也曰功宗
曰惇宗將禮曰臣我宗多遜曰于宗禮亦未克收
凡此宗字皆明堂之宗祀也讀耆皆不察之功耆
明堂宗祀工之大耆詩肅肅謝功申伯之功耆言

大工也用衆急事曰攻庶民攻之攻位洛汭是也
工力盛大曰功謝功申功宗功作元祀是也

詩清廟曰濟濟多士秉文之德對越在天駿奔走在
廟

維清曰維清緝熙文王之典肇禋迄用有成維周之
禎

小毖曰予其懲而毖後患又曰未堪家多難

我將曰我將我享維羊維牛維天其右之儀式型文
王之典日靖四方伊嘏文王既右饗之

康誥曰周公初基作大邑于東國洛四方民大和會

侯甸男邦采衛百工播民和見士于周周公咸勤
多士曰比事臣我宗多遜王曰告爾殷多士今朕作
大邑于茲洛予惟四方罔攸賓亦惟爾多士攸服奔
走臣我多遜

召誥曰其作大邑其自時配皇天

詩大雅文王共七章五十六句

禮記明堂位全篇

福案此皆周公在洛明堂行宗禮諸侯殷士皆來
助祭以定天命卽孝經所謂四海之內各以其職
來祭也大約此時惟周公申明天之命文王之德

反覆以夏殷之事誥治之諸侯殷士始肯服之始
能成此大禮詩所謂肇禋迄用有成者卽克救宗
禮詞氣宛然可見也否則諸侯殷士叛服未定宗
祀幾乎不能有成周家更多難無禎矣釋詩書各
句情事可見故孔子切指周公其人再釋詩文王
七章則全是在鎬而追言作洛祭文王于明堂配
天之事其情更見矣清廟之多士卽尚書之多士
我將之將卽惇宗將禮之將肇禋卽肇稱殷禮初
基也清廟卽明堂維清卽清廟也多士曰臣我多
遜又曰臣我宗多遜明明多一宗字必非閒字孔

傳訓宗禮爲尊禮殊空也

君奭曰故殷禮陟配天多歷年所

洛誥曰王肇稱殷禮祀於新邑

福案此可見配天之禮本於殷禮洛邑新祀實殷禮也又家大人云詩頌之肇禋及此肇稱之肇皆當卽與兆同兆者壇之營域卽洛郊攻營之位不當專訓爲始猶詩訪落之落卽洛誥之洛加艸爲落从洛起義義不專于始也周禮小宗伯曰兆五帝于四郊詩生民曰以歸肇祀箋謂肇者郊之神位于郊祀天詩又曰后稷肇祀箋亦云郊祀箋蓋

以禮記表記作后稷兆祀爲據也書肇稱殷禮亦
言在洛郊爲兆位舉行殷禮此時周公未行周禮
故但曰牛二蓋二牛皆白禮記明堂位詩魯頌白
牡卽皆守殷禮之遺也洛誥末曰文王騂牛一武
王騂牛一前郊不言騂是白牡明矣

禮記中庸曰武王末受命周公成文武之德追王大
王王季上祀先公以天子之禮武王周公其達孝矣
乎夫孝者善繼人之志善述人之事者也

召誥曰王來紹上帝自服于土中受天永命

福案據此可見鎬京武王末率四海行配天配上

帝之祀與孝經相合不然何以孔子必曰則周公
其人學者習讀僞武成而不計當年受命之難也
尚書大誥序曰周公相成王將黜殷微子之命序
曰成王既黜殷命是殷命之黜在成王周公之時
殷命未黜周未能言受天永命也

禮記月令曰季秋大享帝

福案此當是周公初祀明堂之月也

多方曰今爾奔走臣我監五祀

洛誥曰公功迪將其後監我士師工

福案周書奔走臣我凡三見此監字亦非閒字家

大人云文王世子稱周公居攝尚書無攝字而有
監字監卽監國之義後儒於此畧不省之不知成
王命周公監東國洛見於洛誥卽多方之臣我監
五祀也監五祀卽周公居攝之五年也臣我監卽
臣我周公也鄭康成書注戊午蔀五十五年甲申
爲周公居攝五年作召誥劉歆三統厯謂作召誥
在居攝七年此不知尚書監五祀經文中本有明
文鄭氏康成深明厯算定爲五年推算召誥各日
月悉合然亦未知監五祀卽居攝五年此漢以來
未發之義也

洛誥曰承保乃文祖受命民

洛誥曰乃單文祖德

福案此兩文祖卽虞書受終于文祖之文祖後人解爲文王祖德失之矣蓋周之明堂卽唐虞之文祖史記堯本紀集解引鄭康成書注曰文祖者五府之大名猶周之明堂卽此義也蓋居攝五年作洛誥時尚未立明堂之名猶沿古文祖之名至六七年制禮之後始有明堂之名也孫觀察星衍云周書嘗麥解維四年孟夏王初祈禱于宗廟乃嘗麥于大祖合之淮南主術訓有神農以時嘗穀祀

于明堂之說則知史所云大祖卽明堂也又曲禮疏引孝經說云后稷爲天地之主文王爲五帝之宗此亦郊祀宗祀之古義也

洛誥曰孺子來相宅戊辰王在新邑烝祭歲文王騂牛一武王騂牛一王命作冊逸祝冊惟告周公其後王賓殺禋咸格王入太室裸王曰公子小子其退卽辟于周命公後王曰公定予往已王命周公後作冊逸誥在十有二月惟周公誕保文武受命惟七年

福案此成王冬始來洛之證此時明堂已成行冬烝祭禮祭畢仍歸鎬命周公後保洛也以上證明

家大人說孝經之郊祀卽召誥之用牲于郊孝經之宗祀卽洛誥之宗禮功宗也

宗禮餘說

余旣爲孝經宗祀卽尚書宗禮之說矣餘意未盡茲復著之曰宗之爲字也乃屋下祭天帝故从宀从示倉頡造字之始指事會意已定矣所謂宗尊也特其聲義耳虞書曰至于岱宗岱當絕句宗絕句柴絕句此唐虞以前泰山下本亦有明堂明堂祭禮本名曰宗之始也虞書曰肆類于上帝卽郊也禋于六宗卽宗禮也宗禮以配帝配五帝故曰六非宗禮外別有

六宗也若以至于岱宗爲句則至于南岳曷不曰如
岱宗禮而祇曰如岱禮明宗字單讀也月令曰祈年
天宗周書世俘解曰憲告天宗此天宗皆指明堂宗
乃實字若空訓爲尊則天尊爲不辭矣宗祭必燔柴
故又特造柴字燔柴必有煙煙从火聖聲籀文歟从
宀室古文此皆與禋字同義故禋以柴煙爲初義絜
精爲後義也故禋之籀文又作𡵓矣周公在洛所以
擬唐虞文祖造成宗祀之屋以嚴父配天帝也明堂
山內祀五帝卽以文王配五帝五帝卽上帝上帝卽
天帝同一燔柴而宗祀天與后稷配天異者郊無山

宗有六此爲分別也周公初成明堂祇以文王配天而不及武王至五年冬成王始來洛烝祭歲禋祀文武用兩辟入明堂太室裸而不祀天帝此又其分別也武王殺紂不如湯放桀未盡善也故義士殷民多方多士不服未能受命此不必爲武王諱周公攝政若不來洛踐阼親行宗禮以收天下之心則天下必不保爲文武成王之天下此不必爲周公諱惟周公毅然曰我之弗辟我無以告我先王且克敕宗禮之後始名宗曰明堂

福案周公營洛邑時一則曰乃單文祖德再則曰承保乃文祖受命

民一則曰宗禮再則曰功宗不似孝經直曰宗祀文王於明堂者此年周公尚未敢作禮樂未敢改立明

堂之名不得不稱古名于諸侯多士之前後人因不知此卽明堂而忽畧宗字也考工記曰周人明堂此周公歸政後之名也制禮作樂歸政成王退就臣位此所以爲孔子所心悅誠服者也豈新莽所能假託萬一哉蓋周公乃文王之子義士殷民心服后稷又心服文王服文王卽服周公是以臣我監五祀攸服奔走臣我宗多遜故周公探其心之所素服者而收其心多方多士之心旣收然後歸政于成王然後義士殷民亦不再反覆矣否則周公不踐阼于洛不救宗禮多方多士義士殷民曰殺我天子者武王也成王武王幼子也能西東南北無思不服哉迂儒旣諱周公之踐

昨復飾武王以受命進退無據皆非也

大雅文王詩解

余已謂大雅文王之詩皆周公宗祀明堂以後之事
令福載入孝經疏矣惟說詩之義未顯傳箋亦有誤
解茲復解示之曰文王在上乃宗祀明堂指文王在
天上故曰於昭于天非言初爲西伯在民上時也傳箋
皆非周雖舊邦其命維新言周之建邦雖舊追宗祀明
堂基命定命之後天命又新非言新于文王在時也
傳箋
皆非文王陟降在帝左右此言文王在明堂陟則天
上降則庭止也至于在帝左右更是明言宗配上帝

之事豈有文王生前而謂其陟降在帝左右者乎傳箋

說非此周公所以示成王及周士殷士之詩也。亶亶文

王令聞不已者亦言文王令聞至宗祀時猶不已非生前也。穆穆文王於緝熙敬止者言文王穆穆陟降祭者敬其庭止也。周士與文王孫子能同百世故文王在天亦寧也不但多周士而又有殷士裸將于京此指宗祀明堂臣多遜之後又至鎬京助祭也。王之亶臣此王指成王亶臣兼周士殷士言之也。殷之未喪師克配上帝此言明堂本是殷禮殷本宗祀先王配上帝惟因喪師故今周文王在明堂配上帝也。儀

型文王萬邦作孚言宗禮克敕惟以文王之德爲儀
刑萬邦始心服萬邦心服始可謂之新受天命也且
上天之載雖無聲無臭之可尋然在帝左右之文王
其儀刑萬方作孚則赫赫在上故曰於昭于天首尾
相應也此文王之詩七章大義必合孝經尚書明堂
宗禮之義觀之始大明白也

此詩不及武王一字伐商之事別以大明之詩

述之其旨微矣

咸秩無文解

書洛誥曰周公曰王肇稱殷禮祀于新邑咸秩無文
又曰稱秩元祀咸秩無文此兩言無文者謂無詩也

古人稱詩之入樂者曰文故子夏詩大序曰聲成文
謂之音又曰主文而譎諫鄭康成曰聲謂宮商角徵
羽也聲成文者宮商上下相應主文主與樂之宮商
相應也孟子曰不以文害辭趙岐曰文詩之文章然
則周公祀明堂之時但秩序祀禮仍用殷禮而樂則
殷樂詩不可用周樂詩又未敢遽作故曰成秩無文
也周頌及文王之什等詩皆周公祀明堂歸政後在
鎬京所作也

釋佞

虞夏書無佞字祇有壬字任字何畏乎巧言令色孔

壬而難任人是也故爾雅曰允任壬佞也

此佞字當訓材巧

至商周之間始有仁佞二字佞从仁更在仁字之後

此二字皆非倉頡所造

虞夏商書三頌易卦爻辭皆無仁字仁字始見於周禮大

司徒六德知仁聖義中和

故佞與仁相近尚不甚相反周之初尚

有用仁字以寄佞義者不似周末甚多分別也

論語雍也

仁而不佞可見仁佞尚欲相兼不知其仁始言佞異於仁鮮矣仁非絕無仁猶之孔壬異於不孔之王也

說文佞巧調高材也从女仁聲

春秋襄三十年天王殺其弟左氏作佞夫

公羊作年夫國語晉語佞之見佞果喪其田皆仁聲之證也段氏謂小徐从仁聲是也

巧是一

義材又一義柔調又一義禦口給又一義屬文時當

用何義則可以何義釋之書金縢曰予仁若考者言

予旦之巧若文王也巧義卽佞也佞从仁得聲而義隨之故仁可爲佞借也古者事鬼神當用佞金縢之以佞爲美借仁代佞者因事鬼神也故論語孔子謂祝鮀之佞治宗廟卽金縢仁巧多材多藝能事鬼神之義也所以金縢借仁代佞可省女字也金縢曰乃元孫不若旦多材多藝史記以王發代元孫二字訓若爲如此言武王不如周公也上文曰予仁若考此考字當指文王若亦當訓爲如言周公如文王也此五句文勢相同一正一反緊相對屬不應下若字訓爲如上若字訓爲順也不應不若旦有所指之人若

考無所指之人也訓上若爲順則與下不若旦戾異矣史記魯世家明明以旦巧二字代予仁二字此巧字卽訓金滕仁字仁讀爲佞佞卽巧也非可以金滕考字越仁若二字代巧字也巧與考本可假借但此處考字實指文王非巧字之假借江氏聲尚書集注以巧字抵考字而訓之又知經中仁若二字無著遂謂仁若二字爲衍非也後世佞字全棄高材仁巧之美義而盡用口調口給之惡義遂不敢如史記以巧佞屬之周公矣且古人每謙言不佞者皆謙不高材不仁巧也

左傳成十三年寡人不佞成十六年諸臣不佞昭二十年臣不佞國語魯語寡君不

佞晉語吾不
佞皆訓才
若佞全是惡豈古人皆以喜口調口給

之小人待人而自居於不口調不口給之君子乎是

故解文字者當以虞夏商周初周末分別觀之虞夏

無仁字何有佞字惟有壬字任字耳其言壬任者乃
巧言令色之人自謂能堪當重事而績終不成其惡
在力不能任而以巧言令色妄任之遍考羣經壬字
任字無惡訓孟子尚以爲伊尹之聖矣孔壬者甚自
負任也而難任人者不輕易用自任之人也爾雅之
允任壬佞也此佞字尚是周初高材之義非惡義使
允爲惡則惇德允元又將何說乃漢人說尚書者一
概以周末之佞義釋虞夏周初之壬任字恐非也又
孫氏星衍古今文注疏云此兩不字當讀爲丕皆
語詞事鬼神者謂生而主其祀事非謂死而事之

釋來

來者麥也象形自當以麥爲本義來至假借爲後義

也說文來周所受瑞麥來麤也二麥一秝象其芒束之形天所來也故爲行來之來凡來之屬皆從來詩曰貽我來麤據此來爲瑞麥則麥爲常麥義在前而來爲瑞麥義在後矣然麥从夂其字由來孳乳而生之來文也麥字也倉頡造字來先麥後不得云周始有此瑞麥也況虞書曰鳳皇來儀已有來字是來字明爲倉頡所造唐虞以前有此文卽有此物天所來者當始於黃帝之時而后稷武王時又來耳二麥一秝實爲不常有之瑞麥嘉慶初年嘉興曾出此麥傳示至蘇州錢辛楣先生見之作文記之以解二麥一

夆之象矣

左傳引康誥解

康誥曰封元惡大憝矧惟不孝不友子弗祗服厥父
事大傷厥考心于父不能字厥子乃疾厥子于弟弗
念天顯乃弗克恭厥兄兄亦不念鞠子哀大不友于
弟惟弔茲不于我政人得罪天惟與我民彝大泯亂
曰乃其速由文王作罰刑茲無赦左傳僖公三十三
年曰季曰康誥曰父不慈子不祗兄不友弟不共不
相及也昭公二十年苑何忌曰在康誥曰父子兄弟
罪不相及案以上經傳三條義似相反周公康誥之

語甚嚴有刑無赦之文而曰季苑何忌之語甚寬有不相及之文自孔穎達以下皆未得其解竊謂康誥之意謂父雖不慈而子則孝子雖不孝而父則慈弟雖不恭而兄則友兄雖不友而弟則恭如此則可偏罪之不相及若茲父子兄弟交相大亂則應用文王法刑無赦翫兄亦不念亦字則交亂之意可見左傳之語乃古人括康誥之大義而說經也左傳中引詩書而爲說者甚多或疑左傳爲康誥逸文非也康誥整齊必無逸文卽有逸文亦不至語甚相反且不相及也文辭亦不類周書周書內豈有相也二字乎又

王充潛夫論曰堯聖父也而丹凶傲舜聖子也而叟
頑惡鯀殛而禹興管蔡爲戮周公祐王故書稱父子
兄弟不相及也後漢書肅宗本紀詔曰書云父不慈
子不祇兄不友弟不恭不相及也鄭志趙商問康誥
之說門內尙寬此皆漢人用左傳說康誥之義非專
引康誥文也

釋訓下篇

余于釋訓篇言順訓二字常相通借又于詩得義同
字變之例後人不知每每兩解失古人本義如昔所
舉褒姒威之進退維谷之類是也癸未冬適雷州偶

于肩輿中憶抑詩無競維人四方其訓之有覺德行
四國順之知此亦義同字變也四國順之卽是四國
訓之與上四方其訓之無異詩人變其字爲順以書
之也抑詩無競二句乃引烈文無競二句舊文而證
之也若曰烈文常謂無競維人四方其訓之矣果有
覺德行必四國訓之也順卽訓也訓卽順也此詩反
覆于訓行之義其九章曰其維哲人告之話言順德
之行此順字亦是訓字之通變與四國順之相同左傳
哀二十六年詩四方其訓之唐石經岳夫曰告之話
本俱作順蓋左氏本作順順訓無異也言此明是我以言訓之也訓之卽誨諄諄用爲教也

順德之行德行即有覺德行之德行也

詩申伯之德柔惠且

直揉此萬邦聞于四國揉即上柔字上柔為剛柔之柔下揉為揉之即左傳吾且柔之之柔加手變字也周人以詩說詩自抑始詩之訓詁傳自孔子故有物必有則始詩之考證自孟子由此觀之雖周亦助始又禮記坊記君陳曰女乃順之于外順亦訓之假借字宋人以為諛順且咎成王失言此不知偽古文及假借也

釋敬

古聖人造一字必有一字之本義本義最精確無弊

敬字从苟从攴苟篆文作苟

音亟

非苟

音狗

也苟即敬也

加攴以明擊敕之義也警从敬得聲得義故釋名曰

敬警也恒自肅警也此訓最先最確蓋敬者言終日
常自肅警不敢怠逸放縱也故周書諡法解曰夙夜
警戒曰敬虞翻易逸象曰乾爲敬易曰君子終日乾
乾夕惕若厲書曰節性惟日其邁日邁者日乾乾也
周書以無逸名篇國語敬姜論勞逸之義爲千古至
言孔子歎之此敬姜之所以爲敬也欲知敬字之古
訓本義試思敬姜之論卽明矣非端坐靜觀主一之
謂也故以肅警無逸爲敬凡服官之人讀書之士所
當終身奉之者也至于孟子論性有曰四肢之於安
佚也性也年老之人久勞于事養神之人不勤于學

皆樂於安佚或知安佚不可爲訓也于是有立靜之一字以爲宗旨者非也惟聞孔子閒居未聞孔子靜坐惟聞孔子曲肱而枕孟子隱几而臥未聞孔孟瞑目而坐惟聞禮君子欠伸侍坐者出未聞君子瞑坐侍者久立蓋靜者敬之反也年衰養神者每便于靜乃諱其所私便而反借靜字以立高名則計之兩得者也雖然年老之人必不能如強壯者終日肅勞矣或推古人養老之義少安之可乎然孟子曰四肢之於安佚也性也有命焉君子不謂性也終當以苟安節之也此節性之一端也

雲南黑水圖考

禹貢黑水有二一在雍州一在梁州名同而地異

甘肅

黑水相隔遠阻斷不能通

蓋黑水亦晦黑之義

非色黑

海晦也故四

海之稱皆荒遠晦黑之義禹貢之黑水亦皆荒遠晦

黑之水之通名也禹貢曰華陽黑水惟梁州此以東

北華山西南黑水定梁州之域此句經文顯朗可據

故梁州之域必遠包滇池黑水以南始合經文若以

今瀘水當之則梁州祇有四川不包雲南矣

淮海揚州一海

字遠包閩越猶此黑水二字遠包雲南也

且瀘水卽金沙江卽江水之上

游導江雖自岷山岷山以上禹時未曾別名黑水猶

之導河自積石積石以上未聞不名河而別有名也
故華陽黑水惟梁州之黑水卽是導黑水入南海之
黑水此水近在滇池之南梁州之域可見矣禹貢曰
導黑水至于三危入於南海此經文三句朗如日星
求入南海之水于滇之南今有三焉南盤江由粵西
至粵東入海禮社江由交趾入海瀾滄江由南掌入
海此三大水旣入南海安得不謂之黑水而反以不
入南海之瀘當之乎吾固曰求導水之黑水不可得
當于入南海之水求之求三危不可得

雍州三危與導水三危亦

名同地異

當于入南海之水上游求之求華陽黑水之黑

水不可得卽于經文入南海之黑水合之然則今滇

南入南海三水上游之間

廣南開化臨安普
洱順寧永昌六府

非所謂

三危歟考梁州黑水者自漢以後言人人殊予惟以

經文定經文餘不必辨矣又滇省城東北十餘里有

黑龍潭潭上有龍王廟

唐梅在廟
東坡上

此潭廟甚古莫知

其始漢書地理志滇池縣有黑水祠余謂今滇池上

之黑龍潭廟非卽古華陽黑水之黑水祠歟或者潭

東唐梅宋柏之間今之三清道宮卽漢祠故址而潭

北龍王廟卽神祠所遷降者歟滇池與南盤江禮社

江切近百里前漢有黑水祠禮亦宜之

華陽山

大江入湖北

廣南府

由粵西入南海

盤江
既入南海
即是黑水

臨安府

開化府

由交趾入南海

岷山導江

蜀省

北為四川

惟梁州

黑水祠
滇省
滇池

北與雍州黑水隔遠

金沙江

瀘

南為雲南

既入南海
即是黑水

普洱府

由南掌入南海

瀘不入南海
即不得指為黑水

禮社江

順寧府

瀾滄江

既入南海
即是黑水

永昌府

中庸說

中庸爲子思所作自天命之謂性至父母其順矣乎似中庸篇之大義已止于此自鬼神之爲德已下似別成一篇與中庸無涉此乃子思專言祖德配天俟百世之聖人雖孔子生前不得位不敢損益三王制作禮樂而至誠爲學治天下之道能使百世天下人皆齊明盛服承祭孔子凡有血氣者莫不尊親孔子之神洋洋乎與堯舜文武之配天相同此子思之微詞也此應別有篇名但子思明哲保身不敢明著篇名而接存于中庸篇之後以授于傳經之弟子門人

耳康成鄭氏注祖述堯舜四句以爲孝經春秋二經之事淺人詫之不知此必子思微詞傳禮之門人述之鄭氏尚得之于古禮說耳孟子曰春秋天子之事也此說當傳之子思

漢志中庸說當與鄭說同

擘經室續二集

黃河海口日遠運口日高圖說

黃河挾泥沙入海一歲之中泥沙多不可量此泥沙積墊於海口愈積愈多愈墊愈遠攔門沙亦愈推愈遠蓋必然之勢也乾隆初年之海口非康熙初年之海口矣嘉慶初年之海口非乾隆初年之海口矣蓋遠數百里矣今又三十餘年而清黃交會通漕之處則未尺寸移故地也然則運口昔日清高於黃今常黃高於清者豈非海口日遠之故乎夫以愈久愈遠之海口行陝州以東之黃水自中州至徐淮二府逐

里逐步無不日加日高低者填之使

壬庚今海口

平坳者填之使仰此亦必然之勢也

而湖水之堰則不能再加高此亦一

定之勢也如此而欲數千里平行

嘉慶已初年海口

之黃水獨在徐淮一帶獨自刷

使深而且低再仰而出於海口

竊憂其難矣譬如樓梯斜下十

乾隆戊初年海口

三層梯脚占地一丈

如乾隆初海口

今運丁丙乙

如戊

其第十層離地高三尺

此運口今未改地步

如運

今於梯脚接添三層為

口乙

十六層使梯勢不陡必多

占二尺餘地矣如今海口

是其第十層離地者必

加高尺許矣如今運何

也梯腳占地遠也遠

之一字今言河者皆

未言及私心揣測

聊為圖以觀之

道光七年記

河出
陝州

甲
勾

此
乙

此乙
辛一
線乃
洪澤
湖水
水平
二百
年來
高以
低未
大改

辛

此壬
癸一
線乃
地平

豎

癸地
心

陝州以東河流合勾股弜說

凡水行於山石不平之地隨地形爲高低也若黃河出陝州之後由陝州以至海口數千里之遠數百年之久必平無高低如弜之直矣何也地勢本平而沙填又久也故自河南至淮南海口則日墊日遠河身必日加日高低者填之使平坳者填之使仰如弜之直如準之平矣加以屢次決口屢次挑爲引河少有丈尺之高坳者亦無不平矣此合乎勾股弜矣右圖癸庚股也甲癸勾也甲壬弜也股與弜同此日加日長而獨欲使丁之弜屈曲低落如丙乙之舊使乙水

仰出於庚此斷斷不能之勢也此理易明人所共曉
尺幅之間此理此數數千里之遠亦同此理同此數
也蓋測天測地未有勾股直而弼曲者亦未有入股
已加長改位而弼不加長改位者

如戊改庚
乙改丁

擬儒林傳稿凡例

一史漢始記儒林宋史別出道學其實講經者豈可
不立品行講學者豈可不治經史強爲分別殊爲褊
狹

國朝脩明史混而一之總名儒林誠爲盛軌故今理
學各家與經學並重一併同列不必分歧致有軒輊

一各儒以

國初爲始若明人而貳仕於

國朝及行止有可議者皆不得列入

一

國朝百餘年來

聖化所涵學人輩出天下之大山林之僻學者萬千

今僅列百數十人雖示謹嚴恐有掛漏如同館諸友

所見者不妨酌補

一次序以顧棟高爲始者因

高宗純皇帝諭辦儒林傳奉爲緣起也此外則以年

分相次

一凡各儒傳語皆採之載籍接續成文雙注各句之下以記來歷不敢杜撰一字且必其學行兼優方登此傳是以多所褒許以見我

朝文治之盛至於著述醇疵互見者亦直加貶辭此外私家狀述涉於私譽者謹遵館例一字不錄至於各句雙注將來進呈

御覽時應否刪去候總裁核定

一唐曹憲在隋曾爲秘書學士唐貞觀中以宏文館學士召不至卽家拜朝政大夫入唐書儒林傳元金

履祥當宋末襄樊兵急履祥請以重兵由海道直趨燕薊莫能用元德祐初起爲史館編校辭弗就入元史儒林傳

欽定續通志儒林傳熊禾宋咸淳進士寧武州司戶參軍入元不仕胡三省宋寶祐進士入元不仕馬端臨宋丞相廷鸞子蔭丞仕郎宋亡入元不仕皆蒙欽定列入元代儒林傳今查湖南王夫之前明舉人在桂王時曾爲行人司行人浙江黃宗羲前明布衣魯王時曾授左僉都御史明亡入我朝皆未仕著書以老所著之書皆蒙收入

四庫列爲

國朝之書

四庫全書提要內多褒其書以爲精核今列於儒林傳中而據實書其在明事蹟者據列代史傳及

欽定續通志例也

一

國朝脩明史儒林傳末列孔顏曾孟傳者用史記孔子世家例也曾孟程朱後人有名而多著述者未得其人應俟加訪

一滿洲蒙古漢軍凡有學行者太約皆已登二品以

上其官職未顯者甚少然亦必有其人此傳已專屬編修陳公傳經采訪撰集矣俟爲補入

一傳中事蹟年月恐有舛錯文理序述不免差謬仍乞館中諸友詳加校對始爲定稿元匆匆交出實未及細審不可恃也

壬申八月漕運總督阮元交出前在翰林院侍講任內撰稿

集傳錄存

毛奇齡字大可又字初晴蕭山人康熙十八年以廩監生

召試博學鴻詞科授翰林院檢討四庫書提要充明

史纂修官以葬親假歸得痺疾遂不復出蕭山志奇齡

少穎悟明季避兵其縣之南山築土室讀書其中盛唐

西河先生傳已著毛詩續傳三十八卷既以避讐流寓江

淮間失其稿乃就所記憶著國風省篇詩札毛詩寫

官記復在江西叅議道施閏章處與湖廣楊洪才說

詩作白鷺洲主客說詩一卷明嘉靖中鄞人豐坊僞

造子貢詩傳申培詩說行世奇齡作詩傳詩說駁議

五卷引證諸書多所糾正四庫書提要盛傳暨在史

館著古今通韻十二卷進

呈

聖祖仁皇帝善之

詔付史館

盛傳李天馥西河集序

歸田後僦居杭州著仲氏易

一日著一卦凡六十四日而書成託於其兄錫齡之
緒言故曰仲氏又著推易始末四卷春秋占筮書三
卷易小帖五卷易韻四卷河圖洛書原舛篇一卷太
極圖說遺議一卷其言易發明荀虞干侯諸家旁通
卦卦變卦綜之法是後儒者多研究漢學不敢以空
言說經實自奇齡始而辨正圖書排擊異學尤有功
於經義提要先是奇齡官翰林時康熙乙丑會試爲同

考官分閱春秋房卷心非胡傳之偏有意撰述盛傳至

是乃就經文起義著春秋毛氏傳三十六卷春秋簡

書刊誤二卷春秋屬辭比事記四卷條例明晰考據

亦多精核

提要

又欲全著禮經以衰病不能乃次第著

昏喪祭禮宗法廟制及郊社禘祫明堂學校諸問答

多發先儒所未及

盛傳經集凡例

至於論語大學中庸孟子

亦多所考證而大學證文及孝經問皆援據古本力

傳後儒改經之非持論甚正

提要

奇齡之學淹貫羣書

提要

所自負者在經學數稱東漢人行誼謂足見人真

性情

紹興府志

惟好爲駁辨以求勝凡他人所已言者必

力反其詞如古文尙書自宋吳棫後多疑其僞及閻
若璩作古文尙書疏證奇齡則力辨以爲真遂作古
文尙書覓詞又刪舊所作尙書廣聽錄爲五卷以求
勝於若璩而周禮儀禮奇齡則又以爲戰國之書至
所作經問其中所排斥者如錢丙蔡氏之類多隱其
名而指名攻駁者惟顧炎武閻若璩胡渭三人以三
人皆博學重望足以攻擊而餘子則不足齒錄其傲
睨如此提要故不得爲醇儒沈德潛別裁集小傳奇齡素曉音律
其家有明寧邸所傳唐樂笛色譜在史館時據以作
竟山樂錄四卷及在籍聞

聖祖仁皇帝論樂諭羣臣以徑一圍三隔八相生之法因推闡考證撰

聖諭樂本解說二卷

皇言定聲錄八卷康熙三十八年

聖祖南巡奇齡迎

駕於嘉興乃以樂本解說二卷進呈蒙

諭獎勞

聖祖三巡至浙奇齡復謁

行在

賜御書一幅是時奇齡已歸蕭山故居越數年卒於

家年九十有四無子以兄子遠宗嗣

盛傳蕭山志

遺命勿

輯文集沒後其門人蔣樞編輯分經集文集二部經

集自仲氏易以下凡五十種文集合詩賦序記及他

雜著凡二百三十四卷

四庫全書收奇齡所著書

目多至四十餘部奇齡弟子陸邦烈盛唐王錫章大

來邵廷采等著錄者甚衆李塉最知名廷采塉自有

傳

見本集及四庫書提要

邦烈字又超平湖人嘗取奇齡經說

所載諸論裒爲聖門釋非錄五卷謂聖門口語未可

盡非也

四庫書提要

沈國模字求如餘姚諸生以明道爲己任入劉宗周

證入社會講歸而闢姚江書院與同里曾宗聖史孝
咸講良知之學順治十三年卒年八十二初山陰祁
彪佳與國模善彪佳以御史按江東一日杖殺巨憝
數人會國模至欣然以告國模曰亦聞曾子哀矜勿
喜乎彪佳後嘗語人曰吾每慮囚必念求如孝咸字
子虛繼國模主姚江書院醇潔之士多歸之順治十
六年卒年七十八沈史歿書院輟講十年縣人韓孔
當繼之孔當爲國模弟子餘姚學人又有邵曾可者
師事孝咸爲學專提致知思復堂集居易齋集紹興府志又有勞史
者字麟書躬耕養親夜則披卷莊誦慨然發憤以道

自任舉動纖悉必依於禮錢塘桑調元餘姚汪鑒皆
史門人調元雍正十年進士工部主事講學暢師說
刻餘山遺書史所著也調元所自著有論語說躬行
實踐錄鑒有孝行人呼爲汪孝子

張甫文集 四庫
提要二林居集

談泰字階平江寧舉人官南匯縣訓導泰博覽勤學
精於天算得梅氏算學之傳所著考證經史之書曰
觀書雜識二十卷其算術之書有測量周徑正誤周
髀經算四極南北游法增補武城朔閏譜召誥月日
譜歲次月建異同辨春秋歲次考三統術推一歲食
限數交食一月終數推漢高九年六月晦孝文十一

月晦孝文元年至七年大小餘孝文二年五年天正
冬至靈帝光和元年大小餘四分術譜劉宋武帝五
年天正冬至又著三統術譜冬至權度紀畧天官書
節次斗分辨分野辨操縵卮言正誤圓壺周徑積實
祖冲之補法辨補內方非十尺辨喪服傳溢說五服
經帶數等書又著古算書細草十餘事

江藩談階平
遺書敘錄

桂馥字未谷曲阜人乾隆五十五年進士雲南永平
縣知縣卒於官馥與厯城周永年同置籍書園以資
來學并祠漢經師於其中取許慎說文與諸經之義
相疏證爲說文義證五十卷又著札樸十卷晚學集

三卷

印心堂文集

錢澄之字飲光原名秉鐙桐城人

提要

與嘉興魏學渠

交最深

嘉興府志

又嘗問易於黃道周其撰田間易學十

二卷初從京房邵康節入故言數頗詳蓋黃道周之

餘緒也後乃兼求義理大旨以朱子爲宗

易學提要

又撰

田間詩學十二卷謂詩與尙書春秋相表裏必考之

三禮以詳其制作徵諸三傳以審其本末稽之五雅

以核其名物博之竹書紀年皇王大紀以辨其時代

之異同與情事之疑信卽今輿記以考古之圖經而

參以平生所親歷其書以小序首句爲主所採諸儒

論說自注疏集傳以外凡二十家持論精核於名物

訓詁山川地理言之尤詳

詩學提要

澄之同縣方中通字

位伯明檢討以智之次子著數度衍二十四卷附錄

一卷其書有數原律衍幾何約珠算筆算籌算尺算

諸法復條列古九章名目引

御製數理精蘊推闡其義其幾何約及珠算等大抵

哀輯諸家之長而增損潤色勒爲一編

數度衍提要

又撰

物理小識十二卷

提要

以智博極羣書撰通雅五十二

卷皆考證名物象數訓詁音聲窮源溯委詞必有徵

明之中葉以博洽著者稱楊慎而陳耀文起與之爭

然慎有偽說以售欺耀文好蔓引以求勝次則焦竑亦喜考證而習與李贄游動輒牽綴佛書傷於蕪雜

惟以智崛起崇禎初考據精核迥出其上風氣既開

國朝顧炎武閻若璩朱彝尊等沿波而起始一掃懸

揣之空談

通雅提要

中通承其家學

數度衍提要

故爲博識

小識

提要

又撰浮山文集

本集

中通弟中履亦撰古今釋疑十

八卷雖不及通雅精核然學有淵源故不舛陋

釋疑提要

朱鶴齡字長孺又字愚庵吳江人前明諸生

四庫書目尚書

埠傳提要

嘗箋注杜甫李商隱詩故所作韻語頗出入二

家

四庫愚庵集提要

入

國朝屏居著述

王光承愚庵集序

與顧炎武友炎武以本原

之學相勗始湛思覃力於經注疏及儒先理學

愚庵集與

吳漢槎書

鶴齡著愚庵詩文集書元裕之集後云裕之於

元既足踐其土口如其毛卽無反詈之理乃今之訕
詆不少避者若欲掩其失身之事以誑國人非徒諄
也其愚亦甚其言益指

國初居心反覆之輩可謂知大義矣

四庫愚庵小集提要

鶴齡

所著經義有尚書埤傳禹貢長箋讀左日鈔詩經通
義尚書斟酌於漢學宋學之間長箋作於胡渭雖指
之前不及渭書而旁引曲證亦多剽獲讀左瑕瑜並

陳不及顧炎武惠棟之密詩經參停於今古之間於國朝惟用陳啟源說陳啟源實與之參正焉陳啟源字長發鶴齡同縣人著毛詩稽古編爲唐以前專門之學

四庫提要

臧庸字拜經初名鏞堂沈默

拜經日記許宗彦序

樸厚學術精

審著拜經日記十二卷

拜經日記王念孫序

拜經堂文集四卷

又嘗輯月令雜說一卷孝經考異一卷樂記二十三

篇注一卷又輯子夏易傳一卷詩考異四卷韓詩遺

說三卷訂譌一卷盧植禮記解詁一卷爾雅古注三

卷說文舊音考三卷蔡邕明堂月令章句二卷王肅

禮記注一卷聖證論一卷帝王世紀一卷尸子一卷

賈唐國語注一卷蕭該漢書音義二卷校鄭康成易

注二卷

見遺書

皆有補於經

王念孫序

其輯子夏易傳辨此

傳爲漢韓嬰所作非卜子夏

見遺書

庸弟禮堂以孝聞

大學士朱珪稱之早卒

朱珪知足齋文集

著說文引經考二

卷

閻循觀字懷庭少孤其學奉程朱爲宗省身克己刻

苦自立而諄諄致戒於近名於河津之派爲近乾隆

三十四年進士吏部考功司主事著困勉齋私記西

澗文集及尚書春秋說

四庫提要閻集韓夢周墓志又二林居集

時濰縣

劉以貴梁鴻翥膠州法坤宏安邱張貞益都李文藻
濰縣韓夢周皆以學行聞韓夢周字公復乾隆丁丑
進士知來安縣刻意濂洛關閩諸儒之書著理堂文
集

汪紱江永同縣老儒一名烜字雙池嘗貧困江西景
德鎮畫盃傭焉紱博極儒經而以宋五子之學爲歸
因陸隴其著有讀禮志疑乃作參讀禮志疑二卷雖
考禮未深然亦多得經意可與隴其書並存紱又著
禮學逢源儒先晤語周易詮義禮記章句
四庫提要及汪氏遺
書尚書詮義詩經詮義四庫詮義春秋集傳樂經律

呂通解

朱筠集墓表

金榜字檠齋歙縣人乾隆三十七年

一甲一名進士翰林院修撰

詞林典故

養疴讀書不復出

卒於家榜師事江永治禮宗鄭康成采獲舊聞撫秘

逸要著禮箋十卷五十八年刺取其大者數十事爲

三卷寄朱珪珪序之以爲詞精義覈

見本書

榜雖最尊

康成之學然於鄭義所未衷者必糾舉之

姚鼐序

於鄭

氏家法不敢誣也

見本書

王鳴盛字鳳喈嘉定人乾隆十九年一甲二名進士

授編修累官內閣學士光祿寺卿鳴盛少與惠棟錢

大昕講經義訓詁必以漢儒爲宗所撰尙書後案三

十卷專宗鄭康成注鄭注亡逸者采馬融王肅注補之孔傳雖僞其訓詁非盡虛造者間亦取焉

潛研堂文集

又撰十七史商榷一百卷蛾術編一百卷西莊詩文

集二十四卷

見本書

丁杰字升衢歸安人乾隆四十六年進士官寧波府

府學教授肆力經史旁及六書音韻算數長於校讐

于胡渭禹貢錐指摘誤甚多開四庫館朱筠戴震皆

延之佐校杰所著有周易鄭注後定大戴禮記釋小

西山房文集

許宗彥丁杰傳陳鱣丁杰墓志銘

任大椿字幼植又字子田江蘇興化人祖陳晉乾隆

四年進士以通經聞

章學誠文史通義施朝幹一勾集

著易象大意

四庫提要

大椿少工文詞既乃專究經史傳注乾隆三十

四年二甲一名進士授禮部主事

府志一勾集

三十八年

修四庫全書充纂修官禮經衷輯爲多提要多出其

手

一勾集并服釋例序

五十四年以郎中授陝西道監察御史

卒年五十二大椿貧盡色養讀書守道義

文史通義一勾集

素不欲以空言講學服官行已無愧古人

汪廷珍序所學

淹通於禮尤長名物

文史通義

著弁服釋例八卷深衣釋

例三卷釋綰一卷吳越備史注三十卷小學鈞沈二

十卷字林考逸八卷詩集六卷

一勾集

大椿初欲薈萃

全經久之知其浩博難罄因思卽類以求一類旣貫
乃更求他類所著深衣釋綰諸篇皆博綜羣籍衷以
已意或視爲爾雅廣疏實禮經別記之意學者能推
其意廣所未盡以類窮之可以會經之全矣文史通義時

江北學者李惇劉台拱汪中皆繼起

汪中述學

李惇字孝

臣高郵人乾隆四十五年進士篤內行治諸經於詩

春秋尤深晚通天算

府志述學

劉台拱字端臨寶應人丹

徒縣訓導幼見王懋竑朱澤澐之書始挈程朱之學
以道自繩書數音韻天文律呂名物理義理莫不窮
考冥搜事親以孝養遭二喪蔬食四年著論語補注

漢學拾遺荀子補注經傳小記及雜文共編爲遺書

四卷三禮詩書並有纂著未成書而卒

見劉氏遺書又朱彬行狀

汪中字容甫江都拔貢生好古博學長於經誼

王昶春融

堂集

於詩古文書翰無所不工著周官徵文左氏春秋

釋疑皆依據經證箴砭俗學

孫星衍汪中傳

餘見述學內外

篇

府志

孔廣森字衆仲又字稟軒孔子六十八代孫襲封衍

聖公傳鐸之孫戶部主事繼汾之子

孔氏大宗支譜

乾隆三

十六年進士官翰林院檢討年少入官翩翩華胄一

時爭與之交然性恬淡耽著述裏足不與要人通謁

告養歸不復出及居大母與父喪竟以哀卒

儀鄭堂文序

時乾隆五十一年年三十有五

孔氏大宗支譜

廣森聰穎特

達經史小學沈覽妙解所學在公羊春秋

儀鄭堂文敘錄

唐

陸德明云魏晉以來公羊久成絕學廣森沈深解剝

著春秋公羊傳通義十一卷於胡母子都董仲舒何

劭公條例師法不墜

公羊通義條記

其自序曰昔我夫子有

帝王之德無帝王之位又不得爲帝王之輔佐乃思

以其治天下之大法損益六代禮樂文質之經制發

爲文章以垂後世而見夫周綱解弛魯道陵遲攻戰

相尋彝倫或熄以爲雖有繼周王者猶不能以三皇

之象刑二帝之干羽議可坐而化也必將因衰世之
宜定新國之典寬於勸賢而峻於治不肖庶幾風俗
可漸更仁義可漸明政教可漸興烏乎託之託之春
秋春秋之爲書也上通天道中用王法而下理人情
不奉天道王法不正不合人情王法不行天道者一
曰時二曰月三曰日王法者一曰譏二曰貶三曰絕
人情者一曰尊二曰親三曰賢此三科九旨旣布而
壹裁以內外之異例遠近之異辭錯綜酌劑相須成
體凡傳春秋者三家粵惟公羊氏有是說焉漢初求
六經於燼火之餘時則有胡毋子都董仲舒皆治公

羊春秋以其學鳴於朝廷立於校官董生授弟子羸公羸公授眭孟孟授東海嚴彭祖魯國顏安樂各專門教授由是公羊分爲嚴顏之學方東漢時帝者號稱以經術治天下而博士弟子因端獻諛妄言西狩獲麟是庶姓劉季之瑞聖人應符爲漢制作黜周王魯以春秋當新王云云之說皆絕不見本傳重自誣其師以召二家之糾摘矣然而孟子有言春秋天子之事也經有變周之文從殷之質非天子之因革耶甸服之君三等蕃衛之君七等大夫不世小國大夫不以名氏通非天子之爵祿耶上抑杞下存宋褒滕

薛邾婁儀父賤穀鄧而貴盛郛非天子之黜陟耶內
其國而外諸夏內諸夏而外四裔殆所謂天下之本
在國國之本在家者非耶愚以爲公羊家學獨有合
於孟子乃若對齊宣王言小事大則紀季之所以爲
善對滕文公言效死勿去則萊侯之所以爲正其論
異姓之卿則曹羈之所以爲賢論貴戚之卿又實本
於不言剽立以惡衎之義且論語責輒以讓國而公
羊許石曼姑圍戚今以曼姑擬臯陶則與瞽瞍殺人
之對正若符契故孟子最善言春秋豈徒見稅畝伯
于陽兩傳文句之偶合哉晉唐以來公羊穀梁皆成

絕緒唯左氏不絕於講誦啖趙橫興宋儒踵煽加以鑿空懸擬直出於三傳之外者淺識之士動爲所奪其訾毀三傳率撫拾本例而膚引例不可通者以致其詰董生不云乎易無達占詩無達詁春秋無達例夫唯有例而又有不囿於例者乃足起事同辭異之端以互發其蘊記曰屬辭比事春秋之教也此之謂也十二公之篇二百四十二年之紀文成數萬赴問數千應問數百操其要歸不越乎同辭異辭二途而已矣當其無嫌則鄭忽之正陳佗莒展之賤曹羈宋萬宋督之爲大夫未嘗不同號祭伯奔而曰來祭公

使而曰來介葛盧朝而曰來齊仲孫外之而曰來未
嘗不同辭入者爲篡天王入於成周乃非篡出者爲
有外天王出居於鄭乃非外此無他正名天王灼然
不嫌也夫人婦姜夫人氏夫人孫於齊則辭有異楚
屈完來盟于師齊侯使國佐如師則辭有異衛侯言
歸以成叔武之意曹伯言歸以順喜時之志而或加
復或不加復則同辭之中猶有異此言負芻出惡已
見於伯討成公出惡未有所見也若是之屬有不勝
僂指述者諸滅同姓莫名獨衛侯燬名諸葬稱公獨
蔡桓侯不稱公諸來稱使獨武氏子毛伯不稱使一

難而乃異一救而言次之先後異一人之名而曼何之有無異一年之內而糾與子糾異凡皆片言榮辱筆削所繫不可不比觀不可不深察春秋有當畧而詳當詳而畧詳之甚者莫如錄伯姬畧之甚者莫如鄭祭仲之事祭仲權一時之計紓宗社之患君子取之亦與其進不與其退之意焉爾若左傳所載忽之弑豐儀之立仲循循無能匡救苟並存其迹將不可爲訓故斷至昭公復正厲公居櫟取足伸仲之權而止此春秋重義不重事之效也董生曰正朝夕者視北辰正嫌疑者視聖人聖人以祭仲易君季子殺母

兄皆處乎嫌疑之間特殊異二子於衆人之中而貴而字之而不名尙猶有援左氏之事以駁公羊行權之義者盍思仲之稱字正逆知天下後世必有嘽嘽議仲者乃大著其善也孔子之修春秋也至於上下內外之無別天道人事之反常史之所書或文同事異事同文異者則皆假日月以明其變決其疑大抵以日爲詳則以不日爲畧以月爲詳則以不月爲畧其以不日爲恒則以日爲變以日爲恒則以不日爲變甚則以不月爲異其以月爲恒則以不月爲變以不月爲恒則以月爲變甚則以日爲異將使學者屬

辭比事以求之其等衰勢分甚嚴善惡淺深奇變極
亂皆以日月見之如示諸掌善哉自唐迄今知此者
唯趙汭一人哉推舉其概及齊平及鄭平均平也而
一信一否月不月之判也郊伯姬來歸杞叔姬來歸
均出也而一有罪一無罪月不月之判也城楚邱之
不嫌於內邑以其月也晉人執季孫行父何以別於
齊人執單伯以其月也晉人入曹何以別於宋公入
曹以其日也武宮亦立煬宮亦立而知季孫意如之
爲之者以其不日也諸侯相執例時始見於宋人執
滕子嬰齊則惡而月之公如例時襄昭如楚則危而

月之會例時終桓公之篇悉危而月之可得謂無意乎常辭偏戰曰詐戰不曰獨至於穀詐戰而亦曰讀其經曰辛巳晉人及姜戎敗秦於殽癸巳葬晉文公皆殯之罪日之而益見復歸未有言日者獨衛獻公曰讀其經曰辛卯衛甯喜弑其君剽甲午衛侯衎復歸於衛諉弑之迹亦日之而益見春秋雖魯史舊名聖人因而不革必有新意焉春者陽中萬物以生秋者陰中萬物以成善以春賞惡以秋刑故以是名其經丙戌之再也疑於衍而非衍夏五或無月十有二月或無冬疑於脫而非脫春以統王王以統月月以

統曰春秋所甚重甚謹者莫若此世俗之說曰譏貶當各就其事而傳說有先事貶者有終身貶者得無乖論語不逆億之訓且疾惡已甚乎是未知春秋之用譏貶當事而施者小過惡耳至其未事而先貶既事而終絕則必蹈名教之宏罪犯今古之極愆有雖孝子慈孫百世不可改者中人之情固有始善終咎先後易轍惟若公子翬之媚桓弑隱公子招之脅君亂國充其惡可以至於此極則平日處心積思出謀發慮久已不範於禮義先師言春秋天子之行事也向使夫子與翬招並時立朝必不待其弑君亂國蚤

已放流之數殛之又何不逆億之有以誅不待教之
惡人而且使之出師而且使之會諸侯之大夫是則
陳魯之君無知人之明以自召其禍也故貶招於鄆
貶翬於伐鄭伐宋以戒後世之爲人君者若曰有臣
如此則不可以長三軍而使四方豈唯決二公子之
辜而已翬公子也而弗謂公子招弟也雖弗謂弟存
公子焉若曰疎者不良當絕其位親者不良但不當
任之亦勿可失其貴此深中之深微中之微也俗儒
不知春秋病於不能探深窺微翬在所傳聞之世訟
言貶之遂在所聞之世唯一貶於其卒逮所見之世

隱如疑不得貶矣然而辭不屬不明事不比不章昭公之篇一曰隱如至自晉一曰叔孫舍至自晉同事而氏不氏異氏者賢不氏者惡亦因得見端焉且遂卒而貶猶夫終身貶也春秋之義人道莫重乎終始用致夫人弗正其始則終身不免爲篡成風之含貽會葬王弗稱天則終身不正其爲小君其於追命桓公亦然故輦招貶之於始仲遂貶之於終皆言乎罪大惡極足以貫其沒世者也譏貶絕不槩施每就人情所易惑者而顯示之法人莫知大夫不敵君而後以楚人書人莫知卿不得憂諸侯而後以晉人宋人

書真梁以降大夫交政未嘗貶也卻缺之徙義公子側之偃革宜若有善焉轉發其專平專廢置之罪而以人書不寧惟是又因是以知士匄公子結專其所可專得免於貶雖於名氏之外未有加焉固已榮矣鄭襄公背華附楚賤之曰鄭伐許與吳伐邾狄伐晉文無以異至其子衰經與戎則正言之曰鄭伯伐許以爲不待貶絕爾第未若狄之之顯也故襄公書葬悼公不書葬其葬猶之突也其不葬也猶前之接後之踰而蔡之肸也傳曰春秋不待貶絕而罪惡見者不貶絕以見罪惡也貶絕然後罪惡見者貶絕以見

罪惡也又曰春秋見者不復見皆讀此經之要法也
楚子虔哆哆然自以爲討賊而取絕於春秋何則般
之弑父已見虔之誘討難知也名虔矣般可以無誅
乎則又見諸絕世子有絕有矣蔡之臣子可釋憾於
楚乎則又見諸葬蔡靈公以爲廬伸其復讐之志凡
義無常唯時所當方君義屬固則般也賊及君義屬
般則虔也讐此其比在刺築館譏猶釋王姬可以無
逆不可以逆而外之遂不宜爲大夫旣爲大夫卽不
得薄其恩禮生殺不相悖天以成其施刑賞不偏廢
王以成其化非春秋孰能則之撥亂之術譏與貶絕

備矣而又曰爲尊者諱爲親者諱爲賢者諱惡如可
諱何以癉惡聞之有虞氏貴德夏后氏貴爵殷周貴
親春秋監四代之令模建百王之通軌尊尊親親而
賢其賢尊者有過是不敢譏親者有過是不可譏賢
者有過是不忍譏爰變其文而爲之諱諱猶譏也傳
以諱與讐狩爲譏重是也所謂父子相隱直在其中
豈曲佞飾過之云乎無駭貶去氏故入極不嫌非滅
承徐人伐吳氏則滅頂不嫌非齊書成鄭虎牢於下
乃可以成不繫鄭書孟子卒於後昭公取夫人乃可
以不書其諱文而存實有如此者於紀侯大去見諸

侯以國爲體於入曹見同姓滅之當救於公孫會見
司寇有八議之辟於防於暨於處父見君臣無相爲
盟之法其假諱而立義有如此者世爭則示之以讓
世詐則示之以信是以美召陵高浚霍而於讓國公
子三致意焉衛子之諱殺也捷之諱宋也三亡國之
諱亡也其緣賢者之心而隱惡有如此者將因其所
諱達之於所不諱則會穆成亂以嚴君臣之分乾時
伐敗以隆父子之恩子般忍日以正世及之坊然乃
知祖之逮聞所以爲始爲將推而遠之而後得盡其
辭又炳炳彰彰如此嘗病左氏規隨擬議續經三年

顧云齊陳恒執其君寘于舒州夫凡伯以天子之使諱不言執况可加之其君乎斥言成叛抑非圍棘取運內邑不聽之例也故曰左氏之事詳公羊之義長春秋重義不重事斯公羊傳尤不可廢方今左氏舊學湮於征南穀梁本義汨於武子唯此傳相沿以漢司空掾任城何休解詁列在注疏漢儒授受之指藉可考見其餘公羊墨守穀梁廢疾左氏膏盲春秋漢議文諡例之等尙數十篇惜無存者解詁體大思精詞義奧衍亦時有承譌率臆未能醇會傳意三世之限誤以所聞始文所見始昭遂強殊鼻我於快而季

姬季友公孫慈之日卒皆不得其解外大夫奔例時諸侯出奔無罪時有罪月內大夫出無罪月有罪日功過之別內外之差宜然也何邵公自設例與經詭戾而公孫敖之日歸父之不日兩費詞焉叔術妻嫂傳所不信邵公反張大之目爲非常異義可怪之論亦猶傳本未與輒拒父雋不疑詭引以斷衛太子之獄致令不曉者爲傳詬病此其不通之一端也七十七子沒而微言絕三傳作而大義睽春秋之不幸耳幸其猶有相通者而三家之師必故各異之使其愈久而愈歧何氏屢蹈斯失若盟於包來下不肯援穀梁

以釋傳叛者五人不取證左傳而鑒造諫不以禮之
說又其不通之一端也今將祛此二惑歸於大通輒
因原注存其精粹刪其支離破其拘窒增其隱漏冀
備一家之言依舊帙次爲十一卷竊名曰通義胡母
生董生旣皆此經先師雖義出傳表卓然可信董生
緒言猶存繁露而解詁自序以爲畧依胡母生條例
故亦未敢輕易也昔韓文公遺殷侍御書云近世公
羊學幾絕何氏注外不見他書聖經賢傳屏而不省
要妙之義無自而尋非先生好之樂之味於衆人之
所不味務張而明之其孰能勤勤拳拳若此之至固

鄙心之所最急者如遂蒙開釋章分句斷其心曉然
直使序所注掛名經端自託不腐其又奚辭蓋自唐
巨儒惜此傳之墜絕而望人之講明也如是今殷侑
之注已復不存更以穴知孔見期推測於千百禩之
後安得有道如昌黎者而就正其失也鑽仰既竭不
知所裁公羊通義廣森又著大戴禮記補注十四卷詩聲
類十三卷禮記卮言六卷經學卮言六卷少廣正負
術內外篇六卷又喜屬文著儀鄭堂駢麗文三卷江
都汪中讀之歎爲絕手儀鄭堂文序
張惠言字皋文武進人少孤貧年十四卽爲童子師

嘉慶四年進士改庶吉士充

實錄館纂修六年散館授編修七年卒年四十二

大雲

山房文集所著有周易虞氏義九卷虞氏消息二卷昔惠

棟作周易述大旨遵虞翻補以鄭荀諸儒學者以未

能專一少之虞氏易義序漢人之易孟費諸家各有師承

勢不能合惠言傳虞氏易卽傳漢孟氏易矣孤經絕

學也定香亭筆談惠言虞氏易序曰自漢成帝時劉向校

書考易說以爲諸易家皆祖田何楊叔丁將軍大義

畧同惟京氏爲異而孟喜受易家陰陽其說易本於

氣而後以人事明之八卦六十四象四正七十二候

變通消息諸儒祖述之莫能具當漢之季年扶風馬融作易傳授鄭康成作易注而荊州牧劉表會稽太守王朗潁川荀爽南陽宋忠皆以易名家各有所述唯翻傳孟氏學既作易注奏上之獻帝翻之言易以陰陽消息六爻發揮旁通升降上下歸於乾元用九而天下治依物取類貫穿比附始若瑣碎及其沈深解剝離根散葉暢茂條理遂於大道後儒罕能通之自魏王弼以虛空之言解易唐立之學官而漢世諸儒之說微獨資州李鼎祚作周易集解頗采古易家言而翻注爲多其後古書盡亡而宋道士陳搏以意

造爲龍圖其徒劉牧以爲易之河圖洛書也河南邵
雍又爲先天後天之圖宋之說易者翕然宗之以至
於今牢不可拔而易陰陽之大義蓋盡晦矣

大清有天下元和微士惠棟始考古義孟京荀鄭虞
氏作易漢學又自爲解釋曰周易述然掇拾於亡廢
之後左右采獲十无二三其所述大氏宗補虞氏而
未能盡通則旁徵他說以合之蓋從唐五代宋元明
朽壞散亂千有餘年區區修補收拾欲一旦而其道
復明斯固難也翻之學旣世又具見馬鄭荀宋氏書
考其是否故其義爲精又古書亡而漢魏師說可見

者十餘家然唯鄭荀虞三家畧有梗概可指說而虞
又較備然則求七十子之微言田何楊叔丁將軍之
所傳者舍虞氏之注其何所自焉故求其條貫明其
統例釋其疑滯信其亡闕爲虞氏義九卷又表其大
旨爲消息二卷庶以探蹟索隱存一家之學其所未
寤俟有道正焉耳見本序惠言又撰虞氏易禮易事易
候易言周易鄭荀義易義別錄易圖條辨儀禮圖說
文諧聲譜茗柯文集共數十卷惠言修學立行敦禮
自守人皆稱敬之見儀禮圖序鄉會兩試皆出朱珪門未
嘗以所能自異默然隨羣弟子進退而已珪潛察得

之則大嘉故屢進達之而惠言亦斷斷相諍不敢隱
惠言少爲辭賦嘗擬司馬相如揚雄之文及壯爲文
又效韓愈歐陽修善篆書嘗奉

命詣盛京篆

列聖加尊號玉寶

人雲山房集

其學要歸六經而尤深易

禮弟子從受易禮者以十數

儀禮圖序

孔興燮字起呂至聖六十六世孫也世居曲阜年十
三嗣其父衍植封爲衍聖公

世祖章皇帝順治元年

允山東撫臣方大猷之請

飭官崇祀復衍聖公及諸恩例衍植因乘傳入覲

上遣官迎勞於邸第給餼廩甚厚

陛見班列閣臣上

賜茶及宴

恩禮有加仍

命以太子太傅襲封衍聖公二年

賜三臺銀印四年冬十二月辛巳卒

遣官祭凡九

諭工部給資營冢五年子興燮襲爵興燮少凝重端
立臨事剛果有器識日以恪守先祀爲心闕里經明

季之亂廟廷圯壞禮樂殘缺凡衍植所未經修復者
晉新作之七年晉太子少保八年晉太子太保
賜清漢文三疊銀印九年十七年

世祖兩臨辟雍皆應

召率族人陪祀

賜賚優渥康熙六年冬十一月甲子卒

遣官賜祭葬如例子毓圻字鍾在襲封年甫十一初
入覲

召對瀛臺進退儀度悉如成人八年夏四月

聖祖仁皇帝臨幸太學如例陪祀禮成

昭聖太皇太后召見宮中

賜坐垂問家世

命宮人授茶及克食出內臣送至宮門外傳

懿旨諭從官善輔導之嘗預朝參退

上命由御道行其荷

寵眷之隆如此十四年晉太子少師二十三年

聖祖東巡還過曲阜釋奠如孔林毓圻因以擴林地

置守衛請

特命賜地十一頃有奇除租賦設百戶一員秩視衛
守備二十八年疏請重修聖廟

上特旨允行並

賜毓圻詩書禮樂匾額四十年

賜毓圻長子傳鐸二品服五十二年

召第五子傳鉦入監讀書六十一年

賜蔭一子五品官雍正元年

冊封孔子以上五代皆爲王爵建立崇聖祠詣京師

謝

恩旋臥病卒於京第

諭遣內大臣奠茶酒三品以上漢官會弔及輓歸

特命皇子親王率內大臣侍衛再奠茶酒行人司司

正護送馳全驛歸葬諡恭愍

世宗憲皇帝聖製碑文曰朕惟國家禮重尊師必顯
庸夫後裔誼隆眷舊宜誕沛乎殊榮稽盛典以易名
樹豐碑以示卹所以廣皇仁彰聖教也爾孔毓圻族
高東魯系本素王秉性樸誠荷天家之雨露持身謙
謹奉闕里之烝嘗勤職守於五十餘年承統緒於六
十七世朕誕膺寶祚篤念前徽晉五代之王封昭千
秋之祀典爾感恩入謝忽遘沈疴奄逝遽聞良深軫
惻旣厚飾終之禮復加論定之名素履允符曰恭曰
愍於戲溯泗水之淵源天章永煥望鳧山之峻峙雲

碣常新爰示寵施垂於無斁不亦休哉復

命葬日立碑日加祭各一次皆異數也毓圻以弱齡承籍先澤志殷報稱故自少至老敦率禮義倡明教學以風俗人心爲已任工擘窠書兼通繪事著恭紀聖祖幸魯盛典四十卷蘭堂遺藁二卷子傳鐸襲傳鐸字振路性恭謹和厚喜讀書工文詞究心濂洛關閩之學熟於三禮廟堂器物悉加釐訂又精律呂書嘗謂審律在得中聲雍正二年

世宗憲皇帝幸太學釋奠例陪祀以足疾艱拜跪特命次子繼溥代行禮是年六月癸巳孔廟災引罪

疏入

上遣官慰問尋

命大臣督工興建並

允增樂器庫值房諸處

賜傳鐸欽承聖緒扁額七年頒

世祖聖製人臣儆心錄

聖祖聖製文集詩經春秋傳說彙纂周易折中性理
精義朱子全書資治通鑑綱目古今圖書集成歷代
紀事年表四朝詩全唐詩律歷淵源音韻闡微萬言
廣訓及

聖製朋黨論周易本義義例啟蒙附論日講四書易
經書經解義性理大全淵鑑古文康熙字典淵鑑類
函繹史佩文韻府凡二十七種俾藏闕里九年以病
傳爵於長孫廣榮十三年夏四月傳鐸卒

賜祭葬如例著三傳合纂十二卷禮記摘藻一卷恭
紀

世宗修廟盛典五十卷讀古偶志一卷安懷堂文集
二卷申椒詩集二卷繪心集二卷盟鷗草一卷古文
源二卷長子繼濩字體和年二十三卒以子廣榮贈
衍聖公廣榮字京立好經術嫻禮儀雍正九年襲封

明年以林工告嚴率族人入謝蒙

諭曰至聖先師後裔當存聖賢之心行聖賢之事一切秉禮守義以驕奢爲戒且爾年尙少尤宜勤學讀書敦品勵行不但爾一人凡爾同族之人皆當共相勸戒共相砥礪爲端人正士爾等果能遵朕訓諭學問日進品行純謹不墜家聲卽所以報國矣廣榮頓首謝出

賜予甚優仍依故事宴於禮部歸益勵志於學顏其所居堂曰念典示弗敢怠也乾隆三年

高宗純皇帝臨雍如例入京上言元聖後裔東野氏

既蒙列於五經博士而周公實先師之所誦法其後人不得與觀禮之列殊所未安請一體陪祀得

旨允行時初行耕藉禮成進恭紀

親耕藉田頌

視學大禮慶成賦各一首四年秋祝

釐入京

特命侍仲秋經筵班聽講明年秋再預因奏請著爲令

從之六年奏列曲阜知縣孔毓琚不職狀毓琚亦訐以數事勘有異辭

詔原勿問而毓琚抵罪如議八年春正月辛酉卒

賜卹典如例著敏求齋文集八卷詩集四卷外集一卷子昭煥襲昭煥字顯文乾隆十三年

上幸魯釋奠酌酒孔林並

賜聖製詩以榮之又

賜聖製樂善堂全集日知舊說唐宋文醇十三經廿二史明年

頒清漢篆文一品三臺印十五年

賜聖書孔子廟碑文墨寶後屢因

南巡幸魯皆不次疊

賜墨寶圖籍不勝紀四十一年平定金川
遣官告林頒賞詣京謝

恩荷

寵以郊勞禮

特命攜子入紫光閣宴

恩遇之盛前古未有也四十七年上疏乞休秋八月
卒子憲培襲憲培字養元四十九年

駕幸闕里

溫旨慰諭訓誨讀書

賜聖製詩釋奠禮成

賞賚有加明年

幸太學

頒賜厚渥五十五年

幸魯還屆

八旬聖壽先後

賞賜倍渥五十八年冬十一月卒無嗣遺疏以弟憲

增子慶鎔爲嗣襲封如初

闕里志

孔繼涵字體生毓圻之孫乾隆三十六年進士戶部

雲南司主事篤於內行

墓志銘

與戴震交於天文地志

經學字義無不博綜

墓志銘

著有考工車度記補林氏

考工記解句股粟米法釋數同度記及水經釋地紅

櫚書屋詩文集

墓志銘

顏光猷光敏光敏並復聖顏子六十七世孫光猷字
秩宗康熙十年進士翰林院庶吉士刑部郎中河東
道鹽運使著易經說義光敏字遜甫康熙六年進士
吏部考工司郎中明律歷句股之數著未信編家誠
樂園舊雨堂詩集南行日記光敏字學山康熙二十
七年進士翰林院檢討提督浙江學政光敏莊重苦
志讀書好沈思清操訓士士感之

顏氏族譜龍灣戶
李克敬曲阜三顏

公傳

常生案

家大人昔撰儒林傳一百數十人乃集各書而成將成時卽出京總督漕運後史館中據此爲底稿畧刪數篇其不刪之人于篇句中亦有所刪然不刪者皆已定爲儒林傳傳爲史館文卽不得刊入私集至于已刪者卽非史文不妨削去儒林之名而收入私集故今檢稿集錄爲一篇收入擘經室續集又案漢書傳經皆著傳經各氏如易有施孟春秋有嚴顏是也漢易荀氏虞氏之學唐以來鮮有傳授至惠氏始治之及張氏惠言始專治虞氏而大明之漢春秋公羊氏唐以來亦鮮其傳至孔氏廣森始專治而大明之故錄其序語爲表章絕學計也

重建肇慶總督行臺并續題名碑記

兩廣總督若明韓雍王守仁皆駐兵廣西梧州而廣東肇慶廣州皆有行臺嘉靖四十三年總督吳桂芳

因東事重於西事始移駐肇慶以行臺爲署握各營勁兵爲兼顧之計誠據形勝也我

大清乾隆十一年總督策楞始常駐廣州以廣州之行臺爲督署肇慶之署爲行臺臺中久無居人堂室朽壞數十年來更全傾圮元來此皆瓦礫場惟石獅碑礎僅存矣近年廣東全海肅清內地安豐廣西邊徼亦皆綏靖元屢以簡閱東西官兵往來肇慶止宿於閱江樓上念此間爲兩省扼要地總督署雖移而兵不可移各營將尙皆有署乃總督於城中無一椽非政體道光五年於舊基重建行臺惟立門屏兩重

堂室兩重取可以校武暫駐而已無多構也復於堂
西開馬射之埒階上設步射之序階下可練小隊東
南建帥字旗修復城南礮臺庶幾體制得宜而往來
均便且重兵所在當務其本也堂前題名碑自乾隆
九年後未續刻爰書列之以續前而開後焉阮元記

那蘇圖

滿洲鑲黃旗人由閩浙總督乾隆九年任

策楞

滿洲鑲黃旗人由廣東巡撫太

子少傅乾

碩色

滿洲正黃旗人由河南巡撫乾隆十二年任

陳大受

湖南

祁陽人進士由吏部尚書

阿里衮

滿洲鑲黃旗人由兩湖總督乾

隆十七

班第

蒙古鑲黃旗人由兩江總督乾隆十八年任

楊應琚

奉天

旗人廕生由山東巡

陳宏謀

廣西臨桂人進士由江蘇巡撫乾隆二十

撫乾隆十九年任

三年任李侍堯漢軍正藍旗人廕生由廣蘇昌正滿洲

旗人監生由兩湖總督太子太保乾隆二十四年任李侍堯由兩湖總督太子太保內大臣

乾隆二十六年任楊廷璋漢軍鑲黃旗人監生由工李侍

堯由武英殿大學士昭信伯楊景素江蘇江都人

巡撫乾隆四十二年任桂林滿洲鑲藍旗人廕貢由四覺羅

巴延三滿洲正紅旗人生員由山舒常滿洲正日

湖總督乾隆四十五年任富勒渾滿洲正藍旗人由閩浙孫士

毅浙江仁和人進士由廣東福安康滿洲鑲黃旗

大臣太子太保協辦大學士長麟滿洲正藍旗人

撫乾隆五十四年任朱珪順天大興人戊辰進士由覺羅吉

慶

滿洲正白旗人由浙倭什布

滿洲正白旗人由山東巡撫嘉慶入

年

那彥成

滿洲正白旗人已酉進士

吳熊光

江蘇

人

休寧籍舉人由直隸總督嘉慶十年任

百齡

內務府正黃旗漢軍壬辰進士由山東巡撫嘉

慶十四

松筠

蒙古正藍旗人由兩江總督嘉慶十六年任

蔣攸銑

漢軍

旗人

甲辰進士由浙江巡撫嘉慶十七年任

阮元

江蘇儀徵人已酉進士由太子少保兩湖

總督嘉慶二

十二年任

英清峽鑿路造橋記

廣東英德清遠兩縣峽江爲各省通行之要路自宋

嘉祐六年轉運使榮諲始開峽山棧道明嘉靖四年

府判符錫曾修十五年兵備道吳憲復加修治

國朝康熙初元平南王重修歷今百有餘歲蕪圯極
矣行旅負絳之人陟傾厓縋危棧援竹木厲水石莫
不履險而畏其隕也道光五年元議修通之乃於閱
兵韶州時往來親督勘丈于三百七十餘里之中分
爲南中北三段南段自清遠縣白廟起至英德縣細
廟角止元率鹽運司翟公名錦督鹽商治之中段自
英德縣大廟峽起至新旺汛止上駟院卿督理粵海
關達公名達率洋商治之北段自英德箭徑山起至
彈子磯止廣東巡撫成公名成率南韶連道衍公名衍
慶治之凡平治道路二萬四千四百餘丈修造橋梁

一百四十五處鑿厓石疊棧級伐竹木六年秋工始畢用銀四萬九千兩有奇每年冬查勘修補一次以爲例時元將往滇池書此以記其歲月工段待後人視此程式耳

例贈儒林郎候選州同知蘭汀林公墓表

公諱閻字苑西號蘭汀江都人贈榮祿大夫浙江巡撫乾隆癸酉舉人閩大田令梅谿公第五子也梅谿公父諱文璉爲高郵大學士王文通公之孫壻蘭汀公繼配亦文通公之元孫女也公幼秉祖父詩禮之教敦孝弟之行補江都學生屢試高等補廩膳貢成

均善屬文尤長駢體亦善行楷書與兄霏崖公并以詩翰名于時年五十有四卒詩載淮海英靈集江蘇詩徵元配吳安人早歲卒繼配王安人有大家禮範以勤儉相夫生子悅曾怡曾悅曾有痼疾怡曾幼得母教讀書能文補江都學生復祖父之業孝養節母援例受州同知職故公例贈儒林郎配例贈安人王安人壽七十族戚共稱觴爲祝遽以疾終道光五年冬卜合葬於揚州西山添丁橋北左之原阮元爲公外甥怡曾屬元表墓公生於乾隆己未年卒於壬子年吳安人生於乾隆辛酉年卒於甲午年王安人生

於乾隆丙子年卒於道光乙酉年怡曾生子榮慶華
慶富慶

平樂府重建

至聖廟碑記

平樂府治背山面川峯巒秀發宋元學宮在城外明
遷城外鳳凰山麓

國朝順治康熙再修建百餘年多就傾朽道光二年
知府唐鑑倡議重建知縣常煜佐之于是各邑紳士
奮興從事鉅工乃集改舊正殿爲大成門而升建正
殿于後山高處是以基廓而地爽輪奐崇焉大成殿

崇三丈七尺有五寸廣六丈輪四丈五尺臺廣三丈九尺輪三丈六尺兩廡崇丈八尺左名宦祠右鄉賢祠改舊尊經閣爲崇聖祠左尊經閣右昭文閣以舊啟聖祠爲明倫堂泮池門壁皆徹新之道光三年工旣成九月壬午奉 聖賢主入廟元適以簡閱官兵來西省丙戌至平樂官士以修廟事告元入廟拜瞻敬且喜焉夫修建

至聖廟乃官吏紳士職誼當爲之事無所爲譽惟是時

天子承平敷政四海乂安兩廣疊出三元會元狀元

科名鼎盛元之至此官稱士民之安仁而好義士民
愛戴長官惜其去也留之思之自元發兵搜山賊之
後各邑民能以保甲自聯安靜無警連歲農田豐熟
是可慰矣今而後文官廉明以養民武官治兵以衛
民士讀經史敦孝弟修天爵而人爵從之凡事皆當
質諸廟中 聖賢而不悖以明其道豈以新廟翼翼
而計其功哉官士請記其事爰書付紳士汪呈玉關
士馨李直等勒于石

南昌府同知璧堂徐君傳

君姓徐名聯奎字璧堂號訥齋浙江山陰人先世由

奉化遷郡城遂入籍祖禹謨父宗元博涉經史有文學以鹽大使借補縣丞罷官歸投生徒以自給君少力學督學于文襄公拔第一人入學試輒高等督學雷公鉉寶公光鼐皆賞拔之食廩餼舉優行中乾隆乙酉科舉人丙戌科進士引

見以知縣卽用授江西東鄉縣知縣巡撫吳公紹詩知君名卽擬調南昌縣君以資淺辭歲餘終以人品端方才猷練達奏調之乾隆三十六年擢南昌府吳城鎮同知四十一年丁母陳憂四十三年服闋江西巡撫奏取督辦堤工四十五年補景德鎮同知大計

卓異保薦四十八年調南昌府同知四十九年以俸
深部推陞湖北鄖陽府知府俄因事連累落職君爲
同僚分謗絕口不辯恬然歸田不再仕矣君少孤得
母教堅苦力學文律深細無所不到入學後迺出佐
司道府幕以其資供孝養是以吏治明于未官時及
官首縣同知凡省中重案多委君審之大吏章奏亦
每就君屬其稿故君以一同知歷署吉安瑞州建昌
南康南安袁州各府事而署撫州九江府者再蓋君
之德與才有爲列郡守所遠不及者乃甫陞一守卽
不復仕命也君雖精于吏事而不輕定讞秉燭披牘

夜分無倦所至書大堂楹曰眼前皆赤子頭上是青天其聽訟皆以平心易氣及人所不經意處得之東鄉民甲與乙爭山對簿呈契君曰僞耳焉有雍正年書券而預避乾隆年

御名者永豐生員甲誣乙侵其地擅毀乙屋久不理君詰其據甲以族譜家塾八景圖說爲證君曰圖內有大江環左小江遶右之語大小江亦爾家所有乎且滕王閣詩序有衡陽之浦若藉辭管地則湖南爲江西所屬矣星子民斧荒山柴村人謂其竊墓樹毆之民以斧傷村人手縣令以罪人毆所捕人折傷擬

絞君驗契量地地浮二畝有奇斧柴者官地也減其
罪廬陵民捕獸置窩弓斃行人縣令謂已如例設望
竿及抹眉索免其罪君詢民望竿何物抹眉索何狀
民無以應蓋縣胥教之也論以罪臨川民李某寓宜
昌時方捕逃兵李某官以其姓同執之擬斬李某訴
原籍實臨川父母故惟伯父存湖北移江西其伯父
畏累稱無姪君迹得其父母墓碑名氏合移覆得免
死興安生員之子娶婦嗔丐者強索食毆斃之辭未
定生員死于獄子告縣令枉其父曰丐死在前月某
日娶婦在後月某日君檢舊時憲書後月日不吉前

月日吉出書示之詐乃破上猶民婦曾某氏夫久出見河有腐屍遂控素有仇之廖某斃其夫獄久不定君取死者遺物厯檢之于荷包中得典票字曰中姓物知死者姓鍾寫典票者皆省鍾爲中也南昌民有殺人于家者家止夫婦恃無證堅不承君步至其家搜得男子履四二大二小訛有甥同居拘其甥鞫之悉得其殺人狀樂安民甲與乙鬥甲迎面倒拉乙髮辯乙擠甲腎死屢伏屢反君鞫之伏如前然料其必再反驗乙髮脫其半詰曰脫髮安在乙曰獄中薙髮者梳取矣詰薙髮人及禁卒語相符遂不復反其他

摘奸發伏盡心無冤者多類此君服官廿餘載所至
興利除弊治莠安良修舉普濟育嬰諸堂澤及枯骨
去官之日百姓每奔走哭送官南昌時圩堤圯于水
君躬勸富戶修築有漳湖者皆貧農君捐俸爲倡市
賈從輸得錢兩月工竣萬畝賴之學宮圯苦建費逾
萬君倡修上官難之君具牘請曰所虞捐工之弊有
三官侵吏擾董事不實也今某尙堪自問亦頗見諒
于士民吏胥不涉手董事選得人必無害令下士民
樂輸工成焉君素廉儉居官如寒士官俸外不名一
錢罷官後無以自給尙以章奏幕應聘如秦晉豫皆

至焉元任浙江巡撫初致之幕友不合意次年訪知君在山陰乃禮聘君君亦慨然相助凡治漕治災賑治倉庫治海盜多得君之益且是時元年方三十七君年已七十餘每從君問舊事論世務多聞老成閱歷之言元去浙後巡撫清公安泰蔣公攸銘亦皆延致之君年六十後始舉二子曰之瓚曰寅皆生員道光二年卒于家年九十有三

誥授奉政大夫乾隆五十五年

萬壽恩賞復原階所著有筠心堂詩古文蘭亭志

熙朝颺言錄暢風軒隨錄宦篋偶存西江政畧關中

紀要中州陵墓錄晉陽陵墓錄各若干卷

高郵孝臣李君傳

李君諱惇字成裕又字孝臣先世蘇州人遷揚州高郵州祖父皆以州文學力行善事司普濟育嬰堂盡其力施藥救病節衣食爲之君幼讀書穎異七歲卽知解經有神童之目十二歲孤旣長博極羣書尤邃經傳與同里賈君稻孫王君懷祖同力于學興化顧君文子任君子田寶應劉君端臨江都汪君容甫歙程君易田皆學術掣摩極一時之盛君以品行爲立身定命之本事母孝侍疾居喪皆盡禮貌質直寡言

惟講學則盡其辨乾隆丁酉試拔貢學使謝金圃侍郎屬意焉及試期不來詰之則前一日賈君稻孫卒于泰州試館君營棺斂事竟不赴試學使歎曰李生以博學名而敦行復乃爾誠今之古人也已亥中式舉人庚子會試中式第二學使彭芸楣侍郎聘主暨陽書院勵諸生以經學乾隆五十年年五十一以疾卒子培紫培碧培黃降服培青君所著書有羣經識小左傳通釋古文尚書論毛詩三條辨渾天圖說讀史碎金諸書而識小八卷考諸經古義二百二十餘事事事精確不磨發前人所未發元己刻入

皇清經解

碧雞臺記


雲貴總督駐滇池之上節院寬敞東有宜園古木時
花爲城中勝境登東北山臺已見金馬諸山松嵐疊
翠矣而滇池北渚及碧雞諸山皆在西南不能見也
昔署西南有高樓登之可以望西南樓久圯道光六
年余初到滇子福構木臺以復其境今四年矣木漸
朽遂徹之而遷其臺于署西北隅廢圃澹泉西南七
丈許臺以七千土壑疊成之縱橫上下皆一丈三尺
工樸用省成之甚易臺腹以梯旋而上臺上又立四


壁爲八尺之瓦屋寬其西南窗使全攬碧雞玉案諸山之勝遠眺滇池近挹華浦碧雞關戍如在几案太華諸寺隱現于華山之麓朝霞暮靄風雲變幻殷雷快雪凍雨皓月皆可于臺上收之舟帆往來耕犢出入春稼秋穫星回火節亦皆可于臺上遇之臺成招幕中賓客落之議所以爲臺之名昔李贊皇帥蜀建籌邊樓而邊壘一新然其時滇境非其所有土番內侵維州偶降復陷衆戮豈若我


大清德威外薄凡韋忠武李贊皇所焦思竭力遠阻近逼之地今皆宴然爲郡縣西南外夷如緬甸南掌

交趾皆奉表入貢攸服奔走余以衰老腐儒奉
使持節坐鎮之而不必有所更張設施惟以崇

國德威休養民生爲事所以政簡身閒得與賓客登
臺興復不淺也又安用侈其名而矜之乎則名之曰
碧雞臺可已







擘經室集

一七

מסכת תענית
פרק ו' הלכה א'
אמר ר' יוחנן
אין אדם יכול
לעמוד יום אחד
בשנה וכו'

אמר ר' יוחנן
אין אדם יכול
לעמוד יום אחד
בשנה וכו'

26
149
J8
y46
v17
學經室續三集

荀子引道經解

荀子此篇言知道者皆當專心壹志虛靜而清明不
爲禍蔽故曰昔者舜之治天下也不以事詔而萬物
成處一危之其榮滿側養一之微榮矣而未知道經
曰人心之危道心之微危微之機惟明君子而後能
知之元按後人在尚書內解此者姑勿論今但就荀
子言荀子其意則曰舜身行人事而處以專壹且時
加以戒懼之心所謂危之也惟其危之所以滿側皆
獲安榮此人所知也舜心見道而養以專壹在於幾

微其心安榮則他人未知也如此解之則引道經及明君子二句與前後各節皆相通矣楊倞謂危之當作之危非也危之者懼蔽於欲而慮危也之危者已蔽於欲而陷危也元謂榮爲安榮者荀子儒效篇曰爲君子則常安榮矣爲小人則常危辱矣凡人莫不欲安榮而惡危辱據此則荀子常以安榮與危辱相對爲言此篇言處一危之其榮滿側若不以本書儒效篇證之則危榮二字難得其解矣故解道經當以荀子此說爲正非所論於古文尚書也又考道經者黃老古說也此等古說周漢之間尚多存者故大戴

記武王踐阼篇武王問黃帝顓頊之道師尙父曰在
丹書尙父西面述道書之言曰敬勝怠者吉怠勝敬
者滅義勝欲者從欲勝義者凶然則荀子戴記所謂
道經道書者皆黃老之古說與今老子五千言又少
異且虞書尙無耆字何況黃帝之時然則此書亦周
人所託耳

塔性說

東漢時稱釋教之法之人皆曰浮屠而其所居所崇
者則別有一物或七層九層層層梯闌高十數丈梵
語稱之曰窣堵波

見後魏碑及妙法蓮華經音義唐以來詩文家稱之爲浮圖誤也此

浮圖家之傑構卽今之塔不可直稱曰浮圖

晉宋姚秦間翻譯佛經者執

此窳堵波求之於中國則無物無文字以當之或以類相擬可譯之曰臺乎然臺不能如其高妙于是別造一字曰塔以當之

說文無塔字塔字始見于葛洪字苑玉篇等書

絕不與

臺相混塔自高其爲塔而臺亦不失其爲臺至于翻譯性字則不然浮屠家說有物焉具于人未生之初虛靈圓淨光明寂照人受之以生或爲嗜欲所昏則必靜身養心而後復見其爲父母未生時本來面目此何名耶無得而稱也卽有梵語可稱亦不過如窳堵坡徒有其音而已晉宋姚秦人翻譯者執此物求

之於中國經典內

經典釋文所謂
典者老莊也

有一性字似乎相

近彼時經中性字縱不近彼時典中性字已相近

莊子

性字本是天生自然之物駢拇馬蹄之喻最爲明顯
莊子曰繕性於俗學以求復其初謂之蒙蔽之民附
之以文益之以博文滅質博溺心然後民始惑亂無
以反其性情而復其初是莊子此言復性謂復其自
然也晉人讀老莊者最重自然故與佛所謂性相近
也李習之復性書之復初則竊取佛老之說以亂儒
經顯然于是取以當彼無得而稱之物此譬如執臺
字以當翠堵波而不別造塔字也所以不別造字者
此時中國文人已羣崇典中之性字就其所崇者而
取之且若以典中性字之解不若釋家無得而稱之
物尤爲高妙典中之解性字未盡其妙也然而與儒

經尚無涉也唐李習之以爲不然曰吾儒家自有性
道不可入於二氏於是作復性書其下筆之字明是
召誥卷阿論語孟子見余所著性命古訓內从心从生之性字
其悟于心而著于書者仍是浮屠家無得而稱之物
此譬如今人以塔爲西域夷人所居甚卑屏之而其
所造所居所崇者必以臺且曰此毛詩內文王之靈
臺月令內高明之臺皆古人禮法之所構造吾所居
所崇必以此及問以爾臺何形則曰高妙之至七級
九級六窗八窗欄杆齊雲相輪耀日嗚呼是直以塔
爲臺口崇古臺而心炫西塔外用臺名內用塔實也

是故翻譯者但以典中性字當佛經無得而稱之物而唐人更以經中性字當之也佛經明心而見之物原極高明淨妙此與莊子復初之性已爲不同特惜與召誥孟子之性更相去萬里翻譯者不別造一字以當其無得而稱者而以典中性字當之不及別造塔字之有分別也

復性辨

莊子繕性篇曰繕性于俗學以求復其初滑欲于俗思以求致其明謂之蒙蔽之民又曰堯舜始爲天下興治化之流凜淳散朴離道以善險德以行然後去性而從於心心與心識知而不足以定天下然後附

之以文益之以博文滅質博溺心然後民始惑亂無以反其性情而復其初元讀莊子未嘗不歎其說爲堯舜孔顏之變局也彼所謂性卽馬蹄天放也卽所謂初也以天放爲初而復之此老莊之學也唐李翱復性之書卽本之於此而反飾爲孔顏之學外孔顏而內老莊也內莊已不可矣況又由莊入禪乎文與博正是周孔顏曾之學而莊子以爲滅溺無以復性之初然則禪家不立語言文字儒家借良知爲宗旨非以莊子此說爲祖乎周孔顏曾之學首重文博後人才力淺弱不能文不能博有復初之一說焉可以

不讀書日安佚而其名愈高孰不樂趨之此亦如六朝佛典太繁釋家別開禪學可以不說一切經而面壁見性也

書東莞陳氏學菴通辯後

朱子中年講理固已精實晚年講禮尤耐繁難誠有見乎理必出于禮也古今所以治天下者禮也五倫皆禮故宜忠宜孝卽理也然三代文質損益甚多且如殷尚白周尚赤禮也使居周而有尚白者若以非禮折之則人不能爭以非理折之則不能無爭矣故理必附乎禮以行空言理則可彼可此之邪說起矣

如朱子議與趙絃等不合

朱子晚年與李季章書曰累年欲修儀禮一書釐析章句而附以傳記近方了得十許篇似頗可觀其餘度亦歲前可了自此之後便可塊然兀坐以畢餘生不復有世間念矣又曰熹今歲益衰足弱不能自隨兩脅氣痛攻注下體結聚成塊皆前所未有精神筋力大非前日之比加以親舊凋零如蔡季通呂子約皆死貶所令人痛心益無生意決不能復支久矣所以未免惜此餘日正爲所編禮傳已略見端緒而未能卒就若更得年餘間未死且與了却亦可以瞑目矣荅應仁仲書云所喻編禮如此固佳

然却太移動本文恐亦未便耳老病益侵而友朋相望皆在千百里外恐此日不能成爲終身之恨矣荅葉味道書云禮書未能得了而衰病日侵恐未必能究竟此事也又荅李季章書云國君承祖父之重康成注賈疏其義重備若已預知後世當有此事者

朱按

子所據者乃禮記喪服小記不繼祖與禰句下孔疏引鄭志荅趙商之文故朱子有向無鄭康成則此事終未有斷決之語建炎以來朝野雜記所載不誤而此書以爲鄭注賈疏則又涉及儀禮喪服傳父爲長子三年句儉人舞文弄法迷國誤朝飾邪說以蔽害下疏文也

之甚可歎也又庚申易簣前一日與黃直卿書云喪禮詳畧皆已得中矣臣禮一篇兼舊本今先附案一

面整理病昏且倦作字不成所懷千萬徒切悽黯此
朱子一生拳拳于君國大事聖賢禮經晚年益精益
勤之明證確據若如王陽明誣朱子以晚年定論之
說直似朱子晚年厭棄經疏忘情禮教但如禪家之
簡靜不必煩勞不必悽黯矣適相反矣然則三禮注
疏學者何可不讀蓋未有象山篁墩陽明而肯讀儀
禮注疏者也其視諸經注疏直以爲支離喪志者也
豈有朱子守孔顏博文約禮之訓而晚悔支離者哉
此清瀾陳氏所未及亦學海堂諸人所未言者故特
著之

學部通辨序

道光八年春粵中學人寄學部通辨來滇請序元謂此書

四庫全書目錄載在子部儒家注云

內府藏本是此書曾爲

內府所藏而非外省所進也此書專辨朱陸異同推尊朱子

四庫書提要曰朱陸之書具在其異同本不待辨王守仁輯朱子晚年定論顛倒歲月之先後以牽就其說固不免矯誣然建此書痛詆陸氏至以病狂失心

目之亦未能平允元於東園清暇重加披閱遵提要之言手將病狂失心等語加以刪削而還之蓋除此所刪則皆表章正學之要言卽有過激之論無非欲辨朱子之誣粵中學人固當知此鄉先生學博識高爲三百年來之崇議也

文韻說

福問曰文心雕龍云今之常言有文有筆以爲無韻者筆也有韻者文也據此則梁時恒言有韻者乃可謂之文而昭明文選所選之文不押韻脚者甚多何也曰梁時恒言所謂韻者固指押脚韻亦兼謂章句

中之音韻卽古人所言之宮羽今人所言之平仄也
福曰唐人四六之平仄似非所論于梁以前曰此不
然八代不押韻之文其中奇隅相生頓挫抑揚詠歎
聲情皆有合乎音韻宮羽者詩騷而後莫不皆然而
沈約矜爲新獲故于謝靈運傳論曰夫五色相宣八
音協暢由乎元黃律呂各適物宜欲使宮羽相變低
昂舛節若前有浮聲則後須切響一簡之內音韻盡
殊兩句之中輕重悉異妙達此旨始可言文又曰自
靈均以來此秘未覩至于高言妙句音韻天成皆暗
于理合匪由思至又沈約荅陸厥書云韻與不韻復

有精粗輪扁不能言之老夫亦不盡辨休文此說乃指各文章句之內有音韻宮羽而言非謂句末之押脚韻也卽如雌霓連蜺霓字必讀仄聲是也是以聲韻流變而成四六亦祇論章句中之平仄不復有押脚韻也四六乃有韻文之極致不得謂之爲無韻之文也昭明所選不押韻脚之文本皆奇偶相生有聲音者所謂韻也休文所矜爲剏獲者謂漢魏之音韻乃暗合于無心休文之音韻乃多出于意匠也豈知漢魏以來之音韻溯其本原亦久出于經哉孔子自名其言易者曰文此千古文章之祖文言固有韻矣而亦有平仄聲音

焉卽如濕燥龍虎觀上下八句何等聲音無論龍虎
二句不可顛倒若改爲龍虎燥濕觀卽無聲音矣無
論其德其明其序其吉凶四句不可錯亂若倒不知
退于不知亡不知喪之後卽無聲音矣此豈聖人天
成暗合全不由于思至哉由此推之知自古聖賢屬
文時亦皆有意匠矣然則此法肇開于孔子而文人
沿之休文謂靈均以來此秘未覩正所謂文人相輕
者矣不特文言也文言之後以時代相次則及于卜
子夏之詩大序序曰情發于聲聲成文謂之音又曰
主文而譎諫又曰長言之不足則嗟歎之鄭康成曰

聲謂宮商角徵羽也聲成文者宮商上下相應主文
主與樂之宮商相應也此子夏直指詩之聲音而謂
之文也不指翰藻也然則孔子文言之義益明矣蓋
孔子文言繫辭亦皆奇偶相生有聲音嗟歎以成文
者也聲音卽韻也詩關雎鳩洲逮押脚有韻而女字
不韻得服側押脚有韻而哉字不韻此正子夏所謂
聲成文之宮羽也此豈詩人暗于韻合匪由思至哉
王懷祖先生云三百篇用韻有字字相對極密非後
人所有者如有瀾有鷺濟盈雉鳴不求濡其軌牡鳳
凰梧桐鳴矣生矣于彼于彼高岡朝陽萃萃雍雍萋
萋喈喈無一字不相韻此豈詩人天成暗合全無意
匠于其間哉此卽子夏所謂聲成文之顯然可見者子夏此序文選選之亦因

其中有抑揚詠歎之聲音且多偶句也

鄉人邦國偶一風教偶二

為志為詩偶三手之足之偶四治世亂世亡國偶五天地鬼神偶六聲教人倫教化風俗偶七八化下刺上偶九言之聞之偶十禮義政教偶十一國異家殊偶十二傷人倫哀刑政偶十三發乎情止乎禮義偶十四謂之風謂之雅偶十五繫之周繫之召偶十六正始王化偶十七哀窮窵思賢才偶十八其偶之長者如周公召公即比也後世四書文之比基于此

綜而論之凡文者在聲為

宮商在色為翰藻即如孔子文言雲龍風虎一節乃

千古宮商翰藻奇偶之祖非一朝一夕之故一節乃

千古嗟歎成文之祖子夏詩序情文聲音一節乃千

古聲韻性情排偶之祖吾固曰韻者即聲音也聲音

即文也

韻字不見于說文而王復齋楚公鐘篆文內實有韻字从音从勻許氏所未收之古文也

然則今人所便單行之文極其奧折奔放者乃古之
筆非古之文也沈約之說或可橫指爲八代之衰體
孔子子夏之文體豈亦衰乎是故唐人四六之音韻
雖愚者能效之上溯齊梁中材已有所限若漢魏以
上至于孔卜此非上哲不能擬也乙酉三月閱兵香
山阻風舟中筆以訓福

學海堂策問

儒字造字之意何在儒名始於何代儒行始於何時
魯孔子時顏曾諸賢之儒行所尊尚者何等事所講
習者何等事其大指何在當細繹魯國聖賢言行在

孝經論語大小戴禮記諸經經文內者以求儒之正本大原而釋之至於荀楊及漢唐宋各家之說且不必涉及不必辨論

自東晉劉宋至隋兼北朝其間經史諸學皆是極精極博極明敏之時南北朝人學力之專之銳之深非後人所能窺企中唐以後人蔑視六朝不知唐初諸經正義及敕修諸史無不本於南北朝人或攘或掩實存而名亡後人於南北朝之書多不能解卽如陸法言等之音韻分部幸爲中唐以後人所不能解故未經攘亂

韻學自法窮極精力

國朝顧江戴段諸君始明古然皆久在陸法言等所定範

圍之其餘如三劉熊徐等之於經疏呂忱李登等之
中於小學庾蔚之崔靈恩等之於禮服徐廣臧榮緒姚
察等之於史傳皆非唐人所能及唐初人猶讀南北
朝人之書天寶後知其學者鮮矣試論而表章之
今大小西洋之厯法來至中國在於何時所由何路
小西洋卽今港脚等國在今回疆之南古天竺等處
元之回回厯是否如明大西洋新法之由廣東海舶
而來大小西洋之法自必亦如中國之由疏而密但
孰先孰後孰密孰疏其創始造厯由今上溯若干年
準中國之何代何年西法言依巴谷在漢武帝周顯

王時確否六朝番舶已與廣東相通故達摩得入中國中國漢郊萌已有諸曜不附天之說後秦姜岌已有游氣之論宋何承天立強弱二率齊祖沖之立歲差等法皆比漢爲密與明來之大西洋新法相合是皆在達摩未入中國前也至於唐時市舶與西洋各國往來更熟元之回回法明之大西洋新法如是古法何以不來於唐九執法之前九執法又自何來且西洋又何以名借根方爲東來法也其考證之

唐宋人每輕視漢魏六朝人以爲無足論無論宋齊疏義斷非唐以後人所能爲卽如邵公之爲人絕無

可議其學如海亦非後人所能窺公羊之學與董子繁露相表裏今能通之者有幾人哉不能通之而一概掃之可乎試爲漢何邵公贊

四書文話序

唐以詩賦取士何嘗少正人明以四書文取士何嘗無邪黨惟是人有三等上等之人無論爲何藝所取皆歸于正下等之人無論爲何藝所取亦歸于邪中等之人最多若以四書文囿之則其聰明不暇旁涉才力限于功令平日所誦習惟程朱之說少壯所揣摩皆道理之文所以篤謹自守潛移默化有補于世

道人心者甚多勝于詩賦遠矣唐宋詩話多文話少而明以來四書文話更少非無話也無纂之者也余令學海堂諸生周以清侯康胡調德纂之諸生共議分二十四門編之一原始二功令三格式四法律五體裁六命題七程文八稿本九選本十墨卷十一社稿十二元證十三名譽十四考核十五師承十六風氣十七興廢十八流弊十九起衰二十假借二十一咎毀二十二談藪二十三軼事二十四五經文雖未甚精詳然已積卷帙矣錄成二部一存粵東學海堂一攜歸江南蓋江南遺文舊說爲嶺南所無者尚多

俟再令家塾子弟補成之時甲申冬日

摹刻詒晉齋華山碑全字跋

嘉慶十四年余摹刻漢延熹華山碑未翦本於北湖祠樓其右方缺石一由全缺者七十八字半缺者三十三字因以家藏歐陽文忠公華山碑跋墨蹟摹補於缺空處俄入京師得見成親王所藏已翦本雖無碑額題名而余碑缺字彼皆未缺遂借鈎入未翦本缺空處道光三年在廣州購端州巨硯材復摹刻成親王本未缺之字及後銘詞內民說二字同置祠樓若兩石並揭遂成全碑矣好古者以兩揭本翦補合

裝爲一碑可留歐公書而分裝之亦可

兩浙金石志序

余在浙久遊浙之名山大川殆遍錄浙人之詩數千家成兩浙輶軒錄刻之訪兩浙帝王賢哲之陵墓加以修護成防護錄刻之以其餘力及于金石刻搜訪摹搨頗窮幽遠又勒成兩浙金石志一書爾時助余搜訪考證者則有趙晉齋魏何夢華元錫諸君子許周生兵部宗彥亦多考訂增益且錄全藁以去匆匆十餘年矣道光四年粵中有鈔本十八卷校原藁文有所刪鐘鼎錢印之不定爲浙物者亦多所刪然亦

簡明可喜李鐵橋廉訪

法

率浙人之官于粵者校刻

之不兩月而工畢今而後藏板於浙印書通行使古金石自會稽秦石刻以下迄于元末皆著於篇好古者得有所稽不亦善歟夏五月望日書於嶺南節院之定靜堂

宋揭醴泉銘殘字跋

凡六朝唐人之碑別有一種筆力良由製筆之工尚存古法今世之筆特湖州工人所造便于松雪筆法耳于北朝隋唐之碑直是不合試細觀此碑筆當用何等柱豪何等裏毛精思巧製若得此等筆則古書

法不亡矣

與學海堂吳學博

蘭修書

自陸澧言等定四聲韻爲二百六韻之後唐人作詩
賦并窄爲寬沿至今祇一百六韻矣以今韻爲今詩
文則可若作古賦詩辭而用今韻不今不古識者哂
之至於唐宋以來獨用通用淺人所爲已鮮依據或
且臆以時俗土音動輒亂用直似以元人劇曲之韻
擬唐人爲律賦更不如今一百六韻矣豈有不明音
韻篆文訓詁能上擬相如子雲者哉

卽如昌黎進學解韻臆用無法

世罕知

然則將奈何因思古韻之分合近惟金壇段

氏若膺六書音均表十七部爲善如之脂支哈四韻
唐人皆并爲四支合用孰知羣經楚辭皆斷分三部
絕不相混文選亦分不通用乎高郵王懷祖先生精
研六書音韻欲著古音一書因段氏成書遂卽輟筆
余三十年前卽聞此論然其分廿一部甄極詩騷剖析豪芒不
但密于段氏更有密于陸氏者予屢欲并廣韻而以
古音分部使便於擬漢以上文章辭賦者取用之迄
未暇爲之計學海堂中年兄深擘古音曷就段氏精
審之而進以王氏之學定爲古韻廿一部以羣經楚
辭爲之根柢爲之圍範庶無隔部臆用之謬乎或曰

漢晉文章之韻已有出此圍範者奈何以此限之荅
曰漢晉文章齊梁之韻雖寬而之支脂等韻未曾通
雜若學漢晉文辭而更能謹守此漢晉以上之韻取
法乎上撥亂韻而反之正不更善乎況以今韻一百
六韻而并爲廿一部已寬之至矣學者亦何憚而不
用此韻哉年兄試再與堂中林曾楊諸子商榷寫定
卽如廿一部至質須在各韻中將
各字提摘而出而刪去彼韻之字卽可在堂中棊板
成帙不過數萬大字卽可嘉惠學古之士子雖老亦
樂得觀之且可以分授家鄉子弟矣庚寅閏月

虞山張氏詒經堂記

唐人云前不見古人後不見來者然則人生所見數十年耳將欲使後人見今如今人見古傳聖賢之事記文史之詳殆非書不可虞山張氏

金吾

世傳家學

代有藏書不但多藏書至八萬餘卷且撰書至二百餘卷不但多撰書抑且多刻書至千數百卷其所纂箸校刻者古人實賴此與後人接見也後人亦賴此及見古人也是詒經堂詩史閣求舊書莊諸地皆羅列古今人使後人共見之地也此於古今人謂之有功於已謂之有福夫遺金不如詒經猶徒爲一家讀書計耳曷若以書公之天下後世乎世之有金者無

所不爲獨不肯用之於書若是者謂之無福若在必
無學術焉則雖有之肯之亦無能用之若是者亦謂
之無福雖然福不可擅也福雖不可擅而有功以補
之則其得此福而居之也豈不宜哉因詒經堂主人
求記而論之如此

金子青

學蓮

詩集序

己丑春子青子以詩集寄滇南元於東園暇日往復
披讀如見久別之友且益慨然於其才與遇也子青
子詩驚采絕豔宛委沉鬱兼慕唐之三李而得其神
理長吉短命而子青則甚壽義山坎壈且有毀而子

青爲名門之壻處節使之幕恬淡不干榮利有譽於
時太白得入翰林而子青無官然太白仙才固不以
翰林重且今人讀唐人詩者無不醉心於義山而於
令狐氏則無聞焉文章之事固有不能以位競者歟
子青子何愠焉子青近年之集皆客隱於竹西草堂
所作也元竹西人也弱冠後惟持服三年居竹西計
子青子詩之在竹西者前後數十年湖山登眺交遊
贈荅讀其詩憶其地懷其人豈能無故鄉舊友之感
哉韻語一函長江萬里年如逝水思切停雲聊寄數
言解慰此情云爾

終

挈經室續四集

謝

賜御筆福字壽字鹿肉摺子

奏爲恭謝

天恩事道光三年正月二十日

臣

齋摺差弁回粵欽

蒙

皇上恩賜

御書福字壽字並鹿肉到

臣

當卽出郊跪迎至署恭

設香案望

闕叩頭祇領伏念

臣

廿載封圻六旬頽齒常懼涓埃

未效實慙廩祿虛糜昨歲入

覲

天顏渥邀

帝賚茲復特叨

恩澤

倍錫春祺已

賜福箋珍隨甲鹿更

加壽幅繪繞雲龍

臣

敬念福者備也

臣

何以備宣

聖德於蒼生壽者酬也

臣

何以酬報

隆施於

丹陛再臣犬馬之齒甲子已周氣力不充髣髴多白
悚惶無地頓忘蒲柳之先衰平格自

天益凜桑榆之有失惟勤思職業仰荅

國恩推

景福於兩粵東西北民有慶頌

聖壽於萬年億秭南極無疆所有臣感激欣悚下忱

謹繕摺具

奏叩謝

天恩伏乞

皇上聖鑒謹

奏

祭

南海神廟文

惟道光五年三月己亥日

太子少保兵部尙書都察院右都御史總督廣東廣西等處地方軍務阮元致祭于

南海神廟曰五嶺之南至于海濱洋洋萬里迺廣迺輪祝融正位實爲

大神惟

神之德順天布仁惟

神之威如雷發春內清外晏無波無塵風和雨節年
豐俗淳戈船估舶息浪通津遠服夷國近育粵人元
奉
帝命部伍是巡舟廻海外祀事再親敬將俎豆祈
神福民尚
饗

節性齋銘

周初召誥肇言節性周末孟子互言性命性善之說
秉彝可證命哲命吉初生卽定終命彌性求至各正
邁勉其德品節其行復性說興流爲主靜由莊而釋

見性如鏡考之姬孟實相逕庭若合古訓尚曰居敬

蘇文忠公象贊

象摹內殿蘇齋曾見嶺南洺山又逢真面古人精神

成書立傳古人衣冠夢中頓現

胡甸切假現爲現較雅

注目生

光如影如電

陸宣公從祀廟廡頌

於戲宣公旣文且忠未嘗講學實踐在躬以仁輔世
以義立功學孟子學異乎禪宗請祀孔廟

帝曰當從

及門吳給事傑奏請從祀奉
旨准行給事寄冊索文因爲此頌福謹識

學海堂集序

古者卿大夫士皆有師法周公尚文範之以禮尼山
論道順之以孝是故約禮之始必重博文篤行之先
尚資明辨詩書垂其彛訓傳記述其法語學者誦行
畢生莫罄譬之食必菽粟日不可廢居必棟宇人所
共知奚更立言以歧古教哉若夫載籍極博束閣不
觀非學也多文殊體輟筆不習非學也次困之士厪
眄勉於科名語上之儔詎愚蔽其耳目率曰乏才豈
其然歟嶺南學術首開兩漢著作始於孝元治經肇
於黃董古冊雖失佚文尚存經學之興已在二千載

上矣有唐曲江誠明忠正求之後代孰能逮之蹟其
初學乃多詞賦耳文辭亦聖教也曷可忽諸

大清文治由朔暨南明都著於因民離曜增於往代
余本經生來總百粵政事之暇樂觀士業曩者撫浙
海氛未銷日督戈船猶開黌舍矧茲清晏何獨闕然
粵秀山峙廣州城北越王臺故址也山半石巖古木
蔭翳綠榕紅棉交柯接葉闢萊數丈學海堂啟焉珠
江獅海雲濤飛汎於其前三城萬井烟靄開闔於其
下茂林暑旻先來天際之涼高欄夕風已生海上之
月六藝於此發其秀輝百寶所集避其神采洵文苑

之麗區儒林之古境也昔者何邵公學無不通進退
忠直聿有學海之譽與康成並舉惟此山堂吞吐潮
汐近取於海乃見主名多士或習經傳尋疏義於宋
齊或解文字考故訓於倉雅或析道理守晦菴之正
傳或討史志求深寧之家法或且規矩漢晉熟精蕭
選師法唐宋各得詩筆雖性之所近業有殊工而力
有可兼事亦竝擅若廼志在爲山虧於不至之譏情
止盈科未達進放之本此受蒙於淺隘而已烏覩百
川之滙南溟哉道光四年新堂旣成初集斯勒四載
以來有筆有文凡十五課潛修實踐之士聰穎博雅

之材著書至於仰屋豈爲窮愁論文期於賤璧是在
不朽及斯堂也升高者賦其所能觀濶者得其爲術
息焉游焉不亦傳之久而行之遠歟

謝

御賜福字壽字并奶餅乾果摺

奏爲恭謝

天恩事竊

臣

齋摺差弁回滇捧到

恩賞

御書福字壽字并奶餅乾果恭設香案望

闕叩頭祇領伏念

臣

散等樗材弱慙蒲質值此亥書

之歲仰邀

申命之麻

寶墨濃揮帶

九天之露氣春祺普洽生一路之星輝共瞻合璧以
成文恰在五雲之多處竊惟南郊樂土地以福名滇
境山居人多壽者荷

恩來之自北益物與之皆春而且珍果連函瓊酥疊
餅自是

澤周外漠醍醐渥桐馬之香卽看

功定西疆扶杜及櫻桃之薦

臣

惟有勤思受

祐切戒素餐美意延年冀上承夫

天壽庶民敷錫勉安鎮於坤維所有臣榮感下忱理

合恭摺叩謝

天恩伏乞

皇上聖鑒謹

奏

謝

賜紫禁城騎馬摺

奏爲恭謝

天恩仰祈

聖鑒事道光八年十二月二十三日奉

上諭雲貴總督阮元著加恩在紫禁城內騎馬欽此

竊臣職效南車材同下駟封圻洊歷愧馬齒之徒增

節鎮久膺撫駒光而自惕遭逢

聖治慶澄清於攬轡之前感激

皇仁勉矍鑠於據鞍之日茲屆覲

光而述職廼蒙

錫馬以趨

朝

垂慈步履之微勞榮傳

紫禁

曲念筋骸之漸老

寵昇丹綸

恩重戴天感增行地伏念

臣

南滇歸極駢征懷靡及

之心

北闕瞻雲駟伐仰

丕成之烈花門雪盡蒲桃與天馬同來

玉殿春回殺核及小輿并載從此駘銜日警益矢馳
驅卽今駑力時勤更蒙策馭半九十里慎行路晚節
之難蔽三百篇守思馬無邪之訓所有

臣

感激下忱

理合繕摺恭謝

天恩伏乞

皇上聖鑒謹

奏

聖經室續集卷四終

聖經室續集

卷四終

人

四

雪庵先生續集

卷四

八
四集

擘經室續集卷五 文選樓詩存十二目錄

癸未

道光癸未正月廿日余六十歲生辰時督兩廣
兼攝巡撫印撫署東園竹樹茂密虛無人跡避
客竹中煮茶竟日卽昔在廣西作一日隱詩意
也畫竹林茶隱圖小照自題一律
福兒汲得學士泉煮茗作詩因再題竹林茶隱
圖中

癸未四月住閱江樓閱肇慶八營官兵
宿閱江樓

羚羊峽東卽端溪研洞今有水不令開鑿福
兒隨來端州住閱江樓數日呈詩文一卷題其

卷首

廣州城西荔支灣荔林夾岸白蓮滿塘卽南漢
昌華舊苑也諸兒遊此折荔歸來題圖一首

五月廿七日內子生辰復避客獨遊荔支灣憩
擘荔亭歸示福祐孔厚卽用前寒韻加刪韻
堂院中用竹木架成平臺與簷齊爲夏夕趁涼
之所秋卽拆之

道光癸未狀元爲廣東吳川林召棠報至粵越

華粵秀兩書院院長同稱喜復用三元詩韻一首

道光辛巳

恩科兼攝廣東巡撫監臨事和德文莊公乾隆庚寅
監臨試院中舊扁詩韻題甲子浙闈試院煎茶

詩卷中

督署西堂木棉

題海印閣

不浪舟小坐

坡公謂嶺南涼天佳月卽中秋不以日月爲斷

癸未中秋天涼月佳續其句成一律

楊桃

重九夜過端州

過平樂

癸未秋閱兵粵西道出灘江

陽朔舟中

清灘石壁圖歌

題崑崙關策騎圖

藤鼓

粵西

由粵西入粵東

將由肇慶往雷州至新興河頭水最清淺

由高州望欽州書示兒輩

過電白溫泉題僧壁二律

雷州道中

題頤道堂詩集卷首

雨腳

卷六

文選樓詩存十三目錄

甲申

省城詩社之詩有刻本見獵心喜擬作二首

西齋

甲 唐荔園

種沙摩竹于西齋

題小瑯嬛畫付福兒

修廣州城及城北五層樓工成

西洋米船初到

題杭州詩僧嘯溪詩卷

乙 西

正月二十日學海棠茶隱

三水縣行臺書院新成停舟登三十六江樓

乙酉春宿端州閱江樓四夜

乙酉春夏間屢登粵秀山憩坐學海堂因題

賦得仲秋上弭月

得中字書院課士作

西齋有欹廊將傾徹而新之且安茶竈

西齋茶廊坐雨

遊花田翠林園

泊舟峽山寺登飛泉亭回憩玉帶堂晚飯

老蚌珠光研研石中有石紋圓暈數層莫知造
物之理鐫詩代銘

余屢過羅浮山下皆未入山誠以地方供帳俗

習牢不可破滅從逕行殊爲無謂弓刀小隊更
非所宜乙酉冬閱兵惠潮六過此山亦惟遙看
山色而已

惠潮海邊四咏

乙酉仲冬望日閱碣石鎮水陸兵全海肅清夜
看海月

過豐湖書院

過寒婆徑

揭陽策騎

題嚴厚民

杰

書福樓圖

卷七

文選樓詩存十四目錄

丙戌

漱珠岡萬松山上建漢楊子祠

焚香

自陽朔溯桂林再題陽朔奇峰圖卷

粵西舟次題周夢巖學使評梅山館圖

題潘紅茶封使富良江使槎圖

桂林東郊耕藉田

沿紅水江至遷江縣宿東軒春月甚朗十年中

三宿于此皆見明月因題曰寓月軒

行過遷江古之瘴鄉今雖瘴少然氣候殊不齊
閱邊

啜茶

邕江舟中

得復初齋全集邕州舟中讀之卽寄野雲山人
祭馬伏波將軍廟畢放船下橫州大烏灘

潯州道中

過端州羚羊硯石峽

三月晦日立夏節過端溪

定靜堂前手種荔支今夏結子頓多積雨甚涼

甘漿欲進學白沙就樹噉荔法噉之

奉

命移節滇黔濱行拜 天后廟

檢書

劉樸石

彬華

何湘文

南鈺

謝里甫

蘭生

胡香海

森

張棠村

業南

李繡子

繡平

諸書院院長暨學

海堂學博生徒皆有圖詠送別題荅一律

別醫者范素庵

濬

避暑

舟過廣西陡河謁分水神廟

泊舟浯溪登居亭

湘江村舍

泛湘川過南嶽得雨

日出洞庭湖

夜泊

八月七日又泊

過會同

沙岸坐月

過黃平登飛雲巖再用壺中九華韻

過清鎮安平縣

重九日登黔西老鷹崖

雲南督署之東園亭館花木之勝爲歷任所未
有心念此間宜有鶴未幾日忽飛一白鶴來翌
日又有一鶴盤旋空中鳴聲相呼薄暮並集於
園月餘遂馴且能舞矣作來鶴篇

栽花

滇園煮茶

雲南督署宜園十詠

閱兵至開化

夜坐

卷八

文選樓詩存十四目錄

丁亥

宜園

正月廿日雪晴煮茶于竹林中題竹林茶隱卷

倚松書屋春祭齋居

仙館花臺欲栽牡丹價貴遂栽蜀葵

月來政簡頗耽漁園之樂詩以自警

摘蔬

南雲行

上巳日東川道中

過以濯河

閱黔西威寧鎮兵

可渡橋夜月

回省看宜園新綠

詠雙綠蝶

綴家書後

頻果

孟夏草木長

滇南小暑節

閱盤龍江登雄川閣望滇池

小暑節賞菊

滇南伏日

立秋日敬一堂晚坐

西臺

登西臺

以藜爲拄杖

中秋宜園鐙月

暮登西臺看碧雞山色

巡西邊曉發

重九日登祿豐之鰲頭峰得伊莘農中丞寄贈

登鰲詩卽荅

住大理閱兵三日看點蒼山

麗江雪山

天生石橋

南詔殘碑

建極銅鐘

古哀牢

渡瀾滄江鐵索橋

宿永昌池館流泉樹石湛然清華名之曰小蘭

津井詩示鎮府諸公

漾漚溪道中

漾漚合江上看月

遊黑龍潭看唐梅二律

余不能飲最多一杯而已滇園梅花盛開不可
無酒命釀白糯數日卽熟花下欣然小酌仍不
能醉詩以自嘲

梅園晚景

宜園三壽詩

除夕園庭之花齊見者桃梅杏山茶玉蘭海棠
木瓜櫻桃馬櫻春蘭薔薇木香迎春水仙長春

報春蜀葵十餘種

戊子

定光寺看紅山茶花

上元登西臺望月

和女蘿亭東園花月

出西城十里遊龍門山海源寺

倚松書屋齋居

同李文園學使

棠階

遊太華山憩太華寺

仙館東新開二方石池一栽荷一養魚池上栽
蘋果樹二株梨二株并於園南栽橡養山蠶以

爲民先

牡丹一枝開極大

梅花蜜

老鶴

登西臺看耕種

東園初夏

近華浦大觀樓新立石柱水誌

晚飯於福兒書齋登西臺觀稼是日剪得七種

園蔬桂花紫薇同開

東園夏日

詠滇南景物

重九曲靖道中

白水河看瀑

貴州省城水南新構小閣正對溪山余名之曰
翠微閣并書扁

鎮遠行臺在鎮陽江上江卽潯水也後倚石屏
山東橫天石橋橋南岸卽中元洞洞之上又有
一亭東向川途余題扁曰上元亭

沅江綠蘿山

清浪灘

武林舟中食蟹

荊州渡江

南陽道中早飯

狐裘

戊冬述職

賜賚蕃庶紀

恩四首

卷九

文選樓詩存十六目錄

己丑

雪夜曉行擬楊誠齋

溯沅水源入黔

黔大定以西古羅施鬼國也穀雨過此牡丹處
處盛開

由七星關入烏撒

東園夏日

大理石小屏方尺許宛然設色山水巧合天際

烏雲二句詩意

伊中丞過東園蔬飯見示一律卽和原韻

滇南風景

登西臺

大暑節桂花初開

秋祭東園齋居詩四十韻

中秋塔鐙

以八月十六日爲中秋

秋園

暮登東臺

題伊莘農中丞不倚圖

以園中柿芥餉莘農中丞見謝長篇因亦以詩

相酬

曉坐後院石壇

東臺待月

霜降日暮登臺看西山

大理石屏四時山水歌

過開化天生石橋題名刻石

戲荅家人

坐月壇坐月

新造臺礮演成速戰陣和伊莘農中丞韻

報春花

大理雪浪石屏用蘇公雪浪石詩韻

冬至後連得大雪

山海棠

臘八日園梅有開者

園梅半開

月夜遊園

東園殘臘

庚寅

正月八日遊西山花紅洞法界寺

正月二十日偕王劉二叟竹林茶隱

立幅雪浪石屏

高一尺六寸
寬一尺三寸

再用坡公雪浪石

七律韻并鐫字曰琅嬛館仿蘇公雪浪齋孫知

微畫法

西宅後有紫薇二株其後屋題曰紫薇花院
紫薇花院後圃坐月壇

澹泉

署西木臺將朽遂拆之遷於澹泉西南七丈許
用七千土壑疊爲方臺名之曰碧雞臺

食家園新麥麵

東園夏日

蜀葵花

紅藜杖

夏登碧雞臺

野鶴羣

題碧雞臺

大理石屏正面立看合疎影橫斜水清淺背面
橫看合暗香浮動月黃昏

九日登西臺

翡翠玉效樂天樂府

西行閱兵憩雲南縣青華洞

點蒼山書所見

過蒼山第十五峰下登楊升庵寫韻樓又至大

雲堂外觀龍女花

重修承華圃教場閱武

臘月十四夜游宜園

大理石擬元人四時山水小幅

大聖王爺示人四和山水小神
國月十四夜遊藝圖
新新新華園遊藝圖
新新新華園遊藝圖

擘經室續集卷五

文選樓詩存第十二

癸未

男福注

道光癸未正月廿日余六十歲生辰時督兩廣
兼攝巡撫印撫署東園竹樹茂密虛無人蹟避
客竹中煮茶竟日卽昔在廣西作一日隱詩意
也畫竹林茶隱圖小照自題一律

萬竿修竹一茶鑪試寫深林小隱圖豈得常閒如園
老偶然兼住亦廬吾傳神入畫青垂眼攬鏡開奩白
滿鬚二十餘年持使節誰知披卷是迂儒

福兒汲得學士泉煮茗作詩因再題竹林茶隱

圖中

酒中有至樂恨我絕不諳近歲作茶隱聊以當沈酣

禺山到鹹海已是珠江南怕汲斜水斜

元和志邪階水今名階水

出縣東百三十里太平寰宇記南齊時有邪階縣後

改為正階縣廣東通志山川畧邪階水出始興縣東

南邪階山水有別源曰巢頭重嶺

戒酌貧泉貧

龍奔湍相屬祖源雙注合為一川

通志山川畧石門水一名貧泉出縣西三十忽聞學

里平地即晉廣州刺史吳隱之飲水賦詩處

士泉輕與雲相涵

廣東通志學士泉在番禺縣北七里明天順中學士黃諫謫廣州品

其井水為嶺南第一福汲取稱之

滴墨辨真偽

此泉貯白

山泉輕於井泉此泉又輕於山泉

磁碗中醺墨滴入墨沈而不符調得一擔松柴與石

散以試他泉則浮散者多矣

砵煮試來吾男茗投龍井葉咀味清且甘諸孫與杯

勺可抵飴弄含七椀喫不得賒飲可及三

耶律楚材詩云盧仝

七椀詩難得說

先生非醉吟

白太傅集有醉吟先生傳大人性不善飲而生

老三歐夢亦賒

辰與白公同日故癸亥撫浙時有正月廿日四十生辰避客往海塘用白香山四十歲白髮詩韻詩一首

隱几何醺醺此時竹林下蝶化羅浮蠶

癸未四月住閱江樓閱肇慶八營官兵

露角叱仙羊觸石成一峽西江千派來受此兩山夾

連舟穿峽行遮眼峰疊疊雙塔指高要

平聲

佳氣滿城

堞登此閱江樓輕帆卸雲葉

茲樓夫何如四樓合爲一南挹端江清北列星巖七

東海多曙霞西巖隔紅日雨捲重簾來雲穿衆窗出

卽此是崧臺况已隣石室

廣東通志山川畧云石室在高要縣北五里南北二

門名爲崧臺按石室山唐天寶六年改爲崧臺山爲七星之一卽定山也

曉出崧臺郊八營勒嚴陣列燾五色翻中權鼓角振
勢湧秋潮來聲雄午雷震百粵控東西兵力重此郡
練彼膽與心道在使之奮

奮勇復選材翌日如臨敵雲中圭頂山

肇慶府志白沙岡卽今所

稱龜頂山在高要縣西八里秀拔高聳

視彼若堅壁分路競先登騰躍

攻且擊時平無戰爭將士少閱歷何以身先之勤習

比運甓

大人新論督標八營將弁於常操之外在圭頂山下又練奮勇一陣不須量度地勢到處

可宜能合能分隨時變動專以上衝捷便爲先

樓居夕頗暇五宿在端州憑闌弄江月四山涼若秋
豈徒閱軍實兼以成清遊興來慙白樂遠慮還多憂
綢繆語諸將又放出峽舟

宿閱江樓

正當山水奔騰處更有高樓抵浪回初夏暑風出羊
峽三更皓月滿崧臺行隨石磴層層轉臥使簾窗面
面開爲惜珠江太繁俗海珠樓上有誰來

廣州靖海門外珠江

中流海珠礮臺激流特起上有樓閣甚雄麗

羚羊峽東卽端溪研洞今有水不令開鑿

五羊仙人來何處必從此峽騎羊去萬羊化石埋紫

雲石角無痕著巖樹端州研匠巧如神水洞磨刀久
迷路詩硯皆無迹可尋非仙那得知其故

福兒隨來端州住閱江樓數日呈詩文一卷題

題其卷首

西樓行吟南樓坐東樓晚飯北樓臥一家終日住樓

臺微之詩少香山和犢兒隨我弄筆來我豈長公爾

非過坡公年表紹聖元年坡公在當塗縣謫授寧遠軍節度副使惠州安置獨與幼子過八月度庾

嶺十月到惠州漫將小集學斜川宋史蘇過傳過家寓居合江樓

數畝名曰小斜川自號斜川居士有斜川集十卷喜得溪山助吟課惜爾兄

弟皆未來縱有詩情遠難作試將此卷寫與之方職

端州此樓大

此樓高借石磯分東西南北四樓四角又有抱樓合通爲一大樓與滕王閣黃

鶴樓岳陽樓合江樓

題成推研笑滄浪

嚴滄浪論詩云盛唐諸人

唯在興趣羚羊挂角無迹可求透徹玲瓏不可湊泊

峽口羚羊挂雲破

廣州城西荔支灣荔林夾岸白蓮滿塘卽南漢

昌華舊苑也諸兒遊此折荔歸來題圖一首

海珠臺外珠江灣夾岸萬樹荔子丹偶然小艇撥荷

去綠杉野屋圍闌干紅雲低壓白蓮水論園買夏邀

人看剗枝不用縱猿摘

蘇詩食荔枝引云惠州太守東堂祠故相陳文惠公堂下

有公手植荔枝一株郡人謂之將軍樹其高不可致者縱猿取之

歸來勸我還飽餐

是時積雨淨暑氣甘漿迸齒尤清寒黃蕉白藕且相

避案前堆滿玻璃盤綠苞倒挂小香鳳

廣東通志挂綠荔枝紅壳上

有綠一線或在肩或在腹以增城沙貝所產爲上按粵東有翠羽小鳥俗名倒挂鳥卽所謂桐花鳳也此蓋以鳥喻之耳

冰珠探出鮫宮丸

廣東通志凝冰子日中照之內外洞徹核在內半明

半減亦名水晶球

連枝帶葉插簾戶譬在林下垂團欒新圖

一幅寫幽淨我亦著眼生喜歡何時我可棹船去清遊歎息何其難

五月廿七日內子生辰復避客獨遊荔支灣憩

擘荔亭歸示福祐孔厚卽用前寒韻加刪韻

按此

時猶未有唐荔園之名

荔支灣中水幾灣荔支仙成十萬丹我獨棹船出江

關穿林拂葉來河干
羊城六度荔子殷
昌華故苑今纔看
赤霞絳雪何爛斑
就樹頗有遊人餐
柴門草閣見青山
雨餘五月江深寒
野塘荷氣清如蘭
白菡萏搖翡翠盤
亭林靜寂泉幽潺
況有黑葉垂晶丸
皆荔支名
夏遊得隱荔樹間
春遊竹裏吟檀欒
歸來寫詩自解顏
爲此枉駕真古歡
大人自注文選古詩十九首
良人惟古歡枉駕惠前綬
若非避客來偷閒
爾亦歎我清遊難

堂院中用竹木架成平臺與簷齊爲夏夕趁涼之所秋卽拆之

偶用杉爲架還將竹作移平鋪杉白板密縛竹青皮

梯曲巡簷起欄疎借柱支檐低登易及柱近倚何危
向晚追涼去看霞吸茗時藤牀圍茉莉蠟炷護玻璃
判事猶披牘餘閒合詠詩星河天湛湛海月夜遲遲
小有樓臺趣兼於筆硯宜好從尋樂處聊以養吾衰

道光癸未狀元爲廣東吳川林召棠報至粵越

華粵秀兩書院院長同稱喜復用三元詩韻一

首

文運三元西粵開幾年連向粵東來七千里外頻聞

喜八十年中間出才嶺海番禺承舊第

乾隆四年狀元莊滋圃先

生爲番禺縣籍

吳川水月起高臺

吳川有

諸君說我多桃李

五管春風見六回

近科瓊山探花張岳崧南海探花羅文俊歸善會元呂龍光廣西三

元陳繼昌及今吳川狀元林召棠皆大人門生所取之士也

道光辛巳

恩科兼攝廣東巡撫監臨事和德文莊公乾隆庚寅

監臨試院中舊扁詩韻題甲子浙闈試院煎茶

詩卷中

珠江試院藥洲旁又看茶煎第一綱

大人甲子在浙監臨

鄉試與潘芝軒盧南石兩主試倡和試院煎茶詩是科多得人今提調雷瓊道費公丙章卽是

科貢士也

三榜連元期兩省

前科西省三元陳繼昌出大人門生門下

五

傳登第喜同堂

大人已酉出文莊公門生門下辛巳廣東主試陳殿撰沆傳編

修綬又皆出大人門生清風滿座隔簾影明月
門下上溯文莊爲五傳

照人聞茗香一十八年成老輩放闈還到少年

場

右詩爲辛巳秋作刻集時刪去詩中三榜連
元本指陳三元也乃廣東辛巳得解元周燧
壬午得會元呂龍光癸未得狀元林召棠說
者以三榜連元竟真兩省如期先爲之兆而
此三元亦皆出門生門下兩省科名洵爲盛
事福爰請補錄於此

督署西堂木棉

絳綃高向半天垂十丈難攀最上枝

木棉名攀枝花

因在堂

西宜夕照若生嶺北更多詩清陰勿翦百年後濃色

常留三月時有此紅雲能捧日牡丹那得染臙脂

嶺南

無牡丹盆烘者有之

題海印閣

廣東通志海印閣在城東南沙洲明萬厯中建今之新閣蓋沿舊名之也

誠齋權使

達三

新構高閣正當海印石

粵中見聞

海印潛石也半出波際上有京觀樓雉堞之四周與海珠浮邱相望隱隱若三台象焉

北可以遠眺因名之曰海印閣書其扁

珠江雨後復炎蒸傑閣初成快共登窗納白雲山一

角帆收黃浦浪千層頓除豪氣涼停扇爲看禪光暮

卻銚高倚闌干提海印蓮花池外問南能

不浪舟小坐

節署二堂之東定靜堂之南有軒五楹南北敞窗修狹似船故舊名

如此

莫訝牽船上岸居絕無波浪一舟虛夾窗全借蕉榕
竹攤几惟留筆研書靜坐豈能忘世慮清吟方算是
公餘若將綠影當秋水比似珠湖可得如

坡公謂嶺南涼天佳月卽中秋不以日月爲斷
癸未中秋天涼月佳續其句成一律

涼天佳月卽中秋况到中秋宿雨收清露滿城涼滿
樹海光當面月當樓得閒心氣如雲淡向老年華似

水流風景安恬波浪靜使君原是泛虛舟

楊桃

楊桃一名五棱子色黃有五棱八月熟時其味似合橄欖與蔗而共嚼之未熟則但

酸澀可代橄欖入茶且能解瘴

荔支生嶺南漢唐名已大味豔性復炎尤物豈無害
誰知五棱桃清妙竟爲最試告知味人味在酸甜外

重九夜過端州

雨後秋風尙未涼半輪斜月認重陽濃濃雲氣瀼瀼
露到處山田晚稻香

過平樂

凍雨洗截壁殘雷殷遠山時當九秋後人在萬峯間

晚稻已再熟溪漁偏獨閒喜看民氣靜餘意慰諸蠻

廣西通志諸蠻傳云平樂徭散處林麓貯粟巖竇男女服飾與桂林僮同

癸未秋閱兵粵西道出灘江

灘江爽氣照秋開閒倚篷窗暮色催日影倒騰峯頂
去晚涼平貼水邊來野漁舟小藏巖洞古堠烟清護
石臺且向萬山深處宿夢隨殘月四更回

陽朔舟中

桂林陽朔峰千萬萬石林中水瀉灘

灘漢書地理志作離蒼梧郡注

云有離水關零陵郡零陵下注云離水東南至廣信入鬱林行九百八十里

石架琅玕立

不律屏開翡翠吹參差美人濃點青螺黛學士驚題

碧落碑

唐國史補絳州有碑篆字與古文不同李陽冰見而寢處其下數日不能去碑上有碧落

二字人謂之碧落碑廣川書跋云李漢謂此碧落觀也故以爲名

削盡坡陀不依傍

亂生頭角分高卑遍求異地絕此景幻出尋常非所思畫與未遊人共看是何邱壑太離奇

清灘石壁圖歌

府江

九域志蒼梧有桂江一統志云一名府江卽大灘水也

陽朔大礫

汎

陽朔縣名廣西志大礫汎上至黃蹄塘十里下至黃埠塘十里

下二里許

有畫山載在通志截壁約高三十丈寬如之其西面平直如削可中懸繩淡黃色上有青綠痕天然如畫家皴法具巒頭層疊之形目

不明者見之以爲真山不知其平直也明目者見之以爲摩天巨幅之畫也因在畫旁書

清灘石壁圖五大字

五字長二丈餘舟中視之猶嫌其小

又寫

道光三年阮元題七字刻於石直是上古巨

圖今始題款矣

天成半壁丹青畫幡然高向青天挂上古何人善畫山似與關荆門名派此派渾同後世敝造物翻師唐宋人認作名山反如假審爲古繪竟成真縱橫量去成千尺五丁直削平無迹古絹依稀染淡黃巒頭重疊分青碧清灘一曲繞山流來往何人不舉頭六年

大人自丁丑冬制久識奇峰面五度丁丑秋大人任兩湖總督往湖

兩粵迄今六年矣南閱兵八月二十八日衡州途次奉旨調補

兩廣總督即赴新任遂取道全州入廣西界到廣東

路經陽朔一次戊寅十一月往廣西查辦藩司富綸

案并閱兵經過陽朔一次庚辰七月往廣西查辦灌

陽會匪案往回經過陽朔二次今年九月往廣西閱

兵由平樂到桂林經過陽朔一次取道柳州南寧潯

梧回廣東來乘讀書舟石渠寶笈繪幾千卷天上雲烟

前後五度南書房修纂

曾過眼乾隆五十六年大人在內府各書畫為石渠寶笈先後賜趙

孟頫無量壽佛元人戲嬰圖漢書地理志

宋人貨郎圖等名跡亦甚多何幸湘南零陵下注云

陽海山湘水所出按離水亦出零陵此湘南謂湘水

之南韓昌黎詩蒼蒼森八桂茲地在湘南是也漢志

長沙國有湘南縣在衡見此山眼福如今還不淺山

山西北與此湘南異

旁刻石壁窠書鑒賞標題始自吾後人來看道光款

傳出清灘石壁圖

題崑崙關策騎圖

巡過龍賓

龍州賓州也龍州卽今之柳州柳城縣

又入邕

州名卽今南寧府城秦桂

林郡唐書地理志邕州本南晉州

畫將秋色代初冬一關路阻分雄

鎮百里陰森盡古松頗有雲山宜策騎久無夜宴似

征儂時平正恐軍心情注目西南十萬峯

邕州西南卽廣東欽

州之西北西有十萬大山接交趾界

藤鼓

藤爲明韓襄毅平大藤峽賊時所斷截中空
冒爲鼓在肇慶府鼓樓至今以爲更漏之鼓

鼓長五尺圍丈五尺或當時不止一鼓今惟

此存耳

武仙

大人自注峽在廣西潯州府武宣縣卽唐武仙縣

歷千載乃產此巨藤

峽夾右江水

三國朝胡南藩潯州左右江考云粵有江並滙于梧滙于潯者二南曰左江

北曰右江右江之源

一藤橫可絙晝沈夜浮渡

潯州府志

大藤峽岸有藤大十圍橫生過江日沈水底夜浮水面渡賊而南以通龍山八寨

妖由亂人

興誰其斷藤者桓桓韓中丞斷藤復段截造鼓示創

懲中空冒以革圍量丈五繩繫以老猺血十里聞鼙

鼙皐陶不用木

考工記韠人爲皐陶鄭司農云皐陶鼓木

坐令鼙弗勝陽

明來駐節應歎見未曾軍門復東徙

大人自注總督初駐廣西梧州

繼遷廣東肇慶鼓在端州仍譙樓數百載聲壓峽九

層大人自注峽內江鼉響與蒼山魅應且憎我今過

潯南斷藤峽在縣訪峽由思陵山在峽之西南猺明

海鄺湛若赤稚云猺名輦客古入蠻之種以南窮極

嶺海迤邐巴蜀藍胡槃侯四姓槃姓居多皆高辛狗

王之後以犬戎奇功尚帝少女封于南山種落

繁衍又云居思娥隱貴縣南七十里居思岩

府志云猺女黑齒黥面而繡額為花草蛾蝶

之狀嫁則自荷傘戒徒聚族數十人送之

狠人者亦古槃瓠之苗裔粵西諸郡處處有之潯州

狠自宏治間因大藤諸峽亂從黔中調來征剿峽中

遂戍赤雅云雕題高髻狀若猊狒散居莽中不室

焉伶而處飢拾橡薯射狐掘鼠蠶蠹蝼蝻甘生如

薺卉衣鳥言重譯四姓伶外曰狙獠大人自注獠

其風罔聞意莊子所謂狙公云獠聲山民有此數

種不皆猺也今猺頗馴有盜匿猺中者猺縛獻焉福

案赤雅云冬編鷺毛夏衣天葉持飯掬水以禦飢渴

緝茅索綯伐木架楹人棲其上牛羊犬豕
畜其下謂之麻蘭子長取婦別闌而居 與民不犯

凌峽中無伏莽野燒宵如鐙土民耕古寨有產亦可

恒裏鹽

柳子厚柳州詩青箬裏鹽歸洞客

與賣桂

大人自注猺中產桂名猺桂

此

外非所能東歸過舊府復訪此鼓徵大昕郡樓上諸將同來登

治平聲更和淵淵江水澄

粵西

四千里路粵西還祇過東邊一半山

大人自注粵西幅幘周五千餘

里總督祇到東半耳

襲職土司小封建

大人自注四十六土司官皆世襲有狄青時者

有韓雍王守仁時者

射生巖峒古夷蠻鎮兵脛走鉛爲瓦

大人自注

兵之練捷足者以一斤鉛爲二瓦分縛兩脛

能負

大入自注

重

富不甚饒貧不餓乞兒少見路途間

大人自注

數錢一斤行數千里祇見乞兒三四人較數年前大不同

由粵西入粵東

每悵官居少靜緣難將清興寄林泉卽今山水朝朝

換權作園池處處遷終日小輿看竹坐幾回虛枕壓

溪眠一邱一壑如相傲可是珠湖射鴨船

孟郊詩不

射鴨無是非大人四十歲時曾畫珠湖射鴨小照珠湖分詠詩內有射鴨船

將由肇慶往雷州至新興河頭水最清淺

沙明石白淨潺湲一尺餘波路百灣水性本清休咄

怪客情相賞卽高閒行吟有興方成句坐臥何時不
對山寒雨會須添淺漲虛舟我復海邊還

由高州望欽州書示兒輩

海角天涯

輿地紀勝云海角亭在廣州合浦縣元范梈有海角亭記天涯亭在欽州東門北畔

臨水宋陶弼有登天涯亭詩

望可哀古賢多少不能回七千里外

櫬曾返

大人撰先曾祖行狀乾隆初太府君任廣東欽州營遊擊病足二十四年十月十六日卒

于任所櫬歸自欽州入揚州城治喪

六十年餘孫竟來

乾隆二十四年至今道光三年

爲六十四年

家計百年自清白

國恩五世受栽培

先曾祖以三品官封贈二代大後人以一品官封贈三代兼蔭子

人有慶先人德文武科名豈易哉

過電白溫泉題僧壁二律

山光橫電白

隋書地理志高涼郡電白下注云梁置電白郡平陳郡廢又有海昌郡廢入焉

地脈出溫泉

廣東輿圖云熱水山在縣西三十里下有泉湧出熱如鼎沸粵中見聞云熱水

山上有石牀長二丈餘廣七尺刻浴沂石三字浴溫泉畢多臥其上

一水自功德上池

常淨圓大牙

大牙塘汎屬陽江鎮

今再到

大人自注泉在大牙郵舍東

彈指

又三年

庚辰十一月大人自廣州由陽江巡視高廉雷瓊時曾經此于今三年矣庚辰有國服

故無

僧說天台寺

浙江天台山萬年寺也

遙遙省舊緣

大人自注泉上

僧習鴻云嘉慶初曾見余于天台僧又曾到五臺峩峩見雪

此間大雪節花放小桃枝況有溫泉氣渾如春暖時
昔僧曾白脚踏雪上峩峩我亦憶殘臘冷泉亭外詩

大人庚申辛酉兩年臘月在
浙有入靈隱祈雪遇雪詩

雷州道中

海南長至似中秋氣暖風清雲霧收西海夕陽東海

月

大人自注硃洲吳川爲東海圍洲夕陽爲西海

中間一道是雷州

題頤道堂詩集卷首

及門陳雲伯

文述

宰江都多惠政開伊婁河

建彩虹橋以便民又監濬儀徵運河癸未夏

江水爲菑拯卹更力頌聲遠聞旋丁外艱去

官與吾乙丑年在浙賑菑丁憂相似也偶閱

其集中過文選樓詩有我是春風舊桃李種

花還得傍門牆之句續成一律題之

種花還得傍門牆滿縣春風憶故鄉
隸駕一橋同召伯水通兩邑勝河陽
拊災似我昔巡浙奉諱如君今去揚
江北部民留不住門前桃李卽甘棠

雨脚

斷虹消盡薄雲遮雲外穿來日脚斜
向晚欲晴晴未得又飛雨脚不成霞

擘經室續集卷六

文選樓詩存第十三

甲申

男福注

省城詩社之詩有刻本見獵心喜擬作二首紅

梅驛探梅十三元韻

消息梅花又幾番半關驛路認開元

聖朝丹荔無飛騎此地紅林有舊根十月早濃銷嶺
色一枝遙寄夕陽痕九齡祭使曾停頓無復鵲音萃
墓門

羊城鐙市九青韻

海龍雲鳳巧瓏玲歸德門前列彩屏市火蠻賓餘物

力豐年羊穗復仙靈

前年火災洋市甚損今年復盛年穀亦豐

月能徹夜

春先滿人似探花馬未停見說瀛洲雙客到書窗更

有萬鎗青

時狀元林召棠探花羅文俊皆歸里

西齋

督署西南隅有老屋五楹時虞其傾然稍搢之擇其中二間埽除之尚可坐也於是名之曰西齋齋之北植四柳樹又牆北牆東皆有老榕橫陰數丈百餘年物也齋南地廣七丈輪八丈右有二楮樹相倚而生而交相讓所謂讓木者非歟讓木南築甃臺高三尺方丈

許花晨月夕頗可坐臺南一畝地盡種菊臺
之東南又築一臺高二尺方二丈此臺與樹
遠無翳更得月矣舊牆相圍不加粉飾自有
蘿薜纏之牆之內以竹爲籬使露葵扁豆牽
牛子施之臺東北之隙地多紫薇桂荔槿蕉
之屬齋西廊外又有地二畝許結一小亭亭
南有小井周植弱柳十數株柳下皆爲田以
種雜蔬早韭晚菘紫茄赤莧之屬頗供剪摘
偶于暇時過此課花看月煮茶烹蔬頗清靜
矣惟不能酒耳

古人洛園詩花竹秀而野惟野乃有情繁麗胡爲者
西齋本老屋措拄此頽厦薜荔上緣牆榕楮低遮瓦
墾治數畝田所妙在聊且端溪七研山名向星巖假

福以端溪大研石七出立爲小山題曰小七星巖並
識曰此七石皆自端溪研洞外來洞外之石爲研則
粗立爲列巖以肖端州之星
巖令老研工刻于第七石 蔬學老圃鉏籬似村農

社色宜秋菊淡香可茉莉治公餘看灌園井汲畦水
瀉行厨有真味采摘供菜把我本不能酒一飯却杯

竿我不解絲竹花木亦陶寫埽逕暑氣清門靜設行

馬石壺注甘泉新茶注苦櫝

有茶坑研石福鑿爲茶
壺茶本作茶尔正曰茶

苦觀櫝朝日升折葵夕露下晚來待明月鐙燭涼欲

施雖非杜曲閒差比平泉雅樂志詎在多安寄足瀟灑

唐荔園

紅塵笑罷宴紅雲二百餘載荔子繁十國祇知漢花
鵑晚唐誰憶咸通園咸通嶺南鄭節度風流曾見詩

人言

文苑英華曹松南海陪鄭司空遊荔園詩云荔

支時節出旌旂南國名園盡興遊亂結羅紋照

襟袖別含瓊露爽咽喉葉中新火欺寒食樹上丹

曹

砂勝錦州他日爲霖不將去也須圖畫取風流
松陪遊老文筆丹砂濕濕霞軒軒前此英詞接扶荔

曲江一賦傳開元

張曲江集有荔支賦

荔香曲破妃子去貢騎

不復馳中原後此年年荔支熟那堪屈指巢與溫

黃巢

朱桑田有改荔枝在隱巖得地皆唐恩茉莉不强牡

丹勝

清異錄南漢每見北人盛誇嶺海之強世宗遣使入嶺館接者遺以茉莉文其名曰小南強後

銀面縛到洛陽見牡丹大駭有緝紳謂之曰此名大北勝

昌華廢苑成荒村方今

承平嶺海盛夷實十倍唐崑崙

舊唐書林邑傳林邑國在交州南千餘里

自林邑以南皆卷髮黑身通號爲崑崙王方慶都督廣州廣州南海舊有崑崙舶市外區珠琲秋豪

無所

貢獻屏絕尤物賤百蠻共仰

朝廷尊節使公餘但緩帶荔枝灣一任開園垣士民競

赴半塘社

廣東荔枝支社以食多者爲勝勝則稱荔枝支狀頭少則罰飲酒數大白

家家畫

舫傾芳罇燕脂林外立白鵲芙蓉塘底飛文鴛所惜

遊談但南漢何曾買夏唐園論

蘇東坡荔枝支詩云買夏欲論園劉家

暫竊枝與葉豈知本是仙李根曹詩巋然見文苑古
園不泯因詩存喜從新構得陳迹社詩千首題園門
近日民間詩社有唐荔園詩累至千餘首詩人精魄自千古一亭便可乾
與坤更向夢徵追老杜試擘重碧輕紅痕杜工部宴戎州楊使君東樓詩云重碧拈春酒輕紅擘荔支今南海邱氏荔園卽唐荔園也有擘荔亭

唐荔園記

男福

廣州城西荔支灣舊謂劉漢昌華苑福謂不然蓋
植荔非十餘年不實實矣非數十年不繁僞劉僭
竊襲乃大侈計襲至銀僅廿年耳而紅雲宴已特
聞則荔林非始於劉可知矣文苑英華有唐曹松

南海陪鄭司空遊荔園詩云葉中新火欺寒食樹
上丹砂勝錦州所謂南國名園已具紅雲之勝概
然則昌華紅雲卽因荔園故址爲之耳曹松者唐
詩紀事以爲舒州人字夢徵學賈浪仙爲詩天復
初年七十餘始及第松遊廣州作詩當在天復之
前咸通之間距張宴八十餘年矣唐末鄭氏鎮廣
州者一爲從諱一爲愚從諱節度嶺南在咸通末
年愚鎮嶺南兩次在從諱前後兩鄭皆拜平章其
年與松皆相合然從諱滎陽人愚卽嶺南人松詩
有他日爲霖不將去之句則司空爲從諱無疑又

考唐書表傳從諫節度嶺南在咸通十三四年至
廣明元年節度河東始加檢校司空松詩題司空
者文人詩藁從後改寫亦往往有之愚固未嘗檢
校司空也夫以唐咸通詩人唯宴之地豈不甚可
傳乃獨使劉漢首稱之何可哉近年荔支灣中有
南海邱氏所構竹亭瓦屋爲遊人擘荔之所外護
短牆題曰虬珠圃福惜唐迹之不彰也因更名之
曰唐荔園蓋以文人所遊樂有古迹迹之最古者
當溯而著之矣

種沙摩竹于西齋

大人自注沙摩竹根蟠節大
翠綠可愛一年生三番筍節

上復生小筍種者斷竹留節橫埋于地活卽生
筍三年後高二三丈蓋大而易生之竹也太平
御覽引嶺表錄異名沙摩竹今土人則稱爲馬尾竹

沙摩大竹如玉碧一夜雨雷抽一尺貓頭

桂海虞衡志貓頭竹

質性類筋竹陳師道詩秋盤堆鴨脚春味薦貓頭

初破土花肥籜龍頓礙風

林窄久看老節成拱把那復高枝許扳摘年來種竹

瘦可憎得此蒼簣一當百我昔小隱深篁中道是人

家非我宅此齋忽挺十百竿青士綠卿

竹名也

左右席

一碗淡黃茶正涼五月輕紅荔初擘若教穡事報平

安聊可筠心近泉石他年儻有山公來定識林間曾

阮籍

題小瑯嬛畫付福兒

乾隆五十七年孫淵如年伯爲家大人題篆扁曰小

瑯嬛仙館家大人刻詩畧時刪去小字今轉以有小字之館名并畫賜福

金碧霞城護洞天竟名此地小瑯嬛我家經室但迂
叟何處石樓成列仙舊榜偶因朋友贈新名預兆子
孫傳謏聞祇似伊家記不願兒曹說茂先

修廣州城及城北五層樓工成

山如海上駕金鼇跋浪騰雲勢太豪霸氣欲銷千里
遠神樓須壓五層高古人頗盡經營力來者何辭匠
作勞

聖代年逾周代久此城永不有陀囂

樓明初建云以厭霸氣者

西洋米船初到

以前關使者慮短稅不肯行家大人力行之

西洋夷船來瓊

大人自注即呢羽毛

可衣服其餘多奇巧價

貴甚珠玉持貨示貧民其貨非所欲田少粵民多價

貴在稻穀西洋米頗賤

大人自注僅有內地平價之半

曷不運連舫

夷曰船稅多不贏利反縮免稅乞

帝恩

大人自注余奏免米船入口船及米之稅仍徵其出口船貨之稅蒙允行以後如米船倍來

則關稅仍不短

米舶來頗速以我茶樹枝易彼島中粟彼價

本常平我歲或少熟米貴彼更來政豈在督促苟能

常使通民足稅亦足

以後凡米貴洋米即大集故水旱皆不饑

題杭州詩僧嘯溪詩卷

杭州南屏壑庵有僧廬在竹林最深處詩僧
小顛居之余昔在杭嘗遊其間小顛能詩傲
物與一時名流相接余題其室扁曰七代詩
僧精舍蓋小顛以上居此者皆詩僧至小顛
七代矣或曰詩傳七代而無名今余名以七
代豈以後將失詩傳耶余爲之憮然余去杭
後小顛沒其弟子嘯溪復能詩不失其傳嘯
溪昔來粵爲羅浮之遊甲申又至并以詩一
卷相示余因題其詩卷嘯溪以後永傳詩弟
子則余詩爲公案而詩鐙二字亦成故實矣

漫將衣鉢說南能七代詩傳百代僧鐘後月前明不
斷南屏深處一詩鐙

乙酉

正月二十日學海堂茶隱

癸未春大人兼攝撫篆嘗于生辰避客撫

署東園竹林中有竹林茶隱詩甲申冬闢堂于
粵秀山以課士取拾遺記何邵公學海之意以
名其堂今乙酉生辰
又來避客煮茶于此

又向山堂自煮茶木棉花

堂外大人植木
棉花十餘本

下見桃花

堂中諸生植
桃花百餘株

地偏心遠聊爲隱海濶天空不受遮儒

士有林真古茂文人同苑最清華六班千片新芽綠

可是春前白傅家

白香山茶詩云綠芽千片火前春
溫庭筠採茶錄樂天有六班茶大

人生辰與香山
同日故末句云

三水縣行臺書院新成停舟登三十六江樓

樓爲

道光四年正月建大人名之曰三十六江樓并
撰記畧云廣東三水縣江上行臺建自前明嘉
靖間彼時兩廣總督駐梧州而肇慶廣州亦皆
有行署三水行臺在肆江之北岸魁岡塢之南
浮石之西爲廣州肇慶往來適中之地此地據
西北兩大江會合之處距海非遠山水沈雄地
氣靈秀門上有樓可以遠覽爰名其樓曰三十
六江樓蓋謂北江所匯者九湏江始興江墨江
錦江翁江麻江滘江政賓江蒼江也西江所匯
者二十七北盤江南盤江龍塘江思覽江牂柯
江柳江灘江鬱江潯江西洋江洛青江馱蒙江
黃龍江橘江荔江藤江繡江橫槎江邕江秋風
江賀江新江白馬江金城江
綠甕江蕉花江武陽江也

滔滔三十六江流齊到行臺古渡頭學海迴瀾動浮

石三水縣志縣東偏在肄江相傳石中舊有寶鴨隨水浮沈後為外國貢客鑿去魁岡三水縣志

在城東南形如圓珠舊名龜岡後改魁岡建塔其上佳氣起高樓久無羽檄催

傳箭為採風詩暫泊舟手把新書時學海堂集甫刻成授多士

風帆送我又端州

乙酉春宿端州閱江樓四夜

端州四度閱兵來大人戊寅十月巡閱肇慶督標兵越庚辰癸未乙酉凡四閱今

日春光晴後開著眼無非好山水高眠難得此樓臺

窗前嵐氣涼如雨枕底江聲隱似雷迴憶昔遊何處

勝祇曾一榻臥天台庚申大人有宿天台上方廣寺詩

乙酉春夏間屢登粵秀山懸坐學海堂因題

夙好在詩書高情屬雲岫峩峩粵臺山盡啟南海秀

層巖三疊成

學海堂在山中層啟秀山房爲上層至山亭又在上

古木百年茂

此巖谷間本有老樹數百株綠榕紅棉之屬交柯接葉堂成諸生等又栽雜花數百株

堂開古

木中木讓乃肯構

就其山麓稍平之地爲堂堂向東南芟木數株乃讓出堂基

堂

前獨宏做山海得奇觀

坐堂中遠見百里山水重複上雲下海三壩參差風帆葉

葉隨潮從獅子洋來

堂後倚碧岑清樾密雲覆翳蒼與繁柯夾

蔭堂左右海月出黃昏新涼滿晴畫山水湛清華動

靜驗樂壽炳焉有文章壯麗復沈厚山房在翠微精

舍頗不陋到此林更深軒戶殊氣候最高結笠亭望

遠又明透隨山爲繚垣萬綠圍一圉堂房易於新樹

石難此舊何由新耳目還以古籍授

賦得中秋上弼月

得中字書院課士作

西月平秋色生明月正中二三分漸滿八九夜當空
桂魄猶藏半銀河恰在東房心剛掩映箕斗欲朦朧
縱未全開鏡真如已挂弓王弼邊門角銀箭漏敲銅
珠海宵潮減羊城瑞采融壽星南極近祝嘏萬方同
西齋有欹廊將傾徹而新之且安茶竈

搯起欹廊得五楹破廡修好著茶鐺却從樸畧粗疎
處聊寄消遙澹定情柳徑不因邀客步菊田還爲種
花耕依稀耆舊鄉祠外棖觸秋懷是弟兄

大人自注
慕陳兄議

拓小圃於北湖者舊祠西未成而
卒福案慕陳伯諱嗣琳今年夏卒

西齋茶廊坐雨

西齋靜似野人家小坐常宜散晚衙
廊接五楹排雜樹窗開兩面見秋花
風須颯颯涼纔透雨縱瀟瀟聽
不譁好使樵青燒石碣嫩黃閒試
六安茶

大人喜啜
六安州茶

遊花田翠林園

茉莉開初歇秋田菊又黃林巢生翡翠
池渡野鴛鴦埋玉香成土栽花土亦香
何須問園主自看碧簪簪

泊舟峽山寺登飛泉亭回慙玉帶堂晚飯

朝京還過此病足已三年稍得秋風健
重來峽寺前

扶筇登截壁跂石聽飛泉一飯惟閒坐何庸肉食禪
老蚌珠光研研石中有石紋圓暈數層莫知造

物之理鐫詩代銘

千年老蚌化爲石中有珠光暈圓白南海方諸生古
魄弄霏更向淮南夕太極圈成點周易研中物理煩
君格

余屢過羅浮山下皆未入山誠以地方供帳俗
習牢不可破滅從逕行殊爲無謂弓刀小隊更
非所宜乙酉冬閱兵惠潮六過此山亦惟遙看
山色而已

六次羅浮山下過不曾去問鐵橋津祇因俗吏能留
我未免名山屢笑人胡蝶聊同故園夢梅花豈向達
官春轉因天界三峯遠離合烟雲更有神

惠潮海邊四詠

薯哇

花蔓滿寒畦甘瓜地中結

俗名地瓜

穰穰抵晚杭縣縣勝

生甍

秋冬之薯收抵晚稻

鹽塼

漉沙鋪萬池構白何皎潔冬海暖如春聊以當南雪

粵鹽由曬而成其灰池俗名爲塼

蔗林

高蔗若蘆林霜譜甘且白海外多棉花有無正相易
兩粵不種棉花棉花皆自西洋來而
蔗田糖霜出海者甚多交易相等

榕村

村村有大榕一榕蔭數畝愛此村中人冬溫夏無暑
嶺南多暑春秋皆熱多借其
陰卽冬日偶寒亦足禦風

乙酉仲冬望日閱碣石鎮水陸兵全海肅清夜

看海月

我看月圓幾百回何曾看月海上來也曾兩度涉滄
海月黑水深雲不開碣石南邊無石處再欲南行行

不去樓船直跋岸根來馬足驚濺浪花駐東海蒼茫
月已高西海朦朧日初暮此時冬半暖如秋碧海青
天汗漫遊萬里絕無山礙目三更況有月當頭當頭
月照山頭碣海光如鏡潮如雪今夜天空水亦澄昔
年氛惡常侵月風伯曾令交趾平水仙終在溫州滅
漫言清晏不揚波一萬犀軍還荷戈月當盈處常愁
缺如此滄洲傲若何

過豐湖書院

行過豐湖上如遊隱士鄉橋通釣魚艇山抱讀書堂
竹影皆依水蕉陰亦滿牆幾人來寓此足以散清狂

連次主講
皆致仕者

過寒婆徑

泉石清涼雲霧深
非風非雨氣蕭森
世人春夢知多少
須向寒婆逕裏唵

揭陽策騎

海潮吐霧山含烟
近山遠山青氣連
日色欲出猶未
出扁舟已渡揭溪前
溪前沙路綠山脚竹外山桃破
紅萼衰翁久不據
唵鞍一鞭聊抵閒行藥

關策騎後
今數年矣

題嚴厚民

杰書福樓圖

厚民湛深經籍校勘精詳因昔人云書不飽

蠹魚不經俗子誤改書之福也因以名樓

古書有古義後人每未詳俗子作聰明何妄下雌黃

少見多所怪以不狂爲狂石經在開成據宋已改唐

今石經願車馬衣輕裘輕字等處皆後人妄添幸碑跡可見孰知據明監更改金


陀坊大人自注乾隆間奉敕摹刻岳板五經

甚盛典也余校石經時見其誤字反與明監本同大疑之及訪之始知原摹不誤嚴子精校讐館




後爲武英殿校刻之人所倒改也我日最長校經校文選十日始一行大人自注世人每矜一日十行

之才余哂之夫必十日一行始是真能讀書也人有讀書福書福人亦康書

樓畫爲冊樹石雜縹緗北齊勘書圖今復見錢塘厚



擘經室集



AC 149 38 y46 118

擘經室續集卷七

文選樓詩存第十四

丙戌

男福注

丙戌春余爲粵西閱兵之行六月移節滇黔九月到滇十二月復有開化閱兵之行是年水陸行一萬數千里得詩數十首爲一卷錄寄揚州題曰萬

里集

漱珠岡萬松山上建漢楊子祠

舊聞丁卯許家詩南海雪飛東漢時五鬣長松今萬

樹我來應建孝元祠

楊孚漢議郎嶺南學人之最古者

焚香

嶺氣已鬱蒸海氣復鹹濕城居嶺海間那不愁厭溫
况是春氣早細雨洩雲汁久坐尙無聞所苦出復入
拂茵醖已浮攬衣腥更襲年來脚受病頗困行與立
礎蒸脛同潤簾霧鼻惡吸快撥薰爐來爇炭呼火急
海南香尙多價賤用易給速結初試拈沈水亦可拾
斑輕飛鷓鴣涎重起龍蟄遂使一室中燥氣滿相裒
且讀葉香譜莫緒脚氣集

自陽朔溯桂林再題陽朔奇峰圖卷

九曲灘如折坂登灘江山勢又峻嶒夜來增造萬千
級西去城增十二層員嶠方壺隨地起側峰橫嶺向

空凌荆闕董巨多名筆如此離奇彼未曾

粵西舟次題周夢巖學使評梅山館圖

周編修作楫江

西泰和人
小門生

山館超然遠俗塵翰林且置畫中身要知疎野高閒

趣纔是清華貴重人花在故鄉思快閣

泰和有快閣見黃山谷詩

圖隨官舫過昭津

平樂有昭津

林泉鼎鼐休誇說儘把寒

香詠好春

題潘紅茶封使富良江使槎圖

越南列藩服接粵西南陲江山旣修阻人物亦安熙

嗣王新襲位請

羅經室讀集

卷七

二

四集

命國乃治

帝錫以

誥敕天書煥文詞皇皇

天使節特

命潘公

恭辰廣西按察使

持浮槎富良江嗣王肅威儀

恩波沐浩蕩雲樹增華滋憶昔卅年前新阮

謂光平入

覲時華髮被繡服我曾及見知

乾隆間阮光平入覲大人曾見知之

其子

謂光纘

益不肖其臣盜乃爲連年入閩浙擊伐勞

我師庚申夏六月我乘風擊之船盜全喪失其國遂

更衰

光纘昏庸益甚其巡海總兵四員駕船礮來閩浙爲盜嘉慶初年所謂艇匪是也嘉慶庚申六

月大人乘風縱兵擊之于浙海松門船盜沈溺死數
千人總兵四人溺死者二獲總兵倫貴利戮于杭總
兵耀斬于台餘皆就獲片帆無返者帝擲所
獲四總兵印文及敕以責光纘光纘上表謝罪其國
由此大衰舊阮起農耐收復其舊基阮光平為新阮今越
氏時舊阮栽培與傾覆

帝德皆無私名藩列南服新政善創垂

嘉慶時舊阮滅光纘

帝即封農耐舊阮名福映者為越南國王今所封王乃舊阮王嗣子名福岐嗣王亦恭恪

請

命不敢遲沈沈潘使者說禮還敦詩文明耀桂海溫
肅兩得宜試看此圖內江水何瀾瀾一槎天上來南
極星辰披濃花復細雨待立滄海碑

石象系三續集 卷十
桂林東郊耕藉田

粵西春比粵東遲禁火餘寒入古祠石壁嵐光生翡翠
水田天影凍玻璃因知桂管催耕雨也似江南布
穀時好是農安邊徼靜一郊新綠轉青旗

沿紅水江至遷江縣宿東軒春月甚朗十年中
三宿于此皆見明月因題曰寓月軒

一江瀉紅浪四山森翠微薄暮入巖邑小駐停勞機
行館正春暖東軒猶夕霏茶盤雜藤茆瓦盎香薔薇
樹晚杜鵑響廊暗扁蝠飛清風甫移榻皓月來款扉
光迎粉壁滿影入朱闌圍蠻中烟晦易月色晴霽稀

三度此寄宿徹夜皆清輝呼童舉書燭豪墨試一揮
行過遷江古之瘴鄉今雖瘴少然氣候殊不齊
非霧非烟山氣半晴半雨雲光風勢或凝或散天時
乍暖乍涼行過沙路石路間有草香藥香莫少莫多
茶飯勿單勿厚衣裳

閩邊

襲土州官靜守邊山徭耕讀亦安然

今斷藤峽內外
徭村全入保甲

爲民徭民
有讀書者由來

盛世恩威久遠勝前朝寇亂連細雨春波出藤峽閒
雲落日望思田如今若問岑家事拜職孤兒十六年

前明岑氏世代禍亂岑猛蘇受之事雖經陽明親定旋定旋亂今田州岑錦本遺腹孤兒十六歲大人題請襲職無爭者

啜茶

葉暗桄榔孔雀飛萬山潛蟄起春雷蠻江新漲綠如酒此水能無飲一杯

邕江舟中

邕州古巖疊據江以爲塹五管此最遙按部駐亦暫勾當軍事畢江船欲東帆論程尙逾千計月已盈三十萬大硯山兩岸排成礪參差誰位置玲龍匪雕塹絕似金錫鎔猝投寒水蘸遂使天工成不受人力欠

空洞能藏舟通罅亦繫纜巖怪心屢驚穴多目費瞰
屏列滴蒼翠深青或揚紺吾鄉得其一嗟者必泛濫
歎此奇峰多蠻荒自埋陷屈指古畫家未見亦可憾
歸途抵勝遊已足係思念況有木棉花千樹極紅豔
野廟鷓鴣啼深林苦竹暗落日西山平春風一江澹

得復初齋全集邕州舟中讀之卽寄野雲山人

我初聞蘇齋

翁公方綱

是聞凌氏說

凌氏仲子學于蘇齋乙巳丙午間在揚州

及我入翰林公秉學使節山東我代公

大人授山東學政接公任

石帆亭上別居杭又數年公詩自緝綴寄來前數集
刊校始于浙刊成虔靈隱書藏由此設兩家詩卷中

言此頗親切我重入翰林此事遂中輟蔣氏來嶺南

後集續刻鏤

礪堂相國爲公門生督粵時又刻其後集

六十有六卷十七

集臚列暮年續一集四卷李所擷

公小門生李彥章又刻其末集四卷

去年洛陽紙棕墨新印刷於是復初齋詩乃全無缺

書藏與朝鮮寄去情勿竭憶昔庚辛間袂與野雲挈

紅塵足不到常向蘇齋謁談經兼論詩金石緣亦結

石墨書樓中摩挲遍碑碣有時坐詩境清言落玉屑

有時石畫軒山雲贈怡悅東郊古寺遊拈花聽僧偈

壬秋潞水詩柳向亦園折丙冬復相見暖室畏寒雪

爾時公漸衰則亦嗟大耋公遽歸峨嵋遺集今悲閱

集中惠我詩一字不減十卷金石錄小印爲我剗

欽州竟無書詩筆從此絕

大人以宋鑿金石錄十卷寄公題識公作詩並刻寄

小印且云欽州魚山馮氏家有全帙可借摹刻之訪於欽州無此書公此詩後祇有銅尺詩一首遂絕筆

好古久同心敢比老彭竊蠻江春夜船老眼一燈瞥

祭馬伏波將軍廟畢放船下橫州大烏灘

百里奔流抱山轉山麓磯頭抗神殿棉紅榕綠江春
深溪澗香毛鼓鐘薦羣舟敲鉦齊下灘架櫂挾篙如
待戰怪石如林堆水面水與石爭浪花濺灘底埋山
不可見惟見沸騰亂渦旋灘師昂然坐船頭指點從
容色不變四時水石猜高低總避石鋒尋水線櫓枝

一撥柁振鳴折出龍門

灘下石隙之名

激如箭水強舟弱舟

自搖搖動篷窗作寒顫津吏送我似目愁我喜下瀨

飛橈便灘遙石盡春江平躍鯉猶驚掠波燕

廟中藏伏波將

軍小印伏波不止馬一人但印則真漢物也

潯州道中

鷓鴣天氣半晴陰野路荒江取次吟新漲綠齊芳草
岸夕陽紅助木棉林雲歸蠻洞開還合春入徭邨淺
復深差比陽明多逸興思田行過又邕潯

過端州羚羊硯石峽

千里青山百道舟合流一峽在端州會齊萬派清泉

眼潤透三巖膩石頭靈障磨開天不惜慧根鑿破爾
應愁羚羊有角成何迹莫向詩禪捉摸求

三月晦日立夏節過端溪

木棉花過看桐華

潯州滿岸木棉
梧州滿山桐花

一路桐華看到家

萬疊青山千折水好春才去卽天涯

定靜堂前手種荔支今夏結子頗多積雨甚涼
甘漿欲迸學白沙就樹噉荔法噉之

東堂栽荔已三年雨後甘漿曉最鮮就樹噉鮮原有
法不妨竟學荔支仙

那堪七日馬鞍馱一日離枝變已多如此須臾真不

雪絲室集 卷十
離色香與味問如何

奉

命移節滇黔濱行拜 天后宮

自我領封疆初出卽籌海浙粵東復南于今十七載
目覩鯨波平扶桑發暈彩交南與泰西

國威動真宰至誠雖感神自懼晚節改頓首湄洲宮
庶幾寡尤悔

檢書

十載居嶺南積書數十架茲爲南詔行安得全棄卸
戚友可以別此事豈能罷損之又損之已勞四牡駕

兒曹復好事豐碑載泰華

余請篋雙碑以行

滇池雖控夷內

政頗清暇正宜理陳編青鐙坐清夜思書若無書未免動嗟訝彼鮮藏書家一瓶安所借琴鶴欲相隨莞爾可辭謝

劉樸石

彬華

何湘文

南鈺

謝里甫

蘭生

胡香海

森張棠村

業南

李繡子

黼平

諸書院院長暨學

海堂學博生徒皆有圖詠送別題荅一律

幾年嶺表慮先深得暇纔遊儒士林講學是非須實事讀書愚智在虛心汲投淵海古修綆氣盛衣冠朋合簪此後懷人各何所半看圖詠半登臨

別醫者范素菴

滑

四年病脚氣兩足殊支離豈無千金藥豈無三世醫
奈此濕與熱兼之勞且衰不劇已爲幸安能有痊期
君恩念老臣移節居滇池彼間不寒暑貂葛無所施
彼間不卑濕高燥如京師卽使自乞郡亦惟此地宜
范氏送我行遠過端江涯爲言相別後當是去病時

避暑

路出蒼梧中節氣過大暑川途已苦熱况復日當午
近岸得茂林籬落成小圃修竹高逾樓老柚密如戶
可識綠陰中幽翳勝棟宇願涼風暫清計日暑將處

西山暮起雲挂帆向前浦欲添溪上波須聽今夜雨
舟過廣西陡河謁分水神廟

峩峩海陽山一源分兩溜南與南海通北與湘湖湊
陡河三十六設牖不使漏我來欲溯之涸逢庚伏後
安能陸盪舟來朝馬將走俄看風轉帆油然雲出岫
涼雨漫天來入夜遠且透漲發大榕江津吏啟河竇
壓水舟尺許水今二尺厚若到天平間勢易轉河右
山靈更示奇巧待入陡候烏雲天際垂復令秋雨逗
又聞四月旱禱雨得神救古祠林樾清平野稻花秀
我今逾嶺脊順流行更驟回首謝山靈豈非得顯佑

泊舟浯溪登厓亭

桂舟下湘水又來著浯溪欲試兩脚力故尋十載蹊
蠟屐漸相得厓亭殊可躋漫叟舊祠宅野衲重招攜
嘉慶廿二年大人過此題名壁再讀中興頌還拂山
石亭外有次山祠宅舊僧尚在谷題碑頭走螺螄臺角鳴蟾蜍高林暑猶熾截壁曰
易西安得凍雨洗待看湘雲低

湘江村舍

湘山如翠黛湘水如碧玉巖下有居人林深不見屋
落落百尺松陰陰萬竿竹竹密一徑空照見人皆綠
况有流泉聲清冷比琴筑如此山居幽其人定無俗

笑我坐篷窗秋陽正相曝

泛湘川過南嶽得雨

三湘水鬱蒸衡山降雲雨直將嶽頂寒下洗人間暑

嶽頂甚寒大人昔八月登加小裘

剛風激低雷涼氣落平楚餘電煽

殘夜曉烟迥前浦天北暫放晴明霞半軒舉時於金碧中恍惚覓岵嶠岵嶠不可見朱陵秘靈府昔登祝融峰纖雲捲秋宇今來苦炎熱秋陰益天柱或雲或不雲各如所願與

日出洞庭湖

日出洞庭湖蒼茫圻楚吳星河隨夜去雲夢入天無

野史新集 卷一 十一 四集
曉色非南海鄉心比具區秋帆向沅浦猶恐失東隅

夜泊

新秋沅水上向晚泊輕航岸草萬蟲響山松織月涼
心依清夜永夢繞楚川長北斗天邊近遙遙思帝鄉

八月七日又泊

愛此秋船月清光逐夜添特移欹几燭盡捲壓窗簾
露氣沈沈淨風漪細細恬絕勝官閣裏煩熱閉深嚴

過會同

近夜中秋月沅州與靖州山圍百蠻靜月照五溪流
黔水連疆去吾家舊績留昔年受降處八十六回秋

乾隆五年秋先曾祖征苗由沅
進兵十戰皆捷降者數千人

沙岸坐月

秋月明如晝江沙白似霜
停舟催晚飯登岸坐新涼
地喜離卑濕途非慮阻長
惟思各兒女五處共清光

計此時伯兄在京福行至桂林季
弟行至贛州叔弟及妹在揚州

過黃平登飛雲巖再用壺中九華韻

羅浮海上合雲峰又逐天風向遠空
已掠桂梧過嶽麓又飄蘭芷入黔中
雲能化石山形覆石復成雲水
氣通惜未東巖看瀑去祇聽幽澗漱玲瓏

過清鎮安平縣

山阻舟車廢谿深阡陌長蒹花秋雪白稻葉晚雲黃
穀賤農翻拙蠶興織已忙教民栽橡栗竟欲抵柔桑
今秋稻大熟有一根雙穗者長六尺一石米僅值數
百錢因舟車不便不能遠出也近年鎮遠貴陽一路
仿遵義橡葉飼蠶之法
廣興絲織民計少饒

重九日登黔西老鷹崖

朝朝盡繞青山走已有文書到心手忽然直上老鷹
崖驀想今朝是重九老鷹摩霜下晴空危巢卽在懸
崖中此間祇許飛鳥過何年人跡西南通百丈一盤
十丈一折愈折愈高且盤且歇負牽雙引竹輿竿石
火迸生馬蹄鐵衰翁頗羨據鞍人廿里高崖竟登越

大人自注馬伏波據鞍年六十三余今年六十三雖不健然可稱翁矣

登高難遇重九

時重陽難得登高詩今朝無意巧相併作詩應寄家人知此間峰巒遠比嶺南大節候未較江南遲皇華一洗園圃氣野菊挂崖開瘦枝

雲南督署之東園亭館花木之勝爲歷任所未有心念此間宜有鶴未幾日忽飛一白鶴來翌日又有一鶴盤旋空中鳴聲相呼薄暮並集於園月餘遂馴且能舞矣作來鶴篇

我入滇池數千里載萬卷書非得已不將一鶴伴琴來多恐禽軒累行李宜園亭館清如仙周遮竹地梅

花天閒堦十丈草如席惜少臯羽來蹁躚忽聽園中
發清唳亭邊橫落車輪翅一鶴適從何處來老叟灌
園詫奇事一鶴忽來已詫奇翌日又得一鶴隨嗟我
念鶴鶴豈知鶴來隨我誰使之胎仙識我是清俸肯
來啄料兼催詩我詩昔未向鶴吟今與爾同萬里心
羽帶點蒼山上雪夢入瀾滄江水深風和對舞百花
下露寒相警青松陰如此園林如此鶴屈指廿年無
此樂惟憶春明仙蝶來修書未了秋花落

昔大人在
京有仙蝶

來園中

栽花

前輩栽花樹留香與後來我來百年後樹更四時栽
人縱相隨老花還不斷開世臣與喬木此意在官梅

滇園煮茶

先生茶隱處還在竹林中秋筍猶抽綠涼花尚鬧紅
名園三逕勝清味一甌同短榻松烟外無能學醉翁

雲南督署宜園十詠

仙館雲雲

昆華仙館粉匾無款在園東北前有曇花一株高覆玲石大人以紙

書琅嬛仙館匾加於木匾之上

曇雲覆曇花曇花護仙館雲蒸曉露香花散春雲滿
我無仙釋情怡雲亦蕭散終朝趣事心暫許對花懶

虛齋香雪

仙館西古梅多處名香雪齋

有梅齋已清况是梅皆老繁枝滿覆檐苔根亦合抱
得雪香極清無雪香更早春深階下晴落素不可埽

南軒賞雨

雨春軒在池南射棚北

春雨何處來春雲起昆海隨風過南軒天意實瀟灑
安得坐佳士品詩索真解我縱不醉吟王壺杏花買

山房買月

房在池東如船東西皆窗

我家買月船千里凌滄江船不到滇池山房抵小艤
明月隨我來夜夜貫八窗窗西曲池水印月得一雙

花棚序射

軒南有棕棚爲閱射之地名觀德圃有古梅

昔在杭州時西園曾射鵠三十有二年此懷頗悵觸
兩臂亦已衰彎弧力不足惟呼健兒來花棚看飛鏃

蔬圃齧香

箭圃之南杉林之東關廟之西有閒地數畝以爲蔬圃

種菊成老圃種菜成家園新霜壓肥綠清妙殊雞豚
短鋤親手劬煮以佐晚殮試語知味者其香尤在根

石釣觀魚

雨春軒北香雪齋南有池有石橋養魚

濠梁說魚樂機鋒法始開固知鬥狂禪本自清談來
獨遊石池上悠然得所哉欺方乃君子非道枉庸材

宜亭來鶴

宜亭在仙館南觀音海天閣西多古柏有高十丈者大人九月蒞

滇十月八日忽飛一白鶴來次日薄暮又一白鶴盤旋空中與先鶴鳴相應亦落於園中

皆甚馴月
餘能舞

翩翩雙白鶴飛來亦何奇頓使虛庭前松柏增清姿
我來看鶴舞鶴亦聽我詩鶴固宜此園園得鶴更宜

竹林茶隱

大人在粵繪竹林茶隱圖乃撫署園也今則園竹數千竿茶隱更宜

山隱在粵西竹隱在粵東今遊滇水園所隱將毋同

閒步玲石逕靜坐深簋中茶烟藏不得輕颺林外風

陞嶺怡雲

與春樓東仙館北有土山登之可望四圍遠近雲山大人築石臺石

几於山上陞音虹見漢書地理志卽滇中銅山也今省城北山皆稱陞山

嶺上多白雲雲豈爲我白我情自與怡持之亦無迹
石臺覽四山悅性永晨夕自署曰雲翁不復分主客

閱邊兵至開化

重鎮初逢

昭代開

明以前皆未置郡縣

巖疆三面萬山回江流盡向南交

去

至交趾界

驛馬惟從北路來

東南西北皆走交趾路也

阿雅維

摩沿里寨

今各里皆宋元明阿雅龍氏維摩沈氏之舊地城南即有瘴

儂人熨子

異衣裁

儂熨獠等數十種相隔一村即殊衣異俗

可知

上國恩威遠此地猶高節使臺

夜坐

靜閱寒城已二更節樓西畔月斜明遠山夜色沈沈
碧百八鐘聲萬里情

卷八 經世文編

論學堂之設
學堂之設所以化民成俗而為國家之計也

論學校之制
學校之制所以養士而為國家之計也

論書院之設
書院之設所以養士而為國家之計也

論學官之制
學官之制所以養士而為國家之計也

論學額之定
學額之定所以養士而為國家之計也

論學費之取
學費之取所以養士而為國家之計也

論學舍之設
學舍之設所以養士而為國家之計也

論學田之設
學田之設所以養士而為國家之計也

論學廩之設
學廩之設所以養士而為國家之計也

擘經室續集卷八

文選樓詩存第十五

丁亥

男福注

宜園

梅花如屋竹如門
管領春光在此園
石徑不須倚筇杖
其來扶我有雙孫

正月廿日雪晴煮茶于竹林中題竹林茶隱卷
滇南才過立春節
已覺春光齊漏洩
忽然一夜北風來
捲落漫天玉花雪
我不見雪已八年
頗似故人成久別
今日東園雪滿林
翠柏青杉枝欲折
况是梅花四十株
冷玉寒香同沍結
年年茶隱竟成例
快雪時

晴日光熱竹林春氣透浮筠洗出檀欒綠尤潔王川
老婢來煮茶梅瓣雪泉試同啜借閒一日得披圖靜
坐幽篁自怡悅

命和原韻

男福

春雷早已催時節陬嶺雲蒸復雨洩雨餘天氣轉
春寒忽將夜雨飛成雪此景教人憶故鄉若憶嶺
南又殊別東園梅老花正繁花放隨枝勢盤折雪
花梅花成萬枝一片香光氣團結竹林又遇煮茶
時拾取松枝竈初熱一雙白鶴不避烟也識茶香
最清潔我家茶隱自年年兩弟今年未隨啜親

顏喜付與諸孫黃果如飴其甘悅

黃果形如粵中之橙香色味亦

相似

倚松書屋春祭齋居

屋前梅樹老於我窗後支牀皆古松晚階仍煮六安

茗早飯特剪東園菰西山朝來有爽氣太華

省西南大山名

太華

夜碧聞清鐘衰翁終不悟道妙惟將戒慎持溫恭

仙館花臺欲栽牡丹價貴遂栽蜀葵

十戶中人賦換花此情曾動樂天嗟何如多買葵花

種終歲傾心向日華

滇中蜀葵自正月開至臘月

月來政簡頗耽滇園之樂詩以自警

舊遊無此好樓臺頗識前人費度裁一百餘年人遞
去八千里路我能來風亭月榭參差見仙館神祠次
第開止水怡容魚活潑閒階儘殼鶴毳毼騁懷端在
春三月涉趣何妨日幾回筇杖試攜鏗翠石菜鋤親
把劃蒼苔鶯流燕蟄誰先到棠蒂桃夭合其栽山磴
看山收畫本竹林隱竹伴茶杯抱書孫至還教拜擘
紙詩成不用催適意如斯籌遠否此翁未是鎮邊才

摘蔬

摘我園中蔬古人詩可味譬如齧菜根其香滌腸胃
我園春菜多綠畦隔花卉每看家僮鋤亦課園丁溉

折腰手親摘傾筐盈且堅呼兒共晚餐使識蔬筍氣
一家肉食者遠謀問能未豈可對陶詩不自慙其貴
此以澹性情非復計惠費若云拔園葵在今亦無謂

南雲行

仰看雲在天未辨行遲速今日穿雲跨嶺行豈知疾
過奔馬足平地風氣清吹雲天上行今日披雲動涼
氣始知風在雲中生山不見路惟見雲桃花梨花近
不分北雲壓山烏欲雨南雲映日紅氤氲下山直自
雲中落雲中之人輕似鶴翩然可是隔仙凡悵望山
頭挂雲脚我聞仙人乘雲兼御風仙家幻術安能通

不如安坐南雲下笑指此雲稱老翁

上巳日東川道中

導江已說岷山遠更遠岷山路萬重青海波瀾皆是

雪金沙雲氣尙疑冬

大江正源自青海入雲南爲金沙江行數千里始會岷江之水

于敘

行春我到東川外佳節誰教上已逢若把此川

當曲水一觴流去是巫峰

過以濯河

行過山巔又水涯山桃紅褪柳抽芽連村萬樹堆春

雪都是梨花頻果花

河在會澤縣

閱黔西威寧鎮兵

烏撒接烏蒙皆歸郡縣中山高森白石氣冷遲春風
寒食常多雪桃花也自紅古人誰在此故實竟空空
可渡橋夜月

橋東峻坂石突兀橋西行人鎧出沒一樓窗外萬山
深風弄溪聲洗春月春月竟是山中多百夷安樂春
氣和蠻花飛落山村坡兒女吹笙跳月歌
橋在威寧
宣威二州
滇黔分
界處

回省看宜園新綠

竟將萬綠換千紅祇在離家半月中清氣勝於花爛
漫午陰比似屋幃幪不嫌牆角山光隔更許橋頭水

色同惟有兩般難並綠一雙白鶴一皤翁

詠雙綠蝶

羅浮仙蝶若捉一蝶來則其雌雄雖遠必夜來相從福于東園得巨蝶全嫩綠色大如掌移之西書齋籬上是夜忽又有一綠蝶來相從東園去西齋數百步中隔數堂其踪跡頗似羅浮蝶滇人云鄉來未之見

雙雙來巨蝶踪跡似仙家妙色頻婆果前身萼綠華

滕王圖未備烏足葉猶差

見莊子

疑是鬱棲化裙腰一

道斜

諸書中言蝶罕言綠色者惟西陽雜俎言秀才顧非熊見鬱棲中壤綠裙幅化為蝶

綴家書後

寄知曾在嶺南人萬里滇池也送春兩月晴多初望

雨終朝風起不生塵饑蚊飛蟻全無跡夾帽重棉未
離身爽塏已瘳雙足疾況於松鶴曰相親

頻果

有花曰優鉢有鳥曰頻伽詰屈聞梵音便覺奇可誇
頻果乃大柰滇產尤珍嘉首夏已堪食季夏皆如瓜
甘鬆若棉絮紅綠比玉瑕或豔稱頻婆其言出釋家
譯語爲相思採蘭雜記果稱頻婆華言相思也豈是思無邪何以竊
梵言呼我果與花因思譯性者謬恐千里差

孟夏草木長

孟夏草木長莽莽滿一園翳林高百尺密蔭圍青垣

桤柳垂絡索覆瓦遮前軒新篁放萬葉稠綠蓋石門
池上開紫薇池邊多樹護雜葵備五色爛漫花正繁
養魚有止水縱鶴無近樊園北雙古柏森然在高塹
登臺坐石几四山雲氣翻策杖過南圃籬落成野村
鷺巢樹枝穩密脾蜂韻喧瓜田引修蔓菜畦灌香根
摘蔬供晚飯獨樂靜無言試衍陶公詩可與陶公論

滇南小暑節

滇南五月氣猶清雲重爲陰輕復晴非夏非秋別成
景不涼不熱最怡情棉衣休用蒲葵扇花院全無竹
葦棚六十三年慣炎暑幸將高爽快生平

閱盤龍江登雄川閣望滇池

曉出碧雞坊盤龍江路長
四山青過雨萬畝綠分秧
水利村村足天時日日涼
滇池環傑閣登眺滿華陽

小暑節賞菊

棉衣頗耐午陰涼
瓦盎花開老菊黃
不是石欄紅菡萏錯將小暑認重陽

滇南伏日

中伏新秋雨不爭
薄棉衣服過三庚
華山昆海風纔暖
冷雨輕雷氣又清
九夏竟無炎熱苦
四時常得暑寒平
遙思

聖朝三統集 卷八
殿閣微涼處笑我如懷獻曝情

立秋日敬一堂晚坐

天書爛漫懸中省畫戟清森繞節堂暑雨已晴秋月
轉紫薇花外桂花香

西臺

節院致爽軒軒扁爲福嘉勇公所題西南昔
有錫樓用白錫當瓦當板甚華麗登見西面
碧雞太華諸山且見平田耕穫今樓已無存
福兒用木架板爲方臺畧施梯欄費一流銀
遂還舊觀秋日登臨致有爽氣

吾遊惜未登太華却到華陽碧雞下

晉華陽國志兼滇蜀也金馬山

在省東碧雞

碧雞山接太華山西嶽峻嶒名可借西

山在省西

南大山城裏深居隔山色可使高梯木成架金碧岑

樓再構難架木省工更廉價問名終是四方臺

爾雅曰四

方而高曰臺

無瓦非樓亦非榭滇池六月常棉衣爽氣朝

來不知夏登臺萬丈列蒼巖遠見層坡近平壩

壩字見丁

度集韵滇人呼嶺路皆曰坡凡平土皆呼曰壩子

琳宮樵徑皆分明華浦青

青繞禾稼

城西滇水村名曰近華浦

吾衰尙可屢登陟不覺欄枕

怯腰膀把酒閒邀賓客歡攀花莫使兒童怕

臺旁有紫薇花

柱頰剛逢報早秋聞鐘竟可連清夜

臺南一里卽鐘樓應更鼓晉書

時回疆初平定

登西臺

登臺終日見昆華

滇人稱滇池曰海或曰昆海并太華山則稱曰昆華

恰好樓

臺住一家王嶺西橫皆是翠彩雲南現半成霞千村

綠稻真秋色十里清滇是海涯更比樂天州宅壯惜

無元九寄詩誇

元微之以州宅夸於樂天詩云四面常時對屏障一家終日住樓臺

以藜爲拄杖

養得青藜出短牆削成拄杖等身長扶人石徑去行

藥欄鶴松亭來啄糧早歲校書曾秘閣老年飲酒未
家鄉籬邊更待葫蘆落挂向枝頭學道裝

中秋宜園鐙月

小園蝶夢記秋亭

辛未在京寓阜成門內之上岡屋後小園有太常仙蝶來大人名園

曰蝶

又是滇園夢蝶醒樹靜花涼秋浹沱鐙紅月白

意瓏玲頗來鄉思搖銀燭共寫詩心入紙屏更現中

庭香塢影似偕夢得上栖靈

揚州平山佛寺後堂有唐時栖靈塢故址白香

山有與劉夢得同登栖靈塢詩

暮登西臺看碧雞山色

夕陽山外沈暮色起山內似有烟氤氲亦非雲靄隸

初見青出藍繼復螺染黛凝碧已詫奇生翠亦可愛
更如紫電光劍鋒著霜淬碧雞王案邊隱隱有關塞
天成巨屏障濃色疇能續坐待明星生巖穴共昏晦
巡西邊曉發

西風曉起拓邊樓

省城西樓名

霜氣初來雨氣收繞過昆

池三十里碧雞關外萬山秋

由滇省城西三十里至碧雞關關在碧雞山之

四山峙滇

池西北

重九日登祿豐之鰲頭峰得伊莘農中丞寄贈

登鰲詩卽答

浪花卷出青鰲頭

大人自注昔登天台山頂有此句

舊句曾記天台

遊

大人昔撫浙時戊午庚申甲子三年皆有天台詩此句乃戊午舊句也

今來青鰲頭

上立一覽六詔邊關秋遠山疊若大波起鰲足不動

凌滄洲去年黔山過重九老鷹崖上吟詩走

在貴州

阿都田驛西南五十里

詩如健翮但鑒風那解情憐菊花酒今

年鰲背宜亦詩我詩未得君先之揮毫直似釣鰲手

一餌飛過昆明池我與老鰲共霜節君亦與鰲成久

別君昔曾收渤海綸

伊公任山東巡撫以憂去官

我衰喜解南溟

熱會當回首謝詹何策馬蒼山看秋雪

住大理閱兵三日看點蒼山

通志云在大理府城西三里郡鎮山

也自北而南縣亘百里漢書謂邪龍雲南山似扶風太乙之狀是也蒙氏僭封爲中嶽層青接

漢叠翠排空陰崖積雪盛夏不消山腰抹雲橫如玉帶雖林阻谷奧無猛獸毒蟲

我我點蒼山蒼翠極可愛平列十九峰

峰之中特尊者名曰中峰

中峰之北為觀音為應樂為雪人為蘭峰為三陽為鶴雲為白雲為蓮花為五臺為蒼琅為雲弄中峰之南為龍泉為王局為馬龍為聖應為佛頭為馬耳為斜陽諸峰劍簇有似岱宗人莫有能躡其巔者峰各一溪蜿蜒東峯峯染螺黛兩峯夾一溪十八溪為界注為十八溪

溪流遠近不一中峰下者為中溪其北曰桃曰梅曰隱仙曰雙鴛曰白石曰靈象曰錦曰芒涌曰陽曰萬花曰霞移其南曰綠王曰龍曰青

林樾矗浮屠嵐靄碧曰莫殘曰葶莫曰南陽諸溪

罩闌闌何幸見此山心目多所快其一在于雲終年生靉靆有時冠峰頂不動鎮相益有時束山腰飛白若長帶有時競出岫勢如壁絮碎四山皆無雲獨此

雲常在其一在于雪山頂雪最大冬春雪未奇六月
白何怪我來九月中夜雪積嶺背皚皚亦終日不畏
秋陽曬其一在于泉山罅分流派磊落歸百橋清冷
漱鳴瀨穿城爲渠塘灌田作溝澮家家可流觴處處
響水碓其一在洱海東望氣沆瀣葉榆成巨浸南北
兩關隘必有千頃波始與此山配海光開月鏡恰其
屏山對蒼屏百廿里我來坐屏內地因高乃寒山在
西易晦三宿未及登亦足攬勝概唐宋諸詩家罕到
此邊塞遂使古大山寂寞經屢代笑我兩髭霜吟到
萬里外所遊天下山曾陟嵩衡岱

大人于甲寅癸亥
二年有登泰山詩

戊辰有登嵩山詩壯濶有過之雄秀此無賽寄詩未
丁丑有登衡山詩

遊人聊以當清話他時濃設色一卷好圖繪

麗江雪山

一名王龍山十峯崔巍經年積雪若在洱海邊北望上關低缺處可見之

上關山缺處北望何茫茫天低雪山出白影交青蒼

天生石橋

在大理府城西南三十五里洱河下洩絕壑深塹石梁跨之兩巖激水濺

珠宛如梅綻人呼為不謝梅

洱海靜且澄出橋卽橫決落潑九曲谿翻雲復堆雪

南詔殘碑

在大理府太和縣名南詔德化碑撰文為南詔清平官鄭回書為杜光庭

字多剝落仆地已久土人呼為磨刀石乾隆五
十三年王蘭泉先生昶宦滇時訪得于縣南二
十里大道之側載入金石萃編跋尾稱是碑在
大厯元年碑文約三千八百字今約存八百字

福又得蘭泉先生昔未釋出四十餘字
人云唐以前碑字猶是北周北齊遺法王主二
字三橫皆齊日月二字寬而不
窄以此較北朝碑真相合矣

文章與書法確是唐賢派上湖東爨碑此碑在曲靖

東南二十里貞元堡立荒阜之上有碑額碑陰額作
篆字云宋故龍驤將軍護鎮蠻校尉寧州刺史邛都
縣侯爨使君之碑二十四字使君姓爨名龍顏建寧
同樂人即今曲靖府陸涼州也碑文碑陰殘蝕字甚
少字體方正楷隸之間文為同姓人道慶作句法
亦古得漢碑遺法立于劉宋孝武帝大明二年較南
詔碑尚早三百一十一年且甚完善為滇中最古之
石餘詳福撰碑之跋尾大人曾親書題跋刊于碑正
面右下方
無字隙處
古法尚不壞

建極銅鐘

在大理府太和縣城西北蓮花峯下

層每面高二尺五寸餘廣二尺二寸餘下層每
面高一尺三寸餘廣一尺七寸餘上層鑄金剛

智寶大輪妙法勝業慧響六波羅密像下層鑄
增長大梵廣目多聞天王及天主帝釋持國天
王六像末有維建極十二年歲次辛卯三月丁
未朔廿四日庚午建鑄廿二字款識已見于金
石萃編蘭泉先生云建極十二年蓋南詔
世隆年號在唐爲懿宗咸通十二年也

我欲聞古音撞鐘百八杵唐樂久銷沈此音足千古

唐書南詔傳曰天寶初遣閣羅鳳子鳳伽異入宿衛
拜鴻臚卿恩賜良異貞元五年異牟等遣弟奏羅棟
入獻地圖方物請復號南詔帝賜賚有加明年夏冊
異牟等爲南詔王以祠部郎中袁滋持節賜黃金印
異牟等率官屬北面立跪受冊享使者有笛工歌女
皆垂白示滋曰此先君歸國時皇帝所賜龜茲音聲
二列今喪亡畧
盡唯二人故在

古哀牢

萬里哀牢外高秋駐馬時彩雲連百濮

蜀都賦東有巴賓縣亘百

漢

黑水下三危元老曾經畧

神功屢創垂漫言平定易輕視此西陲

渡瀾滄江鐵索橋

康熙

御筆飛虹彼岸四字在樓上與諸葛祠皆在

橋東岸大吏過者先拜祭

宸翰仰高樓飛橋祭武侯金繩橫水上鐵索鎖山頭

險是天成塹行如浪顛舟

鐵索十六條長各數十丈橫懸江上加板成橋行者

動西南通一線走遍禹梁州

永昌府西怒江卽黑水乃禹貢極西之地

宿永昌池館流泉樹石湛然清華名之曰小蘭

津井詩示鎮府諸公

莫言傳舍爲他人漢郡無如此最真

府治平暢東漢立郡必在此地

聖經室讀集

卷八

三

日集

郡名沿東漢至今不改者此亦最確勒石先題古柳貌後漢書明帝時哀牢王柳貌內

附引泉應號小蘭津華陽國志云孝武時通博南山渡瀾滄水人歌之曰漢德廣開

不賓渡博南越蘭治功頻首思張翁漢書明帝紀永平元年姑復夷

復叛益州刺史發兵討破之政事從頭學鄭純華陽後太守巴郡張翁政化清和

士女總讚云純字長伯鄭人也為益州西部都尉處地金銀琥珀犀象翠羽出作此官者皆富及十世純

獨清廉毫毛不犯夷漢歌歎表聞三司及京師貴重多薦美之明帝嘉之乃改西部為永昌郡以純為太

守在官十年卒今日昇平同在此一池秋水十分春列畫頌東觀

漾濞溪道中通志云在蒙化府城西北一百八十里其源有三一出大理浪穹縣

罷谷山由鄧州洱海流入府境為漾水一出吐蕃可跋海由雲龍入府境一出劍川繞點蒼山

後入府境為漾水二水合流至府西南為備溪江

收回雷霰長虹見揭起雲峰白雪鮮記取點蒼山背
路初冬時候夕陽天

漾濞合江上看月

點蒼山背亂峰堆漾濞雙流轉百回雲水萬重山萬
里一輪明月總追來

遊黑龍潭看唐梅二律

千歲梅花千尺潭春風先到彩雲南香吹紫鳳龜茲
笛影伴天龍石佛龕王斧曾遭圖外割驪珠常向水
中探祇嗟李杜無題句不與逋仙季廸談

鐵石心腸宋開府王冰魂魄

見蘇詩

古梅花邊功自壞

鮮于手仙樹遂歸南詔家

白香山新豐折臂翁詩言宋璟不賞邊功楊國忠貪

邊功鮮于仲通喪師南詔事

今日太平多雨露當年萬里隔烟霞

老龍如見三滄海試與香林較歲華

余不能飲最多一杯而已滇園梅花盛開不可
無酒命釀白糯數日卽熟花下欣然小酌仍不
能醉詩以自嘲

遠遊吾得渡瀾滄惜未隨花入醉鄉萬蕊已成香雪
海一缸宜釀王浮梁咏唼大可思何遜慷慨如將傲
杜康畢竟先生眞醉否深杯還是淺相嘗

梅園晚景

園林薄暝鳥初眠繞屋梅花香悄然月色淡黃花淡
綠半朦朧處是春烟

宜園三壽詩

壽石

玲石立一峰刻字在明代園宅有廢興此峰故常在

石壽幾千年勒字三百載

石南刻字云萬曆七年柏亭可教可賢全立二可乃

沐藩家
寺僧也

壽柏

柏亭始明代亭前有古柏壽逾三百年翠高六十尺

高六丈
蔭一畝

昔植老僧廬今森節使宅

壽梅

園中多古梅數百年之壽春花正縛繁苔身更堅瘦

若較龍潭梅彼老此尙幼

香雪齋前古梅十餘株雖皮老腹空用柱撐立而花

尙繁箭亭旁一大株三大幹根有鐵束不知爲何年所束乃今皮壳厚大反包於鐵之外鐵可見者厘十分之三

除夕園庭之花齊見者梅桃杏山茶玉蘭海棠

木瓜櫻桃馬纓春蘭薔薇木香迎春水仙長春

報春蜀葵十餘種

此地可名妙香國

妙香國見佛典俗以雲南卽妙香國見通志

此時可似

百花居

海國見聞錄海外有島名曰百花居

家鄉事事皆堪憶惟

有羣花比不如

戊子

定光寺看紅山茶花

定光寺裏紅山茶紅光不定搖朱霞古卉那肯在城
市南野獨立枯僧家登樓看花及花半尙有半出樓
簷牙高柯難見更引領濃豔極賞翻咨嗟青琅玕葉
雜翠玉紅珊瑚樹增丹砂挺立巨幹若壯士嬌凝舊
影羞吳娃英雄兒女各有說蘇東坡王梅谿山茶維
詩皆曾稱爲兒女花維
摩色相皆無遮世間桃李苦代謝老樹不自知生涯
惟知寒山多雨雪一寒一度生寶華龍潭北望頗不

遠相期應是唐梅花

上元登西臺望月

皓月照昆海元宵登眺來雲山繞城郭鎧火上樓臺
年熟民皆樂春晴漏勿催遙知深夜裏游客踏歌回

滇俗上元前後三日看鎧月人滿街大府發令箭巡
護三更令箭始回城開鑰今年年豐月朗遊人更多

和女蘿亭東園花月

驚蟄滇池尙未雷東園已見雜花開月從金馬坊邊

出春向五華山外來却爲芳林常秉燭

元宵後梅花已落桃李梨

花頻果花木香皆開不妨清夜再登臺感時兩地成遙憶

鳳沼輕冰江北梅

出西城十里遊龍門山海源寺

寺建於元平章明沐氏重建

滇南二月初三日頗似江南上巳天曉色照人出城

郭春風引我到林泉玲峰峭壁龍池外疎竹濃花佛

閣前

紫辛夷牡丹並開

隨處輕爐吹活火近時茶隱又經年

倚松書屋齋居

齋居小屋意從容卧聽茶聲起看松窗外露寒雙立
鶴城頭風定二更鐘掩書頗似學僧靜拙政還當愁
我慵爲憶選樓齋宿處春花滿院月溶溶

同李文園學使

棠階

遊太華山慙太華寺

華嶽五千仞峻嶒上金天若與滇池較池在華嶽巔

池上有高山名借太華傳華陽勒國志地括南中滇
梁州與黑水自古西南連顛縣昔漢郡太華居西偏
城中看西山蒼翠隔野烟春風得閒暇勝侶邀一賢
出城載茶榼適野敲吟鞭松杉閼巖壑雲水開天淵
拾級入古寺樓殿逾百年寺南啟虛堂萬頃何茫然
浩浩天外浪稜稜草際田雙塢辨遠郭片帆識漁船
山外壁更峭方削不肯圓搔首或落雁登頂難采蓮
石室雖可攀未許希夷眠我無攝生術神昏力衰孱
爲語瀛洲侶安能從羽仙惟當隨滇流乘槎歸日邊

水地大勢陝華州約畧與蜀夔州相平乃重慶敘
州江遠而高仰逾千里金沙江又高流入敘州江

滇池又高流入金沙江共數千里是滇池高於華
頂明矣若乘船出滇池口入金沙江又入蜀江入
漢江沂淮渡河竟可直達天津矣太華之名不知
起於何代以禹貢華陽梁州及常璩志推之此山
名爲太華極宜顛縣卽滇縣見漢書志太華山山
半之寺起於元代大建於康熙時其木石皆范總
督承勲毀吳逆故宅運去者范公有太華紀勝文
刻大理石嵌西堂壁上石巨盈丈真壤材也寺中
有明沐藩世代像亦有范公像

仙館東新開二方石池一栽荷一養魚池上栽
蘋果樹二株梨二株并於園南栽橡養山蠶以
爲民先

牆東荒地手親鋤砌石栽花二月初兩樹甜梨兩樹
柰一池香藕一池魚纔教園客來烘繭也看家兒學

著書除却煮茶兼解字更應何事算公餘

牡丹一枝開極大

花大如盤放樣新一枝何止十分春高扶浩態恐成
醉勃發豔紅疑是暎王鏡暈開香氣力紫泥催足暖
精神惟憐南詔詩家少莫道天涯無麗人

梅花蜜

園中梅花盛開至兩月之久二月蜜房已滿
割之是梅花所釀也

春半園花殘蜂釀可收拾呼童開其房蜜脾垂數十
一脾穴滿百蜂頭何戢戢

蜜房片片側垂如脾窩甘
孔側列于脾蜜含孔內

露頷可含黃粉翅能翕

蜂含花露于頷下沾花黃于翅股之間

瑩如冰

壺清白若玉膏濕計彼冬春間花稀寒不蟄惟有百

樹梅衙衙採之急

蜂一日

割脾留半臺

蜂王所居有臺割蜜須留

其半割少則蜂情割多則蜂饑

淋漓注且挹梅花香與魂全與蜜爲

入甜味翻銀匙萬花歸一吸

老鶴

爛漫齊開紅躑躅樹杪呬啞飛屬王何如老鶴靜無聲卓立蒼苔看修竹

登西臺看耕種

平野浸清瀕環城百頃田喜逢新雨後剛是種秧前

橫笛遙村犢抽帆小港船碧雞山色綠低與稻畦連

東園初夏

初夏尙清和東園日日過雙池涼氣合三徑綠陰多
瘦鶴常隨步幽禽各占窩引飛新燕子亂叫野鸚哥
莧染臙脂飯蠶收栗繭蛾奇花現優鉢鮮果結頻婆
嫋嫋風抽筍琅琅雨打荷窗深時可臥琴在不須歌
攜幼還扶杖看山更上坡但逢娛意處休問老如何

近華浦大觀樓新立石柱水誌

雲影天光四面青高樓欄外比滄溟溟池淨拭琉璃
界華嶺平開翡翠屏欲使萬村同水利先教丈石立

淵渟浦前刻碣題名處遠想焦山瘞鶴銘

渟池之水涓滴皆到

焦山入海戊子立三石柱一在金牛寺一在近華浦一在昆陽州海口以驗夏秋漲水之尺寸而知環渟州縣農田之深淺及海口之通塞

晚飯於福兒書齋登西臺觀稼是日剪得七種

園蔬桂花紫薇同開

西齋晚飯比山家六月棉衣不用紗七種自挑園內菜一甌同飲竹中茶摘來青李兼蘋果開滿紅薇又桂花城外稻田似城裏高臺闌外卽昆華

東園夏日

東園積雨半歸池密樹陰陰日影遲蒼鼠避人啣柏

子紅魚浮水暖蘋絲幾層石磴登臨處四面雲山坐
看時杖得青藜隨步穩不妨竹笠向風欹

早微散後掩園扉氣候溫涼驗化機蜂蕊四時香不
斷繭蛾五月破還飛釀花成蜜供丸藥據樹歐絲著
絮衣喜是郊原栽稻畢橡林又報野蠶肥

方塘砌石接平沙白藕栽成看水華落日曬香宜晚
飯曉涼收露點春茶闌邊雨過翠痕響竹裏風來紅
影斜就此課孫知雅訓花名茵蔯葉名藟

菜圃斜陽小屋晴綠杉林下晚風清豆篷瓜架隨人
坐瓠葉茄花礙足行素飽宜知藜藿味忘機可聽桔

棹聲閒來頗愛灌園叟除却肩鋤無世情

咏滇南景物

人以緼袍兼伏臘

六月臘月皆可著棉衣

花無月令開循環

四時

花不斷且午日開菊桂中秋開山茶水仙除夕春花亂開千瓣碧桃結桃滿樹盆中梅花頻果皆結實

不是春秋亦佳日別有天地非人間

重九曲靖道中

邊地西風早見秋今年重九又東遊登高佳處競鞭馬待穫閒時多臥牛驛路正當千里遠農田全是十分收黃花縱好不相賞飽看黃雲到貴州

白水河看瀑

有如此白水未及上翠微高谿瀉鳴瀨湍激不可磯
如驅萬鷺羣鶴鶴鼓翅飛及其落深滌百丈開晴霏
又如千疋帛裂擲天孫機境更夜郎遠奇僻與世違
太白所不到自古吟者稀詩人若相賞不惜濺征衣
貴州省城水南新構小閣正對溪山余名之曰
翠微閣并書扁

水南小閣題名後一段林巒未可忘黃葉多時有霜
氣翠微空處卽秋光眼前畫意任舒卷溪上詩情誰
短長莫怪闌干人倚久勾留清景是斜陽

鎮遠行臺在鎮陽江上江卽潯水也後倚石屏

山東橫大石橋橋南岸卽中元洞洞之上又有
一亭東向川途余題扁曰上元亭

鎮陽江外四山青擁列懸崖石似屏曉起遲看東嶺
日暮來少見北垣星當關蘭錡嚴兵衛登岸牂柯證
水經爲愛橋南巖洞好憑高題出上元亭

沅江綠蘿山

綠蘿巖勢頽懸藤釣沅渚漁詠幽谷中浮響若鐘虞
明鏡澈清潭風籟傳空浦酈氏注水經足跡未到楚
何以接靈均妙出湘沅語子厚永州文安能及斯古

清浪灘

沅灘最是清浪大四十里中石坎珂兩山亂石原連
根豈計奔流從此過清沅千里趨洞庭鼓浪直攻山
石破疊石若梯狹若門直下如春漩如磨石當因水
有撼搖水亦因山多折挫水石相通舟始來第一舟
應莊躋坐我待下灘心氣平不敢恃強亦無懦灘聲
已遠新月低擲筆鐙窗漸思臥

武陵舟中食蟹

武陵水落晚泊舟漁家簍裏多螯蚌十載不嘗郭索
味紫螯入手橫霜秋桃花米飯洞庭酒尖團何擇應
兼收監州與蟹別憎愛符竹那許橫行求計我管地

已無蟹

粵漢黔皆無蟹

况所監者將百州思量必有少卿在

更恐空惹坡公憂

蘇詩欲向君王乞符竹但憂無蟹有監州用錢少卿語也

荊州渡江

遠帆一片指荊州雁陣斜飛過我舟身在江天渾不覺怕人尋句正登樓

南陽道中早飯

黍糜麥餅晚菰根月店霜橋飽復溫何苦貴官誇貴食更將海燕壓雞豚

狐裘

一白狐裘廿四年南邊天暖久相捐今朝河朔當風

雪溫厚何曾減却前

戊冬述職

賜賚蕃庶紀

恩四首

賜紫禁城騎馬一

紫掖朝天日

恩教策馬來未能多矍鑠何敢少厯墮履星垣近

鳴珂王漏催小輿還

命坐帶子散朝回

次日又命坐小椅轎以代馬時伯兄戶部郎中叔弟刑部郎中

乾清宮

面賜福字二

錫福蒼生筆丹砂金繪箋

御前敷禹範頂上戴堯天

御筆書福畢跪受
內監捧福字從頂上過

春滿

璇宮裏香依

王案前傳宣加壽字

恩意在延年

又加賞
壽字一幅

賜

御筆出門見喜春帖子三

玉尺裁春帖祥雲繞筆花喜從天上至

恩近日邊加吉語傳中禁

龍光拜一家春明門外路誰道是天涯

賜黃瓣荷包

四

若若荷囊帶黃如

御佩同包含太和氣搖曳早春風品勝金魚紫

光分韞火紅幾回拜

優賜依戀王階中

擘經室續集卷九

文選樓詩存第十六

己丑

雪夜曉行擬楊誠齋

夜雪迷路曉勿馳
具茨不見歧中歧
驛卒獨捉老馬騎
爲我覓路行逶迤
皓然大塊白玉版
我以輪蹄雕琢之
又忽匝地成巨紙
細行草稿來題詩
題詩直到黃河岸
橫阻渾流望洋歎
河南河北白茫茫
一道金繩分兩半

溯沅水源入黔

一夜漫山雨三篙
上水船已交寒食
節不是冶春天

歷歷幾千里匆匆將半年江南好烟景想到杏花前
黔大定以西古羅施鬼國也穀雨過此牡丹處

處盛開

魏紫韉紅洛下姿東風吹放滿羅施郵亭院落皆雙
益茅屋人家也數枝滇水未能賞春色黔山頗不負
花期小瓶旁插肩輿裏一日看他四五時

由七星關入烏撒

七星岩外七星關幾輩詩人到此間難得知名似寒
士少經題句是邊山三春霜雪行冬氣

山高氣寒穀雨後到威寧

城見霜見霰乃常事

百丈峯巒抗冷顏留此一詩破荒寂荒無

故實問烏蠻

東園夏日

春花未及看及看夏初花

四月東園曇花榴葵皆盛開

樹結蘋婆

果田生哈密瓜

出京帶哈密瓜種之十日即生

抽絲成繭邑

時養橡蠶

為第二年又成繭

割蜜散蜂衙

蜂脾歷八月未割夏初割之蜜老綠色芳香尤濃

倦

向此園臥便如歸我家

大理石小屏方尺許宛然設色山水巧合天際

烏雲二句詩意

天際烏雲含雨重欲畫此情筆誰弄樓前紅日照山
明此景兼圖更難共何期大理點蒼山石畫天生出

蠻洞黑雲日影分五層雨意相含補其空雲中斜罅
漏日脚一片紅光向山送奇景能傳玉局書幻詩早
入君謨夢巧匠裁石妙使縱若使橫裁便無用蒙段
何知蔡與蘇造物天然遠相中嵩陽萬里有古情青
眼相看是清供此詩此石誰後先會向蒼巖較唐宋
伊中丞過東園蔬飯見示一律卽和原韻
園如谷口有山橋客似濠梁同見招風裏筍稍抽筆
直雨餘荷蓋瀉珠搖迴廊隱隱茶烟颺行竈青青菜
把饒共此籌邊多少事苦心却不是詩瓢

滇南風景

萬里西南地人間別有天三春不歸雁

秋深有雁率向西南飛去

春不見歸或由瀾滄土番北

六月未鳴蟬

天涼蟬極少六七月

歸或入緬甸則未必能歸矣

滿城綠樹便面涼停扇深衣夏亦絲

冬暖不用爐炭五六七月無一

不聞一蟬

日離却嗟唐宋客詩句少相傳

登西臺

每是登臺必解顏平疇遠接碧雞關
鷺黃鴨綠新秧地
眉翠鬟青過雨山
趁市船來漁舍外
近華樓在浦雲間
耕耘已畢農歸臥
喜得民間官亦閒

大暑節桂花初開

終朝涼雨不聞雷
北戶何曾肯暫開
今日節時交大

暑開窗爲放桂香來

秋祭東園齋居詩四十韻

余正月廿日生辰與白樂天同日余四十歲
時曾和香山四十白髮詩韻今勿勿廿六年
矣香山有六十六歲詩又是年落二齒有落
齒辭似老年一關鍵也清夜翦鐙作詩自忖
我昔年四十曾和白傳詩白年六十六有詩言其衰
七十欠四歲白樂天句我亦如其時我昔知命年目力先
差池今復十餘載晶鏡屢改移今眼鏡用七髮白雖
少半大半白其髭今年耳所聽亦覺收聲遲我嫌人

語低瞶瞶將在茲白公於是歲二齒落有辭我幸卅
餘齒全在無所隳居粵八九載濕氣注四肢詩云微
且腫脚氣殊難醫入滇氣涼爽左足去其疵右足尚
有病夏來加藥治近亦可半愈兼以息身疲園中有
山臺藜杖閒可搢廐中有紫騮遊山偶一騎仲秋多
祭祀齋宿今其期東園好亭館雜樹交秋枝鐘鳴鶴
聲靜清夜因自思我無白公才我比白公羸今亦大
十六官重非分司白公每乞分司閒官年齒與祿位不圖至於
斯老妻攜季子歸守墓與祠服官有二子效力居京
師滇南宦最遠今惟仲子隨仲子文筆拙經義微能

窺疏經成十卷

時福兒孝經義疏補初成

閱之頗解頤賞郎任子

間所執或不卑聚者固相慰遠者歎相離健亦勿侈

樂衰亦毋心悲君門隔萬里昔人常嗟咨我

君令

臣

喜

去冬出門見喜

賜御筆

喜氣盈須睂春明門外

路豈是天之涯惟念老態具精力將難支安可龍鍾

曳頽然籌邊陲然不籌邊陲偷安又何爲爲此齋居

夕自省復自疑尚其式古訓亦且力威儀大事在於

祀惟福養以之

左傳養以之福俗本譌爲養之以福

中秋塏鐙

月中塏影又懸鐙丈六支提九節青一夜忽看造阿

育二分無賴照棲靈花明滇上昆華館秋滿江南福
壽庭萬里清輝共迴首天邊風露度疏星

以八月十六日爲中秋

雨餘昨夜無明月三五佳時室上樓忽計今宵月纔
望正該十六作中秋

凡中秋十五無月而望在十六者正宜以十六爲中秋

秋園

秋園策杖繞山行更比春園氣候清到處閒花皆有
色許多幽鳥不知名白梨紅柿攀枝摘甜菜香茶共
竈烹案牘判完還把卷夕陽澹似老人情

暮登東臺

西臺遙對碧雞關更看東臺金馬山秋日有情此城郭夕陽無限好峰巒未能酒飲須茶飲縱不朝閒可暮閒石上席狨清坐久朱霞照我得酡顏

題伊莘農中丞不倚圖

古人曾有言地上卽是天惟天爲足倚此外何取焉有莘特立人不倚更不偏宛然中規矩折方周亦圓所佩有緩急在韋亦在弭賦性得骨力可與立與權如此無所倚已五十餘年開圖識生面但坐草芊芊除彼室與戶去其車與船不著屏與几勿傍林與泉是曰強哉矯豈非賢者堅道光七八載暨我居清滇

閒心共覓句苦意同等籌邊我少本無倚況復今華顛
卽此恃天處竊欲相比肩題詩卽言志晚節皆勉旃
以園中柿芥餉莘農中丞見謝長篇因亦以詩

相酬

旣不能爲田舍翁毛錐長劍誰雌雄不如治事有清
暇可以老圃兼老農東園古柿高五丈二三千顆垂
秋紅凌霜摘落去其澀甘脆與梨爭異同秋來北地
寄菜種入土卽綠成晚菰蔓菁香芥潑生辣咬根得
味亦禦冬東鄰西鄰井薄瀾傾筐送去田家風幕掾
分嘗牙將笑兩家氣味皆冬烘果然牙齒嚼清慧已

有長句來詩筒君遷入賦亞平仲元修有菜吟蘇公
君不見吾家閒地尚數畝新栽小麥青茸茸好待明
年作餅餌隻雞斗酒相過從試將野叟茅屋趣納入
戟轅園圃中

曉坐後院石壇

侵曉石壇上居然農圃間晨光銷落月霜氣肅邊山
野趣暫相借閒愁難盡刪不知南去雁何處北飛還

東臺待月

東嶺生明月悠悠照遠村天光澄碧落山影接黃昏
頗不負今夕祇因遊此園歸來行竹徑相送似柴門

霜降日暮登臺看西山

霜氣初嚴雨氣衰碧雞峰色碧參差況當落日餘霞
後正是塗金刷翠時堆起佛頭見華頂磨開銅鏡照
昆池子安山紫潭清句付此方成絕妙辭

大理石屏四時山水歌

已丑冬又見大理四石縱橫皆一尺外巧如
畫幅第一橫幅春山睡綠湘烟疊疊其痕宛
然有欲銷之意用子厚句題之曰烟銷日出
不見人欵乃一聲山水綠此湘烟春霽也第
二方幅橫嶺連峰沉陰黝綠色下有雲起上

有雨來用許渾詩意題之曰溪雲初起山雨
欲來此夏山欲雨也其三立幅特立方峰右
連緣嶺天飄雨脚雲落峰腰亦用丁卯詩意
題之曰殘雲歸太華疎雨過中條此華嶽秋
晴也其四橫幅石紋如坡公雪浪石青白相
糾酷肖風雪江流寒磯激浪之勢卽用坡公
句題之曰畫師爭摹雪浪勢此寒江雪浪也
南雲石幅天生奇奇乃造物爲畫師烟雲雨雪各有
態高山流水分四時造物筆墨何手持何年穴山爲
畫師豈獨勝於畫師畫更得巧合詩人詩子厚漁翁

句久讀不料此詩在山腹湘烟裊裊銷成痕暖透春
山割新綠夏雨欲來垂雨紋山下滄起溪中雲雨雲
山色漸不分風聲颯颯如可聞詩人行過潼關道華
嶽秋高晴更好殘雲疎雨中條山繪出江南許丁卯
又聞東坡雪浪石蜀江畫師留白脈東坡雪浪齋銘
序云余得黑石
白脈如蜀孫知微所畫
石間奔流盡水之變可如此畫飛寒濤風雪江頭
浪花白孫太古冬景米襄陽夏景洪谷子秋景趙子昂春景世
間絹素易漫漶不若石畫能久藏天工豈借人智力
妙手偶得天文章詩情畫意破石出驚天逗雨吟點
蒼

過開化天生橋題名刻石

大道何平平到此已萬里誰知坦途下橫貫巨川水
谿深岸愈高絕壁水面起惟此兩壁巔相接復相抵
此橋真天生百步平若砥橋邊勿駐足亦勿俯而視
臨深知其危奔流浩無底問水何所歸百里卽交趾
諭蜀馬相如題名難到此

戲荅家人

非但養心兼養目高年遠宦少看書家人勸我言如
此我荅家人意可如豈有劉伶聽戒酒祇應輪扁老
攻車此中也有長生法不用三仙飽蠹魚

坐月壇坐月

坐月壇邊夜色遲梅花香動影交枝直從茅屋黃昏

後坐到參旗掛月時

壇旁結茅屋一間

新造擡礮演成速戰陣和伊莘農中丞韻

聖武征西速戰平楊家演得陣圖成

楊宮保遇春練擡礮速戰陣收

平回部此力居多今余在滇仿造此礮教成此陣礮不逾五十斤肩負而放五礮成一連環能捷而及遠

傳來雷霆千聲礮抵過弓刀一萬兵目準手靈燃火

急步齊肩負轉環輕治兵頗可終朝畢還共敦詩入

詔城

報春花

滇中報春花弱草也葉類江南之虎耳草而無白紋其穗高不逾尺花五瓣小如珠翠之盤色在淺紫紅翠之間不畏霜雪冬初卽開凡抽穗至三卽交春矣近時翡翠玉中有一種紅翠色者女衣綾布中亦有比其色者皆名曰報春花色

翠應淡于羽紫亦淺于薇遠比西夷玉新宜少婦衣石邊自荏苒雪裏長芳菲報春何足論耐得送寒歸

大理雪浪石屏用蘇公雪浪石詩韻

大理石片如方立幅之畫一波翻白突起似

有磯激于其中波上迸起浪花浪花外水紋
又成黝綠青白色數層皆具飛濤走雪之勢
昔坡公云余得黑石白脈如蜀孫知微所畫
石間奔流盡水之變畫鑑云孫知微水石圖
一石高數尺湍流激注飛濤走雪今此石頗
似之應亦名之曰雪浪石置香雪齋中

太行石畫如雲屯人巧不到天工尊花石綱殘汴河
凍雪浪齋破寒雲昏蘇公久別此石去尚留銘字埋
荒村黑水梁州玉斧劃別有大理開國門孫知微死
八百載點蒼山裏招其魂畫家粉本入石骨詩人魄

力通天根飛濤向天學雲白古雪窖地變玉痕片片
幻出洱海浪定州一卷非所論况此翻瀾激磯石屏
立不用蘇齋盆齋前梅花亦香雪目擊雪子吾道存
冬至後連得大雪

風暖滇池冬不寒同雲難見彩雲間忽飛冰雪鋪千

里直洒來牟飽百蠻火熱石鑪憐郤屋

滇人少棉衣寒則于屋內

石阮燃薪爲暖

時平鐵甲解邊關

歐陽永叔雪宴詩云須憐鐵甲冷徹骨四十餘萬屯

邊兵

登臺更向園林去放眼遙天萬玉山

百樹松杉凍壓枝竹稍垂葉釣清池卽今玉圃攜筇
日去歲黃河渡雪時路有鴻泥已陳迹家如琴鶴半

輕隨况當香雪花初拆合請皤翁坐詠詩

山海棠

滇山中有大樹名山海棠冬至前開花交春
方謝其花葉皆似海棠蒂亦垂絲而濃密過
之霜雪滿山紅林獨盛偶買連枝插瓶彌月
此花富民縣多昆明縣少余使花奴移買穉
者植之署中

何來冬嶺樹道是海棠枝萬卉彫零日此花穠豔時
凌雲垂鄂不傲雪濕燕支桃李春風耳歲寒誰與詩
臘八日園梅有開者

雪後雲陰意冷清閒隨雙鶴繞園行梅花有性真天
放得到開時便縱情

園梅半開

霜雪風寒理亦齊幾枝曲直任高低林中香性誰知
得我道梅花似馬蹄

詩中不妨戲用玄學說明是玄
便不妨總不可外儒而內玄

月夜遊園

己丑臘月十四日霜雪之後南風減寒嚮晦
月出清景朗澈遂乘椅輿出香雪齋池上林
梅初開仙館牆東臨池小憩雜樹葉脫月光
在粉壁池水之間明潔如晝復由茶隱亭過

宜亭而南止于射圃閑田遠做得月更多綠
杉影直雙鶴靜立老梅南枝向月耀白城鐘
已動坐賞良久復回仙館登北山石臺東望
城中萬屋鱗次城外金馬諸山羅列楚楚山
外流雲橫亘似霞非霞天宇空碧肅而不寒
坐待參昴旣高與月同轉始由山後而返何
地無月何人不得月若不記之則此景付之
太虛矣

夜園月境幽登臺境更闢梅月守靜虛雲山廊清白
我見王輞川近臘愛月夕我見蘇東坡月影玩竹柏

我無裴與張但與月主客後之視今者或如今視昔

東園殘臘

幾曾孤負好年華如此園林聽放衙三徑有苔皆步
鶴一年無日不看花籌邊心力營巢鵲送臘時光赴
壑蛇除却雷塘庵外雪未應春雨更思家

庚寅

正月八日遊西山花紅洞法界寺

邀遊古巖穴更在西山西遶頭策驄馬山足指碧雞
松柏鬱遠翠榆柳含新蕙壑底響泉筑嶺邊休雲梯
石門謝康樂林間孔稚圭轉折見厓洞指點尋招提

旃檀嚴梵像蕙櫟拜

御題

寺殿有御筆萬里傳經四字

聖祖

參天玉蘭立拂殿紅茶齊

歸途視每俯平野望弗迷太華列屏障滇池明玻璃
偶然共遙集聊復遵故蹊出山已蹉午落日春風低

正月二十日偕劉王二叟竹林茶隱

三人二百五十歲隱入竹林同所憩舉甌啜茗作壽
朋少破從前獨遊例桐城壽者百四齡談笑游行啣
甘脆自言弱冠入滇池眼見乾隆平緬裔浪穹老年

七十九手披經解講六藝

時學海堂經解初刻成寄到滇共一千四百卷與王

其概

此乃門中古桃李却並尚書紅杏麗

雨春軒前古杏盛開

軒扁乃乾隆癸未年書
杏在扁前亦百年樹矣

南中地暖纔立春已似山陰

欲修禊時花香葉青春深

時梅已殘
桃李初開

綠篠新篁夕陽

霽兒輩燒松烹洱茶竹亭爐烟風細細

園東竹中
有茶隱亭

羊

求三徑寂無聲惟有林間鶴清唳香山七老今得三

疑我年者使之計

左傳曰疑
年使之年

滇中有百四歲劉壽叟者名廷植桐城人步履目

光齒力皆健鬚髮未全白如六十許人語音高而

善笑叟於壯年在迤西見大何首烏重百餘斤購

得之剖吸白漿目光頓明精神增健由此得長壽

無他異術家大人曾仿唐人何首烏傳作劉壽叟

傳又有家大人已未門生王樂山大令者名崧榜
名藩浪穹人年七十九學問淹博爲滇中老宿總
纂滇省通志精神步履亦強健福乃於庚寅正月
二十日邀劉王二叟在宜園陪家大人遊坐福侍
茶爲壽三壽共二百五十歲唐白香山初爲七老
會其中尚無百餘歲者家大人生辰與白公同日
七老九老再俟諸他日福謹記

立幅雪浪石屏

高一尺六寸
寬一尺三寸

再用坡公雪浪石

七律韻并鐫字曰琅嬛館仿蘇公雪浪齋孫知

微畫法

畫仿眉州復定州宛然濺雪激奔流摹成水法有藍
本捲出浪花皆白頭石脈千年磨不滅江波半幅翦
來收誰能挽得狂瀾住詩力蘇齋抵萬牛

西宅後有紫薇二株葺其後屋題曰紫薇花院

西堂後屋似閒衙收拾荒園可住家山頂平橫青玉

案

正西玉案山

檐牙齊列紫薇花千枝瓊樹看成碧一片

卿雲半是霞須與民間共疴癢莫將官樣負清華

羣芳

譜紫薇名怕癢花梅堯臣詩薄膚癢不勝輕爪陸游詩稱紫薇爲官樣花

紫薇花院後圃坐月壇

卅丈花垣一丈壇石欄啜茗晚盤桓風知少女微時

好月向上弭圓後看

園東有古柏二株望後見月便遲

竹柏兩人影

閒暇星河萬里指闌干且休久戀金波色清露之中
邊氣寒

澹泉

紫薇花院後最西北有井如簪發其覆石汲
之濕二丈之綆其脈由陞山來由五華山出
水甚清白無鹹苦之味然亦不甘蓋甚澹矣
名之曰澹泉

汲得無波井其深如古潭由來上池北穴出五華南
澹欲生虛白清何計苦甘曾陪隱之酌似此又焉貪

聖朝三紀集 卷六
署西木臺將朽遂拆之遷於澹泉西南七丈許
用七千土塹疊爲方臺名之曰碧雞臺

草草荒園起一臺不勞民力不傷財兩層白紙餉虛
牖四壁黃泥疊大坯寒重壓簷飛雨雪春深繞屋走
雲雷縱橫方丈尋詩地那值文人苦費才

排闥誰何到此臺碧雞山特送青來兩三峯向研池
立四十里將屏畫開疎雨晴時霞斂罨夕陽沉後翠
成堆登臨更比東臺近阮眼相看日幾回

水照青天似鏡臺不因城市染塵埃汪汪千頃涵清
濁采采中央詠溯洄金馬山前多佛樹黑龍潭上有

唐梅何如細讀王褒傳縹碧光中節使來

縹碧雜見西京雜記

王褒文

半是公餘可上臺坐看耕種到星回

滇俗以六月廿四日爲星回節

以松炬祀田祖登臺望之明若繁星

不言不動知風自生魄生明記月

哉柔遠惟思鄭純法籌邊休用贊皇才祇今一片滇池水唐宋何人得見來

食家園新麥麵

後圃閒地多偶種數畝麥春來抽穗芒有浪深二尺
園丁攜月鎌刈之付磨石霏屑出重羅無以比其白
今年餅餌香舊臘雪霜汁快此麥秋風黃雲滿梁益

東園夏日

園池長夏樹扶疎待到閒時意自如爲試輕鞵去尋
鶴但拋香餌不釣魚老年可得惟加飯結習難除尚
著書俗客何來詩客少使君家似野人居

末用杜牧之句

蜀葵花

蜀葵春早是滇池夾路當階復滿籬五色各爭高一
丈萬花分與占千枝牡丹極豔何曾久秋菊能黃又
惜遲惟此向陽開不斷芳菲接到雪梅時

滇葵春半已開直到

冬末一穗初殘數穗復起計花之久而繁無過此者
余栽之甚多花有紅紫黑白紺五色其紅色又分大
紅桃紅粉紅紅三色惟無黃色讓與秋葵耳

紅藜杖

青藜杖數枝三年矣丹漆之名曰紅藜欲象

唐之赤藤

老龍拔鬚電搜壁南詔蠻藤如血赤昌黎吟罷香山

吟

韓昌黎有南詔赤藤杖詩白香山亦有南詔紅藤杖詩

萬里雲天隔梁益我

持節住六詔南欲覓此藤無處覓園中自有老藜根
斫取數枝握青碧三年未免色模飭半染苔痕半手
澤忽加丹漆華而堅柳櫪橫擔五六尺太乙吹火紅
照人不許珊瑚鬪玉石皤翁攜此東園來一笠圓棕
雙蠟屐勁莖疎節輕于藤皓鶴驚紅避長策而今那

有異牟尋頗可扶藜傲韓白

夏登碧雞臺

六月滇池上登臺引興長郊原酣雨氣水木泛雲光
尚覺棉衣薄全將羽扇忘昔年泰山頂似此得清涼

野鶴羣

六月廿六日有野鶴爲羣盤飛于宜園林杪
與園鶴相和而鳴久之向南飛去數之恰十
雙也園丁云此鶴與園鶴朱頂者無異滇中
多有之久晴將雨則入澤久雨將晴則入山
秋田旣熟羣飛損稼農人逐之捕之雲南舊

志惟有灰鶴無白鶴蓋習見野鶴耳野鶴毛
色不甚鮮白宜園鶴初來亦不甚白養之逾
歲始全皓潔滇鶴與余鄉淮海之鶴無異惟
白喙以下一尺頸全黑不似淮海鶴乃黑白
二色相糾轉也

忽驚林杪白紛紛廿鶴盤飛白結羣濕羽昆池嫌滯
雨振翎華麓快晴雲高吭引和清相應衆翅搏風颯
可聞能舞終憐園內鶴褊褊肯向鮑參軍

題碧雞臺

不難終日住樓臺難得臺從古跡開山在益州雞縹

碧節持漢使羽琕璫二千年上神光在五色雲中翠
影堆若是倚樓橫塞雁王褒還擬洞簫來

大理石屏正面立看合疎影橫斜水清淺背面
橫看合暗香浮動月黃昏

疎影暗香交水月若教作畫頗難工誰知和靖詩心
在透入蒼山石骨中清淺倒垂枝掩映黃昏斜倚氣
朦朧妙從不甚分明處兩面縱橫覓句同

九日登西臺

九日登臺近更宜豐年佳氣滿昆池直從綠雨鋪成
後看到黃雲捲盡時拙政無如觀穫樂新炊端可望

烟知白杭一石銀纔兩穀賤傷農是謬詞

翡翠玉效樂天樂府

古有驃國樂今有驃國王

翡翠玉來緬甸
緬甸卽唐驃國

朝廷不寶之此玉入流俗色不尚白青所貴惟在綠
炫以翡翠名利欲共爭逐佳者比黃金價更倍五六
滇關駝玉來麤皮皆碌碌貪綠在皮中若可見其腹
或以千金享或判卞和足及剖乃異色今多淡紅色
青蓮色卽報
春花幾于抱玉哭或見綠一斑喪斧少償贖若得綠
色一拳卽能潤其屋緬夷賴爲利斷之彼窮辱此貨走
東南狗之意殊惡貴賤有何常好尚誰反覆所寶若

青紅綠璞成賤璞

西行閱兵憩雲南縣青華洞

青華古洞最清華水木分明又一涯湖墅羣飛朱頂

鶴是日有鶴數十隻飛旋水上滇人不名曰鶴但呼之曰朱頂紅郵亭濃發白崖花

縱來遊客難尋穴洞有水阻可有詩人此住家但使琴堂

非俗吏必耽元狩舊雲霞雲南立縣始漢元狩至于彩雲見於白崖之說不見

於古書

點蒼山書所見

睡醒榆川夜雨殘曉來積雪滿蒼巒早霞西掩青爲
蓋初日東升金作盤雪嶺不知何處去火雲忽變作

奇觀赤城紅燒烟消散玉嶂依然白氣寒

過蒼山第十五峰下登楊升庵寫韻樓又至大

雲堂外觀龍女花

十五峰前洱水涯舊樓還是野僧家楚雄垂柳不堪

折折得一枝龍女花

升庵過楚雄作垂柳篇龍女花惟此地有之高數丈花以單瓣

白茶花稍大而韻勝之皮色亦相似惟葉長而不脆或山茶之別種歟

重修承華園教場閱武

省城內五華山西有校場卽前明沐氏之柳

營今名承華園其堂有康熙辛卯年舊扁曰

景武堂庚寅冬重新之周築土牆三百六十

丈留取土之坎以爲荷池堂後存古柏四大
株餘樹皆朽今栽新柳數百株加以雜花此
地閱小隊官兵演連環擡礮最便

柳營舊是沐家場今日重修景武堂坐榻頗宜依大
樹射屏還與種垂楊池邊共遂爲鵝願階下還疑畫
戟香旗偃梅花軍士散吟鞭歸去又斜陽

臘月十四夜游宜園

殘臘月將滿月下宜有梅古梅三十樹衝寒香半開
梅邊宜有鶴雙鶴立老苔與梅夜相守不覺清鐘催
宜亭竹柏影參差接東臺試問此園境豈不宜我來

扶藜復行樂

去年此夜
游園有詩

獨往無人陪斯時思所宜宜

于漉新醅雅欲學古人對月引一杯白墮不我醉白
鶴不我猜梅花再百臘我亦古人哉

大理石擬元人四時山水小幅


仿名家四時山水小景四幅石質皆堅滑如玉其一高五寸五分寬一尺上方綠色橫山起伏有情下有烟霞青紅二色勢亦起伏題曰春谷烟霞仿趙鷗波設色也其二高八寸三分寬七寸五分中橫赭色山似有暑意山上烏雲橫流鬱然含雨題曰夏嶺蒸雲擬高


房山染法也其三高八寸三分寬七寸五分
下有坡樹中隔溪水水外山村色雜黃駁具
霜林之趣題曰秋山黃葉摹黃子久筆也其
四高九寸八分寬五寸五分主峰中立皴染
無多而積雪甚厚峰外雪氣滿天題曰寒峰
曉雪用倪雲林簡筆也

點蒼山裏石畫繪皆天生乃不曰天生翻云人畫成
子昂與子久二難何可并房山力淳厚倪迂多逸情
旣謝縑楮質豈許丹青爭春谷霞彩暖夏嶺烏雲橫
秋村有黃葉冬雪曉未晴設色尚非異神韻入妙精

筆跡不可求渾脫疑且驚我縱各題品未足揚其名
此物自不朽造化詩無聲

我時自不以爲然也
雖欲不爾求而無益耳





擘經室集

一九

十一

四庫未收書提要

擘經室外集

家大人在浙時曾購得

四庫未收古書進

呈

內府每進一書必仿

四庫提要之式奏進提要

一篇凡所考論皆從采訪之處先查此書原委

繼而又屬鮑

廷博

何元錫

諸君子叅互審訂

家大人親加改定纂寫而後奏之十數年久進書一百數十部此提要散藏于揚州及大兄京邸福因偕弟祐孔厚校刻擘經室集請錄刊提要于集內家大人諭此篇半不出于已筆即

擘經室外集

四庫提要序

一

一篇之中創改亦復居半文不必存而書應存
可別而題之曰外集道光二年阮福謹記

擘經室外集卷一

禮記要義三十三卷提要

九國志十二卷提要

皇宋通鑑長編紀事本末一百五十卷提要

四書箋義纂要十二卷紀遺一卷提要

漢官儀三卷提要

嘉定鎮江志二十二卷提要

至順鎮江志二十一卷提要

續世說十二卷提要

嚴氏明理論三卷後集一卷提要

陸士衡文集十卷提要

註解章泉澗泉二先生選唐詩五卷提要

續後古編四卷提要

四書待問二十二卷提要

道德真經集解八卷提要

聲隅子二卷提要

嘉量算經三卷提要

分門纂類唐宋時賢千家詩選二十二卷提要

梅花喜神譜二卷提要

晁具茨集十五卷提要

詳註周美成片玉集十卷提要

琴操二卷提要

詩傳註疏三卷提要

尚書要義三卷提要

左氏摘奇十二卷提要

回溪史韻二十三卷提要

梅花百咏一卷提要

通元真經注十二卷提要

古逸民先生集三卷提要

漢文鑑二十一卷提要

蘋洲漁笛譜二卷提要

兩京新記一卷提要

洞霄詩集十四卷提要

燕喜詞一卷提要

醉翁談錄五卷提要

重修琴川志十五卷提要

南華真經注疏三十五卷提要

華陽陶隱居集二卷提要

三術撮要一卷提要

蕭冰厓詩集三卷提要

徐文清公家傳一卷提要

鐵崖賦稿二卷提要

日湖漁唱一卷提要

重編海瓊白王蟾文集六卷續集二卷提要

說文解字補義十二卷提要

卷二

支遁集二卷提要

五行大義五卷提要

羣書治要五十卷提要

文館詞林四卷提要

臣軌二卷提要

樂書要錄三卷提要

膳夫經一卷提要

岑嘉州集八卷提要

列子注八卷提要

讒書五卷提要

中興兩朝聖政六十四卷提要

建炎筆錄三卷提要

寶祐四年會天厯一卷提要

辨誣筆錄一卷提要

南嶽總勝集三卷提要

自號錄一卷提要

衢本郡齋讀書志二十卷提要

友會設叢三卷提要

孔叢子注七卷提要

孫子十家注十三卷提要

千金寶要十七卷提要

一切經音義二十五卷提要

古清涼傳二卷廣清涼傳三卷續清涼傳二卷

提要

道德真經傳四卷提要

泰軒易傳六卷提要

春秋集傳十九卷提要

九經疑難四卷提要

爾雅新義二十卷提要

集篆古文韻海五卷提要

太常因革禮一百卷提要

卷三

難經集注五卷提要

脉經十卷提要

類編朱氏集驗醫方十五卷提要

史載之方二卷提要

書齋夜話四卷提要

遁甲符應經三卷提要

六壬大占一卷提要

夷堅甲志二十卷乙志二十卷丙志二十卷丁

志二十卷提要

策學統宗前編五卷提要

斜川集六卷提要

增廣箋注簡齋詩集三十卷無注詞一卷提要

史詠集二卷提要

平安悔稿十二卷提要

雲莊四六餘話一卷提要

分類唐歌詩殘本十一卷提要

詩苑衆芳一卷提要

南海百詠一卷提要

聲律關鍵八卷提要

觀瀾集注三十卷提要

梅磬詩話三卷提要

樵歌三卷提要

陽春白雪八卷外集一卷提要

王周士詞一卷提要

詞源二卷提要

新增詞林要韻一卷提要

陳氏小兒病源方論四卷提要

歷代蒙求一卷提要

論語叢說三卷提要

讀中庸叢說二卷提要

續古篆韻六卷提要

皇元征緬錄一卷提要

元祕史十五卷提要

羣書通要七十三卷提要

遊志續編二卷提要

王山璞稿二卷提要

桐江集八卷提要

王徵士詩集八卷提要

松雨軒詩集八卷提要

蟻術詩選八卷提要

名儒草堂詩餘三卷提要

蟻術詞選四卷提要

名家詞十卷提要

卷四

五服圖解一卷提要

律文十二卷提要

莆陽比事七卷提要

黃帝陰符經疏三卷提要

中藏經三卷提要

王函經一卷提要

三水小牘二卷提要

玉堂類藁二十卷西垣類藁二卷提要

周易經疑三卷提要

詩說十二卷提要

書經補遺五卷提要

漢唐事箋十二卷後集六卷提要

崑山郡志六卷提要

羣書類編故事二十四卷提要

釣磯文集五卷提要

穀齋別錄一卷提要

編類運使復齋郭公敏行錄提要

元賦青雲梯三卷提要

隸韻十卷提要

編年通載四卷提要

廣黃帝本行記一卷提要

淳祐臨安志六卷提要

賢良進卷四卷提要

四元玉鑑三卷提要

運使復齋郭公言行錄一卷提要

圖解素問要旨論八卷提要

元風雅三十卷提要

卷五

東皐詩集五卷提要

周易新講義十卷提要

通紀七卷續五卷提要

諸葛武侯傳一卷提要

離騷集傳一卷提要

策要六卷提要

慎齋集四卷提要

詩義指南一卷提要

增廣鐘鼎篆韻七卷提要

王峯志三卷王峯續志一卷提要

長春子遊記二卷提要

軒轅黃帝傳一卷提要

養正圖解全卷提要

尉繚子直解五卷提要

關尹子言外經旨三卷提要

爲政善報十卷提要

東漢文鑑二十卷提要

道德經論兵要義四卷提要

遺山樂府五卷提要

招捕總錄一卷提要

詩義集說四卷提要

唐陸宣公奏議注十五卷提要

雲間志三卷提要

司馬法直解一卷提要

楊氏算法三卷提要

松窗百說一卷提要

續墨客揮犀十卷提要

陶靖節詩註四卷提要

貞一齋詩文藁二卷提要

輿地紀勝二百卷提要

止

擘經室外集卷一

禮記要義三十三卷提要

宋魏了翁撰宋史本傳稱其有要義百卷據藝文志實二百六十三卷訂定精密先儒所不及方回跋了翁所撰周易集義云前丁酉歲以權工部侍郎忤時相謫靖州取諸經注疏摘爲要義宋史藝文志分載其書而讀書附志讀書後志書錄解題文獻通考皆不著錄明時已無全本內閣所藏據張萱所述已闕毛詩周禮其餘七經按其冊數太少知亦殘闕之本今

四庫全書所采有周易尙書儀禮春秋四經周易乃
天一閣舊鈔本已蒙

高宗純皇帝親灑宸翰昭垂卷首嘉惠藝林洵奇遇
也其自周易儀禮外率非足本此書明聚樂堂藝文
目有之經義攷云未見此本從宋刻影鈔存者三十
一卷曲禮上下兩篇亦以遺佚爲憾然較諸春秋之
所存者固已勝之案虞集九經要義序云取諸經注
疏正義之文據事列類而錄之與方回之言合而張
萱則謂考究九經中義理制度今案其書刪節注疏
存其簡當去其煩冗每段之前各有標目以便讀者

之省覽了翁初無已說葢之所言葢未嘗詳核也諸經注疏自宋遞傳至今脫文譌字不可勝舉了翁所據猶宋時善本足資糾訂而禮記孔疏文繁義富未易得其厓略了翁刪汰過半頗爲精允可以爲研經者之津逮書中第五卷王制篇分上下實三十四卷云

九國志十二卷提要

宋路振撰案宋史本傳振字子發永州祁陽人淳化中登甲科真宗時知制誥嘗采五代僭僞吳南唐吳越前後蜀東南漢閩楚九國君臣行事作世家列傳

未成而卒王應麟云書凡四十九卷其孫綸增入荆南高氏於治平中上之詔付史館實十國也書錄解題則云末二卷爲北楚張唐英補撰合五十一卷文獻通考宋史藝文志總題爲路振九國志五十一卷俱不及綸蓋綸雖經增輯而當時所傳播者則唐英所補也此書世久失傳惟曲阜孔氏尙有舊鈔殘帙用以重錄得列傳百三十六篇編爲十二卷而世家之文已不復見卷帙叢殘闕佚過半然藉此以裨五代史之漏略已不少矣

皇宋通鑑長編紀事本末一百五十卷提要

宋楊仲良撰案李燾取北宋九朝事實仿司馬光長編之體編年述事爲續資治通鑑長編成書一百五十卷卷帙最爲繁重仲良乃別爲分門編類以成此書每類之中仍以編年紀事太祖七卷太宗七卷真宗十四卷仁宗二十四卷英宗四卷神宗三十四卷哲宗二十六卷徽宗二十八卷欽宗六卷共一百五十卷各有事目日中復有子目汴京百七十年禮樂兵刑之沿革制度政令之舉廢粲然具備可以案目尋求李燾而後陳均之前煩簡得中洵可並傳而今所傳長編足本徽欽兩朝皆已闕失藉此得以攷見

崖畧尤可貴也仲良之名不見於書中卷端有寶祐
丁巳廬陵歐陽守道序亦不言著書人姓名而陳均
九朝編年引用書目中有之云長編紀事本末楊公
仲良故知此事出仲良手然其書不見於宋史藝文
志而趙希弁陳振孫馬端臨諸家亦皆不著錄近代
藏書家惟季振宜徐乾學兩家有之徐目云闕一百
十四卷至一百十九卷今此舊鈔本亦闕此六卷又
闕六七兩卷而五八兩卷亦非完袞較乾學藏本蓋
又多闕佚矣據守道序此書寶祐元年刻於廬陵郡
齋貢士徐琥重爲校刻則寶祐五年也

四書箋義纂要十二卷紀遺一卷提要

宋趙惠撰惠乃宋之宗室博學工文宋亡遂隱居南昌之東湖因號鐵峯是書載朱彝尊經義考此從元泰定間刊本影寫宋時儒者闡發四書之功爲多趙氏此書一遵朱子凡章句集注所載一事一言必詳考其本源而各箋義於其下箋義之後繼以附錄附錄之後繼以注疏纂要宋淳熙己酉以前學者確遵舊注自是以後幾不知注疏爲何物矣此冊載朱子論孟序云漢魏諸儒正音讀通訓詁考制度辨名物其功博矣惠亦以四書之學必先觀注疏而後知朱

子發明之精因作纂要其所論說本末兼賅使章句
集注之義豁然無遺較之杜氏之旁通熊氏之標題
有過之無不及也曾翰稱其二十年之功力彙箋成
帙李桀稱其由是而知朱子之說由是而通聖人之
道洵不誣矣

漢官儀三卷提要

宋劉攽撰晁公武郡齋讀書後志以爲劉敞所撰非
也宋史藝文志亦沿其誤此書有敞自跋謂幼年時
所爲仲原父爲之序至爲亳州守因復增損之此可
以證讀書志之誤案宋史劉敞傳敞自京東轉運使

出知兗亳二州守亳時年逾六十而自言嬉戲不異
昔時攷與兄做皆熟精漢書此雖適情之作而西京
職官之制度大備可以資讀漢書者之參攷以之較
司馬光七國象戲似爲勝之宜公武稱其書爲雅馴
其法先置盆入金以象口錢非劉氏不得王爲宗正
及尙公主以象一姓漢爲土德之運其數五五五二
十五故率二十五擲乃一終局有免貼例有納貼例
有得盆例有雜例而遷資降資賜爵比視之道備也
末附亡是公翰林主人二傳又案遼史國語解堂印
博采之名此書亦有之則知堂印不獨爲遼人語矣

此從影宋鈔本繕寫書後有一行云紹興九年三月
臨安府雕印知爲南宋初刻本也

嘉定鎮江志二十二卷提要

宋盧憲撰宋史藝文志有熊克鎮江志十卷而無憲
此書書錄解題云鎮江志三十卷教授天台盧憲子
章撰文獻通考亦著錄之此書中稱憲者四條稱盧
憲者一條故知是憲之書書中所載事蹟惟史彌堅
最詳趙善湘次之攷彌堅以嘉定六年九月守鎮江
八年九月請祠善湘以嘉定十四年十二月守鎮江
十七年召還寶慶二年再任案元至順鎮江志學校

門載教官盧憲嘉定癸酉謁廟事癸酉爲嘉定六年
正彌堅守郡之日書堂成於此時也此書不見於近
代藏書家著錄所存卷數與書錄解題不同中間脫
文錯簡往往而是案其目錄似於體例間有未協蓋
由原本已多譌脫經後人重爲編次小有牴牾固所
不免然宋人地志之存於今者十不得一而鎮江自
六朝以後遞爲重地南渡以前之遺文墜典如唐孫
處元圖經祥符圖經潤州集類京口集之類世無傳
本藉此以存厓畧零圭碎璧尤可寶惜今從舊鈔本
校正繕寫之

至順鎮江志二十一卷提要

此書不著撰人姓名案鎮江自東晉以來屹爲重地志乘之書在宋乾道間有熊克所撰者十卷見於宋史藝文志嘉定間盧憲所撰者三十卷見於書錄解題今乾道志久已失傳嘉定志尙有傳鈔之本已出後人掇拾此書體例大致取法於嘉定志而紀載詳備較爲過之大約宋志主於徵文此則重於攷獻宋志旁稽典籍務覈異同此則備錄故事多詳興廢鎮江在宋爲邊防之地故其志岐守形勢網羅古今在元爲財賦之區故此書物產土貢臚陳名狀其用意

各有所在不得而同也至於郡守參佐宋志近徵唐代此則遠溯六朝鄉賢寓公宋志旁搜隋氏以前此則詳於兩宋及元互爲補苴不可偏廢然此書自明以來藏書家絕無著錄之者洵爲罕覯之秘笈此舊鈔本編次失當文字多舛今重加校定繕寫俾考京口故實者得以取資也以之抗行袁桷之志四明殆無媿焉

續世說十二卷提要

宋孔平仲撰取宋齊梁陳隋唐五代事迹依劉義慶世說之目而分隸之成書十二卷見於宋史本傳及

藝文志小說家類卷一相同書錄解題文獻通考皆錄其書而近代儲藏家罕有著錄者王士禎居易錄曾道及此書云已失傳則士禎亦不得見此書也此書平仲無自序有紹興戊寅長沙秦果序序言平仲書成未刊從義郎李敏得善本於前靖守王長孺相與鏤版王親受於孔知其不繆丁丑之春雒陽王濯來守沅之明年李氏以其書版來售卽加是正鑱刻以補其不足云云後有沅州公使庫總計紙版數目并印造紙墨裱褙工食錢數日後又有右迪功郎司法兼監使庫翁灌右從事郎軍事判官閔敦仁右迪

功郎州學教授胡搏左朝奉郎通判軍州事秦果左朝散大夫知軍州事王濯五人題名皆沅州官也此從宋沅州刻本傳寫者卷袞完整無闕特書中部次錯雜有兩條合爲一條者抑且時代先後往往倒置蓋校勘之時不免有私爲竄改之弊必非平仲元本之誤也

嚴氏明理論三卷後集一卷提要

宋嚴器之撰取寒證分爲五十門詳爲之論又取仲景一百二十方之中擇其世人所常用者二十方各係之以論別爲後集一卷其說類多精詣可爲讀仲

景書者之津筏讀書志讀書附志書錄解題文獻通考皆無其書諸家著錄惟見於讀書敏求記案錢曾云此書尾斷爛序作於開禧改元稱成公當乙亥丙子歲其年九十餘則必生於嘉祐治平之間成公不知誰何蓋北宋時人也曾之言如此今此書首尾完好無斷爛處而失去開禧中之序蓋曾所藏本非宋刻也案宋史藝文志醫家類有嚴器之傷寒明理論四卷書名卷數若合符節此本從宋版影鈔雖不著撰人姓名其爲器之之書當無可疑成公與器之之名厥義相配殆卽器之之表德也

陸士衡文集十卷提要

晉陸機撰案隋書經籍志載機集十四卷又云梁四十七卷錄一卷亡唐書藝文志云十五卷較隋志反贏一卷殆傳寫之誤郡齋讀書志書錄解題文獻通考宋史藝文志皆云十卷則卽此本也宋慶元庚申奉議郎知華亭縣事信安徐民瞻曾合刻二陸文集取張華之語目之曰晉二俊文集此卽影鈔民瞻之本與

七閣所收陸士龍集相合計賦二十五篇爲四卷詩五十八篇爲二卷樂府十首百年歌十首爲一卷演

連珠一首七徵一首爲一卷頌箴贊牋表文誄哀辭
共十五篇爲一卷議論碑五首爲一卷共一百七十
四首案晁公武云機所著文章凡三百餘篇今存詩
賦論議牋表碑誄一百七十餘首厥數正同則民瞻
所刻卽公武之本也公武又云以晉書文選較正外
餘多舛誤今案卷末周處碑中有韓信背水之軍一
段乃以他文襍廁文義不相屬公武所指殆謂此類
其它文句譌脫未容枚數然北宋時已如此而機集
之傳於今者亦莫古於此本矣

註解章泉澗泉二先生選唐詩五卷提要

宋謝枋得撰案章泉者趙蕃字昌父澗泉者韓琥字仲止皆江西上饒人爲清江劉子羽之門弟子當時名人魁儒如葉適湯漢皆推重之此書五卷自韋應物至呂洞賓共五十四人計詩一百單一首皆七言絕句也而李白杜甫韓愈元稹之流皆不在選惟劉禹錫選至十四首爲最多其於諸家皆寥寥蓋其體例出於唐人故與極元集之類相似枋得之註能得唐詩言外之旨可以爲讀唐詩者之津筏卷端有枋得自序序爲建安王道可而發此書世罕傳本惟錢曾也是園書目有之而不載於敏求記枋得之書傳

世甚少宋史本傳藝文志皆不載書以人重不僅以罕覲爲珍也

續復古編四卷提要

元曹本撰本字子學大名人嘗爲都昌丞後出外佐信州幕與太僕危素相友善素撰三皇饗禮樂章本爲之書詔藏祕閣本好古篆年十七八時輒喜作石鼓嶧山篆師籀斯而主說文故下筆深穩圓動平生志事功而不究其用是書著錄家絕不收采蓋補宋吳興張有復古編而作張氏之書舊分類爲六一日聯絲二曰形聲相類三曰聲相類四曰形相類五曰

筆跡小異六曰上正下譌本因其類而加二焉曰字同音異曰音同字異自序云題曰續復古編非敢增多以爲功亦以發隱君之志備拾遺耳姑存篋笥尙俟博雅君子正是之是稿也四卷一十三類六千四十九字起於至順三年秋八月成於至正十二年閏三月蓋其一生精力所萃歷十九年之久而後成亦可謂勤矣此從吳江潘耒家所藏舊鈔過錄前有危素宇文公諒楊翮蔣景武及楊桓諸人之序惟尙缺上正下譌一類無從補掇爲可惜也

四書待問二十二卷提要

元蕭鎰撰鎰字南金臨江人是書因當時取士以經
疑爲試藝之首歷採宋元諸儒如朱晦菴張南軒一
十三家之說而折衷之亦閒取時文之不倍師說者
設爲問答之義書前有邵陵冷掾季存所爲蒼叢述
及續抄兩序稱其於甲寅賓興之初嘗貢於鄉旣而
以漏字黜則此爲其發科決策之作大旨以新安朱
子之說爲主而以己意貫串之於四子書意頗多發
明近時目錄家所載甚少惟黃虞稷千頃堂書目中
有蕭鎰四書待問二十二卷泰定甲子序卽是此本
茲就元時刻本影鈔前有四書互義後分列論語大

學中庸孟子凡五百四十問七百一十七則書中各條之下有注蒼叢者卽鎡自作有注自修者則爲龍江歐陽蒙所作鎡序所謂比客建城與友人歐陽養正讀書之次隨時采集因成是編卽其人也

道德真經集解八卷提要

唐岷山道士張君相撰君相事蹟不可攷此書舊本皆題爲吳徵士顧歡述攷顧歡齊時人隋書經籍志載老子義綱一卷老子義疏一卷又唐書藝文志有道德經義疏四卷義疏治綱一卷不特書名卷數均與此不合不應齊時人而先引及陶隱居成元英諸

人惟晁公武讀書志王應麟玉海有岷山道士張君
相三十家道德經集解一河上公二嚴遵三王弼四
何晏五郭象六鍾會七孫登八羊祜九羅什十盧裕
十一劉仁會十二顧歡十三陶宏景十四松靈仙十
五裴處恩十六杜弼十七節解十八張憑十九張嗣
二十臧元靜二十一大孟二十二小孟二十三竇畧
二十四宋文明二十五褚粦二十六劉進喜二十七
蔡子晃二十八成元英二十九車惠弼公武又言書
稱三十而列名止二十九蓋君相自爲一家言並數
之余今以其言攷之頗與是書合則爲君相所集無

疑至書中兼有引唐元宗御疏則又爲後人所羈入而所稱陳曰榮曰者殆杜光庭所云任真子陳榮也茲從道藏本錄出與天一閣所藏相同究係唐人所纂六朝人遺說賴以不墜著錄家往往失之爲可惜也君相不知何時人晁氏以爲成元英爲皇朝道士則天寶以後之人案杜光庭道德經廣聖義序引著述人名有岷山道士張君相集解在元宗御疏之前則不在天寶後矣且晁氏之言書中亦不見未知何據

聶隅子二卷提要

宋黃晞撰晞字景微蜀人嘗聚書數千卷學者多從之游案趙希弁讀書附志晞好讀書著聲隅歛歛瑣微論石介爲直講聞其名使諸生如古禮執羔鴈束帛就里中聘之以補學職固辭不就故歐陽文忠爲祖徠先生詩有羔鴈聘黃晞晞驚走鄰家之句嘉祐中韓魏公爲樞密使薦之以爲太學助教而朱子近思錄中亦嘗稱之爲聲隅黃先生洵乎儒者之流也書錄解題嘗載此書至宋史藝文志雜家類又有歛歛子一卷亦疑卽此本此從宋刻本影鈔國初時曾收藏於泰州季振宜崑山徐乾學兩家書

目書凡十篇曰生學曰進身曰揚名曰虎豹曰仁者
曰文成曰戰克曰大中曰道德曰三王每篇冠以小
序卷首又有自序述十篇相承之旨晞之文學在宋
初能見重於名臣大儒其辭受不苟殆有足稱者故
書中言論不詭于正體裁文句皆規撫楊雄法言王
應麟玉海直著爲儒家似可無愧也

嘉量算經三卷提要

明朱載堉撰載堉鄭恭王厚烷世子所著樂律全書
及聖壽萬年書等已著錄其律呂精義內有據臬氏
爲量內方尺而圓其外之文謂圓徑卽方斜命黃鍾

正律爲尺而用句股法相求此書蓋卽其意而推衍之其所異者正論則主縱黍算經則主橫黍其實亦互相發明也首載算經答問上卷先著圖說次乃推明周徑容積相求之理中卷由開方以及十二律通長面幕容積周徑下卷則因旋宮而兼識琴調大旨謂聲生於器而以度定量以量定權必參相得而後黃鍾之律可求數學之妙出於天地自然非由人力所能杜撰也載堉學問已詳於樂律全書提要之內此則成於庚戌在載堉二十三年進律書之後成書較晚足與前書相輔而行茲本卷數與明史藝文志

及千頃堂書目所載相同猶是原本其設術皆得諸心解固非空言無徵者所能及也

分門纂類唐宋時賢千家詩選二十二卷提要
宋劉克莊撰克莊有後村集五十卷及詩話十四卷
四庫全書已著錄茲其所選唐宋時賢之詩題曰後
村先生編集者著其別號也是書爲向來著錄家所
未見惟

國朝兩淮鹽課御史曹寅曾刻入棟亭叢書中前後
亦無序跋案後村大全集內有唐五七言絕句選及
本朝五七言絕句選中興五七言絕句選三序或錄

版於泉於建陽於臨安則克莊在宋時固有選詩之
目此則疑當時輾轉傳刻致失其緣起耳書分時令
節候氣候晝夜百花竹林天文地理宮室器用音樂
禽獸昆蟲人品十四門每門附以子目大致如趙孟
奎分類唐詩歌所選亦極雅正多世所膾炙之什惟
中多錯謬如杜甫王維趙嘏諸人傳誦七律往往截
去半首改作絕句甚至名姓不符然攷郭茂倩選古
樂府如風勁角弓鳴一律截其上四句題爲戎渾莫
以今時寵一絕加作八句題爲簇拍相府蓮則古人
多有此例不足以掩其瑜也

梅花喜神譜二卷提要

宋宋伯仁撰伯仁字器之湖州人所著有西塍集一卷

四庫全書已著錄此書宋史藝文志及諸家書目皆不載惟錢曾述古堂書目中有之寫梅花百圖上卷分五類一蓓蕾四枝二小蕊十六枝三大蕊八枝四欲開八枝五大開十四枝下卷分三類一爛漫十八枝二欲謝十六枝三就實六枝每圖各綴五言絕句曰喜神者殆寫生之意攷伯仁於嘉熙中曾爲鹽運司屬官故末首云商鼎催羹其平日多與高九萬孫

季蕃倡和自號雪巖耕田夫所吟亦見於陳起江湖小集千頃堂書目并載其烟波圖一卷蓋江湖派中人也茲從宋板影鈔前有伯仁自序後有向士璧葉紹翁序跋書初刻於嘉熙戊戌此其景定辛酉金華雙桂堂重刻之本也

晁具茨集十五卷提要

宋晁冲之撰冲之字叔用鉅野人卽侍郎公武之父攷晁氏於咸平景德中爲天下甲門一時羣從之盛多在黨中其富貴亦莫與倫比故著述之多如詹事以道之景迂集朝請之道之崇福集進士伯宇之封

邛集吏部無咎之雞肋集皆與冲之爲同輩冲之以
文莊爲曾大父以文元公爲高祖是以其學具有淵
源然公武作讀書志載喻汝礪序言叔用棲志林澗
曠遠之中遇事寫物形於興屬淵雅疎亮則其不溺
於聲色之場可知今景迂雞肋兩集

七閣已著錄而此集流傳甚少卷首有喻序正與讀
書志合得古今體詩共一百六十七首劉後村曰喻
汝礪所作序筆力浩大與叔用之詩相稱余讀叔用
詩見其意度宏濶氣力寬餘一洗詩人窮餓酸辛之
態其律詩云不擬伊優陪殿下相隨于薦過樓前追

書承平之事未有悲哀警策於此句者晁氏家世顯貴而叔用不肯陪伊優之列甘隨于薦之後可謂賢矣他作皆激烈慷慨南渡放翁可以繼之克莊所稱挹如此此詩今具載集中題作次二十一兄季此韻則爲原編無疑視北山律式後附沖之之詩僅數首則是爲足寶矣其注不知何人所作引書內有一統志及韻會韻府等書當爲明時人

詳註周美成片王集十卷

宋周邦彥所撰片玉詞二卷

四庫全書已著錄此宋陳元龍註釋本元龍字少章

廬陵人是書分春夏秋冬四景及單題雜賦諸體爲十卷元龍以美成詞借字用意言言俱有來歷乃廣爲考證詳加箋註焉

琴操二卷提要

漢蔡邕撰邕字伯喈陳畱圉人事載後漢書列傳案唐史藝文志有桓譚琴操二卷無蔡邕琴操然桓譚傳云譚好音律善鼓琴著書號曰新論琴道一篇未成肅宗使班固續成之今文選注引琴道甚多俱與此不合則非譚書可知又隋唐兩志有孔衍琴操一卷宋史志作三卷崇文總目曰晉廣陵相孔衍撰述

詩曲之所從總五十九章書錄解題曰止一卷不著
氏名中興書目云晉廣陵守孔衍以琴調周詩五篇
古操引共五十篇述所以命題之意今周詩篇同而
操引財二十一篇似非全書也與此頗相近茲從徵
士惠棟手鈔本過錄上卷詩歌五曲一十二操九引
下卷雜歌二十一章今文選長笛賦李善注引琴操
曰伏羲作琴以修身理性反天真也又演連珠歸田
賦注引蔡邕琴操曰伏羲氏作琴弦有五者象五行
也俱與此同則在唐世已然其爲舊題無疑雖中引
事實閔有如周公奔於魯之類未免似沈約之注竹

書然越裳操見於大周樂正思親操見於古今樂錄其遺聞佚事均足與經史相證非後世所能擬託也

詩傳註疏三卷提要

宋謝枋得撰枋得著有疊山文集

四庫全書已著錄是書宋史藝文志不載朱彝尊經義考則云已佚惟元人解經如劉瑾詩傳通釋朱公遷詩經疏義胡一桂附錄纂疏徐與喬初學解體中互相徵引而陸元輔云疊山詩傳發明透暢其書爲當時所重茲本通計三百零一則分上中下三卷似係後人編輯而成已非原書卷帙攷枋得生丁板蕩

故其說詩見志每多小雅憂傷哀怨之思然據理解
經亦絕非橫發議論若胡安國之春秋傳可比今書
中如無衣之與子同仇隱然見高宗南渡之事如皇
父之不遺一老輒復刺似道誤國之事至於蓼莪四
章尤詳明愷切然則禮之所謂溫柔敦厚與論語之
所稱興觀羣怨者於枋得實無愧焉

尚書要義三卷提要

宋魏了翁撰了翁尚書要義宋史藝文志本二十卷
其十七卷

四庫全書已著錄此卽其中所佚之三卷攷了翁在

靖州時著九經要義凡二百六十三卷近惟周易要義十卷儀禮要義五十卷尙爲全書其餘如春秋左傳要義三十一卷內缺二十九卷尙書要義十七卷內缺三卷蓋自明張萱重編內閣書目時載九經要義止存七種儀禮七冊禮記三冊周易二冊尙書一冊春秋二冊論語二冊孟子二冊已率非全本今論語孟子尙未見著錄而禮記已得三十三卷較明人所見卷帙已不啻倍之矣此本從舊鈔傳錄第七卷自甘誓至允征八卷自湯誓至咸有一德九卷自盤庚至微子與

七閣中原載山陰祁彪佳家所藏本悉合洵足以補從前之缺佚且所據疏本乃宋時善冊如卷七弟九則烏焉解羽之焉弟十二則器用既具之用弟十三則故政由羿耳之故卷九弟七則之或稱商或稱殷弟十二則夏惟作祫不作時祭之時弟十九則故絕其惡類之惡並足補明以來刊本之脫如卷八弟十則上故更致社稷之致弟十一則從謂逐討之逐弟十六則故用元牡之用卷九弟三則亳殷在河內之內治皆作亂之治從河南亳地遷於洹水之南弟十三則延之使前而教告之之教弟廿六則且云我徒

也之且亦足訂明以來刻本之誤不特其書採摘注疏中精要可爲讀經之助而了翁諸經要義從此珠聯璧合亦佳事也

左氏摘奇十二卷提要

宋胡元質撰元質字長文吳郡人官給事中攷宋史藝文志於史部下載西漢字類五卷注胡元質撰而於經部春秋類下載左氏摘奇十二卷則注不知作者此疑當日或傳刻者失之惟陳振孫直齋書錄解題中載此稍爲詳悉其姓氏爵里實與今本相合此本從吳中藏書家影宋鈔錄卷後有元質自記一條

云左氏摘奇皆手所約鋟木於當涂道院與同志者
共之乾道癸巳元日書當係原刊所識書中摘錄經
傳一二字必兼採杜預集解其謹嚴處視林鉞漢雋
蘇易簡文選雙字類要爲勝宋史志入之經類似不
爲過至文獻通攷竟列於類書之中猶未盡此書之
要也

回溪史韻二十三卷提要

宋錢諷撰諷字正初本錢塘人爲吳越王之裔後卜
居於嘉禾之回溪故自號回溪其書爲近時著錄家
所罕見惟宋趙希弁讀書附志以爲依唐韻分四聲

以十七史之句注於下而陳振孫書錄解題亦云其
附韻類事頗便檢閱蓋宋人兔園冊類摘雙字編四
聲以便尋檢而回溪獨采成語多至三四句未嘗割
裂原文洵著書之良法也秀水朱彝尊跋此云予嘗
見宋時鈔本於京師僅存七冊嫌其殘缺未之錄也
歸田後始大悔之從琴川毛氏長洲何氏訪其所藏
合之才十七卷亟寫而存之笥天下之寶離者會有
合時安知後來所求不適少此十七卷耶茲從影宋
本傳錄卷首祇存慶元五年四月旣望郡人鄭僑一
序而讀書志所云錢文子序已無從復得據明成祖

實錄纂永樂大典時諭解縉等稱嘗觀韻府回溪二書事雖有統而採摘不廣紀載太畧爾等其如朕意凡書契以來經史子集百家之書備輯爲一書無厭浩繁則此在明時曾入祕府今書平韻自一東至四江七之至十一模共五卷上聲一董至三十六養共八卷去聲十四泰至五十九鑑共六卷入聲十二昔至三十四乏共四卷通計二十三卷較彝尊見時已多五卷安知後日不更有多於此者是可以寶也

梅花百咏一卷提要

元韋珪撰珪字德珪山陰人案

四庫全書所收梅花百咏乃元馮子振釋明本倡和之詩德珪此作始以李仲山之命成咏梅二十六首繼又摭拾見聞更成百首復以梅花未入楚詞作補騷一章以附於後又嘗自署其讀書處曰梅雪窩蓋其平生有嗜梅之癖矣首有楊維禎手書序文此從元刻摹寫者

通元真經注十二卷提要

文子二卷

四庫全書已著錄此注唐徐靈府撰靈府號默希子錢塘人爲元宗時徵士隱修衡嶽注文子書上進遂

封通元真人名其書爲通元真經見杜道堅通元真經讚義及全唐詩傳又西天目志載靈府由天目趨天台憩雲二十餘年作言志詩辭武宗之徵著元鑑五卷及三洞要畧則靈府又嘗作天台道士矣案唐書藝文志有注文子十二卷徐靈府著而崇文總目又云文子十一卷徐靈府注闕則徐注在宋時傳習已少

四庫全書總目云自北魏以來有李暹徐靈府朱元三家注惟靈府注僅存亦大半闕佚茲從明道藏本過錄題曰默希子注者據晁公武讀書志王應麟王

海皆云墨希子卽徐靈府自號墨與默通也今觀是
注清靈婉約而文子正文亦尙是舊時之本其自序
云默希以元和四載投蹟衡峯之表考室華蓋之前
追經八稔風敦樸素之風竊味希微之旨則是書當
成于居衡嶽之時据錢曾讀書敏求記曰子彙云吳
中舊刻僅十餘葉近得默希子本始觀其全不知何
故不照原書翻刻又盡削靈府之注殊所不解此是
太原祝氏依宋板摹寫者亦希有之本也是明時尙
有仿宋槧本今則捨此無從攷核矣

古逸民先生集三卷提要

宋汪炎昶撰炎昶字懋遠婺源人幼有奇志於書無所不讀鈎深探賾洞極淵奧其學原本六經得程朱性理之要宋末嘗從太學生孫嵩元遊遂不仕自號古逸民學者稱爲古逸先生得年七十有八其門人東山趙汭爲之狀而金華宋濂爲之銘皆極力推重此本詩一卷文一卷附錄一卷爲近時藏書家所罕覯惟黃虞稷千頃堂書目有之作五卷蓋與趙汭所作行狀相合此則係後人所編輯非當時原本然詩文簡淨古穆具有法度非明人叫囂者所及元代文章道上實源於此則猶有宋季學者之風也

漢文鑑二十一卷提要

宋陳鑑編按鑑建安人自稱石壁野人乃南宋遺民此書不載宋史藝文志惟見明人百川書志及千頃堂書目前有端平甲午鑑自序其文皆採自史傳不無刪節之病然就西京文纂錄其要可以爲讀史之助與前次所錄東漢文鑑同爲宋時巾箱本合之成全璧云

蘋洲漁笛譜二卷提要

宋周密撰密著有癸辛雜識

四庫全書已著錄是書乃其所作詩餘秀水朱彝尊

撰詞綜以爲草窗詞一名蘋洲漁笛譜今攷草窗詞比斯譜實增多數闕則知笛譜是其當日原定草窗詞或後人掇拾所成特以此爲藍本耳是書從長塘鮑氏知不足齋舊鈔傳寫前有吳文英題詞後附徵招醉月二闕並王楠識尾據琴川毛扆舊跋云西湖十景詞嚮缺末二首偶閱錢塘志中載此亟命兒鈔補之然其脫畧仍無從搜輯也

兩京新記一卷提要

唐韋述撰原本五卷見宋史藝文志及程大昌雍錄明郎瑛七修類稿亦嘗及之朱彝尊書熙寧長安志

後云東西京記世無全書則彝尊所見已非完本矣
此一卷在原書爲第三卷所載坊寺宅觀園祠於東
西南北比次頗詳日本人採在佚存叢書中唐人著
述現存者少茲遵

四庫全書採錄莫休符桂林風土記之例爲錄存之

洞霄詩集十四卷提要

宋道士孟宗寶撰宗寶字集虛嘗築室於苕溪之上
曰集虛書院爲詩文咸有法度煉元養素居九鎖山
中三年積書至數千卷與鄧牧相友善牧爲洞霄宮
圖志曾載其人攷今道藏中大滌洞天記有至元三

年吳全節序云道士孟集虛出所編洞霄圖記山川之奇秀巖洞之深杳宮宇之沿革人物之挺特昔耳目之未及者今一覽無遺是編行乎世集虛於茲山之功亦懋矣大滌洞天記者卽今洞霄圖志也記本鄧牧著而序以爲孟宗寶者疑當日兩書本合行耳是本明有高以謨刊近亦不可得見此從舊鈔過錄中有殘缺處宗寶後跋云宋紹定間住山沖妙龔先生與道士王思明裒類大滌畱題刻版行世迄今大德壬寅且三十年廢勿舉名勝入山咸謂闕典宗寶以介石沈公命取舊集泊家藏詩與本山葉君牧心

鄧君暇日討論刪定唐宋賢及今名公題詠命工重刻與好事者共之則其用力亦勤矣書中所載篇什至元時元貞大德之間而於王思明則載入宋本山高道類因仿

四庫全書伯牙琴之例歸諸宋人焉

燕喜詞一卷提要

宋曹冠撰冠字宗臣號雙溪居士東陽人見縣志此本有淳熙丁未長樂陳巖及釣臺詹效之二序文云檢正曹公臺省舊人來游宣幕太守大監詹公歎賞其文刊諸宣城學宮復以所著樂府析爲別集名曰

燕喜今從毛氏汲古閣舊藏本錄出

醉翁談錄五卷提要

宋金盈之撰案盈之家世汴京南渡後官從政郎衡州錄事參軍此書載黃虞稷千頃堂書目第一卷名公佳製載宋以來名卿大夫詩文各體第二卷榮貴要覽畧述唐宋中恩榮遺制第三四卷則爲京城風俗記備載宋室全盛時汴京風物繁華之盛凡所見聞案月搜記如四時風俗好尚無不畢載第五卷瑣聞記聞載唐時遺事爲多書中所載詩文雜事雖屬瑣碎然博聞洽見足資談助可與夢華夢梁等錄並

傳也

重修琴川志十五卷提要

元盧鎮撰鎮字子安淮南人至正間以領兵副元帥兼常熟州知州事按琴州常熟別名齊以南沙爲常熟縣升縣爲州始于元元貞二年明洪武三年復改爲縣舊志昞始于宋慶元間縣令孫應時至淳祐辛丑鮑廉更加飾焉旁搜博採列爲十門而書乃詳其後時久人殊卷帙散佚百餘年間未有取而續之者元至正時鎮宰是地乃屬耆老顧德昭等搜求孫鮑舊本復參攷異同重付諸梓凡所未載並附卷末書

中云晉案者惜佚其姓疑德昭名也其于城池之形勢山水之崇深與夫兵賦之多寡文獻之昭垂罔不記載詳明了無餘蘊是可與施宿嘉泰會稽志梁克家淳熙三山志抗衡非明人全用已說者可比鎮後序所云其續志則始于有元今闕佚已久無從補錄是冊從汲古閣毛子晉舊校本影寫著錄家惟見於黃虞稷千頃堂書目亦不詳其姓氏崇禎間邑人龔立本跋此書云邑中邵兵部麟武得於興福寺僅半部後歸許文學弢美復于南都書肆購其所佚之半始成全帙則此書在前明已稱難得今復二百

餘年宜倍珍惜也

南華真經注疏三十五卷提要

唐成元英撰元英字子實陝州人隱居東海貞觀五年召至京師永徽中流郁州書成道士王元慶遣文學賈鼎就授大義嵩高山人李利涉爲序攷唐書無元英傳其見於藝文志者如此諸家著錄卷帙多寡不同唐志十二卷書錄解題三十卷郡齋讀書志文獻通考皆三十三卷宋史藝文志十卷讀書敏求記二十卷今依明道藏本抄錄爲卷三十五據敏求記錢曾所藏爲前明南京解元唐寅家北宋槧本蓋當

時單行之書不與道藏本同也唐人著書傳世日少此唐初之書至今首尾完具尤爲罕得疏之所本爲郭象注象注掃除舊解標新領異大半空言無所徵實不免負王弼注易之累元英此疏則稱意而談清言曲暢至序文云莊子字子休生宋國睢陽蒙縣師長桑公子受號南華仙人殆出真誥之類殊可以廣異聞元英於貞觀中加號西華法師見於讀書志

華陽陶居集二卷提要之隱

梁陶宏景撰宏景有真誥

四庫全書已著錄此其生平雜文及與武帝往復論

書之劄據集中尋山誌云先生去世後久無人編錄文集至陳武帝貞明二年勅令侍中尙書令江總始撰文集先生以梁大同二年解駕至是五十二載矣文章頗多散落云云然攷隋書經籍志梁隱居先生陶宏景集三十卷又內集十五卷至宋人作唐書藝文志僅載陶宏景集三十卷則疑其所作內集已佚自是以後傳述愈微晁公武陳振孫皆未著錄是本從明道藏本錄出卷首載昭臺弟子傅霄編集大洞弟子陳桷校勘蓋亦道家者流惟集前有江總序一首似尙存其舊餘則存什之一二而已若夫殘膏剩

馥實足以沾溉後人蓋宏景在道家亦號學者其著述與抱朴抗衡所謂列仙之儒也

三術撮要一卷提要

不著撰人名氏案陳振孫書錄解題云三術撮要一卷無名氏又一本名擇日撮要術大畧皆同建安徐清叟真翁云其尊人尚書公應龍所輯不欲著名疑卽此書此從影宋版鈔錄亦無刊刻年月惟中引周謂彈冠必用及沈括夢溪筆談當是南宋間人手筆蓋陰陽家言爲術士所祕六壬遁甲古法除太白陰經武經總要之外載者寥寥無幾宋以前百忌萬年

具注集聖廣聖諸書非此並無從舉其名目故雖五行選擇家所用而司天監據以鋪注頒朔者實不越此亦足資攷鏡也

蕭冰厓詩集三卷提要

宋蕭立之撰立之寧都人字斯立一名立等號冰厓登方逢辰榜進士仕至通守歸隱後自放於詩大旨宗江西派宋詩紀事嘗採其詩此三卷僅有五七言古體五七律及七絕乃其九世從孫敏所訪求而得者其原跋稱向有詩集二十六卷然則立之詩佚者多矣此集雖僅存什一但明羅倫序稱其納交吳氏

艸廬見知謝氏疊山是詩以人重一鱗片羽亦可珍
貴云

徐文清公家傳一卷提要

宋朱元龍葉由庚龔應之等同撰按文清名僑字崇
甫婺之義烏人宋史有傳此則僑門人等所撰至僑
九世孫彰刊以行世與宋史相勘大段相合唯謂僑
於紹定二年理宗新政思得宿望以新大化中外延
頸以俟登用者惟僑與真德秀魏了翁三人攷宋史
理宗本紀不載僑名未免蹈家乘溢美之習然本紀
言端平二年甲寅詔議胡瑗孫明復邵雍歐陽修周

敦頤司馬光蘇軾張載程顥程頤等十人從祀孔子
廟庭升孔伋十哲据家傳則僑與李真實主其議又
本紀言是年三月詔進士陳文蔚著尙書解並補迪
功郎据家傳則僑實以考亭門人薦其曾著傳可爲
傳心建極之要并言其人宜置直講所述事蹟甚詳
可補宋史之缺此傳諸家書目皆未著錄傳後所附
毅齋詩集別錄一卷亦流傳絕少錢塘厲鶚著宋詩
紀事於僑小傳下僅言有集而不能舉其名所選毅
齋卽事一首今存集中而注云濂洛風雅則亦未曾
親見是集轉從選本錄出耳

鐵崖賦稿二卷提要

元楊維禎撰按

四庫全書錄維禎麗則遺音四卷計賦三十二首此則未刻稿也賦凡四十八篇書爲洪武三十一年海虞朱燧子新氏手錄文瑞樓書目有鐵崖賦一卷卽此本也

日湖漁唱一卷提要

宋陳允平撰允平字君衡鄞縣人德祐時授沿海制置司參議官祥興元年允平與蘇劉義書期九月以兵船下慶元當內應爲怨家所訐同官袁洪解之得

釋事見袁清容集其詩詞與吳文英翁元龍齊名張
王田嘗論其所作平正千頃堂書目載日湖漁唱二
卷此作一卷或爲後人所併歟

重編海瓊白玉蟾文集六卷續集二卷提要

宋葛長庚撰按長庚字白叟福之閩清人七歲能詩
賦父亡母嫁棄家遊海上號海瓊子至雷州繼白氏
後改姓白名玉蟾傳以爲仙去所著詩文集凡四十
卷具詳事實中此本乃明正統間南極遐齡老人羅
仙重編前有宋端平時推官潘枋原序及嘉熙元年
耜所書事實一篇黃虞稷千頃堂書目載是集羅仙

序中述及王蟾有上清王隆武夷三集內未入者皆收之今重新校正定爲八卷附錄一冊及霞侶奉酌之元簡仍綴諸卷末而壽諸梓以永其傳焉臞仙乃明太祖第十六子寧獻王朱權之號博古好學凡羣書有秘本莫不刊布著述之富一時無有及者

說文解字補義十二卷提要

元包希魯撰按希魯字魯伯進賢人江西通志稱其穎異嘗授今古文尙書于吳艸廬動履端嚴爲後進楷法其教人先德行後文藝士習爲之一新所著有四書凡例易九卦衍義詩小序辨說文解字補義及

原教說儒等篇此書從至正刊本影寫錢大昕元藝
文志載之書中體例悉依徐鍇韻譜間于補注補音
之後增加補義云云者皆希魯作也其議論多宋學
然於古人制字審音之法時出新意補前人所未及
似亦小學中可存之書

即亦小學中石經之記

經銘古人始字書音之記和以訓而人初亦以
之辨說時前經之記音通而後出也其始會義來也
於音通之記中雖以音通而後出也其始會義來也
經銘銘經銘也其始會義來也其始會義來也其始會義來也

擘經室外集卷二

支遁集二卷提要

晉釋支遁撰遁字道林姓關氏陳畱人或云河東林慮人太原王濛甚重之案隋書經籍志云支遁集八卷注云梁十三卷唐書藝文志則作十卷宋志不著錄讀書敏求記及述古堂書目作二卷知缺佚多矣是編依毛展汲古閣舊鈔本過錄上卷詩凡十八首下卷書銘及讚凡十五首錢遵王跋稱支公養馬愛其神駿胸中未必無事在皎然云山陰詩友喧四座佳句縱橫不廢禪云云晉代沙門多墨名而儒行若

支遁尤矯然不羣宜其以詞翰著也

五行大義五卷提要

隋蕭吉撰吉字文休梁武帝兄江陵陷遂歸于周爲儀同及隋受禪進上儀同煬帝嗣位拜太府少卿加位開府事迹具隋書藝術傳是編日本人用活字板擺印前有自序稱博采經緯搜窮簡牒畧談大義凡二十四段別而分之合四十段二十四者節數之氣總四十者五行之成數云云考隋書經籍志唐書藝文志均未著錄本傳述吉所著書亦無是冊然史稱吉博學多聞精陰陽算術今觀其書文義質樸徵引

識緯諸籍有條不紊且多佚亡之祕笈尤非隋唐以後所能僞爲也

羣書治要五十卷提要

唐魏徵等奉敕撰徵字元成魏州曲城人官至太子太師謚文貞事蹟具唐書本傳案宋王溥唐會要云貞觀五年九月二十七日祕書監魏徵撰羣書治要上之又云太宗欲覽前王得失爰自六經訖于諸子上始五帝下盡晉年書成諸王各賜一本又唐書蕭德言傳云太宗詔魏徵虞世南褚亮及德言裒次經史百氏帝王所以興衰者上之帝愛其書博而要曰

使我稽古臨事不惑者卿等力也德言賚賜允渥然則書實成于德言之手故唐書于魏徵虞世南褚亮傳皆不及也是編卷帙與唐志合宋史藝文志卽不著錄知其佚久矣此本乃日本人擺印前有魏徵序惟闕第四第十三第二十三卷今觀所載專主治要不事修辭凡有關於政術存乎勸戒者莫不彙而輯之卽所采各書并屬初唐善策與近刊多有不同如晉書二卷尙爲未修晉書以前十八家中之舊本又桓譚新論崔實政要論仲長統昌言袁準正書蔣濟萬機論桓範政要論近多不傳亦藉此以存其梗概

洵初唐古籍也

文館詞林四卷提要

唐許敬宗等奉敕撰敬宗字延族杭州新城人官至太子少師咸亨初以特進致仕事蹟具唐書姦臣傳案宋王溥唐會要云顯慶三年十月二日許敬宗修文館詞林一千卷上之與唐書藝文志總集類卷帙合志又云崔元暉注文館詞林策二十卷又雜傳類載文館詞林文人傳一百卷宋史藝文志載文館詞林詩一卷崇文總目載文館詞林彈事四卷皆全書中之一類是編亦僅存六百六十二及六十四六十

八九十五四卷皆漢魏以來之詔令日本人用活字
版擺印者會要又云垂拱二年二月十四日新羅王
金政明遣使請唐禮并雜文章令所司寫吉凶要禮
并于文館詞林內采其詞涉規戒者勒成五十卷賜
之是當時頒賜屬國之本原非足冊此雖斷簡殘篇
而詔令則皆甚古且全書之體例亦可得其一斑矣

臣軌二卷提要

唐武則天撰唐書藝文志及崇文總目鄭樵通志藝
文畧所載卷帙並同宋史不著錄案唐會要云長壽
二年三月則天自制臣軌兩卷令貢舉人習業停老

子又云中宗神龍二年二月二日赦文天下停習臣軌依前習老子書分國體至忠守道公正匡諫誠實慎密廉潔良將利人凡十章是編著錄久佚此冊日本人用活字板擺印卷末題垂拱二年撰乃日本人妄增也

樂書要錄三卷提要

唐武則天撰是編唐書藝文志著錄十卷宋志卽未見闕佚久矣此日本人用活字版擺印僅存第五第六第七三卷其中所引古籍如月令章句五經通義三禮義宗信都芳刪注樂書蘇夔樂志皆世所罕覩

未嘗不藉是以存其崖畧至所列旋宮之法十二相生之圖九足以備參考則天尙有紫宸禮要十卷當時與此并行今亦未見其書矣

膳夫經一卷提要

唐楊烜撰烜官巢縣令是書成于大中十年詳西樓跋唐書宋史藝文志並作膳夫經手錄四卷通志藝文畧同王堯臣崇文總目亦作四卷手錄則作手論爲轉寫之譌此從舊鈔本依樣過錄書僅六葉似後人捃拾成編惟所載茶品甚詳分所產之地別優劣之殊足與茶錄茶經資考證也

岑嘉州集八卷提要

唐岑參撰參南陽人爲文本曾孫天寶三載趙岳榜第二人及第累官右補闕起居郎出爲虢州長史及嘉州刺史杜鴻漸表薦安西幕府拜職方郎中兼侍御史事蹟詳唐才子傳案岑詩律健整非晚唐纖碎可比方回云學杜詩當先觀工部集中所稱詠敬歎及交遊倡酬者其稱詠敬嘆則如蘇武李陵陶潛諸人其交遊倡酬則如李白高適岑參之類杜確序亦稱岑每一篇絕筆則人人傳寫雖閭里士庶莫不諷誦吟習焉其卷帙之數唐書藝文志及崇文總目通

考經籍考通志藝文畧焦竑經籍志並云十卷文淵閣書目則云四冊闕是編與杜確序合然如瀛奎律髓所載同崔十三侍御灌口夜宿報恩寺作爲此本所佚疑非唐人舊冊矣

列子注八卷提要

唐盧重元撰重元范陽人官司勲郎中爲思道元孫詳新唐書宰相世系表列子注本甚希伏讀

四庫全書總目云老莊二子作注者不下百家列子今尙僅存注本之行于世者張湛殷敬慎以外惟林希逸口義及江通解而已是編唐宋藝文志皆未著

錄鄭樵通志焦竑經籍志始見其目此則從道藏中
和光散人高守元沖虛至德真經四解之內錄出發
刊依張湛注分卷足以羽翼湛注卽所徵引各籍亦
多與古本相同惟楊朱一篇注佚其半惜無別本可
補耳

讒書五卷提要

唐羅隱撰隱有兩同書

四庫全書已著錄晁公武讀書志所載卷帙與此同
陳振孫書錄解題云求之未獲蓋佚已久矣是編依
舊抄本影寫方回跋稱隱在京師舉進士畱七載不

第咸通八年丁亥著讒書皆憤悶不平之言不遇于當世而無所以泄其怒之所作今觀是編益信回言之不虛然隱旣仕吳越能請舉兵討梁勸伐無道侃侃大義又豈僅以文士見稱哉

中興兩朝聖政六十四卷提要

此書不知編集人姓名起建炎元年訖淳熙十五年書內標題謂之增入名儒講義皇宋中興兩朝聖政其所采中興龜鑑大事記等書各低一格附後所謂增入講義是也其書編年紀事體例一倣資治通鑑爲之卷端有分類事目列十五門興復一任相二君

道三治道四皇親五官職六人才七禮樂八儒學九
民政十兵事十一財用十二技術道釋十三邊事十
四災祥十五每門各有子目共三百條案書錄解題
典故類有高宗孝宗聖政編要二十卷陳振孫云高
宗聖政五十卷孝宗聖政五十卷乾道淳熙中皆有
御製序此二帙書坊鈔節以便舉子應用之儲者也
據振孫所述知此卽彙合兩書而冠以中興兩朝之
名者所有御製序亦不復存蓋亦書坊所刻故有增
入講義非進御之原本也此書流傳絕少今借宋刻
本影鈔自三十卷至四十五卷惜已闕佚無從訪補

矣

建炎筆錄三卷提要

宋趙鼎撰鼎字元鎮聞喜人登崇寧五年進士第官至右僕射同中書門下平章事安置潮州事蹟詳宋史本傳是編藏書家目錄未見此從舊鈔本過錄所記自宋高宗建炎三年正月車駕在維揚起訖于紹興七年十二月十二朝辭上殿本末粲然蓋鼎耳目所親見聞自確宋南渡雜史中之最有典據者也

寶祐四年會天厯一卷提要

宋荆執禮撰執禮字里未詳是編藏書家未見著錄

此從曝書亭舊鈔依樣影寫卷首有寶祐三年十月中書省劄子末載造算各銜自荆執禮楊旂相師堯而下凡六人案宋史律厯志稱南渡以後繼作厯者凡八曰統元乾道淳熙會元統天開禧會天成天是也又云今其遺法具在方冊惟會天之法不全此則譚王等依會天厯推算故朱彝尊云由丙辰一歲推之厯家可忖測而知其故已

辨誣筆錄一卷提要

宋趙鼎撰鼎有建炎筆錄已鈔錄是編前有自序稱學術迂僻與衆背馳所上前後數千章其間豈無傳

播失實風聞文飾之誤不得不辨其他細故無足深較云云所辨張邦昌僭竊于王時雍權京畿提刑有新奉王音之語卽史所稱檜惡其逼已徙知泉州又諷謝祖信論鼎嘗受邦昌僞命辨盜用都督府錢十七萬卽史所稱檜忌鼎復用諷王次翁論其乾沒都督府錢十七萬謫官居興化軍辨資善堂汲引親黨卽史所稱封瑗爲建國公就學資善堂薦范仲爲翊善朱震爲贊讀朝論謂二人極天下之選蓋定國本莫先于教徽欽以前未見史冊並足以資考證雖篇帙寥寥亦讀宋史者所不能廢也

南嶽總勝集三卷提要

宋道士陳田夫撰田夫字耕叟居南嶽九真洞老圃菴是編從明人影宋本依樣過錄首卷列總圖一分圖五及五峯靈迹又洞天福地以至歷代帝王爲類二十有七中卷叙寺觀及所產珍禽雜藥異花靈草靈禽異獸纖悉畢載下卷叙唐宋異人高僧未附以隱逸之士徵引博而叙述簡深有體要前有隆興甲申拙叟序稱耕叟居南嶽往來七十二峯間三十餘年訪求前古異人高僧靈蹤祕迹考其事而紀之云云案宋史地志傳者頗希此則較唐李沖昭南嶽小

錄更爲詳備尤足以證文淵閣書目作南嶽集三冊
乃轉寫脫誤耳

自號錄一卷提要

宋徐光溥撰光溥錢塘人是編依錢遵王所藏元孫
道明鈔本過錄有淳祐丁未譚聞友序凡宋時墨客
騷人以及名公鉅卿之號彙爲一書自處士以及村
莊分類三十有六附雜類于卷末事涉瑣屑然亦有
資考鏡也

衢本郡齋讀書志二十卷提要

宋晁公武撰姚應績編應績公武門人此書在宋時

已兩本並行淳祐庚戌鄱陽黎安朝守袁州所刻謂之袁本

四庫全書已著錄是編淳祐已西南充游釣知衢州時所刻其所收書較之袁本幾倍之馬端臨作經籍考全據是冊如京房易傳宋太祖實錄太宗實錄建康實錄之類悉與之合其文亦多至數倍伏讀

四庫全書提要云衢本不可復見此從舊鈔依樣影寫經凡十類史凡十三類子凡十八類集凡四類次序有法足爲考核之資

友會談叢三卷提要

宋上官融撰融華陽人其字未詳陳振孫云不知何人案書中稱其父嘗宰建之浦城縣是編前有天聖五年自序卷帙與宋史藝文志通志藝文畧焦竑經籍志並同觀文獻通考所載則作一卷疑轉寫之譌但序稱記在人耳目者六十事此則僅及其半非有缺佚或六爲三之誤字核其所紀皆宋代故事多言報應示勸戒纖悉臚載間傷猥雜然如紀呂端出使高麗與宋史端本傳合紀太平興國三年以定陶地建爲廣濟軍與宋史地理志亦同要非絕無依據者可比也

孔叢子注七卷提要

舊本題曰孔鮒撰宋宋咸注咸字貫之建陽人天聖二年進士仕至都官郎中詳何喬遠閩書是編依宋巾箱本影鈔與晁公武郡齋讀書志陳振孫直齋書錄解題卷帙相合以世所傳三傳之本校之蔓然不同如小爾雅廣言俗刻作俘罰也此作浮罰也禮記投壺若是者浮正義所引可據也咸注亦典核簡潔卷首載自序併進書表王伯厚玉海稱咸上所注揚子孔叢子賜三品服今所注揚子更不可得矣

孫子十家注十三卷提要

宋吉天保撰保字里未詳孫子一卷

四庫全書已著錄伏讀

四庫全書總目云此書注本極夥如隋書經籍志唐書藝文志馬端臨經籍考所載諸家然至今傳者寥寥應武舉者所誦習惟坊刻講章鄙俚淺陋無一可取故今但存其本文著之于錄是編依華陰道藏本錄出十家者魏武一梁孟氏二唐李筌三杜牧四陳皞五賈林六宋梅堯臣七王哲八何延錫九張預十也十家之內多出杜佑乃佑作通典時引孫子而訓釋之非爲孫子作注也案自魏武後注者莫先于孟

氏隋志可考而晁公武則誤以爲唐人道藏原本題曰集注明人所刊又作注解此作十家注依宋志改末附孫子遺說乃鄭友賢所撰也

千金寶要十七卷提要

唐孫思邈原本宋郭思采錄刻石案舊唐書思邈本傳止載千金方三十卷葉夢得避暑錄話稱其作千金方時已百餘歲後三十年又作千金翼方郡齋讀書志書錄解題並載兩書云各三十卷今俗閒傳本千金翼方九十三卷兩書淆溷不復可別不知何人所定也郭思刻石在宋宣和間其所依据當是思邈

原本刻石在華州公署明正統景泰間又重刻石本
又有木刻本至隆慶時耀州真人祠復有石刻案西
陽雜俎謂昆明池龍宮有仙方三十首思邈以療龍
疾得之乃著千金方三十卷每卷置一仙方信爲方
書中之最可寶貴者書中稱痘瘡爲小兒丹毒卽元
人奇効良方所謂痘疹也或謂此疾出自近代者殆
不可從今從石本錄副以備唐人方書之厓畧云

一切經音義二十五卷提要

唐釋元應撰釋智昇開元釋教錄稱元應以貞觀之
末摭拾藏經爲之音義注釋訓解援引羣籍證據卓

明云云案齊沙門釋道惠爲一切經音義宋高僧傳云唐釋慧琳爲大藏音義一百卷二書今皆不傳是編唐書藝文志著錄名衆經音義此從釋藏本刊印其中所引羣籍如鄭康成尙書注論語注三家詩賈逵服虔春秋傳注李巡孫炎爾雅注以及倉頡三倉葛洪字苑字林聲類服虔通俗文說文音隱多不傳之祕冊元應通曉儒術著書該博惟昧漢人之通轉假借泥後代之等韻是其所短也

古清涼傳二卷廣清涼傳三卷續清涼傳二卷

提要

唐釋慧祥撰古清涼傳宋釋延一撰廣清涼傳續清涼傳宋張商英朱并所撰廣續二編藏書家多未著錄惟古清涼傳見宋史藝文志凡方域名勝及高僧靈跡莫不詳載延一收摭故實推廣祥傳更記寺名勝蹟以及靈異藥物其中多涉及儒家且有六朝人文如晉釋支遁文殊像贊序又殷晉安郗濟川讚并世所希見而遁序尤足補本集之所佚若王勃釋迦如來成道記釋迦佛賦今四傑集文苑英華俱無之是編或以爲金大定時寺中藏板末附補陀傳峨嵋讚乃元人所集明釋又從而附綴之也

道德真經補四卷提要

唐陸希聲撰案希聲吳郡人景融四世孫唐書本傳稱其善屬文通春秋易老子論著甚多此書見于唐書藝文志卷帙相符趙希弁讀書附志陳振孫書錄解題皆不著錄凡儲藏家亦皆無之唯見于道藏必字號明白雲霄道藏目錄詳注稱其以事理元會通變機宜探至精之蹟可謂神解其稱許如此今攷此書發明老氏之旨條達曲密視宋人之援老入佛者大不侔矣唐人遺書傳世日少今從道藏校錄卷帙完善洵可寶也

泰軒易傳六卷提要

宋李中正撰中正字伯謙清源人案宋史藝文志不著錄諸家書目亦未載其名是編日本人用活字板擺印凡言易者非泥陰陽卽拘象數此則專明人事于起伏消長之機隨事示戒非空談者可及惜繫辭以下本闕卷首乾卦九三以上及卷二之觀卦亦闕然宏綱巨指尙可推尋如解否之匪人不利君子貞云不利作一讀而君子則無往而不貞也于益卦六二云或益之十朋之龜龜弗克違天助之也天人兩助而能承貞以盡臣節錄存其說以備讀易者之參

考焉

春秋集傳十九卷提要

宋張洽撰洽有春秋集注及綱領

四庫全書已著錄洽爲朱子門人宋史載道學傳伏讀

四庫全書總目云集注遺本僅存而所謂集傳則佚之久矣是編元本二十六卷元延祐中李教授萬敵刻于臨江路學洽曾孫庭堅校正者卷首有宋端平二年繳省投進狀經義考載庭堅後序云副使臧公移文本路總府下學刊刻集傳沿革二書集傳雖成

而章卷倒亂文字差訛迨癸丑江南諸道行御史臺
行移各路春秋用張主一傳延祐庚寅詔興科目而
遠方士友購求者衆李廣文補刊集傳始爲全書云
惜此本缺卷十八至卷二十又卷二十三至二十六
共七卷然全書崖畧尙可推尋如云魯公朝聘之禮
不行于王室及論衆仲言樂之失當以劉氏之說爲
宗論聖人書初之旨當以公羊程氏之說爲正云文
公不會伯主以取晉怒云諸侯不得越境親迎辨穀
梁言恒事之非能集衆家所長討論歸于至當固春
秋家所不廢也

九經疑難四卷提要

宋張文伯撰文伯字正夫樵陽人時代未詳朱彝尊經義考列之錢承志之後疑宋末人是編千頃堂書目經義考並作十卷此從澹生堂鈔本依樣過錄僅總序及易詩書二經餘皆闕佚白序云嘗取五經三禮與夫論孟究其大概凡平日得于先儒之議論者寸長片善靡有不錄又云開卷一覽九經大旨瞭然胸中矣雖其書專爲場屋而設然唐宋諸儒說經之文摭拾不少可以廣見博聞足資考訂也

爾雅新義二十卷提要

宋陸佃撰佃有埤雅二十卷

四庫全書已著錄伏讀

四庫全書總目云爾雅新義僅散見于永樂大典中
文句譌闕亦不能排纂成帙案朱彝尊經義考則云
未見陳振孫書錄解題云頃在城南傳寫凡十八卷
其曾孫子通刻于嚴州者爲二十卷是編從宋刻依
樣影抄凡二十卷殆卽子通之所刻歟陸宰爲其父
作埤雅序云注爾雅畢更修此書易名埤雅言爲爾
雅之輔然二書體例絕然不同此則不若埤雅之貫
穿諸書旁通曲證也而自序以爲雖使郭璞擁篲清

道跂望塵躅可也陳振孫云以愚觀之大率不出王氏之學至句逗亦多不同如釋木樸枹者謂櫬采薪佃則以謂字絕句注云謂之而後知釋蟲螳虬蟹蠶佃則以蠶字連下莫辨爲句注云蠶老而後眠不知經典釋文讀蠶爲他典切又莫辨螳蜋蟬佃則連下文虬字爲句雖本之方言然刑曷已引說文辨其失指惟所據經文乃當時至善之本如釋言楮柱也則作楮柱也皇華也則作華皇也釋天四時和謂之至燭則作四氣和河鼓謂之牽牛則作何鼓釋邱堂途梧邱則作當途釋水河水清且瀾漪則作瀾漪釋草

萍萍則作苹萍苧麻母則作苧麻母蕭荻則作蕭荻
卷施草則作卷施草樓橐含則作樓橐含釋木座接
慮李則作座接慮李釋鳥楊鳥白鷺則作鷺白鷺鳥
鵲醜則作鳥鵲醜並足以資考訂亦讀經者之所不
廢也

集篆古文韻海五卷提要

宋杜從古撰從古字唐稽里居未詳陶宗儀云從古
官至禮部郎自序稱朝請郎尙書職方員外郎蓋指
其作書時而言是編藏書家未見著錄此依舊鈔影
摹從古以郭忠恕汗簡夏竦古文四聲韻二書闕佚


未備更廣搜博采以成之序云比集韻則不足較韻
畧則有餘視竦所集則增數十倍矣案書史會要云
宣和中從古與米友仁徐競同爲書學博士高宗稱
先皇帝喜書設學養士獨得杜唐稽一人今觀其書
所譽良不虛也


太常因革禮一百卷提要


宋歐陽修等奉敕撰案宋自太祖始命儒臣約唐之
舊爲開寶通禮至仁宗初年禮官王皞復論次太宗
真宗兩朝已行之事名曰禮閣新編止于天禧五年
其後賈昌朝等復加編定名曰太常新禮止于慶厯

三年嘉祐中修奉敕重定此書至治平中上之于朝
英宗賜名太常因革禮見于修之自序如此然書後
有淳熙十五年李壁跋以爲此老蘇先生奉詔所修
攷歐公爲老泉墓誌云會太常修纂建隆以來禮書
乃以爲霸州文安縣主簿使食其祿與陳州項城縣
令姚闢同修典禮爲太常因革禮一百卷則此書雖
爲修所上其體裁出于蘇洵居多書中分總例二十
八卷吉禮三十三卷嘉禮九卷軍禮三卷凶禮三卷
廢禮一卷新禮二十一卷廟議十二卷總例內子目
二十八吉禮子目三十七嘉禮子目十七軍禮子目

六凶禮子目二十五廢禮子目九新禮子目三十七
廟議子目二十六計共百卷八門一百八十五目郡
齋讀書志直齋書錄解題不載此書儲藏家亦絕無
著錄者茲從舊鈔本影寫失去五十一至六十七凡
十七卷書中亦多闕文無從訪補其書所采擇者自
開寶通禮禮閣新編太常新禮三書之外復有會要
實錄禮院儀注禮院例冊封禪記明堂記慶厯祀儀
等書至爲賅備蓋治平之際正宋室最盛之時而又
出于名臣名儒之所訂定汴京四朝典禮粲然具備
足以資考鏡者固不少矣








研經室集

二十







五言古詩卷之四

AC 109 38 746 120
羣經室外集卷三

難經集注五卷提要

周秦越人撰越人卽扁鵲事迹具史記本傳明王九思等集注九思字敬夫鄆縣人宏治十才子之一丙辰進士由庶吉士授檢討調吏部主事陞郎中坐劉瑾黨降壽州同知尋勒致仕事迹附明史李夢陽傳餘則未詳難經雖不見于漢藝文志而隋唐志已著錄凡八十一章編次爲十三類理趣深遠非易了然九思因集吳呂廣唐楊元操宋丁德用虞庶楊康侯各家之說彙爲一書以便觀者案宋晁公武讀書志



醫經寶笈卷三
云德用以楊元操所演甚失大義因改正之經文隱
奧者繪爲圖以明之然則書中畧說殆德用所爲是
編日本人用活字板擺印呂楊各注今皆未見傳本
亦藉此以存矣

脈經十卷提要

西晉王叔和撰宋林億等校定叔和高平人官太醫
令甘伯宗名醫傳稱叔和博通經方精義診處尤好
著述是編從宋嘉定何大任刻本影抄前有宋國子
博士高保衡尙書屯田郎中孫奇光祿卿直秘閣林
億等校上序卷末載熙寧二年及二年進書銜名又

紹聖三年六月國子監雕版札子及各衙名案林億序云臣等博求衆本據經爲斷去取非私又云今考以素問靈樞太素難經甲乙仲景之書并千金方及翼說脈之篇以校之除去重複補其脫漏云云用力可爲勤摯世傳叔和脈訣一卷乃後人依託爲之與此絕不相同也

類編朱氏集驗醫方十五卷提要

宋朱佐撰佐字君輔湘麓人前有咸淳二年眉山蘇景行序是編分風寒諸門采掇議論詳盡曲當凡所載宋氏醫書多不傳之秘笈又皆從當時善本錄出

如小兒病源方論長生丸塌氣丸較影抄本爲詳

史載之方二卷提要

宋史載之撰載之字里未詳是編傳本甚希此從北宋刊本依樣過錄上卷之末附載跋語其文不全宋史新編作史戰之方乃形近之譌施彥執北窗炙輠錄稱其治蔡元長疾以此得名案所作爲醫總論闡發甚明各推其因證主治之法精核無遺較諸空談醫理者固有別焉

書齋夜話四卷提要

宋俞王楙王字王吾吳縣人有周易集說

四庫全書已著錄是編見千頃堂書目傳本殊希書中辨字音字義以及六經子史莫不考求得失多前人所未發如云周禮醢人箔菹雁醢謂箔當作落从艸不从竹一條案經文當作落故鄭司農訓爲水中魚衣卽說文艸部云落水青衣也後鄭始易箔爲篋復又誤爲箔字幾不可解又經傳之文耳卽而已爾卽如是一條案凡云而已者急言之曰耳古音在第一部分凡云如此者急言之曰爾古音在第十五部如世說聊復爾耳謂且如此而已是也二字音義絕然不同而唐宋人至今每每譌錯于古經傳致多難讀

全書援引精確不可殫數固非漫無根柢徒爲臆斷之談者所可及也

遁甲符應經三卷提要

宋楊維德等撰維德附宋史方技韓顯符傳字里未詳顯符稱其能傳渾儀法是編不見于宋志鄭樵通志畧始著錄焦竑經籍志錢遵王述古堂書目所載卷帙並同惟馬端臨通考則作二卷乃傳寫之誤此從舊鈔本依樣過錄卷首有宋仁宗御製序末載永樂間欽天監五官司厯王巽序其書以遁甲論行軍趨避之用如言九天之上九地之下卽孫子形篇所

謂善守者藏于九地之下善攻者動于九天之上亦
卽李筌所云以直符加時于後一所臨宮爲九天後
二所臨宮爲九地地者靜而利藏天者運而利動吳
云其書立術精密考較詳明宜五行之家所不廢也

六壬大占一卷提要

宋祝泌撰泌字子涇德興人以進士授饒州路三司
提幹年老乞休元世祖詔徵不赴事蹟詳江西通志
是編宋志不著錄鄭樵通志畧所列六壬多至八十
二家焦竑經籍志凡八十九家錢遵王述古堂書目
凡一十八家皆無是冊蓋佚已久矣此從宋刻本依

樣影鈔卷首有泌進書序及六壬起例案泌云六壬立名古今不宜其旨惟周禮若族氏掌覆天鳥之巢以方書十日十二辰十二月十二歲二十八星之號卽壬盤之體三代之壬書惟此一證與術家以五行始于水水生于一成于六之說異錄而存之以資參考焉

夷堅甲志二十卷乙志二十卷丙志二十卷丁志二十卷提要

宋洪邁撰影宋鈔本案夷堅志十集每集二十卷支志十集每集十卷三志十集每集十卷四志甲乙二

集二十卷共四百二十卷小說家唯太平廣記爲卷
五百然卷帙雖繁乃搜輯眾書所成者其出于一八
之手而卷帙遂有廣記十之七八者唯有此書亦可
謂好事之尤者矣邁每集各自爲之序唯四乙未成
不及序計序三十一篇篇各出新意趙與時嘗撮各
序大指載于賓退錄此本甲志序已佚餘三序存與
賓退錄所舉相合每卷之下注明若干事每事亦必
注明某人所說以著其非妄書中神怪荒誕之談居
其大半然而遺文軼事可資考鏡者亦往往雜出于
其間

四庫全書所收者乃支志五十卷與此不相涉此本卷首有元人沈天祐序稱建學所存舊刻閩本殘闕承本路府判張紹先之命以浙本補全者邁與兄适遵皆皓之子名位著述皆相埒世所稱鄱陽三洪是也邁亦有弟二人一景裴名遂一景何不知其名皆見于此書

策學統宗前編五卷提要

此書標題新刊精選諸儒輿論策學統宗其下列名心易談吳中叔剛校正存理譚金孫叔金遜次桂山譚正叔孫端訂定三譚皆冠以古雲後學三人姓名

既不經見古雲亦不知其何地書中采輯劉子翬呂祖謙陳傅良楊萬里諸家之文議論堯舜三王伊周孔曾顏孟老韓者共三十三篇爲前集五卷四庫全書提要載後集八卷續集七卷別集五卷共二十卷而闕其前集今從元板影錄以成完書

斜川集六卷提要

宋蘇過撰案宋史本傳過有斜川集二十卷藝文志則云十卷書錄解題文獻通考卷數與藝文志同其書久已失傳世間行本大率因謝幼槃劉改之二人之名與叔黨同竄改集名聊以欺世据明王世貞

州題跋則知以劉集充叔黨之書自元季已然真本散佚蓋已甚久王士禎香祖筆記記康熙乙酉有書賈以此集兩冊求售索直二百金惜未之見不知士禎所述者果屬真本否也乾隆朝仁和吳長元得舊鈔殘本復從各書纂輯詩文若干其思子臺賦颶風賦二篇見于本傳者從東坡集校補又益以宋文鑑播芳大全所選者合之猶可成裘然竟未及鈔入四庫全書深可惋惜茲從舊鈔本重加繕錄釐定詩文六卷雖未能盡復舊觀亦庶幾可慰藝林之跂想矣

增廣箋注簡齋詩集三十卷無注詞一卷提要
宋陳與義撰胡穉箋簡齋集十六卷

四庫全書已著錄此本作三十卷末附詞一卷蓋穉
作注時去雜文每卷復釐爲二卷首有樓鑰序併穉
自序又穉所編與義年譜及續添詩箋正誤鑰序稱
穉約居立學日進不已隨事標注遂以成編貫穿百
家出入釋老云云今觀所注多鈎稽事實能得作者
本意絕無捃拾類書不究出典之弊凡集中所與往
還諸人亦一一考其始末固讀與義集者所不廢也
史詠集二卷提要

宋徐鈞撰鈞字秉國蘭谿人與金履祥友善履祥嘗延致以教授諸子是編卷首載許謙序未有張樞黃潛及其子津後序謙潛並稱鈞取通鑑所載君相事實人爲一詩總一千五百三十首此本所存僅三之一止于唐而不及五季卽唐以前諸詠逸失已多然意存勸戒隱發姦諛之旨溢于言表雖殘闕之餘猶爲藝林所重也

平安悔稿十二卷提要

宋項安世撰安世有周易玩辭

四庫全書已著錄案文淵閣書目日字號載丙辰悔

稿十五冊又月字號載悔稿三冊又一部六冊並殘
缺之本宋史藝文志載丙辰悔稿四十七卷近日傳
本殊希厲鶚宋詩紀事僅從后村詩話方輿勝覽后
村千家詩蒐采數首此則依舊鈔過錄合前後集凡
一千二百八十五首分卷與宋志不合卽后村詩話
所錄春日堤上吹帽臺拋毬糟蟹永州諸作皆未見
于是編卷六以下乃慶元丙辰謫居江陵後所作缺
佚雖多然就存者觀之固紹熙嘉泰間一作者也

雲莊四六餘話一卷提要

宋楊困道撰困道字深仲里居未詳是編藏書家目

錄未見此依宋刊本過錄凡宋人說部中之言四六者若王壺清話容齋隨筆能改齋漫錄文章叢說之類莫不廣搜博採其論四六多以剪裁爲工又云制誥牋表貴乎謹嚴啟疏雜著不妨宏肆持論精審固習駢體者之所必資也

分類唐歌詩殘本十一卷提要

宋趙孟奎編孟奎字文耀宋太祖十一世孫寶祐丙辰文信國榜進士官至祕閣修撰是編元書凡一百卷分門纂類孟奎自序云得一千三百五十三家四萬七百九十一首此本依絳雲樓舊藏過錄僅存天

地山川類五卷草木魚蟲類六卷據毛扆跋稱葉文莊集謂從雷侍講錄殘本完者僅二十七卷公爲英宗朝名臣前此且二百年尙止乎此云云缺佚雖多然全書體例由是可推且唐人隱僻姓氏如毛扆所記文丙詳大諸人亦未嘗不藉是以存也

詩苑衆芳一卷提要

此書影元鈔本首題吳郡梅谿劉瑄伯玉編所選諸家詩潘耒章康黃簡趙汝談方萬里鄭起潛文天祥李迪鄭傳之何宗斗蔣恢朱訖魏近思張槩張紹文張元道呂江蔣華子陳鈞蕭炎沈規呂勝之江朝卿

吳龍起二十四人一人之詩多不過十首少或一二首計僅八十二首每人名著其字號籍貫所選之詩近體較多率皆清麗可誦蓋江湖小集之流亞而決擇精當似取法于唐人之選唐詩也

南海百詠一卷提要

宋方信孺撰信孺字孚若莆田人以蔭補官開禧中假朝奉郎使金三往返歷淮東轉運判官知真州至廣西漕所著有好菴遊戲詩境集未見是編乃其官番禺漫尉時所作取南海古蹟每一事爲七言絕句一首每題之下各詞其顛末注中多記五代南漢劉

氏事所引沈懷遠南越志鄭熊番禺襍志近多不傳
厲鶚宋詩紀事載劉后邨序信孺詩文云宮羽協諧
經緯麗密于此亦足見其一斑矣

聲律關鍵八卷提要

宋鄭起潛撰起潛字子升吳縣人少孤力學舉進士
官至直學士權兵部尙書是編乃其官吉州州學教
授時所上前有淳祐元年正月六日尙書省劄子云
總以五訣分爲八韻至于一句亦各有法是雖專爲
場屋而設錄而存之以見當時學者之所業矣

觀瀾集注三十卷提要

宋林之奇編呂祖謙集注之奇有尙書全解祖謙有古周易

四庫全書並已著錄是編宋史藝文志著錄六十三卷此從宋本依樣影鈔僅及其半甲集凡二十五卷自屈平以下六十五人乙集五卷自揚雄以下凡十九人分類編輯祖謙集注多本舊注爲之如離騷經文賦閑居賦卽用五臣注釋摭拾精核足與之奇書相輔而行也

梅磻詩話三卷提要

宋韋居安撰居安吳興人景定間進士是編黃虞稷

千頃堂書目錢遵王讀書敏求記並著錄所論多南宋時人之作名篇警句往往在是采掇亦復謹嚴卷末云余丙子歲司糾三衢二月十一宋太后詔諭諸郡歸附郡將而下奉詔依應吏民安堵如故云云是居安以宋臣而入于元者也

樵歌三卷提要

宋朱敦儒撰敦儒字希真洛陽人紹興乙卯以薦起賜進士出身爲祕書省正字兼兵部郎官遷兩浙東路提點刑獄上疏乞歸居嘉禾此依毛晉汲古閣舊鈔過錄案花菴詞客稱敦儒東都名士天資曠逸有

神仙風致江西月二首可以警世之役役于非望之
福者是編江西月凡八卽指第五第六二首而言又
張正夫稱敦儒月詞插天翠柳被何人推上一輪明
月詞意絕奇似不食烟火人語是作今載集中餘皆
音律諧緩情至文生宜其獨步一時也

陽春白雪八卷外集一卷提要

宋趙聞禮編聞禮字立之臨濮人案文淵閣書日月
字號載陽春白雪一冊乃闕佚之本此從舊鈔依樣
倣寫所選凡二百餘家宋代不傳之作多萃于是去
取亦復謹嚴絕無猥濫之習聞禮著有釣月軒詞周

密絕妙好詞嘗采其作是編亦自錄一二如玉漏遲
法曲獻仙音瑞鶴仙等闕字鍊句琢非專以柔媚爲
工者可比也

王周士詞一卷提要

宋王以凝撰以凝字周士湘潭人由太學生仕鼎澧
帥幕靖康初徵天下兵以凝走鼎州乞解太原圍建
炎中以宣撫司參謀制置襄鄧是編依毛晉汲古閣
書鈔過錄凡三十一首以凝詞句法精壯如和虞彥
恭寄錢遜升驀山溪一闕重午登霞樓滿庭芳一闕
艤舟洪江步下浣溪沙一闕絕無南宋浮艷虛薄之

習其他作亦多類是也

詞源二卷提要

宋張炎撰炎有山中白雲詞

四庫全書已著錄是編依元人舊鈔影寫上卷詳論五音十二律律呂相生以及宮調管色諸事釐析精允間系以嵇與姜白石歌詞九歌琴曲所記用字紀聲之法大畧相同下卷歷論制曲句法字面虛字清空意趣用事詠物節序賦情離情令曲雜論五要十四篇並足以考見宋代樂府之制自明陳仲醇改竄炎書刊入續祕笈中而又襲用沈伯時樂府指迷之

名遂失其真微此幾無以辨其非蓋前明著錄之家
自陶九成說郭廣錄僞書自後多踵其弊也

新增詞林要韻一卷提要

此書不分卷不知撰人姓名目錄標題新增詞林要
韻書中標題則曰詞林韻釋其書分一東紅二邦陽
三支時四齊微五車夫六皆來七真文八寒閒九鸞
端十先元十一簫韶十二和何十三嘉華十四車邪
十五清明十六幽游十七金音十八南三十九占爰
共十九部而以上去二部依部列于平聲之後而入
聲不獨爲部凡入聲之作平聲作上聲作去聲者又

各依類分隸于平上去之後要皆統于平聲十九部之內其中每字皆有訓釋一字數意備載無遺而詞句簡妙精而不支書縫有萊斐軒三字近人厲鶚論詞絕句云欲呼南渡諸公起詞韻重雕萊斐軒世人知重此書實自鶚詩始發之然自來作長短句者未嘗不以入聲押韻而此以入聲分隸平上去三聲蓋後來曲韻之嚆矢或以曲盛于元而此書實出于南宋爲疑今案書錄解題歌詞類有五十曲十六卷萬曲類編十卷則宋時未始無曲也此影宋鈔錄卷端標題詞林詞林者猶藝林之謂非必指長短句而

言以此爲詞韻殆鶚誤會詞林二字之義耳

陳氏小兒病源方論四卷提要

金陳文中撰文中字文秀宿州符離人官太常明大小方脈于小兒瘡疹尤造其妙金亡歸宋處漣水十五年詳鄭全序案醫科一十有三小兒爲啞科其治尤難是編分養子真訣小兒變蒸候又形證門及面部形畧皆先論後方鄭全云是書畧其形狀別其證候跡其方論釐爲一卷今作四卷疑後人所分故書中有稱陳氏云者考諸家目錄所載宋代小兒方症各書今多不傳此本依宋刻影寫亦僅存之祕笈也

歷代蒙求一卷提要

元王芮撰按錢曾讀書敏求記稱歷代蒙求一卷汝南王芮所編括蒼鄭振孫復爲纂注書中歷叙帝王古今世代文約事該不繁不紊鄭注又復援經據史貫徹古今較之周興嗣千文以字集而或乖其義補注蒙求以事對而多失其序者其啓迪童蒙之功似更爲過之矣此卷刻于元至順中馬速忽守新安以其書有資啓發令郡教授王萱鉁梓以廣其傳此從錢曾所藏本影寫尙是元時舊刻也

論語叢說三卷提要

元許謙撰伏讀

四庫全書總目云元史許謙本傳載謙讀四書章句
集注有叢說二十卷此本凡大學一卷中庸一卷孟
子二卷中庸闕其半論語則已全闕是編從元人刻
本依樣影抄其中有正文而誤似注者如中卷晝寢
章衣敝章下卷侍坐章驥章爲邦章性相近章荷蓀
章乃元代刻書陋習悉仍其舊案謙受業于金履祥
故書中引履祥之說獨稱先生吳師道云欲讀朱子
之書必由許君之說今考是書發明朱子之學旁引
曲證不苟異亦不苟同泰伯章云王文憲謂集注朱

子因舊傳修入未及改美王章云沽去聲訓賣若平聲則訓買于此義不相合川上章云舍去聲止息也見楚辭辨證集注未及改割不正不食節則云古者燕饗有大饗曰裁又云其餘牲體骨脊及腸胃肺心割截各有一定所謂不正則不合乎度者頗有根據皆足以資考證也

讀中庸叢說二卷提要

元許謙撰案元史本傳謙讀四書章句集注有叢說二十卷朱彝尊經義攷据一齋書目收入總經類注云未見通志堂經解亦未及編刻蓋世已久不見其

書矣今

四庫全書所收祇大學一卷中庸一卷孟子二卷而已中庸本二卷已佚其半論語則已全佚今除論語叢說三卷已從元板影錄進

呈外復從吳中藏書家得元板中庸叢說足本二卷又影錄副本以補前收之所未備而許氏之書遂成完璧案黃潛爲謙作墓誌載此書卷數二十與本傳相符今所錄者俱遵元板論語三卷中庸二卷合之大學一卷孟子二卷得八卷皆首尾完整明祕閣書目所載四書叢說亦止四冊殆與今本相同蓋未可

據墓誌本傳而疑其尙有闕佚也

續古篆韻六卷提要

元吾衍編有周秦石刻釋首一卷

四庫全書已著錄是編從舊鈔本依樣影寫衍以石鼓文詛楚文比干盤泰山繹山等刻依韻分纂卽遇無字之韻亦接書之非有闕佚蓋畱以待補疑爲未成之本故藏書家目錄多未采入末卷辨疑字專爲鄭樵薛尚功兩家石鼓音義而作如云第十鼓中一字薛作獻鄭作狩衍則云當作獸意通案周官庖人賓客之禽獸注云獻古文爲獸是也錄而存之于小

學不無所助焉

皇元征緬錄一卷提要

不著撰人名氏卷首撮舉大綱有臣作政典云云蓋卽撰元口政典章者政典中稱英宗爲今上皇帝是編似亦成于至治之初體例謹嚴非若政典之漫無端緒不足以資考證所載征緬事多與元史緬國傳相同自大德二年以下更足補正史所未備蓋明時修史卽用此爲藍本錄而存之以備參考焉

元祕史十五卷提要

不著撰人名氏其紀年以鼠兒兔兒羊兒等不以支

千蓋卽國人所錄明黃虞稷千頃堂書目著錄十二
卷明文淵閣書目字字號云元祕史一部五冊又一
部同又云祕史續稿一部一冊又一部同並闕佚之
本此依舊鈔影寫國語旁譯記元太祖太宗兩朝事
迹最爲詳備案明初宋濂等修撰元史急于藏事載
籍雖存無暇稽求如是編所載元初世系孛端義兒
之前尙有一十一世太祖本紀述其先世僅從孛端
義兒始諸如此類并足補正史之紕漏雖詞語俚鄙
未經修飾然有資考證亦讀史者所不廢也

羣書通要七十三卷提要

不著撰人姓氏是編藏書家未著錄此依元至正間
重刊本影寫前有大德己亥王淵濟序稱蒙翁因嘿
齋于君所輯之本旁搜博采增至數十卷凡詩家之
一字一意悉羅致之視初本殆將十倍命其子彌高
壽梓云云所謂蒙翁嘿齋未詳其人其書自甲集天
文至庚集譬喻凡三十七門每十卷爲一集摭摭經
傳子史及前人詩文中成語分類排纂頗藉以有考
視明人類書餽飭裨販者大相徑庭辛壬癸三集卽
元混一方輿勝覽疑重刊時所增故淵濟序中未及
其書且有至元戊寅菖節梅軒蔡氏刊行畱記詹事

錢大昕云勝覽于澤州無陵川縣解州無芮城縣而書中又有冀寧之名係大德中所改則書成之後別有竄易皆書肆射利者爲之而不知其牴牾也

遊志續編二卷提要

元陶宗儀撰宗儀有國風尊經

四庫全書已著錄是編繼宋陳仁王遊志而作所載多唐宋元人遊覽之作自樊宗師柳公權元結而下凡四十有八家選擇精審並足以資考證書中有存其目而其書未經採入者若李格非之洛陽名園記范至能之騷鸞錄吳船錄後人遂疑爲未成之書案

朱彝尊云宗儀所著各書有裨史學此其一也

王山璞稿二卷提要

元顧瑛撰瑛字仲瑛崑山人事蹟附元史陶宗儀傳後王山璞稿

四庫全書已著錄一卷是編乃至正壬辰乙未間所作凡古今體詩二百七十五首詞一首書中送董參政饒歌十章如克淮西入昌化定安吉諸題足補史所未備元史惟稱秋七月饒徽賊犯昱嶺關及杭州路案是時董搏霄率兵復之所云參政及送周天蟾詩中大參董侯皆其人卷末有云水戰甚難蓋舟楫

有遲速風水有逆順故不能齊其隊伍然則瑛于舟師之法亦畧窺其一二非僅以詞語流麗見長也

桐江集八卷提要

元方回撰回桐江續集

四庫全書已著錄皆其元時罷官後所作其前集名虛谷集見黃虞稷千頃堂書目疑卽是編案周密極譏回爲人之鄙全無品行伏讀

四庫全書提要云集中諸文居然醇儒之言就文言文要不可謂其悖于理也如賈似道魯港喪師之後衆皆慮其復入回上書數其十罪繼又言似道與其

客廖瑩中皆當卽誅又請罷王燭平章以佚其老見集中前後上書本末並確有所見中外快之卽他文亦多有根據固宋末元初一作家也

王徵士詩集八卷提要

元王沂撰沂字子與泰和人博通經史學者稱爲竹亭先生至正間嘗試子有司不偶遂不復出洪武初徵爲諸說書授福建鹽運司副使以老辭歸不赴是編乃其門人蕭輦所編梁潛稱沂與大梁辛好禮楊伯謙上元周伯寧清江彭聲之豫章萬德躬倡詩道于東南期以關世教爲務今案沂詩于古體多沖淡

瑩潔近體則典麗鏗鏘宜其凌跨一時矣

松雨軒詩集八卷提要

元平顯撰顯字仲微錢塘人明洪武初官廣西藤縣令案顯集初刻于滇南是編乃其裔孫所重刊今依樣過錄遲序稱其足跡半天下有似于子長學博而行峻直道而屈身云云今觀其詩及風土之同異道途之隄塞以及友朋之離合悉見于篇蓋得于遠遊之助爲多耳

蟻術詩選八卷提要

元邵亨貞撰亨貞字復孺有野處編四卷見

四庫全書伏讀

四庫全書總目云亨貞所著蟻術詩選世已無傳此從舊鈔依樣過錄凡古今體三百七十六首又聯句三首詩格高雅絕無元世綺縟之習案馮遷汪稷跋野處編並云其書乃上海陸鄰以授稷而刊行是編及詞選每卷首皆有新都汪稷校字樣是亦鄰所授刊之冊跋又云并所著蟻術詩選蟻術詞選爲十六卷今合三書卷帙觀之並屬完善之書惟卷首不著名而著字乃明人刻書陋習也

名儒草堂詩餘三卷提要

元廬陵鳳林書院輯本未詳選者姓氏自劉藏春以下凡六十家皆南宋遺老選錄精允秀句清言多萃于是而黍離之感有不能忘情者厲鶚跋稱弁陽老人絕妙好詞而外鮮焉寡匹余于此二種心所愛玩無時離手云案千頃堂書目始著錄一名續草堂詩餘卽是編也

蟻術詞選四卷提要

元邵亨貞撰亨貞有野處集見

四庫全書伏讀

四庫全書總目云亨貞所著蟻術詞選世已無傳又

云其詞世不多見惟陶宗儀輟耕錄載所作沁園春
二首雋永清麗頗有可觀蓋所長尤在于是惜詞選
今已久佚矣是編從舊鈔依樣影寫藏書家未見著
錄古今詞話亦稱其沁園春詞新艷入情書中追和
趙孟頫十首案侯文燦所輯松雪詞已佚其點絳脣
一闕感皇恩一闕蝶戀花一闕未嘗不藉是以見其
梗概也

名家詞十卷提要

國朝侯文燦編輯所選爲南唐二主詞馮延巳陽春
集宋則張先子野詞賀鑄東山詞葛剡信齋詞吳儆

竹洲詞趙以夫虛齋樂府元則趙孟頫松雪詞薩都
刺天錫詞張野古山樂府文燦自序云古詞專集自
汲古閣六十家宋詞外見者絕少又稱孫星遠有唐
宋以來百家詞鈔本訪之僅存數種合之笥中所藏
共得四十餘家茲先集十家付之梓人云云是編子
野詞

四庫全書已著錄卽陸安集伏讀

四庫全書總目云此本近時安邑葛鳴陽所輯凡詞
六十八首此則一百三十首較爲完善末附東坡題
跋其餘所選亦簡擇不苟要不失爲善本也 止

擘經室外集卷四

五服圖解一卷提要

元龔端禮撰端禮字仁夫嘉興人此書載絳雲樓及述古堂書目朱彝尊經義考則云未見端禮祖名頤正宋時宣教郎充樞密院編修官常著服圖端禮是學淵源有自又復精勤參考越十載而後成書嘉興路牒稱其有裨世教厚風俗洵不誣矣其例以五服列五門每門立男女已未成人之科分正加降義四等之服劃圖分章展卷釐然頗足爲參考禮制之助當元泰定元年嘉興路呈此書於江浙行省移咨中

書省此從至治間刊本影寫錢曾讀書敏求記云端
禮以布衣上書闕下蓋有心世道之士也

律文十二卷音義一卷提要

是編不著撰人名氏音義宋孫奭等撰奭字宗古博
平人有孟子音義

四庫全書已著錄事蹟詳宋史本傳宋史刑法志云
宋法制因乎唐律令格式則隨時增損之此書見藝
文志其中所載自名例以至斷獄凡十二門與唐志
悉合陳振孫書錄解題亦云律文十二卷自魏李悝
漢蕭何以來更三國六朝以至隋唐因革損益備矣

本朝天聖中孫奭等又撰音義歷代異名沿革皆著之按奭所著音義爲唐律而作于治字下云唐避高宗諱爲理期字下云唐避元宗諱爲周今改從舊又於名例杖字下云皇朝建隆四年始有折杖之制流字下云皇朝建隆四年制犯徒者加杖免役此則宋時所增並不見于律文故加皇朝以別之至書中字體翻切皆有補于小學卷末列孫奭馮元宋祁等銜及天聖七年四月日准勅送崇文院雕造十五字據此則爲北宋所刊無疑矣

莆陽比事七卷提要

宋李俊甫撰俊甫字幼傑莆田人是編見宋史藝文志成于宋嘉定間取唐以來上下千百年間凡莆陽事之可傳者綺分璧合釐爲七卷名曰比事其同邑人陳讜有序林瑑有跋此則從明人林兆珂宋本翻刻影抄莆陽宋人舊志如鄭僑莆陽人物志以及趙彥勵陸爰所著莆陽志今多散失俊甫此編時見採錄且屬辭有法紀事覈真可與汝南先賢傳襄陽耆舊志並傳也

黃帝陰符經疏三卷提要

唐李荃撰按荃所著太白陰經八卷

四庫全書已著錄此書載宋崇文書目館閣書目通志通攷及陳振孫書錄解題晁公武讀書志皆作經注一卷惟宋史藝文志作經疏一卷此本篇帙無多分爲三卷已非莖之舊次上卷演道章載神仙抱一之道中卷演法章載富國安人之法下卷演術章載強兵戰勝之術與道藏本分目相符

中藏經三卷提要

漢華陀撰分上中下三卷隋書經籍志載華陀方十卷唐宋藝文志並載華陀藥方一卷鄭樵通志藝文畧同宋志又載黃氏中藏經一卷注云靈寶洞探微

撰與此別爲一書無疑矣是編今吳中有趙孟頫手寫本分上中下三卷隋志列有華陀觀形察色并三部脈經蓋卽是書之中卷也其書文義古奧似是六朝人手筆非後世所能假托

王函經一卷提要

唐杜光庭撰光庭字聖賓括蒼人王建據蜀除諫議大夫進戶部侍郎歸老青城山此書銜稱特進檢校太傅太子賓客主管徽國公殆建時加授也書中辭簡義深黎民壽注亦多發明是書藏書家皆未著錄錢曾讀書敏求記載有光庭了證歌一卷又與此異

惟明人殷仲春醫藏目錄曾載是冊列之無上函中
此從宋刻影寫

三水小牘二卷提要

唐皇甫枚撰枚字尊美安定人唐咸通末爲汝州魯
山令僖宗之在梁州枚赴調行在此其書中可考者
也是書成於天佑四年枚當旅食汾晉而追紀咸通
時事共得上下兩卷明嘉靖時姚咨曾手鈔之此從
錢曾述古堂藏本影寫書中所載雖涉神仙靈異之
事而筆雅詞明實寓垂戒又案天佑庚午時晉猶稱
天佑而枚亦稱之

王堂類藁二十卷西垣類藁二卷提要

宋崔敦詩撰敦詩字大雅本河北人南渡後遂居溧陽登紹興進士官至中書舍人李心傳朝野雜記謂呂祖謙文鑑既成近臣密啓其失因命直院崔大雅更定增損去畱凡數十篇朱子語類亦云祖謙編錄文鑑有敦詩刪定之語敦詩淳熙九年致仕故宇文价所作告中傳其才猷敏贍問學淵深是編所載宋孝宗時制誥口宣批答青詞甚詳諸家書目皆未著錄而宋史藝文志誤爲周必大所撰明葉盛菴竹堂書目曾列其書是明中葉尚有傳本此爲活字板其

文皆必大集中所未有也

周易經疑三卷提要

元涂潛生撰按江西通志潛生字自昭宜黃人邃於易爲贛州濂溪書院山長著有四書斷疑易義矜式行世朱彝尊經義攷載潛生易主義一卷注稱已佚並引楊士奇言曰易主義一卷元臨川鄉貢進士涂潛生著專爲科舉設此書題曰經疑元以經疑取士蓋擬之而作也此書或卽主義或卽易義矜式不可得而考矣

詩說十二卷提要

宋劉克撰克信安人事蹟未詳朱彝尊經義攷云此書宋藝文志焦氏經籍志朱氏授經圖均未之載崑山徐氏傳是樓有藏本乃宋時雕刻前有總說惜第二第九第十卷都闕此爲影宋抄本闕卷皆對卽從徐氏藏本錄出者前有克自序作於紹定壬辰壬辰宋理宗紹定五年克乃理宗時人也宋儒說詩有攻小序者有守舊說者廢小序者朱子也尊古注者呂祖謙也克之學出於祖謙其子坦跋稱其書每篇條諸家之解而繫己意於後其所纂輯家數視東萊詩記加詳克之學本之呂氏從可知矣體例雖與詩記

相同然互有去取亦不盡從祖謙之說也坦以纂輯各家卷帙繁富未易鉋梓乃盡刪舊解獨存克說則是書非克之原本矣鄭風大叔于田今本脫大字此書與唐石經注疏本同亦可證近世坊本之誤

書經補遺五卷提要

元呂宗傑輯事蹟未詳其自序云在錢唐購得唐太宗御製王右軍執筆圖乃東陽陳及時父希元先生授同里趙文淑之家藏者遂輯成此書卷中有陳及時跋稱其先人諱夢魁字希元登咸淳甲戌進士科大德末典教岷庠則希元亦元時人矣第一卷爲執

筆圖第二卷法書本象國子助教汶上陳繹曾著第三卷書法總論第四第五卷博古體篆釋乃宗傑白著之書采輯張懷瓘書斷諸書中如大梵王字各體書頗爲詳贍亦臨池家之一助也

漢唐事箋十二卷後集八卷提要

元朱禮撰禮之事蹟無可攷其書論漢唐政典凡食貨職官禮樂兵刑穿穴三書參稽六典爲寔是之學無蕪蔓之辭論二漢之事往往有微言精義可補顏李二家注義之所未及者至于李唐典制但取新書不取舊書蓋新書紀傳不及舊書之詳表志則新書

詳贍舊書太略禮專論大經大法以表志爲則非不用舊書也禮持議平允措詞爾雅無繁冗簡陋之弊學識在鄭樵之上其論太初算術謂司馬遷與鄧平同定其法當時以爲最密而史記反去太初日分之術而用古法九日四十分據漢書太初術建星進退于牽牛之度知太初術疎而不密故史遷有意不用其法而淳于陵渠日月如合璧五星如連珠之說爲附下罔上儒生讀史漢者皆習焉不察而禮能詳言之可稱發前人之所未發矣

崑山郡志六卷提要

元楊諲撰按諲字履祥自號東溪老人事蹟無攷前有至正四年楊維禎序云與諲同出文公則諲乃閩人流寓於王峰者崑山本縣治元成宗元貞二年升爲州故此書有郡志之名延祐中移州治於太倉故志中有新治舊治之別書法簡要得體可與王峰志並傳惟鐵崖序稱二十二卷今據書止六卷首尾完具豈成書之後重爲刪定耶

羣書類編故事二十四卷提要

元王瑩撰按瑩姓名見寧波府志明初曾任廣東肇慶太守事迹無考其書明史藝文志及藏書家皆未

著錄此本從明莫雲卿家藏元刻影寫其書類分十八門所采故事史傳之外多取唐宋說部大旨仿朱勝非五色線之體亦類書中之一格也

鈞磯文集五卷提要

唐徐寅撰按寅字昭夢莆田人乾寧初進士釋褐授秘書省正字

四庫全書採徐正字詩賦二卷恭繹

欽定提要云寅著有採龍鈞磯二卷共五卷自唐藝文志已不著錄意當時卽散失不傳此本僅存賦一卷計八首各體詩一卷計三百六十八首蓋其後裔

從唐音統籤文苑英華諸書哀集成編附刻家乘之
後者已非五卷之舊矣此爲錢遵王所藏影宋本據
其族孫師仁序云家故有賦五卷探龍集五卷又於
蔡君謨家得雅道機要訪得詩二百五十餘首以類
相從爲八卷并藏焉宋史藝文志載徐寅別集五卷
疑卽師仁所藏之五卷也今本乃其裔孫玩所編次
賦五卷凡五十首

四庫全書所錄八首皆在其中而全唐文未採者較
多二十一首云

穀齋別錄一卷提要

不著撰人名氏卷端有正德辛未十一世孫興序一首云先世文清公號毅齋嘗從東萊晦菴相與倡學於婺其所著有讀易記讀詩記詠文集等書以之格君心淑後學羽翼吾道有補於世教也尙矣云云考之宋史乃徐僑之詩也僑字崇甫婺州義烏人早從學於呂祖謙門人葉邦淳熙十四年舉進士調上饒主簿始登朱熹之門熹稱其明白剛直命以毅名齋端平中官至工部侍郎以寶謨閣待制奉祠卒諡文清僑之學以真踐寔履爲尙奏對之言剖析理欲因致勸懲宏益爲多乃理宗時之名臣不以詩名然無

講學家習氣頗近江湖詩派興序又云有文集一十卷遭回祿煨燼今世無傳本矣

編類運使復齋郭公敏行錄提要

無卷次無撰人名氏前有古候黃文仲及三山林興祖兩序疑出二人所編按郁有言行錄一卷已鈔錄此特其宦游所至與當日賢士大夫一時投贈之作江西饒州府志稱郁知浮梁縣聘吳仲迂爲後進師士風丕變政爲江南諸邑最集中壽老致政嘉議郭公序乃胡長孺汲仲作按鄭元祐遂昌雜錄言汲仲爲金華三胡先生之一罷官後客杭貧甚以古文倡

人求記碣序贊稍不順理雖百金不作也又陶宗儀輟耕錄載汲仲特立獨行剛介有守趙松雪嘗爲羅司徒奉鈔百錠爲先生潤筆請作乃父墓銘先生怒曰我豈爲宦官作墓銘邪是日先生正絕糧其子以情白坐上諸客咸勸受之先生卻愈堅汲仲耿介絕俗而乃肯爲郁父作序可以知郁之爲政矣饒州府志又言郁爲浮梁時風謠云桃李陰陰六萬家下車民不識州衙甘棠喜有千年政美玉終無一點瑕今集中有民謠十首而昌江百詠祇存四十五首不錄此詩當日之流風善政遺佚不少且一時之士與郁

相贈荅者如仇遠汪澤民鄧文原皆不輕與人周旋者則郁之賢益可知矣

元賦青雲梯三卷提要

無編纂姓氏從元人墨跡影寫上卷錄賦三十六篇中卷錄賦三十九篇下卷錄賦三十六篇凡一百十一篇蓋當時應試之士選錄以作程式者其中黃潛太極圖賦羅曾石鼓賦孟泌凌煙閣賦鄒選金馬門賦蒲紹簡登瀛洲賦莊文昭蒲輪車賦高明大成樂賦謝一魯孔澮范琮荆山璞賦尹貫道靈臺賦祝堯手植檜賦歐陽元陳泰天馬賦邵公任暘谷賦彭士

奇泰堦六符賦周鏜大別山賦沈幹浙江賦曾煒王
燭賦方回孫無逸圖賦方君王龍虎榜賦劉性石渠
閣賦王沂辟雍賦等二十三篇已載

欽定賦彙中其未采者尙八十餘篇又賦彙載曹師
孔靈臺賦逸句此有全文皆可補其闕也

隸韻十卷提要

宋劉球撰按宋洪适篤嗜隸古取兩漢以來碑銘遺
經殘石鐙鉦盆鏡之屬綜括卷軸佐證經傳次其時
代先後成書五種如隸釋隸續隸纂隸圖隸韻是也
今世所傳惟隸釋隸續二書他皆未見盤洲集中僅

有隸韻序一篇疑洪氏當日尚未成書其後婁機撰漢隸字原悉依隸釋原次蓋以補洪氏之缺也今球此書凡十卷載入宋史藝文志首存殘本碑目一卷及劉球進表半篇第十卷末行又有御前應奉沈亨刊七字董其昌定爲德壽殿本似未真確然此爲當日奏進後奉刊之本無可疑者書中如孔宙碑以畝作敏王純碑以麋作麋荀君碑陰以友作支校官碑以畀作卑唐扶頌以牽作掌郝閣頌婁壽碑以愛作舜皆其采錄時之失碑目所引諸碑凡二百六十一種存於今者不及四分之一則球當日採獲之勤編

次之多聞洪氏之緒餘導字原之先路爲功亦匪淺也

編年通載四卷提要

宋章衡撰按陳直齋書錄解題晁公武郡齋讀書志皆載此書凡十五卷此宋刊本四卷前有明內府文淵閣印記考之明內閣藏書目錄云編年通載二冊不全宋元祐間起居舍人章衡撰進斷自帝堯訖於宋治平丁未總三千四百年推甲子以冠其首凡史之訛謬疑誤皆爲辨證世數代易厯統相傳年名國號灾祥善惡具載焉凡十卷其第五卷以下皆闕據

此則爲明內府所藏宋本無疑也首有元祐三年章
盜刊書序一篇竊乃衡之族父又衡進書表一篇自
一卷帝堯起至四卷西晉世祖太康元年止歷代興
亡分合開卷瞭如是誠有裨於史學也

廣黃帝本行記一卷提要

唐王瓘撰系銜稱閬州晉安縣主簿王瓘進考之新
唐書藝文志雜傳記云王瓘廣軒轅本紀三卷蓋卽
此書此卷首題修行道德四字必每卷各以四字標
識本書帝吹律定姓者十二注云在中卷又黃帝有
子各封一國注云具中卷可證此爲下卷佚去上中

二卷矣此從錢曾舊鈔藏本影寫恐世間更無足本
讀書敏求中具載之

淳祐臨安志六卷提要

宋施諤撰按兩浙古志北宋圖經久已無考至南宋
建爲行都其志乘傳於今者則有周淙乾道志潛說
友咸淳志二種已經

四庫全書采錄此志從宋刻殘本影寫僅存五卷至
十卷無序目可稽觀書中叙錄皆至淳祐間府尹趙
與憲而止其爲施諤所撰淳祐志無疑所存惟城府
山川二門前有總論一篇異於他志其叙城府一首

城社次官宇次舊治古蹟次今治續建爲第五卷城
府二首學校次樓觀次園館次廂隅次軍營爲第六
卷城府三首坊巷次界分次橋梁次倉場庫務次館
驛爲第七卷叙山川一首城內諸山次城南諸山次
城西諸山次亭館次古跡爲第八卷山川二首城東
諸山次城內外諸嶺次諸洞次諸石次諸塢次峪衙
關爲第九卷山川三首江次湖次河渠次水閘爲第
十卷諸門皆爲咸淳志所本而各條下引載前賢題
咏詩文則互有詳畧此與乾道咸淳二志備載南宋
數朝掌故藉補史傳之遺皆未可以殘缺廢也

賢良進卷四卷提要

宋寶文閣學士龍泉葉適撰按適有水心文集二十九卷

四庫全書已著錄宋人賢良進卷甚多如孫深賢良進卷十卷錢公輔賢良進卷十卷均載郡齋讀書志而適書獨不存唯前明葉盛菴竹堂書目經濟門有葉正則賢良進卷二冊卽此書也萬厯溫州府志載水心文集之外有制科進卷九卷外稿六卷疑此與外稿實係一種故黃震讀文集日抄于適正集外復著水心外集其篇目摘要與此卷脗合按宋史孝宗

本紀淳熙十一年六月詔在內尚書侍郎兩省諫議大夫以上御史中丞學士待制在外守臣監司不限科舉年分各舉賢良方正能直言極諫一人適此卷卽于其時所進蓋適抱匡時之用故初年輪對卽以經世之說進且觀其上西府書及執政薦士書所舉陳傅良以下三十四人如劉清之陸九淵章穎呂祖謙楊簡項安世皆一時賢傑洵屬有心當世之士卽以文體而論亦筆力橫肆足以振刷浮靡唯持論間有不純如陳振孫譏其所作習學記言厯詆百家而篤信子華子推崇之以爲真黃震亦辨其行官田不

能無害則踳駁處正復不免故朱子亦嘗移書與之
辨論文體至日抄推尊別集以爲論治之書極論天
下之勢牽縮而不可爲開闔數萬言蓋能言之士莫
能尙也

四元王鑑三卷提要

元朱世傑撰按世傑字漢卿號松庭寓居燕山不知
何處人其書未載前人著錄總二十四門凡二百八
十八問具開方寔方廉隅之數漢卿于九章旣熟于
天元一術正負開方之法又神而明之是誠算學一
大家也其菱草形段如像招數果積疊藏各問爲自

來算書所未及此從舊抄本影寫前有大德癸卯臨
川前進士莫若序卷末又有大德登科二月甲子納
心齋祖頤季賢父序稱世傑嘗游廣陵學者雲集編
集算學啓蒙與此先後付刊並行于世今啓蒙一書
不可復見矣

運使復齋郭公言行錄一卷提要

元福州路儒學教授徐東撰按饒州府名宦志郭郁
字文卿大梁人皇慶末以江浙省都事來知浮梁縣
善爲鈎距自方趙廣漢官終福建都轉運使又浙江
通志名宦類引至正四明續志云郭郁泰定二年任

明州路總管有才略在郡正賦籍定役法措置食鹽
綜理倉庫皆有法修孔子廟飭弟子員徵逋租損浮
費至學廩不能容如兩志所書則郁之宦蹟有足多
也是錄因東適同官故悉載其所厯任途由江南江
西浙江福建諸處所在立政立事愛士愛民勸善懲
惡興利除害各善政後復附以建安進士張復題詞
及福建學陳御史臺狀牒文等件以見當日人情愛
戴之誠各家書目均不著錄唯錢大昕補元史藝文
志曾採入史部傳紀類今錄之雖不盡可據但亦有
可備史家之事寔者

圖解素問要旨論八卷提要

金劉守真撰馬重素重編按守真名完素事蹟見金史方技傳所著素問元機原病式一卷宣明論方十五卷傷寒直格方三卷傷寒標本心法類萃二卷等書皆爲

四庫全書所載此從金板影寫錢大昕元史藝文志補載素問要旨八卷卽此書也其自序以爲內經元機奧妙旨趣幽深習者苦無所悟乃撮其樞要集成斯文以分三卷叙爲九篇繪圖釋音以彰明之其徒馬重素又爲之序重爲編定分作八卷云

元風雅三十卷提要

元蔣易撰按易字師文建陽人焦竑經籍志及黃虞稷千頃堂書目所著錄卷數皆同

四庫全書載元風雅有傳習及孫存吾所編前後二十四卷易與傳孫同時故兩書皆爲道園虞集所序集序傳書在至元二年丙子孫書謝升孫序亦同此書在至元五年己卯後于傳孫之書幾三年不知道園序何以並不論及傳孫兩家也書首取劉因與傳選合而壓卷亦取黃金臺一篇宜乎後世汲古之家或疑與傳選同科而略其傳述歟今計劉因以下至

二十七卷止凡八十五家人不逮傅孫兩家之半而甄錄之詩幾倍之故傅孫於諸大家所錄寥寥此則選擇古體較爲詳審卽同錄一人一題之詩題目字句各不相侔如胡汲仲題女直驄馬圖孫本題字下多崔錄事三字虞集李伯時九歌圖傅本無李伯時三字送星上人歸湘中傅本無歸湘中三字柳貫和袁集賢上都雜詩傅本和字上有同楊仲宏應舉六字諸如此類不可勝舉其餘字句如揭傒斯送淳直子朝發扶桑國傅改扶桑作梁宋吳師道黃金臺千里風塵馳駿馬孫改風塵作強燕銅雀臺漢家一片

當時士孫改當時作如膏蓋當日隨抄所得而又出于各人點竄不可拘于一律至于每人篇尾各著事寔此則較傅孫兩家爲勝存之足以資考證之助末三卷分雜編亦與彼選體例略同錢大昕著元史藝文志旣載易著而復載元風雅八卷注云無撰人名或云宋娶至于傅孫兩家所撰別爲元詩前後集不知何所據也

臨河視觀出

西元宋寧王于新嘉南宮視觀命武將前禁禁不
主志強強以苦而強強以苦而強強以苦而強強以苦而強
三德公強強以苦而強強以苦而強強以苦而強強以苦而強
強強以苦而強強以苦而強強以苦而強強以苦而強強以苦而強
上各人強強以苦而強強以苦而強強以苦而強強以苦而強
強強以苦而強強以苦而強強以苦而強強以苦而強強以苦而強

擘經室外集卷五

東臯詩集五卷提要

元馬玉麟撰按玉麟吳陵樊川人仕元官叅知政事著有詩集五卷嘗自號東臯道人故名其稿曰東臯漫稿云此編成于元至正間當時周伯琦王宗堯皆爲之序玉麟當元之末季仕宦顯要乃能耽工吟咏時出清言且又惕事感時借抒經濟今閱其古今體詩率皆婉麗暢達可謂有關於名教有裨于諷諫者矣卷末附錄東臯先生傳一首係洪武中王遜所作記其生平行事甚詳

周易新講義十卷提要

宋龔原撰原字深甫遂昌人少與陸佃同師王安石進士高第元豐中爲國子直講官至寶文閣待制事蹟詳宋史本傳宋藝文志稱原著易傳十卷續解易義十七卷朱彝尊尊經義考則云未見東都事略傳原著有易傳春秋解論語孟子解各十卷并載有鄒浩一序按所云易傳疑卽是書晁氏讀書志云宋王安石石三經義當時俱頒學宮獨易解以爲少作未善不專以取士故紹聖後又有龔原耿南仲註易並行場屋考之宋楊時之說曰龔原本王學一派其人其書

似無足取惟宋時古笈傳世絕少而此書完善猶存
李衡義海撮要李簡學易記趙汝梅筮宗多取其說
且耿南仲書已收

四庫茲編續出亦未可偏廢矣

通紀七卷續五卷提要

唐馬總撰總有意林

四庫全書已著錄史稱總篤學雖吏事倥傯書不去
前所著有年厯通厯行於世此書起自太古訖于隋
季共十卷中間厯代之事粗陳其槩展帙瞭然後荆
南孫光憲者復輯全唐洎五代事蹟十卷以續總所

紀率多未寔今自十一卷唐高祖起閩王審知止係
孫氏所續然宋時卽僅存其五卷矣晁氏讀書志云
總書纂太古十七氏中古五帝三王及刪取秦漢至
隋世紀興滅又取虞世南略論分系于末今書中自
四卷至十卷有公子曰先生曰者當卽世南之略論
也惜前三卷已闕無從補錄王海所傳齊推序更無
可考矣蓋總以史籍繁蕪故上索典墳迄于隋季以
簡暢之筆成茲一編事簡而明辭約而該亦讀史者
所不廢也

諸葛武侯傳一卷提要

宋張栻撰栻有南軒易傳

四庫全書已著錄此傳不載南軒文集乃從宋刊單行本影寫其闡發武侯生平考證極確自陳壽作三國志尊魏斥蜀使後世莫明正僞且言武侯志大而短于用司馬光作通鑑朱子作綱目乃正其非栻更撫拾舊聞成此一卷具明才學過于管樂稱其有正大之體且傳中述前後出師表與今所傳字句間有異同其後跋云徵自文獻不敢存疑則其所見詳明必有古書足據矣

離騷集傳一卷提要

宋錢杲之撰杲之晉陵人所註離騷集傳一卷見宋史藝文志楚辭類杲之以爲古詩有節有章賦則有節無章乃分離騷三百七十三句爲十四節其名爲集傳者以王叔師曾有離騷注解杲之不敢同于王註也然其註旁採爾雅本草淮南子山海經等書其旨一稟於叔師惟不解昭明置騷於詩後之意遂認騷爲賦未免隅見錢曾讀書敏求記中稱之如此此冊借宋板影抄得之

策要六卷提要

元梁寅撰寅有周易叅議

四庫全書已著錄其門人黎卓序其文集云尙有方策稽要曾鉉梓行世卽此書也寅于諸經皆有訓釋史學亦頗考究是書元元本本能撮其要領宜爲學者所重耳

慎齋集四卷提要

明蔣主忠撰按主忠字存恕儀真人與兄主孝皆以詩名時稱景泰十才子者主忠其一也是集共四卷詞旨清逸致爲可誦考之朱彝尊所著明詩綜曾錄其芙蓉一絕句而此編古今各體計得二百八十餘首已爲全稿無疑矣

詩義指南一卷提要

宋段昌武撰昌武字子武廬陵人官朝奉郎是編諸家目錄均未收錄惟見朱彝尊經義考昌武又有叢桂毛詩集解讀詩總說二書此冊彝尊謂爲舉業發題而作自關雎以至鳬鷖或取詩中一章一節發其義語簡而深義約而盡自篤公劉以下惜未之及耳

增廣鐘鼎篆韻七卷提要

元楊鉤撰鉤字信文臨江人政和中王楚始作鐘鼎篆韻薛尚功已重廣之鉤又博采金石奇古之蹟益以奉符黨氏韻增補兩家所未備其篆則夏商周秦

之篆而以象形奇字終之自珣戈鈎帶以及碑刻古
篆莫不畢載馮子政序稱三代禮樂之古文奇字盡
在是矣洵不誣也又云自唐開元時以隸楷易漢本
尚書而學者自此不識古文是書參訂博采使古文
奇字列列在目可與薛氏書輔翼而行卷末有洪熙
侯書籍印蓋明時本也

王峯志三卷王峰續志一卷提要

宋凌萬頃邊實同撰萬頃字叔度景定三年進士本
陽羨人因其父壻於崑山顏氏因家焉邊實陳畱人
其高祖始遷崑山詳前志邊惇德傳而續志又復爲

自序一篇誇其家世王峰本崑山地宋南渡時始析爲縣卽今之嘉定是也志中所載沿革風俗以及人物古蹟甚悉宋元時崑山志乘世不多得是冊足備一方之文獻也

長春子遊記二卷提要

元李志常撰是編志常記其師邱處機西遊事蹟孫錫序云凡山川道里之險易水土風氣之差殊與夫衣服飲食百果草木禽蟲之別靡不畢載卷末附錄則載當時詔勅等篇處機字通密又號長春子棲霞人自幼住蟠溪龍門者十有三年金大定時曾自終

南召令赴闕賜以巾冠待詔天長觀後放還山及元
太祖時常召至雪山之陽眷渥倍至後復居燕之天
長觀年八十餘著有礪溪集六卷此冊所載足資考
證卽處機各詩亦清真平淡多可誦云

軒轅黃帝傳一卷提要

不著撰人名氏見錢曾讀書敏求記傳記類曾于是
編之前載有廣黃帝本行記一卷亦無著書人姓氏
案注中引劉恕外紀蜀檣杙等書蜀檣杙爲張唐英
所著則此卷當是南宋人手筆書中備載黃帝顓末
及其子孫唐虞三代相承世數甚悉可補皇王大紀

之闕

養正圖解全卷提要

明焦竑撰竑有易筌

四庫全書已著錄是編見黃虞稷千頃堂書目萬厯間竑以修撰爲皇子講官編此進之書中備採前言往行可爲則倣者繪之於圖而詳爲之說卷首有竑自序及祝世祿序稱此書繪圖爲丁雲鵬書解爲吳繼序並一時知名之士也

尉繚子直解五卷提要

尉繚子

四庫全書已著錄直解明劉寅撰寅所撰書皆名直解凡六種見林泉筆記此則六書中之一耳每篇下各有小序發明其義注中所論多精審處如注威戰篇妙勝之論云卽孫子所謂未戰而妙算勝者得算多也于受命之論云卽太公論立將之義于踰垠之論云卽太公所謂越江河渡溝塹之義寅以兵家言注兵書猶儒者之以經注經也惟于天官篇刑德之說而不用淮南子天文訓凡用太陰左前刑右背德及兵略訓注刑謂十二辰德十日之語又將理篇云壻父曰婚女父曰姻而不引爾雅壻之父爲姻婦之

父爲婚未足爲據然瑕瑜不相掩也

關尹子言外經旨三卷提要

關尹子

四庫全書已著錄言外經旨宋陳顯微撰同時王夷
鋟而傳之者顯微序云關尹一書莊列不能言文程
不能道其言簡其義詳似爲道德經作傳案是編分
上中下三卷自一字以至九藥莫不詳注而發明之
王夷所謂因言悉旨轉語明經設喻以彰元反辭而
顯奧或指意于言前或顯微於意外也尹喜書本屬
依託之冊然在偽書中頗有理致顯微經旨吐屬亦

復淵雅可謂質有其文

爲政善報十卷提要

宋葉畱撰畱字景良括蒼人是編見浙江通志本傳
凡十卷此其前編也其書採取經史各說以及當時
宦蹟錄其功在生民慶畱後裔者以成一編意取於
官師相規以爲有位者勸用意忠厚考證精詳殊不
多見同時陳相爲注其出處此從元人刻本過錄惜
後編已佚之矣

東漢文鑑二十卷提要

宋陳鑑編鑑建安人自稱石壁野人殆南宋遺民歟

是編自光武迄獻帝凡九朝大半采從本傳共得文二百三十餘篇宋史藝文志不載惟明人百川書志千頃堂書目絳雲樓書目並載有宋陳鑑西漢文鑑東漢文鑑而東漢文鑑誤作十九卷又天一閣書目亦載此書乃明刻本此從宋巾箱冊錄之以存一代之藝文焉

道德經論兵要義四卷提要

二冊

唐王真撰案真此書獨取道德經所論兵戰之要撫拾元微本上下二卷後更分爲四卷與鄭樵通志所載卷數合元和間進之于朝唐憲宗嘗手詔褒美之

具載篇首老子道德經五千言備舉大道至德修身
理國之要數十章後乃言及于用兵其旨微其言博
自河上公爲之訓釋後若嚴氏指歸開元注釋固已
發蘊指微而真所著要義獨于論兵之法經悉言之
夫真以朝議郎出領漢州軍事久列戎行而考其談
兵意指顧深求乎老子之說唐人之書不多是宜錄
也

遺山樂府五卷提要

金元好問撰好問有續夷堅志

四庫全書已著錄伏讀

御定歷代詩餘載詞人姓氏云遺山樂府錢唐淩雲翰編輯是編從舊鈔本依樣過錄無雲翰姓氏疑轉寫者誤脫耳案錦機集云僧李菩薩灑酒作花開牡丹二株遺山爲賦滿庭芳傳誦一時是作今載集中張炎偁其詞深于用事精于鍊句風流蘊藉不減周秦合觀諸作良非虛美也

招捕總錄一卷提要

不著撰人名氏是編藏書家未著錄蓋佚已久矣此從舊鈔依樣影寫所記元代招捕事宜起于世祖至元迄于英宗至治案卷末云招捕不止此是惟取其

人名地名及事與序相干者入注中分二十九種其事多不見於正史而寔有關於正史雖篇秩無多而敘述典核彌足爲信是亦罕覩之秘笈矣

詩義集說四卷提要

明孫鼎撰鼎字宜鉉廬陵人永樂中領鄉薦任松江教授擢監察御史提督南畿學政是編凡四卷蓋采取解頤指要發揮矜式等書擇其新義彙爲一編仍分總論章旨節旨各類展帙釐然頗屬精備其中所引如彭奇詩經主意曹居貞詩義發揮朱彝尊則云未見謝升孫詩經斷法則云已佚考之黃虞稷千頃

堂書目知是書成於正統十二年經義考曾列此書而注云未見此則從原刻影鈔惜其序文已佚耳

唐陸宣公奏議註十五卷提要

唐陸贄撰贄有翰苑集

四庫全書已著錄是編惟有奏議宋郎煜注煜事蹟無考卷首載經進奏議表銜題迪功郎紹興府嵊縣主簿煜又註東坡文集事畧題銜與此相同此編所註惟採經史爲多無泛搜博引之失不特選擇得當節錄亦多精審使讀者易見端倪茲從元至正甲午翠巖精舍重刊宋本影寫亦讀史者所不廢也

雲間志三卷提要

宋楊潛撰見宋史藝文志按雲間卽今江南之華亭縣在宋時兼今松江全郡之地此志體例繁簡得中不讓宋人會稽新安諸志書成于紹熙四年而知縣題名載至淳祐八年而止則張穎以下三十人是後人所續又進士題名載至寶祐元年姚勉榜錢拱之而止則慶元五年趙汝詒以下二十四人亦後人續入也又載樓鑰等記並爲後人所增考之元徐碩至元嘉禾志華亭一縣全取是書中語知潛此志爲當時所重矣

司馬法直解一卷提要

明劉寅撰寅有三略直解

四庫全書已著錄寅作直解共六種見張綸林泉筆記司馬法亦六書中之一也寅自序云是書言辭古簡而義深中間又有闕文誤字儒家多不經意學者由是不得其說今姑爲之直解其言非無所見而又能不忘改古書舊字如仁本篇會之以發禁者九註云發當作法卽周禮大司馬九伐之法也定爵篇變嫌推疑註云變當作辨辨別人之所嫌也又是謂兩之註云之當作支謂兩相支持之道用衆篇因其不

避註云避當作備因其不備卽所謂乘其無備也又註仁本篇正不獲意則權云正者萬世之常權者一時之用湯武仁義之兵而濟之以權者尤爲切實近理之言矣

楊氏算法三卷提要

宋楊輝撰錢塘人是書成於德祐間分田畝比類乘除捷法及算法通變本末爲上卷乘除通變算法爲中卷算法取用本末爲下卷末附續古摘奇於古算經若五曹張邱建諸家多疏通而證明之如張邱建云不患乘除爲難而患分子母爲難則云分子母有

二本不爲難較其多寡者則用課分均不齊之數者則用平分斤連銖兩匹帶尺寸非乘分除分不能治之又於五曹算經亦多正其誤答之處與秦九韶數學九章並爲習算術者之所宜究心者也

松窗百說一卷提要

宋李季可撰季可永嘉人撫拾古今事實而各爲論說凡百條王十朋極稱賞之謂其有益風教比於唐之杜牧紹興年間尹大任爲之付梓攷之志乘及各藏書家均未著錄書中直書所見以采摭經史爲文據正排異爲意同時如葉謙曾幾趙居廣諸人均有

題跋此從舊鈔影寫

續墨客揮犀十卷提要

宋彭乘撰乘有墨客揮犀十卷

四庫全書已著錄此其續編也宋陳振孫書錄解題則前續二編俱載共二十卷而不著撰人姓氏明商維濟刻稗海題彭乘之作蓋以書中所自稱名爲據卷中所載軼事遺聞以及詩話文評徵引頗爲詳洽足補前編之所未備其所議論多推重蘇黃亦與前集相同合之以爲完書

陶靖節詩註四卷提要

宋湯漢撰漢字伯紀鄱陽人淳祐間充史館校書官
至端明殿學士謚文清人品爲真德秀所重事蹟具
宋史本傳淵明詩文高妙學者未易窺測漢乃反覆
研究如述酒之作讀者幾不省爲何語漢云窺見其
指詳加箋釋以及他篇有宜發明者亦併著之清言
微旨抉出無遺馬端臨文獻通考以爲淵明異代之
知己其所稱說多與世本不同如擬古詩聞有田子
泰句魏志作泰今本多僞爲田子春惟此與魏志無
異其他佳處尤不勝指此從宋槧影寫誠秘笈也

貞一齋詩文藁二卷提要

元朱思本撰思本字本初豫章臨川人常學道于龍
虎山中貞一其號云顧嗣立元詩四集稱思本嘗從
吳全節居都下博洽文雅見稱於時所著詩文稿世
無刻本僅存范梈劉有慶歐陽應丙虞集柳貫及全
節六序俱諸人手書藏吳中劉損抑夫家此本乃叢
書堂吳寬手鈔凡二卷上卷爲雜著文下卷則古近
各體詩思本好學遠遊遍歷名山大川幾半天下嘗
以昔人所刻禹迹圖混一六合郡邑圖皆有乖謬乃
叅閱郡縣九域一統等志攷訂古今校量遠近成輿
地圖一書計里開方之法至思本而始備今文稿內


有輿地圖自序一篇可証也大約思本之學地理爲長也

輿地紀勝二百卷提要

宋王象之撰

四庫未著錄惟有輿地碑記四卷云象之金華人嘗知江寧縣所著有輿地紀勝二百卷今未見傳本此卽其中之四卷今于江南得影宋抄本二百卷前有象之自序象之東陽人略云余披括天下地理之書參訂會粹每郡自爲一編以郡之因革見之編首而諸邑次之以及山川人物詩章文翰皆附見焉東南

十六路則倣范蔚宗郡國志條例以在所爲首而西北諸郡亦次第編集今考其成書之年在南宋嘉定十四年故其所指在所以臨安府爲首而一切沿革亦準是時又宮闕殿門壽康宮下引朝野雜記云寧宗始受禪云云則是作序在嘉定全書之成又在理宗時矣是書自卷一行在所起至劍門軍訖共府廿五軍卅四州一百零六監一其府軍州監一百六十六內或有一府一軍而分爲上下二卷故與總數不合其卷數全闕者自十三至十六又自五十至五十四又自一百卅六至一百四十四又自一百六十八



<p>卷一百一十五</p> <p>五十五</p>	<p>五十五</p>	<p>五十五</p>	<p>五十五</p>	<p>五十五</p>
--------------------------	------------	------------	------------	------------

